



Bodleian Libraries

UNIVERSITY OF OXFORD

This book is part of the collection held by the Bodleian Libraries and scanned by Google, Inc. for the Google Books Library Project.

For more information see:

<http://www.bodleian.ox.ac.uk/dbooks>



This work is licensed under a Creative Commons Attribution-NonCommercial-ShareAlike 2.0 UK: England & Wales (CC BY-NC-SA 2.0) licence.




~~NS. 12 a. Per. IV 10/3~~



REP. F. 9697(3)

~~A/P 3140 A. 4~~




~~NS. 12 a. Per. IV 10/3~~



REP. F. 9697(3)

~~A/P 3140 A. 4~~





SOCIÉTÉ
DES
ANCIENS TEXTES FRANÇAIS
—
MIRACLES DE NOSTRE DAME
—

MIRACLES
DE
NOSTRE DAME

PAR PERSONNAGES

PUBLIÉS D'APRÈS LE MANUSCRIT DE LA BIBLIOTHÈQUE NATIONALE

PAR

GASTON PARIS & ULYSSE ROBERT

TOME III



PARIS
LIBRAIRIE DE FIRMIN DIDOT ET C^{ie}
56, RUE JACOB, 56

M DCCC LXXVIII

... ..
... ..
... ..
... ..
... ..

Commissionnaire responsable :
M. MICHELANT.



XVII



MIRACLE

DE

UN PARROISSIAN ESCONMENIÉ



Publication proposée à la Société le 24 février 1876.
Approuvée par le Conseil le 9 mars 1876 sur le rapport d'une commission composée de MM. Meyer, Michelant et de Queux de Saint-Hilaire.

Commissaire responsable :

M. MICHELANT.



XVII



MIRACLE

DE

UN PARROISSIAN ESCONMENIÉ



PERSONNAGES

LE FILS DE L'EMPEREUR
PREMIER CURÉ
GODART
L'ERMITE
LE CLERC
PREMIER COMPAIGNON
SECOND COMPAIGNON
NOSTRE DAME
RAPHAEL
GABRIEL
SECOND CURÉ
SECOND CLERC
LE TENANCIER
SAINT JEHAN

*Cy commence un miracle de Nostre Dame d'un
parroissian esconmenié que Nostre Dame absolu
a la requeste du bon fol d'Alixandrie. 179 a*

LE FILZ DE L'EMPEREUR

GLORIEUX Dieu, souverain pére,
Tant dolereusement se pére
Qui d'orgueilleux mondains tresors
Plains d'excès tresvilz et tresors
Desire paremens avoir : 5
Car richesse de tel avoir
N'est fors qu'apovrissement d'ame.
Si grant seigneur ne si grant dame
N'a ou mondain terrien estre
Dont l'ame sauvée puist estre 10
Se le corps martire ne sent
Et a penanse ne s'assent.
Elas ! mal suis appareilliez
Pour mon ame et mal conseilliez,
Quant je voy et puis bien entendre 15
Que j'é plus désiré atendre
Aus biens de richesses mortelles
Que aux grans joies perpetuelles.
Mort m'a pére et mère tolu :
Richesce n'y a riens valu, 20
Et bien sçay que morir me fault

Aussi : si seroit grant deffault
 A moy se la char et le monde
 Et l'ennemy faulx et inmonde 179 b
 25 Pour l'amour de Dieu ne laissez.
 Jamais tant comme vif je soie,
 Regne n'heritage tenir
 Ne quier, combien qu'appartenir
 Me devroit Alixandre toute.
 30 En telz honneurs n'a fors que doute,
 Oultrageux orgueilz et desrois.
 Des papes, des princes, des roys
 Mort mort les chars a si grans mors
 Qu'il m'est avis que soie mors.
 35 Mettré paine de conseil querre
 A la vie sanz fin conquerre :
 Jamais d'aler ne cesseray
 Jusques a tant que je seray,
 Se Dieu plaist qui touz les biens donne,
 40 Par aucune sainte personne
 Conseilliez d'amender ma vie :
 D'autre richesce n'ay envie.
 Cerchier m'en vois tant près et loing
 Qu'aie conseil de mon besoin ;
 45 Et li vrais Diex le me consente !
 Pour miex aler de ceste sente
 Tendray l'adresse.

PREMIER CURÉ

Se li vraiz Diex qui tout adresce
 Mon parroissien ne remort,
 50 Qui me het jusques a la mort
 Pour ses meffaiz qu'en li desprise,
 S'ame des ennemis sousprise
 Sera, s'il persevere ainsi
 En sa rancune, sanz mercy

XVII	UN PARROISSIAN ESCONMENIÉ	5
	A Dieu requerre et puis a moy.	55
	Moult pensis ça venir le voy,	
	Ce m'est avis, vers mon rencontre :	
	A celle fin que je l'encontre	
	Par cy li iray au devant.	
	Godart, amis, venez avant.	60
	Comment avez cuer d'ainsi vivre	
179 c	En rancune, de quoy delivre	
	Ne vous puis envers moy trouver ?	
	Par pluseurs foiz de moy grever	
	Vous estes a tort efforcié,	65
	Dont j'ay eu cuer courroucié	
	Et ay encor, car grant offense	
	Est a vous quant riens la sentence	
	De sainte eglise ne doubtez.	
	Se vers moy ne vous amendez,	70
	Mal fait sera.	
	GODART	
	Sire prestre, que me fera	
	Vostre haine, je vous en pri ?	
	Se jamais n'avoie l'ottri	
	De vostre amour jour de ma vie,	75
	Je n'y compteroie une alie ;	
	Ne de vostre esconmenient	
	N'aconte je mie granment,	
	Car je n'en vi onques faillir	
	Les poz a mon feu de boullir,	80
	N'onques le vin dessus ma table	
	N'en fu pieur ne plus coustable.	
	Bien me doy petit esbahir	
	Se vous m'avez pris a hair :	
	Vous en pourrez bien tant parler	85
	Que sur la teste, au paraler,	
	En arcz a po de promesse.	
	Alez, si chantez vostre messe :	

Miex vous vaudra.

PREMIER CURÉ

90 Par Dieu, l'eure et le temps venra,
S'autrement n'avez repentance,
Qu'encores griève penitence
En arez a mort ou a vie.
Car c'est sanz cause desservie
95 Que me haiez.

GODART

De ce ja ne vous esmaiez :
J'en saray bien vers Dieu chevir,
Car de vostre amour desservir 179 d
N'ay voulenté.

PREMIER CURÉ

100 De felonnie entalenté
Vous voy si de cuer et de vois
Que je vous lais, et si m'en vois
D'une autre part.

LE FIL D'EMPERÉRE

105 Dieu, qui touz biens donne et depart,
Par sa grace m'a tant mené
C'on m'a appris et assené
D'un saint hermite le repaire
Qui ça en un desert repaire
En vivant de vie angelique
110 Selon ferme foy catholique.
Je ne me puis miex conseiller
Qu'au conseil d'un tel conseiller,
Puis qu'il het du monde l'atour.
Je croy que là en ce destour
115 Vers celle logette petite
Soit le droit lieu ou il habite :
Adressier m'y vueil sanz desvoy.
Car avis m'est que je le voy,

Selon ce qu'on m'a endité
 Son samblant plain d'umilité. 120
 Saluer le vois de cuer fin.

Sains homs, li vrais péres sans fin
 Vous doint vraie perseverance
 Ou labour de vraie esperance
 Tandant a vie pardurable ! 125

Sire, de voie aventurable
 Sui cy arrivé par endites,
 Car si bonnes nouvelles dites
 M'ont esté de vous que tracié
 Ay tant que g'y suy adressié, 130
 Grace Dieu, dont je suis moult liez,
 Afin que vous me conseilliez,
 Dont j'ay grant besoing neccessaire:
 Si ne vous vueille pas désplaire

180 a - De moy oir. 135

L'ERMITE

Amis, Dieu vueille resjoir
 Ton cuer, s'il est en desconfort.
 Se donner te puis reconfort,
 Moult volentiers le te donray
 Au miex que faire le pourray 140
 Benignement.

LE FILZ D'EMPERIÈRE

Sire, de tout le tenement
 D'Alixandre suis sire et roys;
 Mais pour les orgueilleux desrois
 Du monde, que morir convient, 145
 Des biens mondains ne me souvient
 Ne de royauté terrienne:
 Car c'est joie trop aliene,
 Que mors mort de morsure amère.
 La mort m'a tolu pére et mère 150
 Que j'amoie par grant chierté :

Honneur, richesse ne fierté
 N'i ont peu mettre respit.
 C'est ce qui tenir en despit
 155 Me fait le monde et ma contrée,
 Car fuir ne puis l'encontrée
 De la mort par nesune voie
 Si est le meilleur que g'y voie
 De touz terriens heritages
 160 Guerpir, car de telz habitages
 A mainte ame male merite :
 Si vault miex que m'en desherite
 Et relenquisse telz deliz,
 165 Que de viandes et de liz,
 De noblesces et de repos,
 Ma char norrisse en tel propos
 Que m'ame en souffrist mort grevaine
 Car tant hé celle joie vaine
 Et tant l'ay au cuer desplaisant
 170 Qu'aler le fol contrefaisant
 Vueil en povreté, nuz et las,
 Sanz penser aus mondains solas, 180 b
 Traveillier, pener et despire
 Ma charongne, si qu'adès pire
 175 Li soit demain que le jour d'uy ;
 Et souffreray en gré le huy
 Du peuple et l'escharnissement,
 Et touzjours abelissement
 Aray a tel vie souffrir
 180 Pour moy a tel travail offrir
 Que nulz, tant me regart ou vis,
 N'ait de moy recongnoistre avis.
 Si vous pri, sains homs gracieus,
 Ou nom du vray Dieu precieux,
 185 Me conseiliez de cest affaire,
 Si que je ne mesprengne a faire
 Le Dieu plaisir.

L'ERMITE

Amis, quant tu as tel desir
 Que ton cueur a ce s'humilie,
 Tu feras plus sens que folie, 190
 Se le fol par desconnoissance
 Fais ou lieu ou preis naiscence
 Afin que nulz ne t'aperçoive,
 Mais que pechié ne te deçoive.
 Dieu, qui toi bien appercevra, 195
 La foleur pour sens recevra
 Que tu feras par ficcion,
 En fuiant la decepcion
 Qui est es fausses vanitez
 Des temptables humanitez. 200
 Faindre estre folz et conme sages
 En Dieu et en ses sains messages
 Qui sont lumière de dottrine,
 C'est usages qui endottrine
 Maint cuer de celer et couvrir 205
 Sa penance au monde, et ouvrir
 Son cuer a Dieu par oroison.
 Se tu le fais sur tel raison,
 Diex, qui sur touz est rois possibles,
 Ta foleur pour euvres sensibles 210
 Aceptera, je te plevis.
 En ton lieu près de tes amis
 Le feras bien.

LE FIL D'EMPERIÉRE

Sire, quant presumer pour bien
 Me voulez ceste paciance, 215
 Se je le fas par diligence,
 Je la feray de cuer constrict
 Pour plus tost en avoir destruit
 Mes vanitez et mes pechiez,
 Si que mains en soie entechiez 220
 Et miex aie salvacion.

Sire, pour consolacion
 Avoir de vous et remembrance,
 Se doubte avoie d'encombrance
 225 Par temptement de vaine gloire
 Qui m'assaillist de faulx memoire,
 Beneïçon, se vous voulez,
 Me donnez et si m'assoulez.
 Car je vueil de vous congié prendre
 230 Pour les euvres aler entreprendre
 Qu'ay divisé.

HERMITE

Amis, tu feras qu'avisé :
 Dieu ne t'en tendra pas pour fol.
 De Dieu te benis et absol
 235 Et du pouoir qui m'est commis.
 Or va a Dieu, biau doulx amis,
 Et prie pour moy, s'il te plest,
 Car es prières de moy est
 Et sera ton fait nuit et jour.
 240 A nostre dame sanz sejour
 Tien ton cuer ferme.

LE FIL D'EMPERIÈRE

Sire, je li rens et afferme,
 Et souvent prieray pour vous.
 A Dieu, sains homs, devot et dous!
 245 Ne cesseray pour riens qu'aviengne
 De cy qu'en Alixandre viengne : 180 d
 Tout droit iray par ce sentier.
 Mais se g'y suis, drappel entier
 Sur moy de linge ne de lange
 250 Ne laisseray que je ne change
 Et que ne mette du tout jus ;
 Ne jamais ne vestiray plus
 Qu'une cotelle descousue
 Et descirée et desrompue,

Ou que je la doie cerchier ; 255
 Ne de mes amis approuchier
 Ne quier par congnoissance mais,
 Ne menger delicieux mès,
 Fors pain et yaue, si j'en ay,
 N'en lit de plume ne gerray. 260

Hé! glorieux pére celestre,
 Tant ay cheminé qu'en mon estre
 Suis arrivez : graces t'en rens.
 Mucier m'en vois en sus des rens
 De ma lignée. 265

PREMIER CURÉ

Moult a cruauté engaignée
 Et felonnie ou cuer par my
 Mon parroissien, qui amy
 Ne veult envers moy devenir. 270
 Je le voy aler et venir
 Aussi que de mautalant plain.
 A Dieu propre de li me plain,
 Quant de soy amender n'a cure
 A ce que conscience cure
 Son cuer, n'espurge de l'oustrage 275
 Dont il a si plain le courage
 Que retraire ne se peut d'ire.
 Encor li vois une foiz dire,
 Savoir s'il se convertiroit
 Et s'aucun parler me diroit 280
 A satisfacion tendant.

Godart, biaux amis, entendant
 Te fas qu'a t'ame trop mesprens
 De ce qu'amendement ne prens

285 En toy ne redargucion
 De la fole introduccion
 Du fier orgueil ou tu te lies
 Si fort qu'onques ne t'umilies
 Ne n'amolis n'en diz n'en faiz.
 290 Se bien savoies que tu fais
 Et le peril ou t'ame embaz,
 Joie n'aroies ny esbas
 Tant qu'a genoulz m'aroies cy
 A jointes mains crié mercy.
 295 Tu scés bien qu'envers moy tenuz
 Es, et comment t'es maintenuz
 En rigueur d'orgueil paroutré
 Toutes foiz que je t'ay monstré
 Les offenses et les pechiez
 300 Dont surpris es et entechiez,
 Si que tu viz, a voir retraire,
 Conme personne a Dieu contraire.
 A t'en aviser plus n'oblie :
 N'atens pas tant que je publie
 305 Sentence n'entredit sur toy ;
 Requier mercy par bon chastoy
 A sainte eglise.
 GODART
 Se saviez combien je prise
 Voz paroles et voz favelles,
 310 Jamais jour de telles nouvelles
 Ne me venriez faveler.
 Il semble que renouveler
 Veuillez la noise et le decort
 Pour esveillier le chat qui dort.
 315 Se plus en parlés tant ne quant,
 Vous ne vous donrez garde quant
 Sur la coronne si ataindre
 Vous sentirez qu'en cler sanc taindre
 La vous feray jusques au front.

181 b

Sire prestre, quelle enseigne ont
 Ceulx qu'esconmenier voulez 320
 Plus que ceulz que vous absolvez ?
 Je ne daingneroye resoldre
 D'esconmenier ne d'absoldre
 Que puissés faire une senelle. 325
 Po s'en fault que telle prunelle
 De ce coustel cy ne vous baille
 Que sur vous en parroit la taille
 Se viviez jusque a cent ans ;
 Et fussiez prestre telz cent tans, 330
 Gardez que ne diez plus mot ;
 Car se ne fust pour ce c'on m'ot,
 Bien vous batisse.

PREMIER PRESTRE.

Mal seroit que je m'embatisse
 Plus entour toy par nulle voie : 335
 Le meilleur conseil que g'i voie
 C'est que je me sueffre et m'en voise,
 Car il n'a que peril et noise
 En toy, et parole ennemie :
 Tout le courage te fremie 340
 En mauvais moz que tu desclos.
 L'ennemy est en toy enclos ;
 Si ne te quier approuchier plus.
 Meffait m'as, a briez moz conclus ;
 Dont en mon corage rapel 345
 Et t'en denonce par appel
 Esconmenie de sentence
 De canon. Je m'en vois. Or tence
 A ton desir.

GODART

Par Dieu, prestre, souvent desir 350
 Que trouver vous puisse a mon vueil ;
 Car cy endroit ce que je vueil
 Ne puis pas faire a mon talent ;

355 Mais du cuer vous feray dolent,
Qui qu'il soit grief.

PREMIER CURÉ

Je n'ay terme fors qu'assez brief
D'un voiage que j'ay promis
A saint Jaques pour mes amis. 181c
Temps est qu'a la voie me mette
360 Et que d'errer tost m'entremette;
Car j'ay ou cuer devot courage
D'acomplir mon pelerinage.
Dire vois a mon clerc Lorin
Qu'estre me convient pelerin.
365 Lorin, biaux amis, vien avant.
De garder l'eglise entendant
Te pri que soies nuit et jour,
Car aler me fault sanz sejour
En pelerinage a saint Jaques;
370 Mais je revenray dedanz Pasques,
Se Dieu plaist a qui je m'atens.
Partir m'en estuet; il est temps,
Quant j'ay pris escharpe et bourdon.
Mes biens met touz en ton bandon
375 Et te mez a garder mon lieu.
Or pense de bien faire. A Dieu!
Mouvoir me fault.

LE CLERC

Certes, chier sires, sans deffault
Moult volentiers y entendray,
380 Et près du moustier me tendray
Jusqu'a tant que vous reveigniez,
Du vray Dieu soiez vous seigniez
Qui vous ramaint!

LE PRESTRE *en alant*

385 J'ay enduré de courrouz maint
Pour mon parroissien que voy,

Qui tant me het, ne scé pour quoy,
 Dont contre moy en sentence est
 Sanz estre absolz. Il m'en desplaist :
 Car mon aler et mon venir
 Est tout en Dieu a convenir ; 390
 Riens n'y sçay de mort ne de vie :
 S'en ce point trespasse et devie,
 Contre moy esconmeniez,
 En dampnement sera liez
 181 d Pour l'outrage de son buffoy. 395
 Bien est droiz, pour cause de foy,
 Qu'il m'en ennuit.

LE FIL COME FOL

Je perdi le dormir ennuit
 De songier qu'en estat d'avugle
 Chevauchois dessus un bugle 400
 Qui sans elle voloit au vent,
 Et me sembloit assez souvent
 Que ce devant aloit derrière
 Et qu'il me convenoit arrière
 Retourner la dont je venois. 405
 Mais le bugle que je menoie
 Regiboit si a chascun sault
 Qu'il m'en portoit vers un assault
 De gens cornuz a rouges testes
 Qui tenoient les gens pour bestes, 410
 Se ne fussent de genoulz deux
 Renouans et coupans par eulx
 Cornettes de viez chapperons,
 Et couvrans de viez napperons
 La fumée de leurs langages. 415
 La sailloient les povres gages
 D'un asne qui n'ot que menger,
 Qui m'a fait toute nuit songer

Trop grans babuses.

PREMIER COMPAGNON

420 Onques mais n'oy tant de ruses
 A fol dire qu'a celui la.
 Regardez quel maintien il a.
 Compains, se Dieu vous doint santé,
 N'a guères cy entour hanté.
 425 Ferir de ceste viez savate
 L'iray, et puis de plaine pate
 De boe le ferray ou dos.
 Se trouvasse une piessse d'os
 D'un pié de beuf ou de mouton,
 430 Aus jambes, en lieu d'un baston,
 Li ruasse après les talons.
 Je vous pri qu'après li alons,
 Et je l'assaudray tout devant.
 Coquibus, traiez vous avant :
 435 Retenez ce que je vous rue,
 Tenez, des dons de ceste rue.
 Gardez que je ne vous triquote.
 Ces savates a vostre cote
 Faites estachier sanz couper,
 440 Pour taconner et estouper
 Les troz d'entour, c'on vous emboe,
 Et si arez de ceste boe
 Une dossée par delez ;
 Et afin que plus tost alez
 445 Vous chauceray cel esperon
 Et cest os rungié environ.
 Se baston ne verge tenisse,
 Plus près de vous jouer venisse,
 Mais point n'en ay, si m'en desport.
 450 Dancier a un pié par deport
 En espringuant.

182 a

LE FOL

Il a d'Avignon jusqu'a Guant

Par nuit bien demie journée.
 Je vi quant ma mère fut née
 Qu'elle menoit les truies paistre 455
 Dedans le chapperon d'un prestre
 A heure de prime après hier.
 Je lo que je face un grenier
 De mes presens.

SECOND COMPAGNON

Cilz meschans soz yci presens 460
 Reçoit tant de cops et d'ordure
 Que je ne scé comment il dure.
 Compains, moult li avez fait honte.
 Quant je voy que point ne s'eshonte,
 Je li vois en sa cote mettre 465

182 b

Et atachier une viez lettre
 Par derrière d'un po de cire,
 Et si fault que je li descire
 Ou descouse les paletiaux.
 J'ay de croie fait deus morciaux 470
 Dont je le ferray par les flans,
 Si devendront ses chaillons blans.
 Maistre Bobus, ho! arrestez.
 Pour ce qu'a rebours vous vestez,
 Ceste lettre cy atachie 475
 Vous sera au dos et fichie
 A cire, pour ce c'on vous croie;
 Et sy arez de ceste croie
 Pour vous blanchir.

PREMIER COMPAGNON

Le chetif fol ne scet guenchir 480
 A meschance que l'en li face;
 Et si est si biaux homs de face
 Conme a merveille.

SECOND COMPAGNON

Je croy que partout se merveille
 Chascun qui le voit de son fait. 485

Assez de mal li avons fait;
Laissons le coy.

LE FOL

J'ay trop grant chaut, ne scé pour quoy :
C'est pour ce que je plour et ry.
490 Mon parrin avoit non Ferry,
Guillaume, Huart et Gautier :
En un jour m'aprist le sautier
En mangant féves au brouet.
Ceste cote fu a Drouet
495 C'om m'a mis en si bel attour.
Aler m'en vueil de cy entour
A mes trudaines.

NOSTRE DAME

Gabriel, va tost, si m'amaines,
Et toy, Raphael, mon bon prestre
500 Qui tout son temps a volu mettre
En moy servir com vraiz amis.
Finez est, si vueil qu'il soit mis
En vray repos.

ANGES

182 c

Dame, ainsi conme avez desclos
505 Le ferons sanz point de demeure.
Par nous sera cy tout en l'eure
Hors des griefs paines.

SECOND CURÉ

Il a ja plus de dix sepmaines
Que pour ma saisine exercer
510 De ceste eglise posséder,
Dont mon prelat m'a fait curé,
Tant ay devers li procuré,
Deusse cy avoir venu,

Quant Diex veult qu'il soit avenu
 Que le curé qui la tenoit 515
 Soit mors ainsi conme il venoit
 Devers saint Jasques en Galice.
 Preuzdoms estoit et sanz malice
 Vers nulle personne attenter.
 Aux parroissiens presenter 520
 Me vois; c'est raison et droiture,
 Se le clerc venist d'aventure,
 Moult volentiers parlasse a lui,
 Savoir mon s'il y a cellui
 Ne celle qui sache ne pense 525
 Des parroissiens en sentense.
 Venir le voy trop bien a point.

Clerc, que Dieu sa grace vous doint.
 Parlez a moy.

LE CLERC

Sire, que Dieux vous gart d'ennoy. 530
 Volentiers et améement
 Y parleray certainement
 Sanz contredit.

SECOND CURÉ

Clerc, savez vous homme entredit
 Ne femme de ceste parroisse ? 535
 Raison est que je les cognoisse :
 Si vous diray pour quelle guise.
 Curé m'a fait de ceste eglise
 L'evesque qui patron en est,
 Sienne mercy quant il li plaist. 540
 Il a plus de trois mois passez
 Qu'il scet de vray que trespassez
 Est cil qui la cure tenoit.
 Mors est ainsi qu'il revenoit
 De saint Jasque sanz nulle doubte. 545
 Or est ainsi que je me doubte

De mesprendre en aucun cas en ce
 Que gens qui soient en sentence
 Ne viengnent pour moy encombrer
 550 Quant messe devray celebrer,
 Si que moult volentiers vourroie
 Moy garder tant com je pourroie.
 Pour ce demandé le vous ay,
 Que par vous savoir le voulray
 555 Tout de certain.

LE CLERC

Sire, pour voir vous ascertain,
 Se bien seurement savoie
 Que trespassez fust en la voie
 De saint Jasques le bon preudons
 560 Qui tant faisoit pour Dieu de dons,
 Ce que j'en sçay vous en diroie.
 Mais volentiers vous prieroie
 Se de lui aloit autrement
 Que m'en deissiez plainement
 565 Vostre vouloir.

SECOND CURÉ

Certes, clerc, ne vous peut chaloir
 D'estre en doubte de ce propos;
 Car ce que vous dy et propos
 Est vray, j'en met la main au piz :
 570 S'en mentoie il m'en seroit pis.
 Si vous pri, s'entredit savez,
 N'en registre nulz en avez,
 Que je le sache.

LE CLERC

Mestier n'est, sire, que j'en sache
 575 Registre ne roule nesun.
 Je n'en say en tout le comun
 De ceste parroisse c'un seul,
 Qui mainte tristesse et maint deul
 Fist au curé en son vivant ;

Car souvent aloit estrivant 580
 Contre lui par malivolence,
 Et li fist mainte violence
 Et maint grief de fait et de monstre.
 Venir le voy. Je le vous monstre :
 C'est cestui qui de nous s'approuche. 585
 Mainte injurieuse reprouche
 Li dist a tort et maint contraire,
 Et oultre plus du coustel traire
 Et de l'en ferir fist maint esme,
 Qu'onc pour pasques ne pour quaresme 590
 N'en requist absolucion,
 Mais en sa dissolucion
 De plus en plus se paroustrait
 Quant le bon curé li monstroït
 Que s'en adreçast envers li ; 595
 N'onques son cuer n'en amoli,
 Ains a touzjours perseveré
 En son malice et demouré
 Esconmenié de canon.
 Il ne pourroit dire de non 600
 Par mot de voir.

SECOND CURÉ

Mauvaisement fist son devoir
 Quant il ne li cria mercy.
 En sainte eglise, ailleurs ne cy,
 N'est digne que se doie embatre. 605
 Deffendre moult bien et debatre
 Li saray s'entrer veult ceens,
 Ne mès qu'a mes parroissiens
 M'aie presenté cy endroit
 Conme curé conmis de droit 610
 A les avoir en cure d'ames.
 Or escoutez, seigneurs et dames :
 Je vous dy en face presente
 Que l'evesque a vous me presente

615 Conme curé que je doy estre
 De ceste eglise. Vezcy lettre
 Faite de la donnacion.
 Je suis de ceste nascion
 Et bien cogneu loing et près.
 620 Si vous requier par moz esprès
 Et enjoing sur obediencie
 Que nulz ne m'empesche audience
 A faire le divin office,
 Contredisant mon benefice.
 625 Quar se je voy que bien appére
 En vous, bon pastour et bon père
 Selon Dieu vous seray sanz faille.
 Or gardez qu'en vous ne deffaille,
 Et qu'exconmeniez ne viengne
 630 Ceens pour chose qui aviengne;
 Et priez touz sanz vain remors
 Pour mon devancier qui est mors
 En venant de saint Jasques ça.
 Bien a trois mois qu'il trespassa
 635 A Bisquarrel, ce n'est pas guille,
 Qui est de Navarre une ville.
 Dieu li doint gloire.

GODART

Egar, par le chief saint Magloire !
 Ravons nous un curé nouvel ?
 640 Sire, on doit faire grant revel
 De vous et de vostre venue,
 Qui nous faites cy souvenue
 Du curé qu'avoir solions.
 Se refuser vous volions
 645 Et chacier hors, qu'en seroit il ?
 Vous n'estes pas assez soubtil,
 Qui d'esconmeniez parlez.
 Un po estes trop emparlez,
 Quant ja nous avez menacié.

XVII	UN PARROISSIAN ESCONMENIÉ	23
	J'en ay l'autre prestre chacié	650
183 c	Par ses paroles.	
	SECOND CURÉ	
	Tu qui encontre moy paroles,	
	Es tu ce qui li pourchassas	
	Tant de maus, et le dechaças	
	Une foiz si honteusement,	655
	Main au coustel crueusement,	
	Par ta mauvaise felonnie ?	
	Se c'es tu qui tel villenie	
	Par ton oultrage li faisoies,	
	Je ne sçay comment tu osoies	660
	Estre entre gens.	
	GODART	
	Sire prestre, moult diligens	
	Estes de l'autre soustenir.	
	Que m'en pourroit il avenir	
	Se lui et vous batu avoie ?	665
	M'en convenroit il mettre a voie	
	D'aler a Rome ?	
	LE CLERC	
	Sire, onques mais de si fait homme	
	N'oy parler, a mon avis :	
	Hors du sens est, bien m'en avis.	670
	Sachez que pechié le conduit,	
	Et met en voie et en conduit	
	D'estre dampnez.	
	SECOND CURÉ	
	S'il ne s'amende, il fu mal nez :	
	Pechié tout mal en li a mis.	675
	Or entens un po, biaux amis,	
	Se tu veulx, si feras que sages.	
	Ton curé estoit li messages	
	Pour représenter a Dieu t'ame,	
	Et tu scez qui brise et entame	680
	Ce qu'il devoit garder entier	

D'avoir dommage est ou sentier.
 Tu scez bien que garder devoies
 Entière foy par toutes voies
 685 A cil qui la cure gardoit
 De t'ame, et qui bien regardoit *183 d*
 Qu'avoies felonnie amère
 Contre sainte eglise ta mère,
 Qui est sanz nulle decreance
 690 La fontaine de quoy creance
 Et foy te doit appartenir;
 Et quant posséder et tenir
 L'eglise a ton curé veoies,
 Pour quoy contre lui forveoies?
 695 Car tu dois savoir et veoir
 Que riens ne te peut pourveoir
 De la voie de sauvement,
 Fors l'eglise par sacrement
 Des mains de prestre celebré ;
 700 Et se de pechié encombré
 Te sens ou de sentense aucune,
 Et tu meurs en telle rancune
 Sanz estre repentant confès,
 A t'ame fault porter ton fès ;
 705 Car prestre jamais par nul tour
 Ne te donroit ton creatour
 Se vrais confès premier n'estoies ;
 Et s'autrement le recevoies
 Tu prendroies indignement
 710 Le corps Dieu a ton dampnement,
 Lequel don sainte eglise ordonne
 Que prestre soit qui le te donne.
 Or ne peuz tu avoir tel don,
 Se tu meurs : car onques pardon
 715 A ton curé ne requeris
 Des maulx qu'a li faire queris ;
 Ains est mors sanz qu'il t'ait absolz ;

Cil damages a droit resolz
 Ne te sera.

GODART

184 a Doulx roy celestre, que fera 720
 Ce pecheur desconforté?
 En moy n'a nul reconfort. Hé!
 Glorieuse vierge pucelle,
 Fille de Dieu, mère et ancelle,
 Qui voz deprians avoiez, 725
 Des yex de pitié me voiez,
 Ou se ce non par mon pechié
 Me semble ja qu'en enfer chié.
 Car vers mon curé tant meffait
 Me sens et en dit et en fait 730
 Qu'il n'est riens qui tant m'eust valu
 Conme s'il m'eust absolu.
 Nul autre conseil n'y sçay querre
 Que de ce pseudomme requerre
 Qu'il m'assoille et puis si me charge 735
 De penitence telle charge
 Qu'avoir puisse remission.
 Sire, pour la proumission
 De Dieu qui pardonna sa mort,
 De mon las cuer qui se remort 740
 Vueillez le grant misère entendre
 Et le desconfort, sire tendre.
 Pecherre de moy ne scé pire :
 Bien me doy hair et despire
 Quant j'ay tant mon orgueil creu 745
 Que mon outrage recreu
 Me fist de mercy empetrer
 Vers celui qui pour moy monstret
 Mon bien si fort me desplaisoit :
 L'ennemy tout ce me faisoit 750
 Par sa traistre decepvance.
 Sire, mis en apparcevance

M'en avez : droiz est que m'encline
 A vous par conscience encline,
 755 Moy confessant a cuer devot;
 Et vous pri, pour celui qui vult
 Estre a l'estache flaellez
 Pour nous, que vous m'en absolvez
 Et m'en donnez penance griève
 760 Car le fais du pechié me griève
 Et me destruit.

SECOND CURÉ

Amis, quant si te voy contrit
 Conme il me semble que tu soies,
 Miex en vaurras, mais que t'essaies
 765 A ta char pugnir et purgier
 Pour gairir t'ame et alegier.
 Requier la divine puissance
 Que t'aist, car tu ne peuz sanz ce.
 Moult bien absoldre te vouldroie;
 770 Mais saches que je ne pourroie,
 Tant as fait euvre despiteuse.
 Moult te fera grace piteuse
 Dieu se donner te veult l'adresse
 De personne qui t'en adresse.
 775 De t'absoldre n'ay pas conseil
 Ne pouoir, mais je te conseil
 Que t'en vois es ysnel le pas
 Tout en l'eure, et ne laisses pas,
 Droit a Romme au saint penencier.
 780 Car bien t'os enconvenancier,
 Tant par est devost et honnestes,
 Se de t'aider bien l'amonnestes
 Conseil mettra en ta besongne
 Selon le cas qui le besongne;
 785 Et s'il te charge aucune paine,
 A la souffrir t'efforce et paine :
 Desservi l'as.

184 b

GODART

Sire, com le plus chestif las
 Pecherre c'on saroit trouver,
 Au vice d'orgueil repugner 790
 M'afferroit que tost y alasse;
 Car m'ame dolereuse et lasse
 Seroit s'en tel pechié mouroye
 Et longuement y demouroye.
 G'iray donc par vostre doctrine 795
 Afin qu'il m'enseigne et dottrine
 Conment j'amende.

SECOND CURÉ

Or va, car autrement l'amende
 Ne peuz a Dieu satisfier
 De l'orgueil qui glorifier 800
 A fait ton cuer en gloire vaine,
 Qui d'ame et de corps est grevaine.
 Confès a li par vraie vois
 T'en rens. A Dieu! de cy m'en vois :
 De tost aler ne te delaies. 805
 De Dieu la beneïçon aies
 Et le conduit.

GODART

Si voir que sa grace conduit
 Ceulz qui a bien se veulent duire
 Lui pri qu'il me vueille conduire 810
 Et me doint trouver a delivre
 Le saint penancier qui delivre
 Les pecheours qui se construient
 En Dieu devant lui et destruient
 Les pechiez dont il sont espris. 815
 Par cy sera mon chemin pris
 Premier, pour querre plus brief tour.
 En plains, en plours et en tristour
 Et en regrez ains que g'y viengne,
 Afin qu'a Dieu de moy souviengne, 820

M'en iray, du cuer gemissant
 Mes faiz, car la char fremissant
 Me va souvent de l'obscurté
 Ou j'estoie en toute durté
 825 Tant dissolu.

LE FOL

Tureluru, va, turelu!
 Jouer m'estuet d'anchanterie :
 Non feray pour l'enchanterie
 De la feste sainte Susanne.
 830 Querre me convient dame Osanne
 Qui m'endort par nuit a filer.
 Mes ongles me fault affiler
 Au bec d'un coq de blanc plumage.
 J'ay plus chier lait cler et humage
 835 Que burre mol.

PREMIER COMPAIGNON

184 d

Egar! je revoy la le fol
 Qui si sotement se demaine.
 Se Dieu vous doint bonne sepmaine,
 Compains, puisque vous estes cy,
 840 Alons le rigoler aussi
 Qu'a l'autre foiz que nous y fusmes,
 Vous et moy, quant de lui eusmes
 Tant de deduit.

SECOND COMPAIGNON

En sa sotie se deduit
 845 Moulz jollement, ce li semble.
 Empongnons boe et terre ensemble
 Et quanque pourrons amasser;
 Si le faisons avant passer
 En li ruant.

PREMIER COMPAIGNON

850 C'est bien dit : il fait le truant

Si com je croy et bien appert.
 Retourne toy ça, mal appert :
 Tien ceste empainte.

SECOND COMPAIGNON

Il fault que sa cote soit peinte
 Jusqu'aus espales de fiens. 855
 Tien, sotin, tien, recueil ces biens :
 C'est d'avantage.

LE FOL

Je me suis par enconvantage
 Mis a garder taupes en pré,
 Et m'iray, s'il est advespré, 860
 Diner de grés a escurer.

Se je pouoie procurer
 Un chapel de torches de fain,
 Jamais n'aroie soif ne fain.
 Pour ma cote qui se descoust 865
 J'aray assez a po de coust :
 Chascun me preste.

PREMIER COMPAIGNON

185 a Povreté lui est touzjours preste ;
 Assez appert a son visage.
 De le suivre en tel musage 870
 Point ne nous chaut.

SECOND COMPAIGNON

Autant li plaist froit conme chaut.
 Eschevons le, si ferons sens.
 Il n'a ne memoire n'assens
 Plus qu'aroit une mue beste : 875
 Des maulx c'on li fait a grant feste,
 Et grant solaz estre li semble.
 Alons jouer touz deux ensemble
 Autre partie.

PREMIER COMPAIGNON

De li me plaist la departie ; 880
 Vous dites bien.

LE FOL

J'ay compté par mes doiz combien
 Le roy Artus fu en Bretaingne.
 A il cy entour qui reteingne
 885 Viez chapperons de noir en blanc?
 La moitié de mon destre flanc
 Est mipartie de travers :
 Je m'en vois vestir a l'envers,
 Ou que soit, de viez parchemin.
 890 Retourner vueil par ce chemin
 Vers la norrice qui moy garde.
 Tresdoulx Dieu, mon cuer bien regarde
 Que nulz n'a mais a moy entente.
 En la chappelle sanz attente
 895 De la vierge de Dieu eslite,
 En qui tout bon cuer se delite,
 M'en vois de cuer humelié
 Agenoiller, car folié
 Ay assez, si qu'il est saison
 900 Et temps qu'en faisant m'oroison
 Devant le doulx ymage fin
 De la mère au père sanz fin
 Me represente jointes mains.

 Fontaine de vie aus humains,
 905 Estoille journal sanz estaindre
 Qui ciel, terre et mer peuz ensaindre 185b
 Et secours mettre en touz perilz,
 Si voir que li sains esperiz
 Comprist par parole de père
 910 Char de filz en toy vierge mère,
 Par le salut d'*Ave Marie*
 Dont onques ne fus esmarie
 Ne n'en perdis la dinité
 De ta royal virginité,
 915 Je te pri de cuer et de vois

Que de la penance ou je vois,
 Faingnant le fol, c'on n'ayt avis
 Qui je sui n'a corps ny a vis.
 Veuillez accepter pour valable
 Le fait, car tant l'ay agreable 920
 Pour mater ma char lasse et ville,
 Que par orgueil m'ame n'aville,
 Que je n'y quier autre exemplaire.
 Dame, prie ton filz que plaire
 Lui vueille m'ame, ou trop iert lasse, 925
 Marie, qui mère es de grace
 Et de concorde sanz ostacle.
 Retraire en mon povre habitacle
 M'en revois ja.

GODART

D'errer ne cessé grant pièce a. 930
 Loez soit Dieux de mon travail,
 Car je ne souffis ne ne vail
 En bien tant qu'avoir repos doie.
 A Romme ou moult venir tendoie
 Sui venuz graces a celui 935
 Qui tout peut justicer souz lui,
 Car de bon cuer l'en requeroie.
 Le penancier que je queroie,
 M'est avis que je le voy la,
 Selon l'estat devot qu'il a. 940
 Vers li vois de plaine venue.

185 c

Pere d'onneur, cilz qui la nue
 Et le ciel fist a son vouloir
 Vous doint si vivre que valoir
 Puissez tant en faiz et en dis 945
 Qu'a l'ame vous doint paradis!
 Sains homs, je suis un povre corps

Qui m'ame ay mis en griets descors
 Vers Dieu, se par vous alegance
 950 N'en ay, car si dure vengeance
 N'est de paine, sanz mort souffrir,
 Ou penance se doit offrir
 Que n'y face sanz esbahir,
 Mais que de mes pechiez gehir
 955 Me fusse vers vous deschargié.
 Sire, oez moy; trop ay targié
 En negligence.

LE PENANCIER

S'en ton cuer as la diligence
 Que ta bouche tesmongne cy,
 960 Dieu te vueille ottroier mercy.
 Amis, or gehis et revelle
 Tes pechiez, et si renouvelle
 Ta conscience,

GODART

En outrage sanz pacience
 965 Et en orgueil, chier sire dous,
 Ay vescu, si m'en rens a vous
 Confès, coupable et repentant;
 Et d'especial je craing tant
 Le pechié d'ire, car duré
 970 A trop en moy vers le curé
 De la parroisse dont je sui,
 Pour ce que durté et ennuy
 Et cruauté par folle envie
 Li fis tant qu'il estoit en vie;
 975 Car toutes foiz qu'il m'encontroit,
 De mes outrages me monstroit
 Le meschief qu'en pouoie avoir :
 Mais pas ne le tenoie a voir,
 Ains vouldisse c'on l'eust detrait;
 980 Et tel foiz fu au costel trait
 Le volz ferir par mautalent,

185 d Dont il me dist bien que dolent
 M'en verroye quoy qu'il tardast;
 De moy li dis qu'il se gardast
 Ou de son corps le greveroye 985
 Quel part que je le trouveroye;
 Et fu par ire ainsi contence,
 Et meserray tant qu'en sentence
 Me mist d'esconmenient :
 De quoy chascuns onniement 990
 S'eschevoit de ma compagnie,
 Mais si plains fu d'ire engaignie
 C'onques pardon ne l'en requis
 N'amendement vers lui ne quis,
 Dont je fis grand desavenant; 995
 Car il est mors en revenant
 De saint Jacques ou il ala
 Pelerin, c'onques ne parla
 A moy, ne point ne m'assolu,
 Pour ce qu'ou pechié dissolu 1000
 Perseveroie sanz refraindre
 Et sans l'ire de mon cuer fraindre.
 Dont demouré suis trop mespris.
 Or m'en a blasmé et repris
 Nostre autre curé, en disant 1005
 Qu'il n'a pas pouoir souffisant
 De m'assoldre par nulle voie;
 Mais pour ce, sire, ycy m'envoie
 A vous, que tieng au plus preudomme
 Penancier qui regnast a Romme, 1010
 Cent ans a, et je m'y afferme :
 Si vous pri qu'absolz soie a ferme,
 Et que tel charge me fermez
 De penitance qu'affermez
 Ressoie a la paix du vray juge, 1015
 Qui tout par droit justice et juge,
 Sanz faire tort.

PENANCIER

Amis, l'ennemi, qui entort
 Touzjours les pecheurs en sa corde,
 1020 Selon que ta bouche recorde,
 T'avoit durement encordé 186 a
 De son laz et desaccordé
 Du roy piteux et concordant;
 Mais n'ay pas avis recordant
 1025 A present de ta discordance
 Congruer a telle accordance
 D'estre absolz si com tu voulroies;
 Et scé bien que trop demourroies
 S'atendoies tant qu'au saint pére
 1030 De ton obscurté la matére
 Revellasses, car par ystoire
 Tient du collége consistoire;
 Et say bien, quoy que tu t'en paines,
 A envis de coulpe et de peines
 1035 T'assoldroit selon le meffait
 Qu'as a tort a ton curé fait.
 Mais or entens que tu feras,
 Et se le fais sages seras :
 Quant tu as besoing, si cogite.
 1040 Tu t'en iras droit en Egipte
 A un saint hermitte qui sert
 Jhesu Crist, et en un desert
 S'est mis pour le monde eschiver
 Et vit de ce qu'il peut trouver
 1045 Par le bois, ainsi que racines
 Et fruiz de ronces et d'espines,
 Et poires et pommes sauvages ;
 Des fontaines et des rivages
 Estaint sa soif, non pas de vin ;
 1050 D'inspirement saint et divin
 Est inspirés si largement
 Que conseil et alegement

Te pourra bien donner et faire,
 Quant dit li aras ton affaire :
 Tant par est devot et benignes 1055
 Que de t'aidier est trop plus dignes
 Que moy, et de plus grant value.
 Vaz a ly et le me salue,
 Disant que je li pri de toy
 Qu'il te doint conseil et chastoy. 1060
 186 b Sanz plus tarder tost t'i avoies;
 Et tant que le truisses et voies
 Le quier et cerche.

GODART

Sire, je le querray a cerche
 Ainçois deça et dela mer, 1065
 Souffrant peine et tourment amer,
 Se Dieu plaist, que je ne le truise,
 Mais que tant de vie avoir puisse ;
 Car je vueil faire voz conmans.
 Au saint esperit vous conmans 1070
 Qui en sa douce providence
 Vous tiengne, car par evidence
 Bien m'enseigniez.

LE PENANCIER

A Dieu, amis ! ne vous faingniez
 De l'exploitier. 1075

GODART

Ce chemin sanz autre sentier
 Iray touzjours sanz nul esloing ;
 Car tant que je seray bien loing
 Ne m'est mestier que je le change,
 Ne quere d'autre voie change 1080
 Pour le laissier.

LE FOL

Je pourroie bien trop cessier

D'aler aouer derrechief
 La vierge qui de grace est chief.
 1085 Je m'en revois en sa chappelle
 Ou nul ne me scet ny appelle.
 Si tost conme ge sui dedans,
 A genoulz sui, coutez a dens;
 Devant son doulx ymage a terre
 1090 Me vois humilier grant herre;
 Nulz ne m'y sara environ.

Ave, regina celorum,
 Dame des anges trespriée
 De deité auttorisée,
 1095 Vray temple de Dieu consacré,
 Vaissiau du hault divin secré
 Par qui sauvement esperon.

Mater regis angelorum,
 Qui en vous peustes comprendre
 1100 Ce que les cielx ne porent prendre,
 Si com sapience eternelle
 Vous eslut mère paternelle
 Du fruit de substance divine,
 Car sanz humain charnel convine,
 1105 Mére Dieu, vous ymaginon.

O Maria, flos virginum,
 Tresexcellente souveraine,
 Qui seconde ne premeraine
 Pareille a vous onques n'eustes
 1110 Ne n'arez ; pour c'estes et fustes
 Fleur que par odeur alion,
Velut rosa vel lilium,
 Qui gloire est a tout paradis ;
 Dame, tant par faiz que par dis
 1115 Requier ta grant dileccion :
Funde preces ad filium,
 Et vueille a ta dinité plaire

186 c

La penance qu'en exemplaire
 De fol ay empris a mener,
 Si voir que d'orgueil demener 1120
 N'ay conscience ne desir.
 Dame que j'ain, crain et desir
 Recevez mon oracion
Pro salute fidelium,
 Tu qui es la vierge saintisme 1125
 Qui ciel, terre, mer et abisme
 As surmonté.

NOSTRE DAME

En excellence de bonté
 Moy loant me prie et appelle
 Mon servant en une chappelle 1130
 La dessoubz; bien l'oy et entens.
 Gabriel amis, bien est temps
 Et toy, Raphael, que vers li
 Alissions, car moult m'abelli
 Lui oir quant il m'aime tant. 1135
 186 d Convoiez m'y vous deux, chantant
 Chose joyeuse.

RAPHAEL

Tresdoulce vierge glorieuse,
 Quant il vous plaist, bien sui d'accort
 Que chantons aucun dous recort 1140
 Devant vous a vois angelique,
 Gabriel, chantons par musique
 Gaie et jolie.

RONDEL

La fleur d'umilité polie
 Liement ses amis pourvoit, 1145
 Et voit qui a s'amour se lie;
 La fleur d'umilité polie

Liée est quant vraiz cuers s'umilie,
 Priant qu'a grace le ravoit :
 1150 La fleur d'umilité polie
 Liement ses amis pourvoit.

GABRIEL

Dame, se le monde a amie
 Ne vous avoit, li ennemis
 L'aroit tost a deshonneur mis
 1155 Et ahonté.

NOSTRE DAME

Amis, qui pour folz t'es compté
 Et ton sens fains estre folie,
 Ta secrète melencolie
 Est en bien vers moy si apperte
 1160 Au gré de mon fil que ja perte
 N'y aras d'ame ne de corps ;
 Car humilité les recors
 De ton cuer a Dieu si enforme
 Que j'essauce et soustien en forme
 1165 Les prières de ta parole.
 Je qui ainsi a toy parole
 Suis la mère prevaluée
 De Dieu, que tu as saluée
 Devotement en cuer secré,
 1170 Qui reçoif et si preng en gré
 La peine que portes cousteuse,
 Que tu fains estre folieuse
 Et qui non sensible est au monde. 187 a
 Je l'accepte pour fine et monde
 1175 Selon foy et obediencia,
 Et t'ottroy grace et audience
 De m'appeller.

LE FOL

Dame, a qui l'ange reveler
 Voult le salut dont grace vint

Quant la parole char devint, 1180
 Graces vous rens, loenge et pris,
 Quant moy fol de pechié espris
 Deignez cy de vostre presence
 Visiter par telle evidence
 Que de vostre biauté virgine, 1185
 Ou bonté doulçour ymagine
 Qui resplendist et fructiffie
 En lumière qui morteffie
 Toutes obscurtez et conjoie.
 Lis de pitié, tresor de joie, 1190
 Quant pour ami me retenez
 Et ma penance en gré prenez,
 Devotement sanz mesurer
 Y vueil et doy ma vie user :
 Car pour merite desservir 1195
 Doy vous et vostre filz servir
 Et vueil de bon cuer finement
 Touzjours, jusques au finement,
 Que je murray.

NOSTRE DAME

Amis, celle suis qui voultray 1200
 Toy donner confort gracieux.
 Fay bien; je m'en revoys es cieulx
 Vers mon enfant celestiel.
 Raphael, et vous, Gabriel,
 Ma doulice amoureuse mesnie, 1205
 Ralons ent en la compagnie
 De deité.

GABRIEL

187 b Tresorière de charité,
 Mère au roy des divins secrez,
 Nous irons par tout a voz grez 1210
 Benignement.

RAPHAEL

Voire, mais mettre a finement

Nous convenra nostre rondel.
 Or avant : prenons, Gabriel,
 Ensemble et disons de voiz lie.

LA FIN DU RONDEL

Lie est quant vraiz cuer s'umilie
 Priant qu'a grace le ravoit ;
 La fleur d'umilité polie
 Liement ses amis pourvoit.

GODART

1220 Dieu, qui tout gouverne et tout voit
 Et qui maint en gloire celestre,
 Soit loez ! En maint divers estre
 M'a convenu querre et tracier
 L'ermitte que le penancier
 1225 Me dit qu'en Egipte manoit
 Et en un desert se tenoit.
 A Dieu plaise que ce soit cil
 Que je voy la en lieu essil
 Devant son petit habitage !
 1230 Bien croy que ce soit l'ermitage
 Ou il maint du tout et demeure.
 Saluer le vois sanz demeure
 Et dire ma neccessité.

Preudons, la sainte trinité
 1235 Vivre adès par amendement
 Vous doint, et bon deffinement.
 Sire, a vous m'a yci tramis
 Uns homs qui moult est voz amis :
 Penancier de Romme est nommez,
 1240 Et m'a dit que sy renommez
 Estes et de si sainte vie
 Que s'amour est en vous ravie.
 Par maint salut se reconmande

XVII	UN PARROISSIAN ESCONMENIÉ	41
	A vous, et si vous prie et mande	
	Que de vostre introducion	1245
187 c	Me donnez consolacion	
	Qui m'esjoisse.	
	L'ERMITE	
	Amis, nouvelles que j'oyse	
	Pieça ne m'abellirent tant	
	Que du bon penancier vailant.	1250
	Est il sain du corps et haitez?	
	Quanke pourroie d'amistiez	
	Pour son mandement te feroie	
	Et en bien te conseilleroie	
	A mon pouoir.	1255
	GODART	
	Sire, sains et haitez pour voir	
	Estoit quant me parti de lui;	
	Et si li plot et abeli	
	Especialment m'envoier	
	A vous pour mon cuer ravoier	1260
	A voie de paix et de grace.	
	Sire, j'ay vesqui longue espace	
	En orgueil, en oultrage, en ire	
	Dissolument com le pire	
	Du monde et plus desnaturé.	1265
	Car un preudon prestre curé,	
	A qui parroissien estoie,	
	Tant qu'il vivoit si deboutoie	
	Et villenoie soir et main	
	Qu'une foiz au coustel la main	1270
	Mis pour le ferir par courrous.	
	Mais tant estoit humbles et dous	
	Que chastement me monstroie	
	Partout la ou il m'encontroit.	
	Mais par mes oultrageus despiz	1275
	Le haioie de pis en pis,	
	Qu'ainc mon cuer ne s'umilia,	

- Et tant qu'il m'esconmenia
 Et tint en sentence a mon tort.
 1280 Or est sanz moy absoldre mort,
 C'onques mercy ne l'en requis,
 Dont j'ay par repentance quis
 A un autre curé qu'avons *187 d*
 De mes grans oultrages felons
 1285 Conseil conment je feusse absolz ;
 Qu'il me dit que nulz, sire dous,
 Fors que le penancier de Romme
 Ne me pouoit oster la somme
 Du pechié dont je suis chargié.
 1290 A Romme fui par son congié
 Au penancier quy y manoit,
 Et li ay si com dit m'avoit
 Mon horrible pechié gehy,
 Dont moult l'ay fait estre esbahy ;
 1295 Et me dit que soy entremettre
 Ne pouoit de remède y mettre,
 Et que le saint pére ensement
 Estoit occuppé grandement,
 Si ne pouoit a moy entendre.
 1300 Lors m'enchargea que sanz attendre
 A vous venisse, et m'en hastasse,
 Et ma besongne vous comptasse.
 Tant ay erré qu'au plaisir Dieu
 Vous ay trouvé cy en ce lieu
 1305 Conme il me dit pour verité.
 Si vous suppli en charité
 Pour Dieu que vous me conseilliez,
 Ou d'ame et de corps essilliez
 Suis a touzjours.
- L'ERMITE
- 1310 Amis, en trop mauvais secours
 De corps et d'ame te mettoies,
 Quant ton curé si deboutoies

Qui la cure avoit et la garde
 De t'ame. Or t'avise et regarde
 Comment c'est pour toy chose amère : 1315
 Certes sainte eglise, ta mère,
 Ne devoit cherir ny amer
 T'amour, quant par outrage amer
 Pechié contens te procurait
 Au curé qui t'ame curoit 1320
188 a Du pechié que tu as en toy.
 Conforter ne donner chastoy
 Ne t'en puis pas a mon bandon :
 Li vrais Diex t'en face pardon
 Si voir qu'il est humbles et piex; 1325
 Mais pour toy conseiller au miex,
 Selon que dit m'as de ton fait,
 Te lo que de vray cuer parfait
 Graciant les vertuz divines
 Vers une cité t'achemines 1330
 Qui Alixandre est appelée,
 Et t'avance de ton alée,
 Se salvacion trouver veulz;
 Car secours recouvrer ne peuz
 Du pechié qui te lie et tient 1335
 En la guise qu'il t'appartient,
 Fors par un homme de noble estre
 Qui miex semble fol que sage estre
 A son affaire.
 GODART
 Helas! chetis, que pourray faire? 1340
 Sire, vous m'esbahissez tout,
 Qui dites qu'a un fol estout
 M'en voise conseil demander.
 De conseil de fol amender
 Comment peut nulz? 1345
 L'ERMITE
 Amis, il est pour fol tenuz

Et faint qu'il soit de fol courage
 Pour Dieu, mais il est homme sage ;
 Car tant het d'orgueil le diffame
 1350 Que sa char destruit et diffame
 Pour s'ame honnorer par penance :
 Moult sueffre de desordenance
 C'om li fait, dont a Dieu se loe :
 En li rue ordures et boe,
 1355 Savates et drapiaux pourriz.
 Mais ne fu pas ainsi norriz,
 Car il est de royal lignée.
 Mais il het et a desdaingniée 188 b
 L'orgueilleuse vie du monde
 1360 Et vit en conscience monde
 De povre vie aspre et cuisant,
 Et l'a en plaisir souffisant
 Plus que richesse ny avoir
 Ne noblesce c'on puist avoir.
 1365 En Alixandre la cité
 Le quier pour ta neccessité :
 Par l'enseigne le trouveras
 Que le fol faire li verras
 Et estre nuz et despennez,
 1370 Combien que de hault lieu soit nez.
 Quant vers li seras arrivé
 Pursui le tant qu'en lieu privé
 Lui puisses gehir ton affaire,
 Et il t'enseignera a faire
 1375 Ce dont pourras estre sauvé.
 Si tost qu'a point l'aras trouvé,
 Fay que te saches entremettre
 De li presenter ceste lettre.
 Or y vas sanz dilacion,
 1380 Et si li fay bien mencion
 Que la t'envoy.

GODART

Sains homs, loez de cest envoy
 Soit Diex. Quant faire le m'esteut
 Et autrement estre ne peut,
 Toutes paines estre solaz 1385
 Me doivent pour yssir des laz
 Ou pechié lonc temps m'ame enclos
 A, sire; et selonc le propos
 Que dit m'avez acompliray
 Le voiage, et au fol iray; 1390
 Et Dieux m'i doint trouver secours :
 Car m'ame en pereilleux decours
 Est d'aler a maleïçon.
 Sire, vostre beneïçon
 Me donnez s'a plaisir vous vient; 1395
 Car de cy partir me convient
 Sanz nul detry.

188 c

L'ERMITE

Amis, Dieu par son doulx ottry
 Grace et beneïçon t'envoït,
 Et a salvacion t'avoit 1400
 D'ame et de corps, si qu'il t'apére.
 Or va : seigneur soiez du père,
 Du fil et du saint esperit,
 Qui de la mort nous resperit
 Par sa pitié. 1405

GODART

A Dieu, sire! trop respité
 Me sui d'amender, si me griève.
 Pour plus trouver la voie briève,
 Ce chemin si aler vourray.
 Glorieux Dieu, comment pourray 1410
 Congnoissance avoir de trouver
 Ce saint corps qui fol approuver
 Se fait par ficcion prouvée,

Qu'aperceavance revelée
 1415 Me soit qui il est ne conment
 Il tent a querre sauvement?
 Dieu qui de li scet les assens
 Li remerira pour grant sens
 Sa foleur penitencielle,
 1420 Car plaisant et substancielle
 Lui est, selon qu'entendu l'ay
 De l'ermitte qui sanz delay
 M'envoie a li pour ma besongne.
 Pour ce qu'aler tost me besongne,
 1425 M'avenser y.

LE FOL

D'un pié sur costé danceray
 Et baleray de la main destre.
 Certes j'ay trop grant desir d'estre
 Advocat pour plaidier a court.
 1430 Un homme qui le braz a court
 N'a mestier de longue chemise.
 J'ay ma cote dès hier promise
 Au pape pour faire une aumusse.
 Po s'en fault que je ne me musse
 1435 Je ne scé ou.

188 d

PREMIER COMPAGNON

Egar! encor voy je le fou
 Qui est cy revenuz arrière.
 Je li vois donner par derrière
 De mes cinc doiz un bobelin.
 1440 Tourne toy, tourne, Jobelin.
 Qui t'a feru?

LE FOL

Au chant d'un asne mort feru
 M'endormi ersoir a la lune.
 Je met bien de mes deux mains l'une

Sur l'autre pour mes doiz froter, 1445
 Et say bien saillir et troter
 Tost et menu.

SECOND COMPAGNON

Coquelourt, es tu revenu ?
 De toy veoir me semble bon.
 Je te vueil farder de charbon
 Pour ressembler plus biau varlet. 1450
 Or vas : tu n'aras plus si lait
 Le visage con tu avoies.
 Se le bien que t'ay fait savoies,
 Biau te seroit.

LE FOL

Ma mère l'autrier me queroit 1455
 A tastons dessoubz son surcot.
 Ceulz qui soupent a mon escot
 Ont de retour.

GODART

Grant chemin ay fait et grant tour
 Puis que sejour n'oy ne repos. 1460
 Mére Dieu, selon mon propos,
 En Alixandre la cité
 Sui, si ay bien neccessité
 Que sus et jus tant pourveisse
 189 a Que le preudomme fol veisse. 1465
 Car besoin m'est de l'aconsuivre.
 Ne scé quel povre homme poursuivre
 Voy a deux compaignons moult près,
 Je lo bien que je voise après
 En regardant a l'aventure 1470
 Se ce seroit la creature
 Que querir doy.

PREMIER COMPAGNON

Je vueil au fol bouter mon doy

1475 En l'ueil aussi qu'en gaberie,
 Et si mettray par loberie
 Un chappel d'estrain sur sa teste.
 Bien sçay qu'il en fera grant feste
 Quant il l'ara sur ses cheveulz.
 1480 Sot, retourne toy se tu veulz :
 Ton chief, qui est gros et testuz,
 De ce chappellet de festuz
 Vueil coronner.

LE FOL

1485 J'oy les sains de Rome sonner,
 Ce m'est avis, en une huche.
 Ne scé qui m'appelle et me huche
 En Barbarie.

GODART

1490 Glorieuse vierge Marie,
 Comme ce fol semble a son vout
 Avoir cuer benin et devot !
 Mauvestuz est et descirez
 Et honniz et mal atirez
 De charbon, de boe et d'ordure.
 1495 Quanque on li fait sueffre et endure
 Sanz courrouz en fait ny en dit,
 Selon que l'ermite m'a dit.
 Celui que quiers j'ay suspeçon
 Que ce soit il, a la façon
 De sa manière.

SECOND COMPAGNON

1500 Je vois mettre en lieu de bannière
 A ce fol dessoubz son chapel
 Ce viez panuffle de drapel,
 Et li sacheray le toupet.
 Tourne toy ça, tourne, Tripet :
 1505 Pour ce que tues chappellez,
 Vueil que tu sois endrappellez
 De ce drappel cy par desseure :

189 b

A terre l'ay pris tout en l'eure
 Pour t'en cointir et deporter.
 En lieu de bannière porter
 Le te ferray a cestui coup, 1510
 Et si te tireray le toup
 Dessus le front.

LE FOL

Toutes foiz que vendanges sont,
 Plus sage sui que je ne cuide.
 Ho! je scé bien comment on vuide 1515
 Les marlières ou temps d'esté.
 J'ay en un seul karesme esté
 Trente ans a l'escole aprenant.
 Je vueil que karesme prenant
 Soit venredy. 1520

GODART

Encor croy je, si com je dy,
 Que ce soit celui proprement
 Que je quiers, fors tant seulement
 Que cestui ne dit que sotie.
 Nonpourquant, combien qu'il sotie, 1525
 Faisant penitence grevaine,
 Je cuist que c'est pour gloire vaine
 Oster des gens, qu'aucun ne die
 Qu'il le fait pour papelardie.
 Je le croy en ma conscience; 1530
 Car il prent tout en pacience
 Quanque on li fait.

PREMIER COMPAGNON

J'ay assez regardé le fait
 De ce chetif fol et la guise.
 Je m'en vois, car tant se deguise 1535
 Que tout m'afole.

SECOND COMPAGNON

J'ay pitié de sa guise fole,
 Car ses moz dit a simple vois.

Plus ne le suivray, ains m'en vois 189 c
 1540 En autre lieu.

LE FOL

J'ay aus deux bouz et ou melieu
 Du monde esté depuis matines.
 Toutes escriptures latines
 Sont mises en ebrieu françois.
 1545 Raler m'en fault de cy ençois
 Que ma norrice se courrouce.
 Royne des anges tresdoulce
 Quant nulz ne me suit ne ne guette
 Je me trairay vers ma logete
 1550 Ou nulz ne me scet ny appelle,
 Puis iray en vostre chappelle
 Vous servir, vierge tresamée,
 Et d'une chandelle alumée
 Vous y presenteray l'offrende,
 1555 Excellent dame reverende,
 De grace et de paiz tresorière.
 Temps est qu'a vous voise en prière :
 Nulz ne me voit.

GODART

Dieu, qui touz ses amis pourvoit,
 1560 Me doint que bien aie adressié
 A celui que j'ay tant tracié;
 Et si ay je, selon m'entente:
 De loing poursuivray sanz attente
 Ce fol la penitencieux ;
 1565 Car paciens et gracieux
 Me semble estre selon les faiz
 Qu'en ma presence a diz et faiz.
 Savoir vueil quel part il veult traire
 Et se c'est cil a qui retraire
 1570 Doy ma douleur.

LE FOL

Je feroie trop grant folour

S'en lonc detri plus m'affermoie
 Et ma chandelle n'alumoie
 Pour aler dire le service
 De la pure vierge sanz vice 1575
 189 d A qui liges sers suis d'onmage.
 Pour aler devant son ymage
 Yray ou que soit alumer
 Ceste chandelle et enflammer;
 Puis iray si com j'ay appris 1580
 A la haulte royne de pris
 Mercier et rendre salu,
 Qui aus humains a tant valu
 Que nulz dire a droit ne le scet.
 A elle qui touz pechiez het 1585
 Vois de ma chandelle en present
 Faire en li saluant present
 De cuer devot.

GODART

Diex oublier pas ne me volt
 Quant cy m'amena tout de vray : 1590
 Ce fol sanz cesser poursuivray
 Quel part qu'il aille.

LE FOL

Dame des cielx, quoyque po vaille
 Mon povre las chetif de corps,
 Recevez en gré les recors 1595
 Que mon cuer de voiz et de bouche
 Vous represente, car reprouche
 De honte ne de vitupére
 Ne peut venir a qui se pére
 De vous amer, craindre et servir. 1600
 Dame, donnez moy desservir
 L'amour vostre filz vous servant
 Si qu'il me vueille pour servant
 Recongnostre en faiz et en diz

- 1605 Et recevoir en paradis
 Ou si hault vous enlumina.
O gloriosa domina,
 Mére sans euvre de nature
 Au Dieu de toute creature,
 1610 Qui tout a fait a sa divise,
 Temple de foy ou sainte eglise
 Prent pour repaistre humanité
 Norreture et solempnité 190 a
 D'amour qui onc ne varia,
 1615 Fleur de paiz, *ave Maria*
 Plaine de grace.
- GODART
- Sanz plus de delay ne d'espace
 Aus piez de ce preudomme a terre
 M'en vois a genoulz li requerre
 1620 Conseil, car congnoistre puis bien
 Que c'est cil en qui tant de bien
 A, conme l'ermite disoit,
 Que par grant sens le fol faisoit.
 Je le voy bien a son affaire.
 1625 Preudons, li Dieux qui tout peut faire
 Vous doint d'ame salvacion.
 Sire, par grant affeccion
 Vous vien a faire mes complains
 Des pechez dont je suis si plains
 1630 C'onques de bien ne m'entremis.
 A vous m'a cy endroit tramis
 Un hermite qui fait bien maint,
 Qui es desers d'Egipte maint.
 Il vous envoie ceste lettre,
 1635 Veez qu'il y a volu mettre,
 Et moult se reconmande a vous,
 Et que me vueillez, sire doulx,
 Conseil donner.

LE FOL

Amis, ainçois abandonner
 Me vueil a ceste lettre lire. 1640
 J'ay bien veu qu'elle veult dire
 Et que tu demandes et chaces.
 A estre absolz quiers et pourchaces
 D'un grief esconmenient
 Ou as esté moult longuement : 1645
 Si te diray que je feray,
 Et bonnement m'entremettray
 De prier Dieu qu'il te pardoint
 Tes pechiez, et pouoir te doint
 De t'amender. 1650

190 b

GODART

Certes, doulx sire, demander
 Meilleur conseil ne vous saroie,
 Et pour ce prier vous vouloie
 Qu'avoir pitié de moy vueilliez ;
 Car se vous ne me conseilliez, 1655
 Sanz fin suis mors.

LE FOL

Biaux amis, se tu te remors
 Vers Dieu ainsi conme tu dis,
 Encor pourras de paradis
 Desservir la joie et la gloire. 1660
 Or aiez en Dieu bon memoire.
 Si m'esbahis je moult de toy
 Quant en telz perilz sanz chastoy
 T'es laissé couler et encorre :
 S'en pitié ne t'en veult secourre 1665
 Jhesus et sa tresdoulce mère,
 Ta vie est trop pesme et amère ;
 Si te diray que tu feras :
 Par mon conseil tu te tenras
 La en cel anglet trestout coy, 1670
 Et te diray raison pour quoy :

Souvent ceens repaire et vient
 Celle a qui de pecheurs souvient :
 Si gardes pour riens que tu voies
 1675 Ne t'esbahis ne ne desvoies,
 Combien qu'en ton cuer te merveilles;
 Car tu pourras veoir merveilles
 Ainçois que long terme detrie;
 Mais de cuer sers, de bouche prie
 1680 Adès la royne des anges,
 Et ton propos de riens ne changes;
 Et je la requerray aussi
 Que secours te face et mercy
 Par sa pitié.

GODART

1685 Sire, par piteuse amistié
 Voy bien que vous me conseilliez, 190 c
 Si feray com bien conseilliez
 Quanque me dites sanz espace,
 Et ça en cest englet ma place
 1690 Iray prendre tout simplement,
 Et prieray devotement
 Celle qui grace a nulz ne vée.
 Ave, vierge es cieulx eslevée,
 Qui onques d'amour n'asseichiez.
 1695 E! dame, estaigniez les pechiez
 De moy pecheur qui cy dedans
 Sui devant vostre autel adens
 Jointes les mains.

LE FOL

1700 Dame qui en deité mains
 A la destre de ton filz dous,
 Si voir que tu confortes tous
 Les cuers qui au besoin reclament
 Ton nom et te servent et aiment,
 Vierge aus ennemis ennemie,
 1705 Moy pecherre n'oblie mie,

Mais reçois ma prière en gré
 Si com tu scez qu'en cuer secré
 Fais le fol soffrant orfanté,
 Par quoy nul de mon parenté
 Moy cognoissant ne me regart; 1710
 Dame, de ton piteux regart
 Me visite et vien regarder;
 Tresorière qui a garder
 As de grace la seigneurie,
 Excellente vierge Marie, 1715
 Vaissiau de purté et saint temple,
 Demontre moy aucun exemple
 Que ce que te pri et salu,
 Dame, me vaille et ait valu
 Par tes merites. 1720

NOSTRE DAME

190 d Tant de belles prières dites
 M'a cil qui service plaisant
 Me fait, le fol contrefaisant,
 Qu'aler me plaist a son appel.
 Gabriel, et vous Raphael, 1725
 Mes anges et mes bonnes ames,
 O moy qui sui dame des dames
 Venez jusques la jus en terre
 Ou appeller m'oy et requerre
 D'un mien servant qui me supplie 1730
 Et si devotement me prie
 Que pour ç'a lui par grace vois.
 Or tost : chantez a haulte vois
 Moy convoiant.

GABRIEL

Providence, fleur ravoiant, 1735
 Quant il vous plaist que nous chantons,
 De tel chant qu'a chanter hantons

Chanterons nous deux d'accordance.
 Raphael, moy faisant aidance
 1740 Enconmenciez.

RAPHAEL

Voulientiers, si que pronunciez
 Soit ce rondel que savons cy.
 Quelle part yrons nous de cy,
 Vierge pucelle ?

NOSTRE DAME

1745 Mes amis, en celle chappelle
 Irons sanz cy faire demour.
 Mais pour solaz faire et honnour
 A vous, Jehan, que cy voy estre
 Et a vous aussi, mon bon prestre,
 1750 Avecques moy vous en venrez
 Et avec moy retournerez

Quant me plaira.

SAINT JEHAN

Dame, vostre gré fait sera,
 Quant est de par moy, c'est droiture.
 1755 Vierge mère dessus nature,
 Vez me cy prest.

PREMIER CURÉ

Fontaine d'amour, aussi est
 Vostre chappellain qui cy sui.
 N'ay pas vo voloir a annuy,
 1760 Ains m'y assens.

191 a

GABRIEL

En alant chantons d'un assens
 Touz ensemble de voiz ysnelle.

RONDEL

1765 Amours et mercy sont en celle
 Ou douceur fait bonté florir.
 Avec biauté touz temps nouvelle
 Amours et mercy sont en celle.
 Pour ce qu'elle est et bonne et belle

Pour touz resjoir et guerir,
Amours et mercy sont en celle
Ou douceur fait bonté florir. 1770

LE PECHEUR GODART

Le cuer de joie me sautelle.
Ce saint homme m'a bien voir dit :
La mère du doulx Jhesu Crist
Voy la en sa propre faiture,
Sanz moy monstrier, ceste aventure 1775
Regarderay, en oroisons
Moy tenant tant que li sains homs
Lever me face.

LE FOL

Souveraine mère de grace,
Vostre poissance vertueuse 1780
Tresexcellent et precieuse
Soit loée, quant par la nue
Deignez ça jus estre venue
Moy visiter acompagnie
De si glorieuse mesnie 1785
Par votre benigne plaisir.
Bien doy avoir joye et desir
De tel noblesce.

NOSTRE DAME

Bon corps, j'ay bien veu l'umlesce
De ton cuer quant ça m'appelloies : 1790
Les loenges que reveloies
191 b De ta bouche ay bien entendu ;
Pour ç'ay je ça jus descendu
Toy visiter, qu'a gré me vient.
Scez tu qu'il est ? il te convient 1795
Avec mes anges accorder
En chantant et moy recorder
Aucune loenge nouvelle
Qui me soit et plaisant et belle ;

1800

Ainsi le vueil.

LE FOL

Dame, puisque c'est vostre vueil,
Faire le doy de désirée,

1805

Car la vois de moy inspirée
Est si de vous veoir presente

Et oir que je m'y presente
Presentement.

SAINT JEHAN

Ensemble d'un assentement

Nous fault d'un motet le recort

Chanter : bon fol, a nostre accort

1810

Tost vous mettez.

LE FOL

Mes amis, de ce ne doubtez :

Commenciez, et je vous suivray.

Je tenray ou je trebleray,

Quel que vouldrez.

LE PRESTRE

1815

Bien sçay que pas ne vous faindrez.

Sus, commençons.

YCI DIT HOM UN MOTET

NOSTRE DAME

Telz chans me sont doules leçons,

En les oir tant me deport;

Amis, et pour vostre deport

1820

L'ay je fait dire.

LE FOL

Ha! dame du royal empire,

Ce bien ne vous puis je merir;

Mais vous qui avez de perir

Tant de grans pecheurs respité

1825

D'un en vueillez avoir pitié

Qui ceens est tristes et mas

Pour ses pechiez, dont grant amas

191 c

Avoit ou cuer par l'ennemy,
 Qui de devenir vostre amy
 Le fortraioit a son pouoir. 1830
 Or li a Diex donné voloir
 De li amender de maint fait
 Qu'a un sien curé a meffait,
 Qui esconmenié long temps
 L'a tenu, pour ce que bestans 1835
 Ot contre lui si tresmortel
 Conme de sacher le coustel
 Sur li sanz demander pardon.
 Or est mors le curé preudon,
 Si n'est de lui ne d'autre absolz 1840
 Le pecherre qui cy dessoubz
 En tristesse mercy requiert.
 Doulce dame, de ce qu'il quiert
 Le confortez.

NOSTRE DAME

Pour t'amour sera confortez, 1845
 Car bien sçay ce qu'il t'a promis
 Et vueil qu'il ait ce qu'il a quis
 Devers toy, mercy requerant
 A moy quant il t'aloit querant.
 Par repentance si prouvé 1850
 S'est que moy querant t'a trouvé,
 Et sçay bien comment il vint ça
 Et par qui il s'i adresça.
 Va, si l'appelle sanz demour,
 Et je li feray pour t'amour 1855
 Graces appertes.

LE FOL

Tresdoulce dame, si acertes
 Savez ses faiz que riens n'y fault.
 Appeller le vois sanz deffault,
 Si verra de vous la faiture. 1860
 Liève sus tantost, creature.

Si vien regehir tes desrois
 A la mère au douls roy des roys :
 Bien scet tes euvres.

GODART

1865 Dame, qui pour tes amis oevres
 Vers Dieu ton glorieux enfant,
 Je suis cil qui de pechiez tant
 Ay fait que je ne sçay le nombre ;
 Mais celui qui le plus m'encombe
 1870 C'est d'un mien curé qui ja fu,
 Qui en sentence m'a tenu
 Pour plusieurs griefs que li ay fait :
 Or est mors, et de mon meffait
 Onques absoldre ne me volt
 1875 Ne je n'oy pas tant cuer devot
 Aussi que li en demandasse
 Pardon, ne vers li m'amendasse.
 Trespassez est, et je suis vis
 Ou pechié, si qu'il m'est avis
 1880 Que jamais secours n'en aray
 Se par vous n'est, mère au doulx roy.
 Si vueillez, trespiteuse dame,
 Secourre ceste povre d'ame ;
 Car se par vous ne truis secours,
 1885 Après mort en enfer le cours
 Aler m'estuet.

NOSTRE DAME

Amis, mon filz qui scet et puet
 Touz desrois remettre en compas
 Et moy si ne te faudrons pas
 1890 Pour l'amitié de mon servant
 Qui cy et partout moy servant
 Fait penitence, je t'otry
 Par grace et vueil que sanz detry
 Soiez absolz de celui prestre.
 1895 Regarde a destre et a senestre

- S'entre ces ames le verras,
 Ne se tu choisir l'i pourras.
 192 a Se choisir l'i peuz par nul point,
 Il t'assoldra, je n'en doubt point;
 C'est de mon gré. 1900
 GODART
- Mére au roy du divin secré,
 Quant ce vous plaist moy ottrier
 G'y garderay sanz detrier
 Au plaisir de vostre pourvoy.
 Dame, c'est cil que droit la voy 1905
 A destre part.
 NOSTRE DAME
- Prestre, a ce pecheur cy depart
 Et donne absolte tout a fait
 De quanque avoir te peut meffait,
 Sanz plus faire ent plainte ne clain. 1910
 Je vueil qu'il soit absolz a plain
 De quanque a meffait jusques cy.
 Amis, puisque requiert mercy,
 Aussi l'assol.
 PREMIER CURÉ
- Doulce dame, se fel et fol 1915
 Le trouvay quant mon corps vivoit,
 Touz les maux dont il m'estrivoit
 Li pardoin quant vous le voulez,
 Et quant vous mesmes l'absolvez.
 Je l'absoil de faiz et de diz 1920
 Au nom de Dieu, péres et filz
 Et sains esperis d'un pouoir.
 Amis, bien dois mercy avoir
 Quant la requiers.
 GODART
- A jointes mains, doulx sire chiers, 1925
 M'en enclin a vous pour le don
 Qu'absolz m'avez et fait pardon

- Par le conmandement piteux
 De la mère au roy deliteux
 1930 Qui n'a commencement ne fin ;
 Et mercy criant de cuer fin
 Vous requier bonnement, mains jointes,
 Qu'aie penitences enjointes *192 b*
 De vous a qui fui tant rebelles :
 1935 Car les paines me seront belles
 Et bonnes avec l'ordenance
 De la royne de puissance
 Que j'aour de sa courtoisie.
 Ma char vueil que soit mesaisie
 1940 Pour mes dessertes.
 PREMIER CURÉ
 Amis, tu voiz et scez acertes
 La dame des cieulx ycy est,
 A qui je suppli, si lui plaist,
 D'en ordener.
 NOSTRE DAME
 1945 Congié te doins de li donner
 Penance raisonnable et ferme,
 Et je li enjoing et conferme
 De l'acomplir.
 PREMIER CURÉ
 1950 Amis, pour toy miex raemplir
 D'esperance de grace avoir,
 De quanque tu pourras savoir
 En servant Dieu d'oracions
 Trois foiz le jour oblacions
 A ceste haulte dame sainte
 1955 Qui du fruit divin fut ençainte
 Devant son ymage feras ;
 Et ainsi persevereras
 Tant conme tu seras en vie,
 Et lairas l'orgueil et l'envie
 1960 Du monde repentablement

Pour vivre penitiblement :
Je le te charge.

NOSTRE DAME

Et je conferme ceste charge.
Or y met entente et desir,
Et i vueilles sanz desplaisir
Perseverer. 1965

GODART

192 c Tant conme vif pourray durer,
Haulte royne souveraine,
Sera mon oeuvre premeraine
De vous et vostre fils servir 1970
Pour ceste bonté desservir
Et cestui don.

NOSTRE DAME

S'en aras si hault guerredon
Tant conme la gloire des cieulx.
Se bien as fait, fais encor miex. 1975
Cy endroit plus ne demourray :
De vous deux me departiray ;
A mon glorieux fil m'en vois.
Anges, chantés a haulte vois
A mon retour. 1980

RAPHAEL

Fontaine de touz biens et tour,
Nous ferons vostre voulenté.
Avant : soions entalenté
De chanter, puisqu'il plaist a elle.

LE RONDEL DE DEVANT

Pour ce qu'elle est et bonne et belle 1985
Pour touz resjoir et guerir
Amours et mercy sont en celle
Ou douceur fait bonté fleurir.

GODART

O dame des cieulx, qui faillir
Ne savez a nulz qui vous quiére 1990

1995 Mais que de bon cuer vous requière,
 Con grandement qu'il ait meffait,
 De la grant grace du bien fait,
 Dame, qu'ay par vous en present
 Loenges et grés vous present
 De cuer entier.

LE FOL

2000 Amis, bien doiz estre rentier
 A la vierge ou Dieu prist hommage
 D'aourer souvent son ymage
 En la remembrance de ly,
 Car mie ne t'a deffailly
 N'a moy oir quant l'en requis : 192 d
 Trouvé as ce que tu as quis.

2005 E! fontaine d'umilité,
 Qui la povre fragilité
 De moy avez tant confortée,
 Vostre glorieuse portée
 Et vous en graci humblement
 Quant ça jus si begnignement
 2010 Venir voulsistes.

GODART

2015 De bonne heyre le fol feistes,
 Sains homs. Or vous vueil je requerre,
 Ains qu'avant voise pié de terre,
 Qu'il vous plaise qu'en cel demaine
 Conme vous ma vie use et maine
 Pour plus faire a mon corps contraire;
 Car jamais ne quiers ailleurs traire
 Ma penitence.

LE FOL

2020 Amis, je te dy sanz doubtaunce,
 Tel estat ne t'apartient pas.
 Mener dois vie par compas,
 Qu'avec moy point ne te mainray,
 Mais bien conseillicier te voulray,


Qu'en un autre lieu que scé bien
 Près de cy vouldisses en bien 2025
 Avec un saint hermite user
 Ta vie sanz le refuser,
 Quant a bien faire as mis tes veuz ;
 Si t'i conduiray se tu veuz
 Par bonne entente. 2030

GODART

Sire, sanz plus faire d'atente,
 Me menez a vostre plaisance,
 Car je prendray en souffisance
 Vostre vouloir.

LE FOL

Pour l'ame de toy mieulx valoir 2035
 T'i conduiray, quant bon te semble.



XVIII



MIRACLE

DE

THEODORE

PERSONNAGES

LE MARI THEODORE
THEODORE
L'AMANT
LA MAQUERELLE
L'ABBESSE
SUER YSABEL
QUEREUR DE SERMONS
LE PRESCHIEUR
L'ABBÉ
PREMIER MOINE
SECOND MOINE
DIEU
GABRIEL
MICHIEL
L'ENNEMI
L'OSTE
LA FILLE
LE VALLET
LA BELLE ANTE
NOSTRE DAME
LE FILZ

*Cy commence un miracle de Nostre Dame d'une
femme nommée Theodore qui pour son pechié se
mist en habit de homme et pour sa penance faire
devint moine et fut tenue pour homme jusques
après sa mort.*

197 a

LE MARI THEODORE

BELLE douce suer Theodore,
Je vous dy bien je deusse ore
Estre avec mon seigneur en guerre
Pour honneur et prouffit acquerre.
Mes gens en sont pieça alez. 5
D'estre plus ci ne me parlez :
G'y vois ; ne sçay quant revenray
Ne comment je besongneray.
A Dieu vous dy.

THEODORE

Mon seigneur, pas ne vous desdi. 10
Alez, a la vierge Marie
Qui vous soit et dame et amie !
Cy demourray.

L'AMANT

Amours, comment me cheviray ?
Tu me fais une dame amer 15
Dont trop me puis pour fol clamer.

Car elle est belle et bonne ensemble.
 Ainsi pers mon temps, ce me semble,
 Qu'elle ne scet point que je l'aime.
 20 Pour ç'a toy m'en complains et claime,
 Amours, car com plus la desir,
 Plus me truis des roiz de desir 197 b
 Pris et lacié de jour en jour,
 Et plus ay peine sanz sejour,
 25 Et n'est qui me puist esjouir
 Fors seulement d'elle jouir,
 Et c'est chose a faire moult fort
 Comment j'aie d'elle confort :
 Car onques a li ne parlay,
 30 Ne de l'amistié qu'a li ay
 N'a elle encore riens sceu ;
 Si me pourray pour deceu
 Tenir se ne li fas savoir
 Que de moy merci vueille avoir.
 35 Pour ce m'en vueil de cy aler
 Savoir s'a li pourray parler.
 Seule la voy ; c'est bien a point.

Theodore, bon jour vous doint
 Li doulx Jhesus.

THEODORE

40 Sire, et vous bien soiez venuz
 En cest hostel.

L'AMANT

Dame, je sui pour vous a tel
 Meschief que je ne le puis dire.
 Vostre amour mon cuer tel atire
 45 Que je ne say penser qu'a vous
 Ne ne fis grant temps a, cuer doulx.
 Je ne le vous puis plus celer :
 Et s'il vous plaist moy appeller
 Et tenir pour vostre ami, dame,

Je vous donrray robes, par m'ame,
 Et joyaux telx qu'il vous plaira,
 Si qu'en ceste ville n'ara
 Vostre pareille.

THEODORE

Ne plaise Dieu que m'apareille
 Ne consente vous acointier
 Pour telles choses convoitier !
 Sire, trop seroit grant damage
 Que je brise mon mariage.

Ne m'avenra ja, se Dieu plaist.
 Si ne m'en tenez plus de plait,
 Car vostre deshonneur feriez
 Et vos paroles gasteriez,
 Je vous promet.

197 c

L'AMANT

Dame, en vostre mercy me met.
 Mors sui se vous n'avez pitié
 De moy, et que vostre amistié
 Me soit donnée.

THEODORE

Dieu, qui me souffri estre née,
 Face que male mort me morde
 Avant qu'a tel pechié m'amorde.
 Fuiiez de cy.

L'AMANT

Elas! en paine et en souci
 Me convient dès ore mais vivre,
 Ne je ne voy comment delivre,
 Dame, en seray pour ce refus.
 Partir de vous dolent, confus
 Me faites, plain de desconfort.

Or ne sçay ou prendre confort,
 Car nu me voy et esgaré
 De toute joie et separé ;

Ne ne puis qu'est joie savoir,
 Puis que l'amour ne puis avoir
 De celle que j'ains ne la grace,
 Qui les autres en biauté passe.
 85 Mais ainsi pas ne la lairay
 En paiz, ains y envoieray
 Telle pour ma besongne faire
 Qui scet qui faut a tel affaire.
 Querir la vois sanz estre lent.

90 La la voy. Margot de Mulent,
 Qu'est ce ? ou vas tu ?

LA MAQUERELLE

Ne scé qui a trop bien batu
 La Mignote, ce me dit on ;
 Si vois savoir en sa maison
 95 Que ce peut estre.

L'AMANT

Je te vueil en besongne mettre,
 Mais qu'il t'agrée.

LA MAQUERELLE

Est ce chose qui soit secrée ?
 Ne me ment mie.

197 d

L'AMANT

100 Tout te diray conme a m'amie.
 J'ains Theodore vraiment
 Tant con je puis, mais nullement
 Ne veult mes paroles ouir.
 Se tu me peuz faire jouir
 105 De lui, je te promet sanz lobe
 Que je te donray une robe
 Trestoute neuve.

MAQUERELLE

Feras ? et j'en feray l'esprouve
 Ens en l'eure, je te promet ;
 110 Et s'en tel tour ne la te met

Qu'en jouiras com de t'amie,
Si di que ce ne suis je mie
Hardiement.

L'AMANT

Et tu l'aras certainement :
Va besoingnier. 115

LA MAQUERELLE

En l'eure sanz plus esloingnier,
Mais qu'elle seulement m'escoute,
La besongne feray sanz doubtte.

Dieux y soit, dame Theodore.
Egar ! estes vous ci seule ore ? 120
Ou sont voz gens ?

THEODORE

Dame, il n'y a que moy ceens
Quant a ore. Venez vous querre
Riens qui soit ? Dites moy bonne erre,
Que voulés vous ? 125

LA MAQUERELLE

Puis qu'il n'a icy que nous
Deux femmes, s'il vous vient a gré,
Un po vous diray de secré ;
Et ne prenez a villenie,
Pour Dieu, chose que je vous die, 130
Je vous en pri.

THEODORE

198 a Nanil, dame, ce vous ottry.
Dites touzjours.

LA MAQUERELLE

Mon enfant, il a plusieurs jours
Qu'un riches homs, gaiz et jolis, 135
A du tout son cuer en vous mis
Et vous aime tant sanz faucer
Que riens nulle ne peut penser
Fors conment de vous soit amez,

140 Et tout aussi qu'uns affamez
 Seiche et languist pour vous sur terre.
 Si vous vien prier et requerre
 Que pour li me vueilliez entendre.
 Vous estes femme, si que tendre
 145 Cuer devez avoir et piteux :
 Ce dont il est si diseteux,
 C'est la vostre amour qu'il requiert,
 Li donnez, dame : plus ne quiert.
 Il vous sera amis loyaux ;
 150 Robes vous donrra et joyaux.
 Autre foiz le vous a il dit,
 Mais refusé et escondit
 L'avez, si qu'il ne scet qu'il face ;
 Et certes s'il n'a vostre grace,
 155 Perduz sera.

THEODORE

Dame, je ne scé qu'il fera :
 Dieu li doint bien faire ou qu'il voit ;
 Mais devant mon Dieu qui tout voit
 Jamais tel pechié ne feroie ;
 160 Certainement miex ameroie
 La mort encorre.

LA MAQUERELLE

Dame, bien le pouez secourre,
 Se vous voulez ; vezci comment.
 Il est voir que Dieu clérement
 165 Voit quanque on fait de jours : pour quoi ?
 Pour la clarté du jour, par foy.
 Mais riens ne scet, ne vous ennuit,
 De chose c'on face de nuit ;
 Et c'est pour ce qu'il n'y voit mie
 170 Aussi com de jours, belle amie, 198 b
 Pour l'obscurté.

THEODORE

Dame, dites vous verité,

Se Dieu vous gart ?

LA MAQUERELLE

Aussi voir com je vous regart

Vous di je voir.

175

THEODORE

Ore vous li ferez savoir

Qu'a moy viengne quant nuit sera ,

Et je li promet qu'il ara

Ce qu'il desire.

LA MAQUERELLE

E ! mon enfant , Dieu le vous mire.

180

Je li vois de par vous nuncier.

Pense de ton cuer eslessier,

Meschant ribaut.

L'AMANT

Comment va ? di , pour saint Thibaut,

As tu riens fait ?

185

LA MAQUERELLE

Oil : il m'est promis de fait

Qu'après l'anuitier tu yras

Chiez li , et lors tu joiras

Tout a plain d'elle.

L'AMANT

Par foy, ci a bonne nouvelle :

190

Nous yrons souper moy et toy,

Et si aras je say bien quoy

Que te donrray.

LA MAQUERELLE

J'ay grant fain ; volentiers yray.

Or alons ; il est près du soir.

195

Mais nient moins je voulray avoir

Ma robe entière.

L'ABBESSE

Suer Ysabiau, m'amie chiére,

La journée est près de complie.
 Je vueil que nous disons complie :
 200 Il en est temps.

SUER YSABEL

Dame, vostre vouloir attens. 198 c
 Conmandez et je respondray.
 L'un ver direz, et je diray
 205 L'autre ensuivant.

L'ABBESSE

Pour estre a nous mains ennuiant,
 Tout bas disons.

SUER YSABEL

Dame, il me plaist, et c'est raisons,
 Quant le voulez.

L'AMANT

210 Desvez seroie et affolez
 Se d'aler mettoie en detri
 Vers ma dame, de qui l'ottri
 J'ay que je doy avoir s'amour.
 Pour c'y vueil aler sanz demour.
 215 J'ay plus chier la entour attendre
 Que par trop demourer mesprendre,
 Et áussi le me vault il miex.
 Vezla la ou elle ses yex
 M'a jetté. Je vois celle part.

220 Ma chiére dame, Dieu vous gart
 De mal et d'ire.

THEODORE

Vous soiez li bien venuz, sire.
 Passez outre hardiement :
 Il n'y a que moy seulement.
 225 En ma chambre vous vueil mener ;
 La pourrons ensemble parler

Privéement.

L'AMANT

Granz merciz, dame. Vraiment
De ma vie estoie en balance
Se n'eusse vostre acointance, 230
Je vous di voir.

THEODORE

Sire, je vous fas assavoir
Qu'aussi avez vous m'amistié
Pour une amoureuse pitié
Que de vous ay. 235

L'AMANT

198 d Ma chiére dame, bien le sçay,
Et je vous en scé si grant gré
Qu'a touz sera par moy secré,
Je vous promet.

THEODORE

Sire, en vous m'onneur toute met. 240
Je vous pri, si me soit gardée
Qu'estre ne puisse diffamée
De nul par vous.

L'AMANT

Dame, miex vouldroie avoir rous
Les braz par my. 245

THEODORE

Ore il m'est avis, chier ami,
Qu'a ce premier commencement
Nous avons assez longuement
Ensemble esté.

L'AMANT

Dame, vous dites verité. 250
Par vostre congié m'en iray.
Une autre foiz vous reverray
Plus a loisir.

THEODORE

Sire, tout a vostre plaisir
En ordenez. 255

L'AMANT

Or sui je de bonne heure nez
 Quant j'ay de la belle jouy,
 Qui tant a mon cuer esjouy
 Que je n'en sçay dire le conte.
 260 Car se j'estoie duc ou conte,
 Si me doit il souffire voir
 Telle dame a amie avoir.
 Pour ce sera touzjours amée
 De moy et ma dame clamée
 265 Et ma maistresse.

QUEREUR DE SERMONS

Dame, par devers vous m'adresce
 Pour vous dire, n'est pas secrez,
 Qu'un vaillant clerc, maistre en decrez,
 Dit maistre Guillaume Rousée,
 270 De qui n'est pas science ostée, 199 a
 Sermonnera presentement.
 Venez y, dame, appertement,
 Se me creez.

THEODORE

Perrin, est il maistre en decrez,
 275 En bonne foy?

LE QUEREUR DES SERMONS

Oil, dame, et sire de loy.
 Onques n'oistes telle bouche.
 C'est merveille comment il touche
 Biau son parler.

THEODORE

280 Atens moy; je vueil donc aler
 A son sermon.

LE PRESCHER

*In ecclesiis altissimi apperuit os suum. Ecclesiastici
 xxiiij.* Ou commencement de nostre brève colacion sa-

luons tuit la vierge benoite pour grace empetrer et li disons : *Ave Maria, etc. In ecclesiis, etc.* Pour avoir matère de devocion a la vierge mère Marie, nous pouons dire de elle les paroles proposées qui veulent ainsi dire en françois : es eglises de Dieu le père. La a parlé la vierge mère. Es quelles paroles la vierge benoite pour qui amour et reverence nous sommes ci assemblez est reconmandée d'aucunes choses a lui proprement appartenens et especiaument de discrecion de parole. Car elle est monstrée avoir en ses paroles meurté, opportunité et sobriété, comment il dit. Es eglises du treshault : par les eglises je n'entens fors la congregacion et l'assemblée des saintes personnes aunez et assemblez a l'onneur du treshault, c'est de Dieu le père. En telles eglises la glorieuse vierge ouvri sa bouche, voire pour parler discrettement, meurement et soubrement, et en signe de ce est il dit de la forte femme, *Proverbiorum ultimo : Os suum* 199b *apperuit sapiencie et lex clemencie sub lingua ejus.* Il est dit que la forte femme ouvri sa bouche a sagesce et la loy de douceur estoit sur sa langue. Or doiz tu savoir que je truis quatre eglises, se sont quatre assemblées, ou la glorieuse vierge ouvri sa bouche. La première fu de lui et de Gabriel l'archange: ileuc dist elle deux paroles, l'une de meure inquisicion, ce fu quant Gabriel lui dist que elle concevroit le filz de Dieu et elle li demanda : Comment me sera ce fait? la seconde si fu de l'umble et paisible octroy et concession, quant l'ange lui ot dit la manière et elle respondi : *Ecce ancilla domini, etc.* : Vezci la chamberière de Dieu; il me soit fait comme tu me dis. La seconde eglise ou assemblée si fu entre lui et Elizabeth sa cousine, quant le benoist Baptiste s'esjouy de sa venue ou ventre de sa mère; la ouvri sa bouche en Elizabeth saluant et en Dieu devotement regraciant, quant elle dit : Mon ame magniffie nostre seigneur. La tierce eglise fu la compagnie de li, de Joseph, et de Jhesu son filz; la dit l'evangeliste saint

Luc, *Luce II^o : Cum factus esset Jhesus duodecim annorum, etc., sequitur : Invenerunt eum in templo, etc.*, Quant Jhesus ot douze ans, ses parens et Jhesus monterent ou temple en Jherusalem selon la coustume du jour de la feste ; et quant ilz s'en revindrent, ilz oblièrent l'enfant Jhesu en Jherusalem et le perdirent trois jours ; et après ces trois jours ilz le trouvèrent ou temple entre les maistres et les docteurs de la loy ; la ouvri la vierge benoite sa bouche, en disant : *Fili, quid fecisti nobis sic?* Biau filz, que nous as tu fait ? vezci que ton
 199^c père et moy dolens te querion ; et ceste parole fu d'une amoderée reprehencion. La quarte eglise fu de la compagnie du benoist Jhesu, de Marie, et des disciples Jhesu, quant ilz furent appelez aux noces ; la ouvri la vierge sa bouche a parole de douce compassion, disant a son filz *Johannis II^o : Vinum non habent*, Biau filz, ilz n'ont point de vin ; a parole de seure informacion quant elle dist aux menistres : Faites tout ce qu'il vous dira. Ce furent quatre eglises qui proprement furent du treshault ; car ce furent quatre assemblées faites a l'onneur du treshault, c'est de Dieu le père ; et en ces quatre eglises est dit que la glorieuse vierge ouvri sa bouche a parler, set foiz et non plus. Mais regarde comment elle l'ouvri fructueusement, car elle parla meurement, prouffitablement et sobrement. Dont saint Jehan Crisostomes dit : Marie ne fut ne ligière parlerresse, ne jouerresse, ne chanterresse ne de laides paroles amaresse, conme sont plusieurs pucelles a il ou monde ; pour ce dit saint Anseaumes de elle en ses meditations : O femme singulière merveilleusement, o femme merveilleuse singulièrement, par qui li ellement sont renouvelé et li fil d'enfer ont remède trouvé, par qui li hommes sont sauvé et li anges reintegré ; dame, tes benefices trepercent les enfers et surmontent les cieulx, car par la planté de ta grace ceulx qui estoient en enfer sont liement delivrez et ceulx qui sont es cieulx joieusement retorez. Et saint Bernart

si dit que elle est la clére estoille née de Jacob qui par ses raiz enlumine tout le monde, qui tout treperce par *199 d* exemples et reluit par merites. Pour ce, tu quiconques es, qui te vois es ondes du fluve de ce monde plus plungier que sur terre aler, ne ostes onques tes yex de la lueur de ceste estoille regarder, se tu ne veulz trebuchier. Car se dit saint Bernart : Se tu la suiz, tu ne peuz forsvoyer ; se tu la pries, ne te doiz desesperer ; se tu penses a li, tu ne peuz errer ; se elle te deffent, tu n'as ame a doubter ; se elle te mainne, tu ne te peuz lasser ; se elle t'est propice, ne t'estuet de parvenir a la gloire de paradis doubter. Laquelle gloire nous otroit *ille qui est Deus benedictus in secula seculorum. Amen.*

THEODORE

Lasse! pecherresse! en quel an
 Sui je, lasse, plaine de rage?
 Qu'ay je fait? j'ay mon mariage
 Brisé, et a perdicion 285
 Mis m'ame, et a destruccion
 Ma biauté, mon honneur, mon corps.
 Ha! tresdoulx Dieu misericors,
 Conment ay je esté si surprise?
 Lasse! lasse! a tart m'en avise. 290
 Certes du dueil morir voulroie.
 Lasse! jamais jour n'aray joie
 Et a bon droit.

LE MARI

Qu'est ce? Qu'avez vous orendroit,
 Ma suer? Estes vous affolée, 295
 Qui ainsi estes esplourée?
 Je vous dy bien que je m'en dueil ;
 Et certainement savoir vueil
 Dont ce dueil vient.

THEODORE

300 Mal ait la vie qui me tient !
 Lasse! lasse! que pourray faire? 200 a
 Lasse! trop mal va mon affaire.
 Laissez m'en paiz.

LE MARI

Et ne finerez vous hui mais
 305 Autrement? Au mains dites moy
 Que vous avez, je vous en proy,
 Et pour m'amour vous deportez
 De tel dueil, et vous confortez;
 Et s'en y peut remède mettre,
 310 Je vous jur par le roy celestre
 Je l'i mettray.

THEODORE

C'est pour nient. Ce dueil maintendray
 Certes tant conme j'aray vie.
 Si n'ay de nulle riens envie
 315 Fors de la mort.

LE MARI

Puisque vostre vouloir s'amort
 Que ce dueil point ne laisserez
 Et qu'autre riens ne me direz,
 Je vois souper chiez mon compère.
 320 Cy ne pourroie a telle chiére
 Mengier ne boire.

THEODORE

Souveraine dame de gloire,
 Fontaine de misericorde,
 Quant de mon pechié me recorde
 325 De paour me tremblent li membre.
 E! dame, de moy vous remembre,
 Car je ne scé s'il peut voir estre
 Qu'en sache riens le roy celestre,
 Pour ce que je l'ay fait de nuit.
 330 Mais maintenant, quoy qu'il m'ennuit,

L'iray demander a l'abbesce :
 Elle est assez bonne clergesce,
 Elle ne m'en mentira mie.
 Je vois a li en s'abbaie.
 Je vieng bien a point; la la voy. 335

200 b Ma dame, pour Dieu, dites moy :
 Voit Diex et scet aussi le fait
 Du pechié qui de nuiz est fait
 Conme de jours ?

L'ABBESSE

Certes, m'amie, oil, touzjours : 340
 Soit bien, soit mal, quanque faisons,
 Quanque pensons, quanque disons
 Soit de jours, soit de nuit sanz doubte,
 Il en scet la verité toute
 Sanz ficcion. 345

THEODORE

Pour miex a vostre oppinion
 Croire, ma dame, je vous pri
 Q'un livre aie cy sanz detri
 D'evangilles, car g'y vouldray
 Je mesmes sortir; si verray 350
 S'il est ainsi.

L'ABBESSE

Voulientiers. Apportez me cy,
 Suer Ysabiau, sanz detrier
 Nostre grant evangelier :
 Faites bonne erre. 355

SUER YSABEL

Dame, en l'eure le vous vois querre.
 Vezci celui que demandez.
 Ou le mettray je? Conmandez
 Que j'en feray.

THEODORE

Bailliez ça, suer; je l'ouverray. 360

De ceste première ouverture,
 Dame, qu'a il en l'escripture
 De ce mot cy?

L'ABBESSE

Il y a : *Quod scripsi, scripsi,*
 365 Qui veult ytant dire en françoys :
 Ce que j'é escript une fois
 Si est escript.

THEODORE

Que feray je, doulx Jhesu Crist?
 M'amie, tenez vostre livre.
 370 Dame, je voi tout a delivre
 Que ce que m'avez dit est voir.
 J'ay bien cause de plourer, voir. 200 c
 Lasse ! dolente, que feray,
 Ne conment du dueil cheviray
 375 Que j'ay au cuer?

L'ABBESSE

Et qu'avez vous, ma douce suer,
 Qui si amérement plorez?
 Pour Dieu, ne vous desesperez.
 S'ore avez tribulacion,
 380 Requerez par devocion
 Aide a la vierge Marie,
 Et vraiment je ne doubt mie
 Que ne l'aiez.

SUER YSABEL

A telz cuers ainsi esmaiez
 385 Vient a la foiz li ennemis,
 Et sachiez que plusieurs a mis
 En desespoir ; trop est subtil.
 Je vous dis bien c'est grant peril
 De tel dueil faire.

THEODORE

390 Certes, je ne m'en puis retraire,
 Tant sui plaine de grant tristesse.

A Dieu, ma dame l'abbesse !
 Priez pour moy.

L'ABBESSE

Jhesu Christ, le souverain roy,
 M'amie, vous doint son confort. 395
 Pitié m'a fait du desconfort
 Ou l'ai veu.

SUER YSABEL

Le cuer m'en est si esmeu
 Que je n'ay oeil qui n'en lermoie.
 Jetter l'en vueille et donner joie 400
 Dieu bonnement!

L'ABBESSE

Ainsi soit il. Suer, alons ment
 En noz jardins un po deduire :
 Tantdis pourra pour souper cuire
 Nostre viande. 405

SUER YSABEL

200 d Ma dame, de voulenté grande
 A vo vouloir obeiray,
 Et vostre voulenté feray :
 C'est de raison.

THEODORE

J'ay bien plaine de traison 410
 Esté contre mon bon mari,
 Mais j'ay de ce cuer plus marri
 Que je t'ay, mon Dieu, courroucié
 Et par mon pechié delaissié.

Sire, si le t'amenderay : 415

Dès maintenant commenceray.
 Vezla mes tresses jus copées ;
 Plus ne seront de moy portées.

Ma propre robe aussi lairay
 Et robe d'omme vestiray 420

Pour aler aval le pais.
 Li ennemis s'est envais
 Contre moy et m'a fait pechier,
 Mais voir je le pense trichier.
 425 Puis que conme homme suis vestue,
 Aler m'en vueil sanz attendue :
 Hostel et meubles, je vous lais ;
 Mes amis touz et clers et lais,
 Le mendre aussi com le greigneur,
 430 Conmant a Dieu nostre seigneur ;
 Mais sur touz par especial
 A Dieu, mon chier seigneur loyal,
 Qui vous et moy ait en sa garde !
 E! douce mère Dieu, regarde
 435 En pitié ceste pecherresce,
 Et prie ton filz qu'il m'adresce
 Et me sequeure a ce besoing.
 De mon pais sui ja si loing,
 Tant ay erré par champs et villes,
 440 Que j'en sui a plus de dix milles,
 Si que je sui toute esbahie.
 Aler vueil en celle abbaie
 Savoir s'il pourroit avenir
 Que l'en m'y vouldist retenir.
 445 L'en tient que c'est un devot lieu.

Pais soit entre ces hommes Dieu.
 Est l'abbé ci ?

201 a

L'ABBÉ

Oil, mon ami, vez me cy.
 Que voulez vous ?

THEODORE

450 Je vous requier, sire, et a touz
 Voz autres frères qui sont cy
 Que par la vostre et leur mercy
 Vous me deigniez en frère prendre

Et pour m'ame sauver apprendre
A Dieu servir devotement. 455

Car je vous di bien vraiment
Pour miex entendre a servir Dieu
J'ay guerpi mes gens et mon lieu ;
Et ne vous soit point en ennui
Se je ne vous ai dont je sui 460
Dit quant a ore.

L'ABBÉ

Conment avez nom ?

THEODORE

Theodore

Sui nommez, sire.

L'ABBÉ

Biaux seigneurs, que voulez vous dire ?
Vous avez ouy qu'il requiert 465
Et qu'a Dieu servir sanz plus quiert,
Si conme il dit.

PREMIER MOINE

Mettre ne vueil nul contredit
Qu'il ne soit frère.

SECOND MOINE

Ne moy. Vezci pour quoy, biau père : 470
Il est jounes homs; moult pourra
Besongnier pour nous, qu'il vouldra
Et ça et la pour nous aler :
Si conseil que sanz plus parler
Le recevez. 475

L'ABBÉ

Il me plaist, puis qu'en gré l'avez.
Theodore, amis, vien avant.

Frère te fas de ce convent
Par cy que tu obeiras
A nous touz, et chaste seras 480
Sanz propre avoir.

THEODORE

Sire, je le vous promet voir,
Et c'est raison.

L'ABBÉ

Menez le sanz arretoison
485 La de sa robe desvestir
Et de nostre habit revestir.
Or tost, alez.

PREMIER MOINE

Voulientiers, puis que le voulez.
Ça, Theodore.

LE MARI

490 Je ne scé se ma femme encore
Fait autel dueil conme yer faisoit.
Vraiment il me desplaisoit,
Quant savoir n'en puis l'achoisson.
Je m'en vois veoir a maison
495 Sa contenance et sa manière.
Theodore, m'amie chiére,
Estes vous la? dites, parlez.
Egar! sui je ci affolez
Ou s'il n'a ceens homs ne famme?
500 Estes vous lassus, dites, dame?
Je voi bien qu'elle n'y est pas.
Je vueil savoir isnel le pas
S'elle est chiez nulz de ses amis.
Le dueil ou l'ai laissé m'a mis
505 En une souspeçon mauvaise.
Le cuer ne pourroie avoir aise
Tant que la voie.

PREMIER MOINE

Theodore, il nous fault a voie
Mettre de raler au moustier,

Pour faire le divin mestier
Et nostre office. 510

THEODORE

Conmandez moy conme a novice
Et j'humblement obeiray.
Devant conme novice iray,
201 c Se vous voulez. 515

SECOND MOINE

Vous dites bien : oil, alez.
Nous vous suivrons.

L'ABBÉ

Or ça, seigneurs, ça, si dirons
Commendances qu'avons a dire
En voz livrez pensez de lire 520
A voiz bassete.

PREMIER MOINE

Vostre volenté sera faite,
Sire, c'est droiz.

LE MARI

Or sui je bien en touz endroiz
Povre et nu de beneurté 525
Et venuz a maleurté,

Quant j'ay ma compaigne perdue.
Je doy bien avoir esperdue
La pensée, et si ay je voir,
Quant nouvelles n'en puis savoir. 530

Nulz ne la me scet enseigner.
Elas ! je me doy bien seignier
Et esbahir de ceste perte.
Las ! que feray ? au cuer apperte
Douleur en ay. 535

SECOND MOINE

Mon seigneur, comment cheviray ?

Sachiez que nostre huile deffault.
 Garnison faire nous en fault :
 Point n'en avons.

L'ABBÉ

540 Si feray que nous en arons.
 Theodore, vous en rirez
 Querre et nous en achetterez
 A la cité de Rougeval.
 Prenez en tant com le cheval
 545 De ceens en pourra porter.
 Alez y sanz plus deporter,
 Et vous tenez entre la gent
 Simplement. Vezci de l'argent.
 Alez bonne erre.

THEODORE

550 Sire, je vois le cheval querre;
 Si l'en menray avecques moy.
 Je feray le miex, par ma foy,
 Que saray faire.

201 d

LE MARI

555 Et! douce amie debonnaire,
 Conment estes ainsi perdue?
 Voir d'aucun estes deceue
 Qui vous en maine, je l'espoir.
 A po que ne me desespoir,
 Certes, pour vous, tant hé ma vie.
 560 Las! conment m'estes vous ravie
 Si fausement?

DIEU

Gabriel, va t'en erranment
 Dire au mari de Theodore
 Que plus en son dueil ne s'acore,

Mais qu'il s'appareille et atire 565
 D'aler au chemin du martire
 Saint Pére et saint Pol, et pour voir
 La pourra sa femme veoir
 Venir sanz doubte.

GABRIEL

Sire, vostre voulenté toute 570
 Vois faire sanz arrestoison.

Biaux amis, entens ma raison.
 Dieu te mande, qui ci m'envoie,
 Que tu t'en vois en la voie
 C'on dit le martire saint Pére 575
 Et saint Pol, des docteurs le pére,
 Et que la quant tu y seras
 Ta femme veoir y pourras ;
 Je te creant.

LE MARI

E ! Diex, trop seray recreant. 580
 Se plus sui cy. Certes g'y vois
 La ou m'a endicté la vois.
 Bien say le chemin et la voie.
 Ne m'en chaut mais que je la voie.

En ce quarrefour me tendray 585
 Et si endroit l'attendèray :
 Trop me fait mal.

THEODORE

202 a

Puis que j'ay dessus ce cheval
 Troussé mes barilz et mon bas,
 Le chemin m'en vois hault et bas 590
 Tant qu'a Rougeval venir puisse :
 Dieu doint que marché d'uile truisse.
 Lasse ! je voy la mon mari.
 Je croy pour moy est moult marri,

595 Car je le voy pensis et morne.
 Ne sçay s'il vaut miex que retourne
 Ou qu'en passant a li me moustre.
 E! Diex, je m'en iray tout oultre.
 Saluer le vueil en passant.

600 Mon seigneur, Dieu le tout puissant
 Joye vous doint.

LE MARI

Amen, dan moine, et si pardoint
 A vous et a moy les pechiez
 Dont les cuers avons entechiez
 605 Et enlaidiz.

THEODORE

Ha! mon bon mari, conme en diz
 Et en faiz de nuit et de jour
 Je travaille et ay de labour,
 Afin qu'eschaper le meffait
 610 Puisse que j'ay contre toy fait
 Et conceu!

LE MARI

Las! je me tieng pour deceu.
 Je voi bien que l'en m'a rusé.
 J'ay toute jour icy musé
 615 Et si n'est point venue encore
 Celle qu'atens. Hé! Theodore,
 Je voi bien que perdu vous ay.
 Ci endroit plus ne museray.
 Dieu, qui souffri son corps pener,
 620 Suer, te vueille en tel lieu mener
 Et ta vie si maintenir
 Qu'a bonne fin puisses venir,
 Et la paine que tu me fais
 Te pardoint, et touz tes meffaiz
 625 Autres aussi.

202 b

DIEU

Michiel, liève sus tost de cy.
 Va dire au mari Theodore
 Que le moine qui passa ore
 Par devant lui, c'estoit sa fame
 Et qu'il n'en die nul diffame, 630
 Qu'il aroit tort.

MICHIEL

Sire, bien feray ce recort.

Dieu te gart, amis; or entens.
 Tu crois avoir perdu ton temps
 Et si te tiens pour deceu : 635
 Sachiez le moine qu'a veu
 Si est ta femme en verité.
 Dieu s'est vers toy bien acquitté
 De sa promesse.

LE MARI

Elas ! dolens, mon Dieu, et qu'est ce ? 640
 Comment ay je esté si avugle,
 Si malostru, si fol, si bugle
 Que je ne l'ay pas ravisée ?
 Las ! malement s'est deguisée.
 La suiveray je ? que feray ? 645
 Oil, voire, mais ou iray ?
 Las ? je ne scé de quelle part.
 Le cuer de dueil pour li me part.
 Confortez moy, biau sire Diex !
 Retourner m'en vueil pour le miex 650
 En mon droit estre.

THEODORE

E ? mère Dieu, s'il peust estre
 Qu'en nostre abbaie ore fusse
 Ou soupper et couchier sceusse

655 Bien! mais n'y puis hui mais aler.
Leens me fauldra hosteller :
C'est mon repaire.

L'ENNEMI

Fole musarde deputaire,
Qui brisié as ton mariage,
660 As tu pris cest abit sauvage ?
Pour ce que si tu me desprises
Que mes faiz ne moy riens ne prises, 202 c
Par mes vertus c'on doit bien craindre,
Briefment te feray si contraindre
665 D'aversité et si lier
Que je te feray renier
Ton crucefiz.

THEODORE

Biau sire Dieux, péres et filz,
Gardez moy de cest ennemi
670 Qu'il n'ait de riens pouoir sur my.
Je te conjur, faux Sathanaz,
Tantost en sus de ci t'en vaz
Sanz moy touchier.

L'ENNEMI

Haro! ne la puis approuchier :
675 Le signe a fait qui tant me nuit.
Je te feray ains qu'il soit nuit
Assez contraire.

THEODORE

Biaux hostes, ceens me vieng traire
Pour herbergier ; ne vous ennuit.
680 Je voy qu'il est près de la nuit
Et me sens un po travaillié.
Avez vous riens appareillié
C'on puist mengier ?

L'OSTE

Vous avez assez sanz dangier.

Alez faire mettre la table. 685
 Ce cheval menray en l'estable
 Et si le vous destrousseray
 Et courreer le vous feray
 De bonne pille.

THEODORE

C'est bien dit. Dieu gart celle fille 690
 Que ci voy ore.

LA FILLE

Bien veigniez, frère Theodore.
 Conment vous est ?

THEODORE

M'amie, il m'est bien, se Dieu plaist.
 Et vous conment ? 695

LA FILLE

202 d Sire, a vostre conmandement,
 Com celle qui vous aime bien
 Et qui pour mon ami vous tien,
 N'en doubtez mie.

THEODORE

Dieu le vous rende, douce amie. 700
 La table mettez, je vous pri.
 Souper vueil et puis sanz detri
 Aler couchier.

LA FILLE

Puis qu'il vous plaist, mon ami chier,
 Sanz plus delaier la vois mettre, 705
 Et si me voulray entremettre
 De vous servir.

THEODORE

Et je le voulray desservir,
 M'amie chiére.

L'OSTE

Vostre cheval si a litière, 710
 Ce sachiez, frère Theodore,
 Jusqu'au genoil et plus encore.

Ça souppons. Servez nous, pucelle;
 Apportez nous celle escuelle
 Ou est le rost.

715

LA FILLE

Mon seigneur, vous l'arez tantost.
 Tenez, chier sire.

THEODORE

Ce mès vault bien eufs, par saint Cire;
 Puisqu'il est ci, j'en vueil mengier;
 De la jeune me vueil vengier
 Que j'ay hui fait.

720

L'OSTE

Ce ne sera mie mal fait.
 Or mengiez et je trancheray
 Devant vous, et si mengeray
 Avec vous, frère.

725

THEODORE

Et je vous em pri, qu'il m'appére
 Combien pouez avoir grant fain.
 Or avant : mettez ci la main
 A la viande.

LE VALLET

730

Je ne suis pas filz de truande :
 Je vien bien a point, ce me semble.
 Dieu gart la compagnie ensemble
 Que je cy voy.

203 a

L'OSTE

Qu'as tu fait? dont tu viens? di moy,
 Ne me mens point.

735

LE VALLET

La besongne va bien a point.
 L'en ma dit, ne vous esmaiez,
 Que dymenche serez paiez
 Certainement.

THEODORE

740

Nous avons assez longuement

Sis a table. Lever m'en vueil,
Biaux hostes, car j'ay grant sommeil,
Je vous promet.

L'OSTE

Frère, vostre lit est tout prest.
Menez le couchier, belle fille. 745
Je m'en vois un po en la ville.
Guillot, quant elle revenra,
Soupez de ce qu'il y ara
Tout a vostre aise.

LE VALLET

Si ferons nous, par saint Nicaise, 750
Et a loisir.

LA FILLE

Frère, s'il vous vient a plaisir
Et a gré, je sui vostre amie.
Onques homme en jour de ma vie
Je n'amay tant com je fas vous. 755
Il n'a ame ci fors que nous ;
Si vous pri vostre amour m'offrez,
Et ja quant point sera souffrez
Qu'avecques vous viengne couchier,
Conme avecques mon ami chier 760
Que j'ain de cuer.

THEODORE

Certes, belle fille, a nul feur
Je ne feroie tel oultrage
Que j'aie vostre pucelage.
203 b Haro! comment l'osez vous dire? 765
Vous devriez celi maudire
Et hair tant con l'en pourroit
Qui tel chose vous requerroit.
Ou avez vous mis vostre assenz ?
Vous estes, je croi, hors du senz, 770
Qui requerez c'on vous ahonte.

Ha! mère Dieu! n'avez vous honte?
Vuidez : fi! fi!

LA FILLE

Theodore, je vous affi
775 Que je ne l'ay dit que par ruse,
Pour vous faire paier la muse
Se je pouoie.

THEODORE

Gardez que maishui ne vous voie;
Alez vous ent.

LA FILLE

780 Bien doy avoir le cuer dolent
Quant de celi sui refusée
Ou estoit toute ma pensée,
Que j'ay si longuement amé,
Et il m'a vilment refusé
785 Pour ce que li ay descouvert
Mon cuer et mon desir ouvert :
C'est mesprison.

LE VALET

Sa, souppons; il en est saison,
Ce m'est avis.

LA FILLE

790 Guillot, soit fait a ton devis.
Seoir me vueil encontre toy,
Et si vueil mengier, par ma foy,
En t'escuelle.

LE VALLET

795 Et donc s'en suivra il, pucelle,
Que nous tant nous entramerons
Que nous deux q'un lit ne ferons :
C'est mes recors.

LA FILLE

Et par ma foy, je le t'acors,

XVIII	THEODORE	99
203 c	Mais je te pri qu'il soit secré, Et je feray du tout ton gré. Quant mon seigneur couchié aras, En ma chambre droit t'en venras Sanz nul mot dire.	800
	LE VALLET	
	De ce ne vous vueil escondire. Ore a tant pais.	805
	L'OSTE	
	Sa, je vieng; il est temps hui mais Que chascun resposer se voise. Avant, sans point faire de noise, Fille, allez y.	
	LA FILLE	
	Mon seigneur, point ne vous desdy. G'y vois en l'eure.	810
	L'OSTE	
	Et je sanz plus faire demeure. Guillot, vien, si me couverras Et puis aussi couchier t'iras Quant le seray.	815
	LE VALLET	
	Sire, volentiers le feray ; N'en doubtez pas.	
	L'OSTE	
	Je sui bien, Guillot; or t'en vas. Quant Theodore s'en vouldra Aler et il appellera, Va mettre a son cheval le bas Et le trousse. Or ne laisse pas : Tu m'entens bien?	820
	LE VALLET	
	Se fas mon. N'en doubtez de rien. A Dieu, qui bonne nuit vous doint! Je m'en vois, car il est a point, Devers m'amie.	825

LA FILLE

Haro! Guillot, tu ne scez mie
Qu'anuié m'a.

LE VALLET

830 Et a moy quoy? mais ainsi va :
Je n'ay peu plus tost venir.
Encor ne me puis je tenir
Yci q'un po, car il me fault
Garder que par moy n'ait deffault
835 Ce moine quant il s'en voudra
Aler, et il m'appellera,
Que prest ne soie.

203 d

LA FILLE

840 Ha! sire, Dieu doint qu'il se noye
Ençois qu'en s'abbaie viengne,
Ou qu'il se puist, tant li mesviengne,
Briser le col.

THEODORE

845 De plus ci estre seray fol.
Je vueil le vallet appeller
De ceens : il m'en fault aler.
Guillot, sus, sus.

LE VALLET

Cy ne puis, m'amie, estre plus.
Je vois la, sire.

THEODORE

850 Guillot, par amours te vueil dire
Pour moy que tant faces et paines
Que mon cheval troussé m'amaines
Yci devant.

LE VALLET

Il vous sera fait maintenant.
Sa, vez le cy.

THEODORE

La teue tresbonne mercy.

A Dieu ! salue moy mon hoste.
Aler m'en vueil par ci de coste. 855

Je voy bien a mon cheminer
Qu'en l'abbaye devant diner
Venrray. Vez la la ci devant.
Avant que m'en monstre au convent, 860
Je vois mon cheval destrousser,
Establer, froter et housser
Et sa prouvende li donrray.

C'est fait. Au moustier m'en iray
Avec mes frères Dieu prier. 865
Je ne m'en vueil plus detrier.

Mes frères, Dieu soit avec vous,
Dans abbes, et, par dessus touz,
204 a Vous doint sa gloire.

L'ABBÉ

Bien veigniez, frère Theodore. 870
Conment avez vous puis marchié ?
Avons nous d'uille bon marchié ?
Dites moy voir.

THEODORE

Sire, je vous fas assavoir,
Combien que je soie sot homme, 875
J'en ay acheté tant en somme
Que jusques a la saint Jehan
En avez, voire a plus d'un an.
Soiez en seur.

LE PREMIER MOINNE

Frère, ce soit en bon eur. 880
En ce n'avez peu meffaire.
Car touzjours en a l'en a faire
En plus d'un cas.

SECOND MOINE

885 Biau frère, vous ne mentez pas,
Mais tout voir dites.

L'ABBÉ

Or pais, seigneurs ; il en est quittes
De raler y jusqu'a grant pièce.
Je vous conment chascun se siesce
Et selon son affeccion
890 Monstre a Dieu sa devocion
Et son desir.

LE PREMIER MOINE

Dans abbes, a vostre plaisir .
Cy me serray.

SECOND MOINE

895 Et je aussi com vous feray,
Se m'aist Diex.

THEODORE

Et je pour entendre un po miex
A ce que vueil dire et a Dieu
Vueil solitaire estre en ce lieu
Et devant cest autel veillier,
900 Et si me vueil agenoillier
Pour prier des cieulx la royne.
Ave, dame, en qui la divine
Poissance des cieulx si ouvra
Que parmy vous nous recouvra
905 Et nous ouvri ce que jadis
Femme nous clost, c'est paradis ;
Glorieuse vierge pucelle,
Regarde en pitié moy t'encelle ;
Car, dame, tu es m'esperance
910 Et en toy seule est ma fiance :
Que j'aie pardon du pechié
Don Sathan m'a si entechié
Et mon ame si enlaidie.
E! mére Dieu, fai que je die

204 b

Aussi com saint Bernart recorde, 915
 C'est que ta grant misericorde
 Fait tant pour tout cuer qui te sert
 Que l'amour de ton filz dessert ;
 Et pour ce qu'en pitié me voies,
 En l'onneur de voz quinze joies, 920
 Dame, diray ci quize seaumes
 Et des loenges saint Anseaumes
 Ce que j'en sçay.

LA FILLE

Las ! cuer dolent et plain d'esmay
 Doy avoir : sanz cause n'est mie, 925
 Quant je voy que par ma folie
 J'ay fait honte a tout mon lignage ;
 Car j'ay donné mon pucelage
 A tel qui n'a ne sens n'avoir,
 Et sui preste d'enfant avoir. 930
 Lasse ! comment me cheviray ?
 Pour le miex de ci m'en iray,
 Je croy, chiez ma belle ante Thiesce
 Et li prieray qu'une pièce
 Face avecques lui demourée 935
 Tant que je soie relevée.
 Se je sui de dire contrainte
 De qui c'est que je suis enceinte,
 Je ne pense a respondre encore
 Fors que de frère Theodore. 940
 G'y vois tout droit.

LA BELLE ANTE

Qu'est ce ? dont viens tu ci endroit,
 Di, belle niepce ?

204 c

LA FILLE

Pour Dieu merci, belle ante Thièce :

945 Aidiez moy, ou perdue sui.
 J'ay meschief et assez annuy
 A porter, voir.

LA BELLE ANTE

Et de quoy? je le vueil savoir
 Ysnellement.

LA FILLE

950 Je suis malade vraiment
 D'enfant; le celer riens n'y vault.
 Diex! que feray? le cuer me fault.
 Hau! Diex! les reins.

LA BELLE ANTE

955 Met sur mes espauls tes mains.
 En nostre jardin te menray
 Et la bien garder te feray.
 Mais de cest enfent, dont es mère,
 De moy dire qui est le père
 Ne soiez lente.

LA FILLE

960 Frère Theodore, belle ante,
 En est le père a brief parler.
 Dieux! je ne puis avant aler,
 Tant sanz d'angoisse.

LA BELLE ANTE

965 Avant que ton mal plus t'engoisse,
 Fole, boutons nous ci dedens :
 Si ne nous verront pas les gens.
 Delivres toy.

L'OSTE

970 Guillot, ma fille ou est? dy moy.
 Grant pièce m'a fait ci seoir
 Et ceens ne la puis veoir.
 Ou est elle allée?

LE VALLET

Sire, par la vierge honnorée,
 Je ne scé, se n'est au moustier.
 Se vous avez de li mestier,
 Querre l'iray.

975

L'OSTE

204 d Nanil, non, je l'attenderay.
 Passion la fière !

LA BELLE ANTE

Biau frère, faites bonne chiére.
 Vostre fille a eu un filz
 En mon jardin, soiez en fiz,
 Tout maintenant.

980

L'OSTE

Vous m'alez pour un fol tenant,
 Je croy, suer Thiéce.

L'ANTE

Non fas, se ja ne me meschiéce.
 En l'eure en son lit l'ay laissie.
 Moult grant honte s'est pourchassie
 Et a nous touz.

985

L'OSTE

Sainte Marie! et savez vous
 Point de qui c'est ?

LA BELLE ANTE

Biaux doulx frère, je vous promet
 Qu'elle le donne tout a plain
 Et dit qu'il est pour tout certain
 A un moine de telle affaire,
 Qui ceens bien souvent repaire
 Et y fut devant ier encore :
 Il a nom frère Theodore,
 Si com j'entens.

990

995

L'OSTE

L'ay je pour ce ceens long temps

Si benignement receu
 1000 Qu'elle et moy a si deceu ?
 Et! par la foy que doi saint George,
 Jamais de pain en ceste gorge
 N'enterra ne ne mengeray
 Tant que de li vengié seray.
 1005 Je vous pri l'enfant m'alez querre
 Et le m'apportez ci bonne erre :
 Veoir le vueil.

LA BELLE ANTE

Par saint Spire de Corbueil,
 Frère, moult volentiers je vois.

1010 Tenez : ne veistes des mois
 Plus bel enfant.

205 a

L'OSTE

Foy que doy Dieu, tout maintenant
 Le presenteray a l'abbé.
 Si verra conment m'a gabé.

1015 Dans abbes, que ci voy present,
 Tenez, recevez ce present
 Que vous apport.

L'ABBÉ

A moy, mon ami ? c'est a tort.
 Portez l'ailleurs; vous estes nices.

1020 Enne sommes nous pas norrices
 D'enfans petiz.

L'OSTE

Vostre moine a mon pain fetiz
 L'a fait : que le dyable y ait part!
 Si demourra, se Dieu me gart,

1025 A l'abbaie.

L'ABBÉ

Vous me faites toute esbaye
 La pensée et estre en tristesse.

Pour Dieu, dites moy lequel est ce :
Nel celez ore.

L'OSTE

C'est vostre moine Theodore : 1030
Or le gardez.

L'ABBÉ

Ha! Theodore, or regardez
Le hontage et le grant annui
Que par vous avons au jour d'ui.
Qui ceens onques mais ce vit? 1035
Voirement dit on voir : l'abbit
Ne fait pas le religieux.
Comment avez si outrageux
Esté, biau frère?

THEODORE

Merci! merci! doulz abbes pére, 1040
Merci! merci!

L'ABBÉ

Vous l'arez : quelle? vez la ci.
De ceens vous bouteray hors,
205 b Si me soit Diex misericors,
Et vostre enfant emporterez. 1045
Autre merci de moy n'arez.
Tenez, de ceens tost yssiez.
Alez, et si le norrissiez
De nous bien loing.

THEODORE

Confortez moy a ce besoing, 1050
Fontaine de misericorde.
Car je voi bien et me recorde
Que ceste fortune perverse
Qui ainsi me trebuche et verse
Me vient a cause du meffait 1055
Que envers mon seigneur ay fait.
Voir et qu'a tort suis encoupée

De ce fait ci et hors boutée
 De ma religion, hé! Dieux,
 1060 Bien doi la lerne avoir aux yeux
 Et plorer continuellement
 Pour deux raisons : premièrement
 Que je n'ay mie fait le vice
 Pour quoy me fault estre nourrice ;
 1065 L'autre est comment me cheviray
 Ne de quoy ce filz norriray :
 Car je n'ay maille ne denier,
 Et si ne sçay point de mestier,
 Et si ai la subvencion
 1070 Perdu de ma religion,
 Si que de touz poins j'ay meschief.
 Tresdoulx Diex, mais a quelque chief
 M'en venra ta benivolence,
 Car je prenray en pacience
 1075 Touz les meschiefs qui me venront,
 Ja si grans estre ne saront,
 Pour plus faire a l'ennemi guerre.
 Mon enfant, aler me fault querre
 Ou que soit ta vie, pour Dieu ;
 1080 Et vezla, ce me semble, un lieu
 Ou nous prenrons nostre refuit
 Et serons en couvert de nuit ;
 Et si fault que je paine mette
 D'avoir lait, et une cornette
 1085 Dont je vous acornetteray,
 Biau filz : ainsi vous norriray,
 Et Dieu, s'il li plaist, parfera
 Ce qui a parfaire y sera.
 A ces gens m'en vois demander,
 1090 Puis qu'il me convient truander.
 Donnez a ce povre pecheur,
 Pour l'amour de nostre seigneur,
 Et a ce petit orfelin.

Que Dieu, qui est couchiez en lin,
 Le vous vueille rendre a cent doubles. 1095
 Mon enfant, nous avons trois doubles,
 Et s'avons du lait et du pain,
 C'est assez jusques a demain.
 Hui mais vueil aler reposer
 Et vous en blans drapiaux poser 1100
 Tout de nouvel.

L'ANEMI

Je demenasse grant revel
 S'avoir peusse Theodore,
 Mais je voy ce n'est pas encore.
 Avoir la cuiday sanz respit 1105
 Quant faire li fis ce despit
 Que l'abbe hors de son abbaie
 La bouta, mais je ne l'ay mie,
 Tant a en li grant pacience.
 Ouvrer me fault d'autre science. 1110
 Si ay pensé que je feray :
 Com son serourge m'en iray
 A li parler tout maintenant
 Et la seray si court tenant
 Qu'a ce cop l'aray se je puis. 1115

E! bele suer, ou fust on puis
 Que je ne te finay de querre?
 Mon frère, ton mari, sur terre
 Languist et muert, saches de voir,
 Quant voit qu'il ne te peut avoir, 1120
 Et fait touz jours ceste clamour :
 Ma dame, m'amie, m'amour,
 Las! vous ay je perdue ainsi?
 Suer, et pour ce te cri merci.
 205 d Vien t'en avec moy, ne t'esmaies 1125

De chose que tu meffait aies.
 Car bonement te pardonra
 Tout si tost conme il te verra,
 Saches de vray.

THEODORE

1130 Certes, jamais ne demourray
 Avec li, et vezci pour quoy :
 Le fil d'un chevalier a moy
 A geu, et pour cest oultrage
 Que j'ay brisié mon mariage
 1135 Et que le delit m'embelli,
 Du pechié que fis contre li
 Vueil je faire la penitence.
 E ! doulx Jhesu, pour la souffrance
 Que portastes pour noz pechiez,
 1140 Quant en croiz fustes clofichiez,
 Pardonnés moy cestui mefait
 Et touz les autres que j'ay fait.
 Sire, en vostre garde me met.
 Egar ! sainte Marie, ou est
 1145 Celui qui parloit ci a moy ?
 Qu'est il devenuz ? Hé ! je voy
 Que c'est l'ennemi qui me veult
 Honnir et decevoir, s'il peut.
 Mais ainsi ne m'ara il mie.
 1150 Glorieuse vierge Marie,
 A vous me rens, a vous m'ottri.
 Dame, de cuer devot vous pri :
 J'ay des meschiefs assez et grans.
 Soiez de moy secourre engrans
 1155 Et me gardez si que je n'isse
 Point, dame, de vostre service
 Par vostre grace.

NOSTRE DAME

Biau filz, plaise vous que je face

- A Theodore aucun confort.
 Vous vez qu'elle est en desconfort 1160
 Et en tribulacion grève,
 Et sanz cause, qui moult la grève;
 Et nient moins elle s'en deporté
 Et si benignement le porte
 206 a Pour vostre amour con vous veez. 1165
 E! biau filz, que la pourveez
 C'est droiz, sanz faille.
- DIEU
- Mère, a ce qu'en li ne deffaille
 La grant pacience et la foy
 Qu'elle a en vous, je vous ottroy 1170
 Le don d'aler la conforter.
 Or y alez sanz deporter,
 Car je le vueil.
- NOSTRE DAME
- De ce conmant point ne me dueil.
 Anges, faites moy compagnie, 1175
 Et chantez de voulenté lie
 Moy convoiant.
- GABRIEL
- Nous le ferons de cuer joiant
 Puis qu'il vous plaist, dame des cieulx.
 Avant, Michiel, disons le mieulx 1180
 Que nous sarons sanz faire oyseuse.
- RONDEL
- Servir, vierge glorieuse,
 Vous doit on en loyauté,
 De pensée humble et joyeuse
 Servir, vierge glorieuse; 1185
 Pour ce qu'en vo precieuse
 Char prist Diex humanité
 Servir, vierge glorieuse,
 Vous doit on en loiauté.

NOSTRE DAME

1190 Theodore, a Dieu gracieuse,
 Pour ce que m'amie te tieng,
 Pour ce veoir ici te vieng
 Que j'ay de toy compassion
 Et de ta tribulacion.
 1195 Ma douce amie, je t'ennorte
 Que ton cuer paciemment porte
 Encore un petit ce meschief,
 Et briefment en venras a chief
 Et si grant bien y acquerras
 1200 Qu'en paradis sanz fin seras
 Conme royne.

THEODORE

Dame, pour la vertu divine, 206 b
 Qui estes vous? dites le moy.
 De la grant biauté qu'en vous voy
 1205 Ay grant merveilles.

NOSTRE DAME

M'amie, ne t'en esmerveilles :
 Marie sui, la Jhesu mere,
 Qui pour amenuiser t'amere
 Douleur et ton cuer apaisier,
 1210 Te vueil de ma presence aisier.
 J'ay de toy soing et diligence.
 Tien te touz jours en patience ;
 Plus ne te diray : ore a Dieu !
 Ralons nous ent en nostre lieu.
 1215 Passez, Michiel.

MICHIEL

Glorieuse dame du ciel,
 Voulentiers. Avant, Gabriel.
 En alant finons ce rondel
 A voiz bien melodieuse.

RONDEL

1220 Pour ce qu'en vo precieuse

Char Dieu prist humanité,
 Servir, vierge glorieuse,
 Vous doit on en loyauté.

THEODORE

E! mère Dieu, ceste bonté
 Comment te pourray desservir? 1225
 Dame, je te doy bien servir,
 Quant tu, qui es des cieulx deesse,
 D'une si grande pecherresse
 Conme je sui t'a souvenu,
 Et conforter m'as si venu. 1230
 Je t'en merci a jointes mains,
 Vierge, qui mère lassus mains
 De Dieu et d'homme.

LE FIL THEODORE

Egardez, mon père, une pomme!
 Est elle belle? 1235

THEODORE

Oil, mon enfant. Dont vient elle?
 Monstre la ça

206 c

LE FILZ

Egardez : celle femme la,
 En nom Dieu, si la me donnit
 Et encore en aray, se dit, 1240
 Une après hier.

THEODORE

Or te siez cy, mon enfant chier,
 Et fai en ton giron les nocés.
 Vezci de pain deux pièces grosses.
 Tien : or menjue. 1245

LE FIL

Ay je bien ma nape estendue?
 Di, mon père, en moquin moquas.
 Enne me baterez vous pas :
 Je sui bon filz.

THEODORE

1250 Je n'ay talent, soyez en fis.
Siez te donc coy.

L'ABBÉ

Seigneurs, je vous diray de quoy
Je me vueil a vous conseillier.
Sachiez que moult esmerveillier
1255 M'a fait pièça et fait encore
La povreté qu'a Theodore.
Set anz a que nous le boutasmes
Hors de ceens et le chassames.
Onques puis ne jut en l'ostel,
1260 Et s'a eu a faire un tel
Fait qu'il a cel enfant norri,
Qui li deust avoir pourri
Le cuer de courrouz et de honte.
Mais je voy qu'il n'en a fait compte,
1265 Ains son meschief si humblement
Touz jours et si pacienment
A porté que, se Dieu me gart,
Je tieng qu'en li Dieu ait grant part;
Et combien que Dieu l'ait touchié
1270 Et l'ait batu pour son pechié,
Si croy je, par ma conscience,
Que pour sa tresgrant pacience
Quant envers Dieu qu'il soit bien quittes
De son meffait. Et vous qu'en dites?
1275 Or respondez. 206 d

PREMIER MOINNE

Sire, se vous m'en demandez,
Je n'en sçay mie bien jugier.
Mais je scé bien que du mengier
Et du boire, je ne doubt pas,
1280 A il eu povre repas

En ces set ans.

SECOND MOINNE

Mais li a plus grevé cent tans
 Le veillier et le mauvais giste.
 Car ou il gist et ou habite
 Le vent y cuert de toutes pars, 1285
 Pluie, gresil, tonnerre, espars;
 Et s'a tant de froit enduré
 Je ne scé conment a duré,
 Se Dieu m'ament.

L'ABBÉ

J'ay de li pitié vraiment, 1290
 Si vous dy a touz deux ensemble;
 Et vous dy oultre qu'il me semble,
 S'il nous a fait honte et viltance
 Et je l'en charjay penitence,
 Puis qu'il en a fait son devoir, 1295
 Que nous le devons recevoir
 A merci conme nostre frère;
 Et je vous pri, pour Dieu le père,
 Qu'il soit ainsi.

PREMIER MOINE

A vous appartient de cecy : 1300
 S'en ordenez.

L'ABBÉ

Frère, alez, si le m'amenez :
 Je vous em proy.

SECOND MOINE

Sire, a voz grez faire m'ottroy.

Dieu gart et ce père et ce filz. 1305
 Theodore, certains et fiz
 Soiez que dans abbes vous mande
 Et com son ami vous demande,
 Je le vous jur.

THEODORE

1310 Frère, ce soit en bon eur. 207 a
 A li de cuer yray aussi.
 Se Dieu plaist, il ara mercy
 De moy son moine.

SECOND MOINE

1315 Mon chier seigneur, je vous amaine
 Ci Theodore.

THEODORE

Père, cilz Dieu qui maint en gloire
 Vous soit amis.

L'ABBÉ

Theodore, pitié m'a mis
 En un vouloir tel que de grace
 1320 Moine de ceens te reface.
 Tu scez combien tu oz mespris
 Quant te mis hors de ce pourpris :
 Mais pour ce que tu as souffert
 Pacienment et toy offert
 1325 A plaine ma volenté toute,
 Grace te feray : quelle ? escoute
 Je te reconsilieray
 Et de ceens moinne feray
 Ton filz aussi.

THEODORE

1330 Mon chier seigneur, vostre merci.
 Se Dieu plaist, rien ne mefferay,
 Mais dès ores mais prieray
 Dieu pour vous, et a ce m'oblige
 Con celui qui vostre sui lige :
 1335 C'est de raison.

L'ABBÉ

Mes frères, sanz arrestoison
 Cest enfant con moinne vestez,
 Puis vueil qu'a lettre le mettez,

Et je vous ordene son maistre.
Or vueillez en li peine mettre
Par amour, frère. 1340

PREMIER MOINE

J'en feray mon pouoir, biau père;
Je vous promet.

L'ABBÉ

207 b

Pour c'en vostre chasti le met.
Biau frère, or alez de par Dieu. 1345
Alons tandis veoir quel lieu
Theodore pour celle ara.
Ce lieu ci bien bon li sera,
Ce m'est avis.

SECOND MOINNE

Ce sera mon et bien faitiz,
Sire, pour voir. 1350

L'ABBÉ

Or alons de ça pour savoir
Se point de meilleur en avons.
Nulle si bonne ne trouvons
Com celle la. 1355

SECOND MOINNE

Vous dites voir, sire : s'il l'a,
Elle est bien bonne.

L'ABBÉ

Et je li ordene et li donne.
Ça, alons ment.

DIEU

Gabriel, va secretement 1360
A Theodore et li denonce
Qu'elle s'apreste com semonce
De venir sa sus en ma gloire,
Et que le monde transitoire
Enuit laira. 1365

GABRIEL

Je feray ce qu'il vous plaira.
Vrai Dieux, g'i vois sanz compagnie

Theodore, de ceste vie
Mondaine ennuit trespaseras
1370 Et en gloire sanz fin venras.
Apreste toy.

THEODORE

Mon createur, mon Dieu, mon roy,
Je vous glorifi et graci,
Et vostre douce mere aussi,
1375 De ce que de moy vous souvient;
Et puis que finer me convient,
Sire, faites m'ame si fine
Que de vo gloire qui ne fine
Soit parsonniere. 207 c

PREMIER MOINE

1380 Mon seigneur, selon la maniere
De cest enfant et sa coustume,
Si maintient ce qu'il acoustume,
Je vous di qu'en religion
Homs de si grand perfeccion
1385 Com li n'ara.

L'ABBÉ

S'il fait bien, et bien li venra.
Autre chose vueil proposer :
Il nous fault aler reposer,
Si que levons ja de bonne heure
1390 Theodore, vostre demeure
Si sera la en celle cele.
Elle est pour vous et bonne et bele
Et doit souffire.

THEODORE

Mon chier seigneur, Dieu le vous mire.

Tantost iray.

1395

L'ABBÉ

Ci endroit plus ne demourray.

Alons couchier.

SECOND MOINNE

Je vous suivray, mon seigneur chier :

Il appartient.

PREMIER MOINNE

Ains que je couche, il me convient

1400

Aler en un po de besongne.

De ci endroit pas ne t'esloingne,

Ainçois m'atens

LE FILZ

Maistre, je feray sanz contens

Vostre plaisir.

1405

THEODORE

Filz, liève sus; j'ay grant desir

De parler a toy a mon gré.

Alons en ma selle a secré.

Sa la main, sa, je t'i menrray.

Ore, biau filz, je te diray :

1410

Il n'a icy que moy et toy :

Je t'acole, et tu, baise moy,

Doulx filz, n'y met nulle deffences.

Je te pri dès ores mais pences

De servir Dieu devotement

1415

Et de faire ton sauvement

Par oroisons et par jeunes.

En toy bonnes vertuz aunes :

Soiez touz jours humbles et sers :

Devotement tes frères sers

1420

Et aies le cuer pur et fin.

Je sui de ma vie a la fin,

Pour ce te fai je cest conmant :

Mon enfant, a Dieu te conmant,

1425 Qui te vueille aide et pére estre.
Sire, en voz mains vueil rendre et mettre
Mon esperit.

DIEU

Sus, mi anges, sus sanz respit,
Et vous, mère, alons l'ame querre
1430 De Theodore. Alons bonne erre,
Ains qu'elle fine.

NOSTRE DAME

Filz, alons; elle en est bien digne,
Car souvent a esté lassez
Son corps par penance et assez
1435 Meschief eu.

GABRIEL

Or nous convient estre esmeu,
Michiel, de chanter en alant.
Pour joie estre renouvelant
Dison ce rondel : bon me semble.

RONDEL

1440 Par amer et servir ensemble
L'umble vierge mère et son filz
Ne peut on estre desconfiz,
Mais en soy si grans biens assemble
Par amer et servir ensemble
1445 Que esperit ange ressemble
De grace et de gloire confiz.
Pour ce, humains, soiez touz fiz :
Par amer et servir ensemble
L'umble vierge mère et son filz
1450 Ne peut on estre desconfiz.

DIEU

208 a

Michiel, celle ame tost saisis,
Si l'en emporterons en gloire.
Elle a du monde eu victoire,

De la char et de l'ennemi.
 Pour ce vueil qu'elle ait avec mi
 Gloire sanz fin. 1455

MICHIEL

Vray Dieu, je feray de cuer fin
 Vostre vouloir. Vezla ci, sire.
 Or me pouez vous oultre dire
 Que nous ferons. 1460

NOSTRE DAME

En paradis nous en irons.
 Va devant, toi et Gabriel,
 Et pardites vostre rondel.
 Filz, dis je bien?

DIEU

Oil, mère, et a bien le tien. 1465
 Passez devant.

GABRIEL

Voulientiers, vray Diex. Or avant,
 Michiel, si reprenons ensemble.

RONDEL

Que esperit ange ressamble
 De grace et de gloire confiz. 1470
 Pour ce, humains, soiez en fiz :
 Par amer et servir ensemble
 L'umble vierge mère et son filz
 Ne peut on estre desconfiz.

LE FILZ

Las! las? seray je orphelin filz? 1475
 Mon pére, estes vous trespassez?
 Las! las! il est oultre passez.
 Emprès li vueil ci demourer

.....

Mon dueil faisant. 1480

L'ABBÉ.

Je ne pourroie estre taisant

La vision que j'ay veue.
 Sus, mes frères, sanz attendue
 Si m'escoutez.

PREMIER MOINNE

208 b

1485 Mon seigneur, de quoy vous doubtez
 Ne qu'avez vous ?

L'ABBÉ

Je le vous diray, seigneurs doulz.
 Sachiez que maintenant sonjoie
 Qu'a une grans noces estoie
 1490 Ou toutes les ordres des anges
 Estoient, voire, et des archanges
 Et des sains sanz nombre y avoit
 Et ou melieu d'entre eulz estoit
 Une femme si glorieuse
 1495 Que c'estoit chose merveilleuse.
 Des noces estoit l'espousée :
 En une chambre estoit menée,
 Se me sembloit, et sus un lit
 Fu assise par grant delit,
 1500 Que mieulx valoit, tant estoit noble
 Que tout l'or de Contentinoble.
 Ceulx qui compaignie li tindrent,
 Quant assise fu, a li vindrent
 L'un après l'autre et l'aourèrent.
 1505

En ce regardant une vois
 Me dist : « Dans abbes, ce que voiz
 « Ce sont les noces vraiment
 « Theodore qui fausement
 1510 « Fu accusée d'avoir fait
 « L'enfant, et coulpe n'ot ou fait. »
 Si que je vueil qu'a li alons
 En sa sele et li requerons
 Qu'il nous die et qu'il nous expose
 1515 La verité de ceste chose.

Suivez moy, car je vous promet
En grant doubte et paour me met
Ma vision.

DIEU

Michiel, oi ma division.
Droit quant de ci departiras, 1520
Au mari Theodore yras
Dire li que sa femme est morte,
Pour qui souvent se desconforte,
208 c Et s'il a fain de la veoir
Voit en l'abbaie, et pour voir 1525
La la verra.

MICHIEL

Ce message bien fait sera,
Vray Diex, ains que je cesse mais.

Entens moi. Dieu te doint sa paix,
Amis; je te di de ta femme : 1530
Pour verité rendue a l'amme,
Trespasée est en l'abbaie;
Se de li veoir as envie
Que tu y voisés sanz deffaut.
D'aler y avancer te fault : 1535
Or vaz bonne erre.

LE MARI

Elas ! ne la finé de querre
Puis que de moy fu departie;
Et quant de ce siècle est partie,
Dont primes la puis je trouver ! 1540
Voir, je doy bien pour li plourer,
Mais neant moins sanz plus pourveoir
De ci m'en vois pour la veoir
En l'abbaie.

L'ABBÉ

1545 Tu faiz chiére moult esbahie.
Biau filz, qu'as tu ?

LE FIL

Sire, que j'ay assez perdu.
Mon père a moy ore parloit
Et m'acoloit et me baisoit
1550 Et prioit si tresdoulcement
De penser a mon sauvement,
Et il est mors.

L'ABBÉ

Tais toy, biau filz : ton dueil remors.
Seigneurs, veoir le vueil tout nu
1555 Pour savoir qu'il est devenu :
Monstrez le moy.

PREMIER MOINE

Voulientiers, mon seigneur, par foy :
Jusqu'au chief le rebracerons
Et puis nu le vous monstrerons. 208 d
1560 Dieux ! qu'est ce ci ?

SECOND MOINE

Ha ! sainte Marie, merci !
Vezci un trop merveilleux fait ;
C'est une femme, et si s'est fait
Touz jours un homme.

L'ABBÉ

1565 Seigneurs, or appert tout en somme
Clérement la grant traison
Que l'en li mist sus sanz raison.
C'est ma vision toute entière.
Nous avons bien cause et matière
1570 De plourer pour le grief meffait
Que nous li avons a tort fait.
Certes le père manderay
De la fille et li monsterray.
Alez le querre.

PREMIER MOINE

Mon chier seigneur, je vois bonne erre. 1575
Si l'ameneray se je puis.

Biaux hostes, bien a point vous truis.
Mon seigneur l'abbé vous demande
Pour une besongne bien grande
Qui li est source. 1580

L'OSTE

Je vois sanz pensée rebource.

Je vieng a vous ci, mon seigneur.
Or me dites pour quel labour
M'avez mandé.

L'ABBÉ

Amis, tu as bien demandé. 1585
Nuef ans a passé qu'un enfant
M'apportas ci, et entendant
Me fis qu'engendré par sa guille
L'avoit Theodore en ta fille.

T'en souvient il? 1590

L'OSTE

Par m'ame, mon seigneur, oil ;
Bien m'en souvient.

L'ABBÉ

209 a Theodore est mort. Si convient
Que tu aies l'enfant en garde.
Vezci Theodore. Or regarde 1595
Conme engendrer peust enfant.
Tu voiz a son sexe devant
Qu'il estoit femme.

L'OSTE

Mercy, chier sire : ce diffame,
Si com direz, l'amenderay, 1600
Et ma fille vous amenray
Pour la punir.

LE MARI

Dieu vueille ce convent tenir
 En s'amour, qui touz biens enorte !
 1605 Est ce voir que ceens est morte
 Une femme qui est encore
 A enterrer, qui Theodore
 Avoit a nom ?

L'ABBÉ

Se je vous disoie que non,
 1610 Je mentiroie.

LE MARI

Pour Dieu, sire, que je la voie
 En son visage.

SECOND MOINE

Est elle de vostre lignage
 En verité ?

LE MARI

1615 C'estoit ma femme en loyauté,
 Ce vous puis dire.

SECOND MOINNE

Regardez. Est ce ceste, sire ?
 Avisez vous.

LE MARI

1620 Ma suer, m'amie, mon cuer doulz,
 Mon confort et tout mon solaz,
 Ma joie, mon deduit, las ! las !
 Chiére Theodore, comment
 T'es tu vers moy si longuement
 Celée quant ceens estoies ?

1625 La grant amour dont tu m'amoies,
 Que peut elle estre devenue ?

209 b

Dieu, se semble, la m'a tolue
 Et l'a prise a soy de touz poins.
 Las ! je doiy bien tortre mes poins
 1630 Et clamer sur toy derrechief.

Suer, tu m'as mis a grant meschief

Long temps et tolu ma leesce
 Mais or double ci ma tristesse
 Quant te voy morte.

PREMIER MOINNE

Sire, entendez. Ce vous enorte 1635

Nature pour soy acquitter
 Faire dueil pour lui sanz doubter;
 Raison si vous dit du contraire
 Et que grant joie devez faire,
 Car tant a fait la bonne dame 1640
 Que je tieng qu'en gloire est son ame
 Certainement.

LE MARI

E! pour Dieu, dites moy comment
 Elle a vescu.

L'ABBÉ

Comment? Certes elle a vaincu 1645

Tout orgueil par humilité.
 Et si sachiez pour verité
 Qu'en ce siècle selon m'antente
 N'avoit femme si patiente
 Ne de si grant benivolence. 1650

Ne fu ce pas grant pacience
 Que quant cest enfant ci fu nez
 Conme a pére li fu donnez
 Et dist on qu'engendré l'avoit,
 Et du contraire elle savoit, 1655

Mais plus se souffri diffamer
 Que ce qu'autrui vouldist blamer?
 Dont enduré a et porté
 Par set ans moult de povreté.
 Car je cuiday que voir feust 1660

Que ce filz engendré eust.
 Si la mis hors de l'abbaye,
 Dont li a convenu sa vie
 Pourchacier set ans, ce me semble,

1665 Pour li et pour l'enfant ensemble ;
 Mais touz jours si pacienment
 S'est portée que vraiment
 Pitié si me fist esmouvoir
 A elle a grace recevoir,
 1670 Dont je la reconsiliay
 Et avec nous la raliay,
 Il a deux ans, je vous affy,
 Et l'enfant pour amour de li.
 Or est finée.

LE MARI

1675 Sire, s'il vous plaist et agrée,
 Je vous diray m'entencion.
 Certes j'ay en affeccion
 Que jamais pour gaain ne pour perte
 De ceste abbaie ne parte,
 1680 Puis que ma compaigne y est morte :
 Ma devocion si m'enorte
 Qu'en lieu d'elle moinne seray
 Et des orés mais serviray
 Dieu et vous le cours de ma vie,
 1685 Car je n'ay d'autre riens envie :
 Si que je vous suppli, doulz abbes,
 Sanz plus faire longues sillabes
 Recevez moy.

L'ABBÉ

1690 Ou nom de Dieu et je l'ottroy.
 Seigneurs, avant, ce corps prenez
 Ensemble et si vous en venez
 Après moy en l'enfermerie.
 La sera elle ensevelie
 Et puis enterrée sera.
 1695 Mais pour ce que son lieu tenra
 Son mari, qui est un preudoms,
 A Dieu loenge en chanterons
 Tant pour ce que moinne devient

Comme pour son dueil mettre au nient.
 Alons chantant ensemble. Or sus. 1700
Te Deum laudamus.
Explicit.

Serventois.

209 d

GRANS deduiz est de bien oir parler
 De la cité de touz biens plantureuse
 Ou Amours vult un saint temple sacrer
 Pour espouser no vierge suer piteuse,
 Qu'il fist joindre par euvre vertueuse
 A son doulx filz sanz le fait de nature.
 Ceste cité j'enten, par l'escripture
 Sophonias, l'umblé vierge Marie
 En qui temple de ses precieux flans
 Le fil Dieu prist char vierge et d'omme vic
 Pour mettre en paix amies et amans. 11

Pour les amans, c'est ligier a prouver,
 Touz delivrer de prison tenebreuse
 Maria Dieu son fil, qui vint muer
 No guerre en paix, mort en vie joieuse,
 Ennemistiez en amour gracieuse,
 Et pardonner d'Adam la forfaiture
 Quant encharnez yssi sanz ouverture

De la cité franche, nette et jolie,
 Dont tout temps sourt grace, et est habondans
 De paix, d'amour, d'onneur, de courtoisie,
 22 Et quanqu'il fault aux amoureux servans.

Touz ces biens ci peut en amours trouver
 Qui sert en foy la vierge precieuse
 Que sains espirs concepvoir et porter
 Et enfanter sanz euvre vicieuse
 Fist l'espoux vray de sainté amoureuse,
 Qu'elle baisa et coucha par grant cure
 Entre ses braz, donnant li norreture
 Du vierge lait dont parla Isaye,
 Par mistères glorieux si puissans
 Que cil qui bien les croit et certiffie
 33 Les biens d'Amours est par grace sentans.

Si que j'en doy Amours et vueil loer
 Quant il nous vout de sa voiz doulcereuse
 Parson chier filz la foy bien declairer
 Et puis l'offry pour souffrir mort crueuse,
 Dont la cité, princesse delitteuse
 Des prouvinces d'ame et de creature,
 Sist de foy seule, et de ce fu signie 210 c
 Quant lamentant regretoit Jheremie
 Jherusalem, mais la vierge plaisans
 Fu es sains cieulx après si resjoie
 44 Que sa vie est joie a touz les vivans.

Fleur de biauté, on ne pourroit numbrer
 Le bien, l'onneur, la voiz melodieuse
 Dont touz les sains vous loent sanz cesser.
 Sains esperiz le dit par l'eureuse
 Bouche David disant : O glorieuse
 Cité de Dieu, saintiffiée et pure,
 Doulx moz sont diz de toy sanz mesprenture;

Pour ce vous pri, d'Amour temple et amie,
 Que nous soiez envers vo filz aidans,
 Conme no suer, vierge, espouse saintie,
 Enluminée et vraie enluminans. 55

ENVOY

Princes du pui, servons d'entente lie
 La cité dont le treshault fu naiscens
 Qui la fonda; si tendrons compagnie
 Au doulx espoux qui est sanz fin regnans. 59

Autre serventois

Au besoing veult fors sa vertu monstrier ;
 Et tout aussi fist Dieu, li pères grans,
 Qui au besoin vult par amour fonder
 L'umble cité des amoureux servans.
 Ceste cité de degré en degré
 Edifia Sapience a son gré,
 Et dedans fist une noble maison,
 Vergier et puy, et tout ce par raison
 Par quoy citez peut miex estre acomplie;
 Mais ce qu'elle est si de touz biens emplie,
 Ce fist Amours de sa provision. 11

210 b Ainsi Amours vult son nom esprouver,
 Quant par li fu ceste citez plaisans
 Ediffiée. Or la doy bien nommer,
 Car c'est la vierge en qui li roy puissans
 De paradis vint par grant amistié,

En qui aussi de pure humanité
Se vult armer conme vray champion,
Puis s'en yssi et a destruccion
Mist nostre mort par sa mort, car paiie
Vouloit qu'ainsi de l'umaine lignie
22 Fust la debte sanz occupacion.

En ce fait n'out Droiz cause d'opposer
Pour ce que grace y fu tant habondans;
Amour ainsi le vouloit ordener,
Et ce pouoit bien faire et plus cent tans,
Combien qu'adonc Desconfors la cité
Prendre cuida quant lermes de pitié
Vit que ploroit hors par compassion
Cil dignes puiz dont j'ay fait mencion;
Mais il ne pot, car elle estoit garnie
Du doulx vergier ou foy estoit florie.
33 Loée en soit elle en discrecion.

Chascuns la doit bien prisier et loer,
Quant ses haulx roys li fu si vraiz amans
Qu'a sa destre la vult puis couronner
De douze estoilles clères et luisans,
Et de soleil vestir pour la purté
De sa precieuse virginité,
Et a ses piez pour sa perfeccion
Mettre une lune; ainsi par vision
La vit li evangelistes ravie,
Ou elle peut bien mettre sa mesnie
44 De bas estat en exaltacion.

Dame, c'on doit sur toutes honorer,
Cité de Dieu forte, riche et vaillans,
Maison royaulx, assise ou throne cler,
Vergiers souefs, fruit de vie portans,
Puiz sacrez dont l'iaue nous a lavé,

Au char de feu d'Elye comparé
Ay vo saint corps par vraie affeccion,
Qui eslevez par piteuse oroison
Vo temple en gloire ; et pour ce tant se fie
Mes cuers en vous, mère et vierge Marie,
Qu'en mon desir n'esper se mercy non. 55

ENVOY

Prince, je lo en ma conclusion
210 c Que de nous touz soit par devocion
Ceste citez honnourée et servie,
Si qu'empetrer nous vueille a nostre vie
De touz pechiez vraie remission 60

XIX

MIRACLE

DE

UN CHANOINE QUI SE MARIA

PERSONNAGES



L'ESQUIER
LE CHANOINE
LE PRESCHÉUR
L'ONCLE
LE COUSIN
LE VOISIN
LE PÈRE
LA MÈRE
LA FILLE
BLET
VOLANT
POLET
NOSTRE DAME
SAINT JEHAN
GABRIEL
MICHIEL

*Cy commence un miracle de Nostre Dame d'un
chanoine qui par l'ennortement de ses amis se
maria, puis laissa sa femme pour servir Nostre
211 a Dame.*

L'ESCUIER

MON seigneur, on m'est venu dire
Qu'au moustier a un maistre sire,
Je ne sçay comment il a nom,
Mais on li donne grant renom,
Qu'il doit au peuple un sermon faire. 5
S'il vous plaist, alons nous y traire
Pour l'escouter.

LE CHANOINE

Thibaut, il me plaist, sanz doubter.
Prenez ma cloque et mon chapel,
Et venez après moy isnel. 10
N'y vueil pas des derreniers estre,
Thibaut, cy endroit me vueil mettre,
Seez vous la.

LE PRESCHÉUR

*Sapientiam sanctorum narrant populi et laudes eorum pronunciat ecclesia. Ecclesiastici xliiii°. Ces paroles sont escriptes en un livre de la sainte escripture qui est appellez Ecclesiastes, et veulent ainsi dire en françois : Les peuples racontent la sagesce des sains et l'eglise pro-
211 b nuncie leur louenge. Doulce gent, pour deux causes sont*

gardées les festes des sains, c'est assavoir pour les devoz cuers edifier, pour les sains loer et magnifier. Pour les devoz cuers edifier, car en oyant les merites des sains et les faiz recorder et preschier, les devoz se seulent par bonnes euvres a eulx conformer et ainsi en eulz edifier. Après je dy que les festes des sains seult on garder pour les sains magnifier. Car après ce que on nous a leurs merites preschié et monstre, c'est raison qu'ilz soient de nous et loez et magnifiez. Pour le premier dit la sainte escripture : Les peuples racontent la sagesce des sains, c'est assavoir a ce que le peuple l'ait en exemple. Pour le second est adjoint : et l'eglise prononce leur loenge, c'est a dire que le peuple crée les sains en loenge. Et vraiment sur touz les sains de paradis les festes de la glorieuse vierge mère Marie, pour qui amour et reverence nous sommes cy assemblez, devons nous garder pour nous enbonnes euvres edifier, pour elle magnifier. Car c'est celle qui touz jours est preste de nous aidier, si conme David le tesmoingne, qui dit : *Astitit regina a dextris tuis in vestitu deaurato* : Sire, dist David a nostre seigneur, la royne, c'est la vierge Marie, est a ta destre en vesteure d'or. Elle est avecques Dieu pour regner; elle est avec nous pour nous conseilier. Elle est avecques Dieu conme empereris et deesse; elle est avecques nous conme vraie conforteresse; elle est devant Dieu pour nous conme moiennesse; elle est avecques Dieu pour regner, et c'est a creature humaine grant noblesce et grant dignité quant une femme humaine conme toy et moy, que nous pouons dire qui est nostre suer, car touz sommes venuz de Adan et Eve, est royne de paradis. Pour ce est il dit : *Astitit regina*; c'est la royne qui a esté, mais c'est la royne qui est avecques nous pour nous secourre et aidier, et c'est a nous tresgrant prouffit et utilité. Pour ce dit le sage *Sapiencie septimo* : *Venerunt michi omnia bona pariter cum illa* : Quant ceste dame est avecques moy, touz biens me sont venuz avecques

elle. Que dirons nous donques a ceste dame qui est si preste de nous honorer et de nous seurement garder, ne mais ce qui est dit a nostre seigneur *Sapiencie ultimo: In omnibus magnificasti populum tuum*: Dame, tu as sur toutes choses magnifié ton peuple? Donques elle est a la destre de Dieu. Mais je dy que elle y est en vesteure d'or; en quoy est noté aornement de biauté. Penses tu que la royne des vierges soit nue a la destre de la majesté? Nani, ains est merueilleusement aornée de royaulx vestemens et especialment de trois paires. Premièrement, car elle a un vestement blanc; secondement elle est aornée d'un vestement d'or; et tiercement d'un vestement plein de lumière. Le premier vestement elle desservy pour sa
 211 d tresgrant purté et neteté; le second vestement elle a desservy par l'exellence de sa charité; le tiers par la sagesce de sa verité. Du premier vestement dit saint Jehan en l'Apocalipse, *Apocalipsis decimo octavo: Venerunt nupcie agni et uxor ejus preparavit se, etc.* Il dit que les noces de l'aignel vindrent et sa femme se para de bougueran; par quoy je n'entens mais que la pure virginité de Marie: et ceste vesteure elle a departi aus vierges conme a ses damoiselles. Je dy après qu'elle est aournée d'un vestement d'or, si conme il est dit en l'auctorité dessus: *As-titit regina, etc.* Et aussi com par le bougueran est entendue purté sanz corrupcion, aussi par le vestement d'or est entendue charité et parfaite dileccion: cestui vestement a elle departi aus martirs conme a ses chevaliers. Mais par le vestement de lumière est entendue la sagesce de sa verité, et cestui a elle desparti aux apostres et aux sains docteurs de sainte eglise qui ceste verité ont viguerusement preschié et montré par la lumière de science et par ardeur de charité, a ce que par l'ardeur feussent eschaufez les froiz cuers a lui amer et par la lumière feussent enluminez les entendemens obscurs a cognoistre Dieu cy aval en partie, si que après ilz le cognoissent aussi conme ilz sont congneuz la sus en gloire,

laquelle gloire nous vueille donner *ille Deus qui simplex et unus per infinita secula seculorum in trinitate 212 a regnat.*

LE CHANOINE

E! vierge, qui le fruit portas
 De pitié, de grace et d'amour,
 Moult fait en terre bon labour
 Qui vous aime, sert et honneure,
 Et cil est nez de moult male heure
 Qui n'a en vous servir s'entente.
 Thibaut, alez en sanz attente
 Pour nostre diner pourveoir,
 Et quant temps sera d'asseoir,
 Si me revenez querre aussy,
 Et vous me trouverez icy.

Amis, alez.

L'ESCUIER

Ce vault fait; plus ne m'en parlez,
 Sire: g'y vois.

LE CHANOINE

Vierge, mère au doulx roy des roys,
 Par qui grace telle nous vint
 Que Dieu nostre frère devint,
 Quant en toy prist humanité,
 Qui de tout en quoy endebté
 Nous orent noz premiers parens
 Nous acquitta et fist exens
 Quant en croiz souffry passion,
 La fu la dominacion
 De nous a l'ennemy tolue
 Dont monteplia ta' value
 Tant, royne et gloire des anges,
 Qu'en gloire es sur touz les arcanges
 Beneurée empereris,
 Dame, qui peuz de touz periz
 Garder et veulz ceulz qui te servent

De cuer, puis que grace desservent,
 Garde moy, dame, de touz maulx, 45
 De touz periz, de touz assaulx
 Qu'avoir puis du Sathan, du monde,
 212 b Et de ma propre char inmonde.
 En ta sainte garde me mez,
 Douce dame, et si te promez 50
 Pour ce qu'a besoin me sequeures
 Que je recorderay tes heures
 Touz les jours mais que je vivray
 Et en usage les avray,
 Et ainçois que de cy m'en voyse 55
 Les diray bas sanz faire noyse
 Devant t'ymage.

L'ONCLE

Biaux niez, entendez mon langage.
 Je vous dy bien moult me deplaist
 De ce que mon nepveu qui est 60
 Canoinne de Saint Cassien
 Met si a non chaloir le sien
 Que de ses fiez et heritages
 Ne li chaut ; si ert grans dommages
 S'ainsi les lait. 65

LE COUSIN

Or le faisons bien, s'il vous plaist.
 Alons li monstrier, vous et moy
 Ce sera aumosne, par foy,
 Se nous l'alons reconforter ;
 Et si le pourrons enorter 70
 De femme prendre.

L'ONCLE

C'est voir. Or alons sanz attendre :
 Nous sarons qu'il a en courage
 Qui dort. Thibaut, faites nous sage

75 Ou est mon nepveu, savez vous ?
Se le savez, dites le nous,
Amis, bonne erre.

L'ESQUIER

Sire, le vous iray je querre ?
Il est au moustier ; bien le sçay.
80 N'a gaires que je l'i laissay
Disant ses heures.

L'ONCLE

Thibaut, mais que point ne demeurez,
Va, si li dy qu'ysnel le pas 212 c
Viengne cy, et ne le lait pas,
85 A moy parler.

L'ESQUIER

Sire, veez my la aler.
Gardez cy : je le vous vois querre.

Mon seigneur, venez ent bonne erre :
Vostre oncle a l'ostel vous atent.
90 Je ne scé a quel fin il tent,
Mais il vous mande.

LE CHANOINE

Si yray, puis qu'il me demande.

Biaux oncles, bien soiez venuz.
Or ne vous vit mais pieça nulz
95 Ceens venir.

L'ONCLE

Ce m'en a fait tant abstenir
Que j'ai eu a besoingnier.
Je vous diray sanz proloingnier
Qui cy m'amaine. Veez le cy.
100 Vostre pére, dont Dieux mercy
Vueille avoir, si est trespassez,
Il a ja plusieurs jours passez,
Et aussi morte est vostre mère,

Et si n'avez ne suer ne frère ;
 Et si avez, a parvenir, 105
 Grans heritages a tenir,
 Dont vous ne faites pas grant conte.
 Ce m'est vis, et certes grant honte
 Sera a vous se les laissez,
 Et que vous ne les possesiez. 110
 Nous sommes cy amis ensemble.
 Or considerez s'il vous semble
 Que je dy voir.

LE CHANOINE

Biaux oncles, je vous fas savoir
 Que n'en ay pas si grant envie 115
 Que pour eulz en jour de ma vie
 Clergie laisse ne l'eglise.
 Je l'ay amorse et si aprise
 212 d Que la laissier n'est pas m'entente.
 Avec ce g'y ay belle rente, 120
 Vous le savez.

LE COUSIN

Mon chier cousin, voir dit avez,
 Mais consideré tout en somme
 N'est pas de vous com d'un autre homme.
 Vous n'avez ne pére, ne mère, 125
 Ne si n'avez ne suer, ne frère,
 Et vous avez de moult biaux fiez ;
 Si avez vous d'arrérefiez,
 Qui donnent en particulier
 Que les tiengne homme seculier. 130
 Vous estes joenne homme d'aage :
 Consentez vous a mariage,
 Biau sire, et l'en vous pourverra
 De femme tele c'on verra
 Qu'a vostre honneur y soiez mis 135
 Et a l'onneur de voz amis,
 Je vous dy bien.

LE CHANOINE

Biau cousin, je n'en feray rien
 Ne pour grant don ne pour promesse.
 140 Prestre vueil estre chantant messe
 Et servir Dieu et nostre dame
 Pour le sauvement de mon ame.
 Et prier pour les trespassez
 Qui ont acquis et amassez
 145 Les biens dont j'ay si largement :
 Et ne m'en parlez autrement,
 Je vous en pri.

L'ONCLE

Biau niez, quel los et quel escri
 Cuidez vous des gens recouvrer,
 150 Se vous voulez ainsi ouvrer ?
 L'en dira c'est un folz lunages,
 Se delaissiez voz heritages
 Ne qu'i voisent en autruy main.
 N'aiez mie le cuer si vain :
 155 Avisez vous pour l'amour Dieu.
 Il n'a fille de si hault lieu
 Cy entours, je n'en doubte point,
 Que volentiers on ne vous doint ;
 Si vous lo qu'une en regardez
 160 Qui soit vostre femme, et gardez
 Vostre heritage, il le vault miex,
 Qu'a voz filles et a voz fieulz,
 Quant Dieu les vous donra avoir,
 Departirez com vostre avoir :
 165 Si ferez sens.

213 a

LE CHANOINE

Biaux oncles, point ne m'y assens,
 N'ay cure d'estre mariez.
 A brief, plus ne m'en tariez :
 Riens n'en feray

LE COUSIN

Biau doulx cousin, je vous diray : 170
 Nous en irons ; vous demourrez,
 Biau sire, et vous aviserez
 Sur ce qu'avons cy proposé,
 Et se ce qu'est dit et posé
 Est vostre bien c'on vous denonce. 175
 Vous nous en ferez la response
 Quant vous plaira.

LE CHANOINE

De par Dieu et fait vous sera,
 Puis qu'il vous plaist.

L'ONCLE

A Dieu, sanz plus faire de plait 180
 N'autre sejour !

LE CHANOINE

A Dieu, biaux oncles, qui bon jour
 Vous doint, et a vous, cousin chier !
 En vain me sont venu preschier
 Certes, car mon affection 185
 N'est point ne mon entencion
 D'avoir ja femme.

L'ONCLE

Biau niez, je m'en vois chiez ma damme,
 Ou a faire ay, de Vaussemain.
 213 b Se voulez, rassemblons demain 190
 Pour regarder a cest affaire
 Comment le puissons si parfaire
 Que veoir puissons et sentir
 Qu'a soy marier consentir
 Par nous se vueille. 195

LE COUSIN

Sire, il est bon que l'en y veille,
 Car a nous grant honte seroit
 Qui autre chose n'en feroit.

200 Si nous a dit ore un langage,
 Espoir changera son courage
 Et nous dira tout le contraire
 Alez a Dieu : je me vois traire
 Devers maison.

L'ONCLE

205 Niez, vous dites bonne raison.
 Certainement g'y penseray,
 Et demain a vous revenray
 Bien matinet.

LE COUSIN

De par Dieu ! je seray tout prest :
 N'en doubtez point.

L'ESQUIER

210 Sire, tout est prest et a point,
 Quant il vous plaira a disner.
 Il est temps de vous desjuner ;
 Ce m'est avis.

LE CHANOINE

215 Thibaut, se je voir te devis,
 Penser me tolt tout l'apetit .
 Esbatre m'en vois un petit
 Disne a par toy

L'ESQUIER

220 Voulentiers, sire, par ma foy :
 J'ay faim, mais j'aray fait bonne erre.
 Dites, ou vous iray je querre,
 Se mengié ay ?

LE CHANOINE

225 Tu trouveras que je seray
 A l'eglise ou sus les fossez .
 Quant diné aras ton assez,
 A moy t'en vien.

L'ESQUIER

Si feray je; je vous dy bien,

Et bien briefment;

LE VOISIN

Qu'est ce? ou allez si aprement?
Dieu vous doint bon jour, sire Aubert.
Pieça ne vous vy si appert 230
Com vous voy ore.

L'ONCLE

Je doubt trop demourer encore;
Pour ç'avance je si mon pas.
Voulez vous, biau voisin Thomas,
Rien que je puisse? 235

LE VOISIN

Oil, mais qu'a loisir vous truisse.
J'ay trop bien a vous a parler
De secré. Pensez vous aler
Maintenant loing?

L'ONCLE

Nanil, et si n'ay pas besoing 240
Si grant qu'autre foiz bien n'atende.
Je vous pri que sache et entende
Que voulez dire.

LE VOISIN

Voulientiers le vous diray, sire.
Mais dites moy sanz varier, 245
Est ç'acertes que marier
Se veult vostre nepveu ou non?
Aval la ville en est renom
Et grant parler.

L'ONCLE

Voisin, sanz plus avant aler 250
Vous en vueil parler en secré.
Je voulroye bien qu'a mon gré
Le fust, se Dieux me soit amis.
Mais encore n'en a il mis

255 Nulle ame en paine, ce sachiez.
 Qui vous meut que vous me touchiez
 De tel langaige? 213 d

LE VOISIN

Vous me demandez conme sage,
 Si le vous diray volentiers.
 260 J'estoie devant yer moy tiers
 En un lieu que je nommer n'ose,
 Ou l'en parloit de mainte chose :
 Entre les autres il ot la
 Un qui d'une fille parla,
 265 Qui riche est et bien gentil femme
 Et s'est belle et bonne, par m'ame,
 Et s'a de bons amis aussi.
 Toutes voies fu dit ainsi
 Et conclus que qui en feroit
 270 Mariage d'eulx, ce seroit
 Chose moult belle.

L'ONCLE

Voisin, dites moy qui est elle :
 Je vous en pri.

LE VOISIN

Je le vous diray sans detry,
 275 C'est la fille au Barré de Saus,
 Qui a esté en mains assaus,
 Qui est un vaillant chevalier,
 Et si est moult bon conseillier
 Et bien noble homme.

L'ONCLE

280 C'est voir, par saint Pierre de Romme.
 Et aussi vous dy, biau voisin,
 Mon neveu est riche orfelin,
 Et, n'en soiez ja esbahiz,
 Il n'a si riche en ce pais.
 285 Mais combien que cecy m'avez
 Endité, mié ne savez,

Qui: pour li la demanderoit,
Se refusée li seroit.

Ay je dit voir?

LE VOISIN

Sire Aubert, je vous fais savoir

290

Que se marier se vouloit

214a

Et il autant m'apertenoit

Conme a vous, je la requerroye

Pour lui, ne ja ne le lairoye

Pour la doubtance de refus:

295

Tant en oy je ou je fus

Devant ier, sire.

L'ONCLE

Je ne scé qu'il me pense a dire,

Mais volentiers l'en parleray,

Biau voisin, et si vous diray.

300

L'en ne scet qui peut avenir:

Je vous pri que vueillez tenir

Secré cecy.

LE VOISIN

Mais je vous en pri, sire, aussi,

C'on ne sache dont c'est venu,

305

Ne qui vous en ara meü,

Que vous m'ariez desconfit:

Je n'en parle mais qu'au proufit

De vostre ami.

L'ONCLE

Miex vouldroie perdre demy

310

Muy de mon blé que j'en parlasse

Par cy que je vous encusasse.

A Dieu, a Dieu!

LE VOISIN

Alez: Dieu vous maint en tel lieu

Que bien vous viengne.

315

L'ONCLE

N'est pas bon que plus cy me tiengne,

Je vois savoir se mon neveu
 Trouveray, a qui j'ay fait veu
 Et promesse d'aler a lui.

320 Biaux niés, ce m'a moult abeli
 Que si a point ycy vous truys.
 Comment va? Oistes vous puy
 Riens de nouvel?

LE COUSIN

Foy que doy ma mère Ysabel,
 325 Nanil; et vous?

L'ONCLE

214 b

Je ne scé. Dites, irons nous
 Devers vostre cousin savoir
 S'il a cure de femme avoir?
 Car s'il est point puis ier changié
 330 Je pense que j'aye songié
 Bon lieu pour li.

LE COUSIN

Oil, biaux oncles, alons y.
 Que ferons dont?

L'ONCLE

Alons nous ent par cy amont
 335 Au moustier, puis que le querons.
 Je croy que nous l'i trouverons
 Mieux qu'autre part.

LE COUSIN

Je croy bien, car envis s'en part.
 Alez devant et je vous sui.

340 Oncle, se Dieu me gart d'ennuy,
 La le voy estre.

L'ONCLE

Aussi fais je. Qu'est ce la, maistre?
 Comment vous va?

LE CHANOINE

Bien, la Dieu mercy. Qu'est ce la?
Ou en alez?

345

LE COUSIN

Cousin, par foy, bien tant valez
C'on vous doit bien verité dire.
Nous venons pour savoir, biau sire,
Se vous nostre conseil croirez
Et se point vous marierez.
Ou il fault que vous le faciez,
Ou il fault que vous delaissiez
De vostre estat trop malement.
Or regardez, pour Dieu, comment
Vous en ferez.

350

355

LE CHANOINE

Biaux seigneurs, vous vous cesserez
De moy parler que prengne femme,
Je vous en pri, pour nostre dame;
Car, a briève colacion,
Je n'y ay point d'afeccion,
Se Dieu m'aist.

214 c

360

L'ONCLE

Niés, le cuer pour vous m'esbahist
De ce qu'estes si nonscient
Que miex amez a escient
Estre povre et le vostre perdre
Que vous a mariage aerdre
Ne prendre femme de valeur
Pour vous maintenir en honneur
Ce n'est mie bien, ce sachiez.
Biau niez, vostre rigueur lachiez
Et se mon conseil vous souffist,
Par Dieu, qui onques ne meffist,
Bien vous feray.

365

370

LE CHANOINE

Mon chier oncle, je vous diray :

375 Je voy bien qu'il fault que decline
 Mon vouloir et qu'au vostre encline.
 Mais aussi vueil qu'il soit sceu
 Que se je suis ja pourmeu
 A femme avoir, j'aray pucelle
 380 Qui sera bonne et sera belle,
 Et avecques ce sera riche,
 Ou ja, ce vous jur et affiche,
 Ne li mettray annel en doit ;
 Car mon estat assez le doit,
 385 Vous le savez.

LE COUSIN

En nom de moy, voir dit avez,
 Cousins amis.

L'ONCLE

Est il femme ou vous aiez mis
 Vostre cuer ny assis, biau niés ?
 390 Gardez que ne le me niez.
 Dites me voir.

LE CHANOINE

De quanque j'en puis percevoir,
 Celle que je miex ameroye
 Et que plus volentiers prenroie, 214 d
 395 Puis que dire fault ces consaulx,
 C'est la damoiselle de Saux,
 Car elle est grant et belle fille,
 Si est assez sage et soutilie,
 Ce m'est avis.

LE COUSIN

400 Pleust a Dieu qu'a mon devis
 Feussiez ja assemblez ensemble.
 Par foy, ce seroit, ce me semble,
 Ce qui vous fault.

L'ONCLE

Seroit ? or sachiez sanz deffaut
 405 Que jamais je ne fineray

Tant que demandée l'aray
Pour vous, biau niés.

LE CHANOINE

Je doubt que pas n'y aveigniez,
Biaux oncles, car ce sont grant gent
Et puissans d'amis et d'argent, 410
Je n'en doubt pas.

L'ONCLE

Je le saray isnel le pas,
Se je puis le père trouver.
Alons men, biaux niés, esprouver
Que pourrons faire. 415

LE COUSIN

Alons commencier un affaire
Que Dieu parface a son plaisir,
Ainsi conme je le desir,
Hastivement.

L'ONCLE

Au mains a ce commencement 420
Ne musérons pas biau quarré,
Car je voy la sire Barré :
Alons men a li sanz sejour.

Sire, Dieu vous mette en bon jour,
Et ma dame et sa compagnie 425
Deffende Dieux de villenie
Et doit honnour.

LE PÈRE

215 a Bien soiez vous venu, seigneur.
Sa, seez cy.

L'ONCLE

Mon seigneur, la vostre mercy, 430
Ne serrons pas, sauf vostre grace ;
Mais se tant aviez d'espace
Qu'a vous puissons un po parler,
Nous vous dirons en brief parler

435

Qui nous amaine.

LE PÈRE

Se Dieu me doint bonne sepmaine,
 Et je suis tout prest, sire Aubert.
 Or me soit de vous descouvert
 Que voulez dire.

L'ONCLE

440

Direz vous, biau niez ?

LE COUSIN

Nennil, sire,

Mais vous direz.

L'ONCLE

445

Se je fail, vous m'amenderez
 Es deffautes que je feray :
 Ainsi par vostre gré diray
 Dessoubz vostre correccion
 Sire, vezcy l'entencion
 Qui devers vous nous a atrait.

450

Souvent on raconte et retrait
 Qu'a bon fait bon avoir a faire,
 Car qui des bons est souef flaire;
 Le mauvais ne prise une quille.

455

Sire, vous avez une fille
 Dont Dieu vous face père lié,
 Laquelle, sur ce conseillié,
 Pour un nostre ami requerons
 Par mariage, et vous dirons
 Bien qui il est.

LE PÈRE

460

Biaux seigneurs, ceste chose c'est
 Un fait a autre non pareil,
 Qui ne se doit point sanz conseil
 Faire, qui bien en veult user.
 Pour ce sanz vous faire muser
 A ses amis en parleray
 Et brief vous en responderay.

215 b

Mais, s'il vous plaist, vous me direz 465
 Celui pour qui la requerez;
 Et nientmoins, seigneurs, vous mercy
 De l'honneur que me faites cy
 Vous deux ensemble.

LE COUSIN

Le celer n'est preuz, ce me semble : 470
 C'est pour son nepveu, mon cousin,
 Qui est si près vostre voisin,
 Qui est certes un fin preudomme
 S'il en a nul de cy a Romme,
 Bien dire l'os. 475

LE PÈRE

A dire voir, il a bon los
 Et s'a du bien tout plain apris.
 Je cuidois qu'il eust pris
 Ordre de prestre.

L'ONCLE

Par foy, sire, il le vouloit estre 480
 Se ne li eusse contredit.
 Mais tant li ay monstré et dit
 Et d'un et d'el que toute voie
 De marier l'ay mis en voie;
 Autrement fussent ses gagnages 485
 Et le plus de ses heritages
 En autrui main.

LE PÈRE

Ore vous venrez cy demain,
 Et selon ce que je seray
 Conseillié, je vous respondray 490
 Sans rioter.

LE COUSIN

Et nous y venrons sanz doubter,
 Mais a quelle heure ?

LE PÈRE

215 c A telle, se Dieu me sequeure,

- 495 Com vous plaira.
 L'ONCLE
 Après prime, voir, ce sera
 Assez a point, ce m'est avis.
 Entre vous deux avez avis
 Avec voz gens.
- 500 LE PÉRE
 De l'avoir seray diligens,
 N'en doubttez point.
 LE COUSIN
 Sire, a Dieu qui honneur vous doint !
 A Dieu, ma dame !
 LA MÈRE
 A Dieu, seigneurs, qui corps et ame
 505 Vous gart de mal !
 L'ONCLE
 Ma dame, la vierge royal
 Vous doint joye de quanque amez.
 Pour Dieu mercy, ne me blamez
 Se j'ay tenu trop longuement
 510 Mon seigneur. Biaux niés, alons ment.
 Je ne vous vy huy desjuner.
 Vous venrez avec moy diner
 Sans plus parler.
 LE COUSIN
 Puis qu'il vous plaist qu'y doie aler,
 515 Je ne le refuseray pas.
 Alons y donc ysnel le pas :
 Il en est temps.
 L'ONCLE
 C'est a quanque, biau niés, je tens.
 Alons bonne erre.
 LE PÉRE
 520 Dame, savez que viennent querre
 Ces hommes qui de cy s'en vont ?
 Je vous dy bien que le cuer m'ont

Mis en pensée.

LA MÈRE

Sire, ne suis pas appensée

215 d

A quoy il tendent.

525

LE PÈRE

Je vous diray. Il me demandent

Nostre fille par mariage

Pour un homme de leur lignage,

Biau cleric et preudomme et honneste.

Il n'en fault point faire d'enqueste,

530

Je le congnois et vous assez :

C'est ce cleric de qui trespassez

Fu son pére n'a pas granment.

Si nous fault aviser comment

Nous en ferons.

535

LA MÈRE

Me dites vous ce jeunes homs

Qui est a sire Aubert nepveu?

J'oy dire qu'il a fait veu

Que ja ne se mariera,

Et que briefment prestre sera.

540

Puet ce voir estre?

LE PÈRE

Il tendoit bien a estre prestre,

C'est verité, mais sire Aubert,

Son oncle, ne lui a souffert,

Ainçois veult qu'il espouse femme.

545

Pour ce vueil que m'en diez, dame,

Vostre propos.

LA MÈRE

Vezy que je vous en desclos.

Je ne scé se vous l'agreez,

Mais il l'ara, se m'en creez.

550

Car a brief parole solue

Homme ne sçay de sa value

Ycy entour.

LE PÈRE

Or me fault faire un autre tour.
 555 Sa, belle fille, vien avant :
 Est il nul a qui convenant
 Aies ne de foy ne d'amour ?
 Ne mens pas ; dy le sanz demour.
 Car un jeune homme te demande,
 560 Et ta honte y seroit moult grande 216 a
 Se par cremeur te parjuroies,
 Et grant deshonneur te feroies
 Et a nous touz.

LA FILLE

Certes, nanil, mon seigneur doulx :
 565 De ce n'aiez nulle doubtance
 Que j'aie a nul homme aliance
 N'acort nul fait.

LE PÈRE

Ore tenras tu bien a fait
 Ce que je vouलय ordenner
 570 De toy ? Je te vueil assener
 Espoir briefment.

LA FILLE

Mon seigneur, oil vraiment,
 N'en doubtez goute.

LA MÈRE

Elle seroit folle et estoute
 575 S'elle ne le vouloit tenir.
 Il l'en pourroit bien mal venir
 Et a bon droit.

LE PÈRE

Or pais. Seons nous cy endroit.
 Puis que j'ay vostre opinion
 580 Oy et son entencion,
 Response rendre me fauldra
 A sire Aubert quant il vendra
 Tranchéement.

L'ONCLE

Nous demourons bien longuement,
 Biau niez, et je le vous denonce, 585
 D'aler savoir quelle response
 De messire Barré arons.
 Alons y, car plus demorrans,
 Plus ert grant honte.

LE COUSIN

Vous savez miex a quoy ce monte 590
 Que je ne fas, biaux oncle. Alons.
 216 b Dieu vueille que ce dont parlons
 Puist avenir.

L'ONCLE

Avancez vous, nyez, de venir
 La voy soir tout le mesnage ; 595
 Et gardons qu'en nostre langage
 N'ait que raison.

LE PÈRE

Bien veignent en ceste maison
 Ces preudes hommes.

LE COUSIN

Dieu vous croisse honneur, sire ; sommes 600
 Venuz trop tart ?

LE PÈRE

Nenil, sire, que Dieux vous gart.
 Ça, que direz ?

L'ONCLE

Sire, response nous ferez,
 S'il vous plaist, sur nostre requeste ; 605
 Et s'elle vous semble estre honneste,
 Si l'ottroyez.

LA MÈRE

De quoy est ce que le proiez
 Si doucement ? Savoir le vueil.

610 Je vueil estre de ce conseil,
S'il vous agrée.

LE PÈRE

Ce n'est pas chose si secrée,
Dame, que vous n'y doiez estre.
Sire Aubert me requiert de mettre,
615 Ne fault pas que je le vous nie,
Nostre fille en la compaignie
De son nepveu par mariage
Et la m'a requis conme sage,
Si ques je vous en respondray,
620 Sire Aubert, et si vous diray,
Sanz vous mettre en nul autre soing,
Dès maintenant je la vous doing
Pour vostre ami.

LA MÈRE

216 c

625 Sire Aubert, par l'ame de my,
Grant joie ay de ceste besongne.
Or disons dès cy sanz prolongne
Quant les fiançailles ferons
Et en quel lieu espouserons
Par vostre assens.

L'ONCLE

630 A quanque voulez je m'assens
Tresvoulentiers.

LE PÈRE

Or en parlons endementiers
Que nous sommes ycy ensemble,
Et j'en diray ce qui m'en semble.
635 Je say plusieurs bonnes maisons
Qu'a ma requeste bien arons.
Mais celle ou j'ay mieux mon assens.
C'est chiez l'arcevesque de Sens
Vers les Barrez.

LE COUSIN

640 Sire, ja autre ne querez

Par mon gré, qu'elle est bonne et belle.
 Il y a chambres et chapelle
 A droit souhait, cuisine et sale
 Et si n'est pas vielle ne sale,
 Et s'est hors main.

645

L'ONCLE

Or nous accordons que demain
 Nous y serons, se bon vous semble,
 Et presens noz amis ensemble,
 Nous y ferons les fiançailles
 Premier, et puis les espousailles
 Tout en celle heure.

650

LE PÈRE

Je l'accors : preuz n'est la demeure.
 Soions l'un par l'autre avisé.
 Amenez donc nostre espousé
 Bien matinet.

655

L'ONCLE

216 d

A Dieu, sire ! il sera tout prest
 Assez matin ; ja n'en doubtez.
 Mon neveu, ça, or m'escoutez,
 A vostre cousin en alons
 Et ceste chose lui disons
 Et l'accordance.

660

LE COUSIN

Sire, il convient c'on s'en avance
 Alons bonne erre.

L'ESCUIER

Mon seigneur, je vous viens de querre
 De dessus les fossez plain d'ire.
 Car nulz ne me savoit a dire
 Ou vous feussiez.

665

LE CHANOINE

Thibaut, envis m'y trouvissiez
 Quant n'y estoye.

L'ESQUIER

670 Sire, que faire ne savoie
De m'en raler.

LE CHANOINE

Est ame venu pour parler
A moy de rien ?

L'ESQUIER

675 Nanil, sire, je vous dy bien,
Qu'aye veu.

LE CHANOINE

Alons men. J'ay assez eu
Esbatement.

LE PÈRE

680 Dame, sanz nul delaiement
A l'ostel de Sens en alez.
Nostre fille avec vous menez :
Faites l'ostel assemillier,
Netoier et appareillier
Et gardez qu'il n'y ait deffault,
Car demain noz noces nous fault
685 Faire leens.

LA MÈRE

Plus ne me tenray donc ceens,
Mon seigneur, foy que je vous doy.
Alons men, fille, vous et moy
Sanz plus cy estre.

217 a

LA FILLE

690 Alons, de par le roy celestre,
Quant vous plaist, mère.

LE PÈRE

Or alez : g'iray, par saint Pére,
Bien tost après.

L'ONCLE

Biau niez, s'estiez aussi engrès

De mon preu com je suis du vostre,
Foy que doy saint Perre l'apostre,
Je seroie bien eureux. 695

Biau sire, nous avons nous deux
Tant brassé, tant quis et erré
Que gendre a messire Barré 700
Serez, biau sire.

LE COUSIN

Cousin, vous en pouez bien rire;
Il vous dit voir.

LE CHANOINE

Dites vous que la doy avoir
Pour tout certain? 705

L'ONCLE

Oil, je le vous acertain.
Avec nous, soit folie ou sens,
A l'ostel mon seigneur de Sens
Maintenant venir vous en fault.
La l'espouserez sanz deffault: 710
Tout y est prest.

LE CHANOINE

Puis que le fait est si aprest
Qu'aler nous y fault sanz demeure,
Alons men donc : en la bonne heure
Se puist il faire. 715

Le COUSIN

Biau cousin, hastons nostre afaire,
Car estre y deussions pieça.
Avant touz nous, de par Dieu, ça,
Mouvez devant.

217 b

LE CHANOINE

Voulientiers, seigneurs, or avant
Donc me suivez. 720

POLET

Tu soies le bien arrivez,

Volant. Qu'est ce la qui te maine ?
 Dy me voir, s'en bonne sepmaine
 Te mette Dieux.

725

VOLANT

L'entente que j'ay d'estre miex
 Diné ceens qu'en ma maison,
 Je te promet, c'est l'achoisson
 Pour quoy vieng cy.

POLET

730

Et comment t'est, pour Dieu mercy ?
 Dy moy, as tu bien proufité
 Ou pais ou tu as esté
 A recors faire ?

VOLANT

735

Polet, pour voir te puis retraire,
 Ma gaingne n'y a riens valu,
 Car les Anglois m'ont tout tolu,
 Et une meschine qu'avoie
 Si belle, que trop decevoie,
 Que j'avoie prise en Bourgoingne.
 A brief, alée est ma besoingne
 Trop meschanment.

740

POLET

745

Je n'ay pas donc perdu granment
 Se de Paris ne m'ay meu.
 Touz dis ay je le brout eu
 Pour moy et pour Santelinete,
 Qui est assez belle garcete
 A mon devis.

VOLANT

750

Polet, or me dy ton avis :
 Je voy ceens a planté gent,
 Y pourrons nous gagner argent
 A recorder ?

POLET

S'a mon dit te veulz accorder,

Cy endroit point ne demourrons,
 Mais a unes noces yrons
 Que mes sire Barré huy fait : 755
 La ferons nous miex nostre fait,
 Je n'en doubt pas.

VOLANT

Et je t'em pri qu'ysnel le pas
 Y alons. Ou est ce, Polet?
 Nous departirons nostre acquest 760
 A ton plaisir.

POLET

Nous y venrons tout a loysir,
 Volant, mais dès cy devisons
 De quoy au diner servirons
 Devant les gens. 765

VOLANT

Vecy : tu seras diligens
 De biaux diz recorder assez,
 Et je ne suis pas si lassez
 Que ne face d'esparteté
 Et des faiz de ligiereté 770
 Plus que ne fist onques Safret ;
 Et si diray, se mestier est,
 De grans falourdes.

POLET

C'est bien dit. Or alons de bourdes
 Servir tant la feste et de lobes 775
 Qu'avoir puissons l'une des robes
 A l'espousé.

VOLANT

Nous en serons, se puis, housé
 Ains qu'il soit nuit.

LE CHANOINE

A qui qu'il siée ou qu'il ennuit, 780
 Puis que me voy hors de la feste,

Je n'y mettray mais pié ne teste
 Tant que les heures aie dit
 De la mère au doulx Jhesu Crist.
 785 Bouter me vois en sa chappelle.
 E! tresdoulce vierge pucelle, 217 d
 Source de grace et vray conduit,
 Mercy, dame, et ne vous ennuit
 S'il ne m'est si bien avenu
 790 Que de dire m'est souvenu
 Voz heures, si conme je sueil.
 Dame, acquitter ycy m'en vueil
 Afin qu'en grace m'avoiez
 Et que vous joie m'envoiez
 795 De celle que vieng d'espouser;
 Et sanz moy plus cy dolouser
 Vueil conmençier bas, plus n'y a :
Domine, labia mea, et cetera.

NOSTRE DAME

Jehan, mon amy, je voy la
 Un mien sergent a qui parler
 800 Me convient; si y vueil aler.
 Venez me faire compaignie,
 Et ces anges que ne hé mie
 Faites descendre.

SAINT JEHAN

Dame, volentiers, sanz attendre.
 805 Seigneurs anges, or m'entendez :
 Vous deux de cy jus descendez
 Appertement.

GABRIEL

Jehan, nous ferons liement
 Vostre vouloir.

LE CHANOINE

810 Egar! qu'est ce? que puis j'avoir?

De sommeil sui si entrepris
 Que ne puis plus. Ou l'ay je pris ?
 Un petit cy clignier me fault,
 Puis acompliray le deffault
 Que j'ay a dire.

815

MICHEL

Jehan, or vous plaise, biau sire,
 Faire nous savoir ou irons,
 Ne lequel chemin nous tenrons
 Ou la ou ça.

218 a

SAINT JEHAN

Nostre dame le vous dira,
 Qu'est cy presente.

820

NOSTRE DAME

Mes amis, d'aler m'atalente
 Jusques la en celle chappelle
 En y alant a voiz ysnelle
 D'accort chantez.

825

GABRIEL

Dame, chascun entalentez
 En est. Michiel, avant disons.
 Son conmant bien faire devons,
 Car mère est de nostre seigneur.

RONDEL

Precieuse vierge d'onneur,
 Mére au glorieux fruit de vie
 Par tout s'estent vostre valeur,
 Precieuse vierge d'onneur;
 Et n'en dit on que la moitié :
 Tant a en vous grace et douceur
 Que nul ne fault a vostre aye,
 Precieuse vierge d'onneur,
 Mére au glorieux fruit de vie.

830

835

NOSTRE DAME

Dy moy, dy moy, tu qui de cuer

840 Par samblant amer me soloies
 Et qui maintenant me tenoies
 En disant nonne pour si belle,
 Comment est ce, se je suis telle,
 Que pour autre femme me laisses ?
 845 Malement, ce semble, m'abaisses
 Et ma valeur et ma biauté.
 Ce n'est pas bonne loyauté,
 Quant cy me laisses. Es tu yvres,
 Qui tout ton cuer et t'amour livres
 850 A une terrienne femme,
 Et tu me laisses, qui sui dame
 Du ciel? Dy me voir, ou est celle
 Qui plus est de moy bonne et belle?
 Je te dy bien que tant t'amoye
 855 Que ja en paradis t'avoye
 Ordené un lieu ou feusses, 218 b
 Ouquel gloire sanz fin eusses.
 Mais de la te sera defaiz
 Et en enfer te sera faiz,
 860 Ce saches, et appareilliez,
 S'autrement n'es tost conseilliez.
 Plus ne t'en dy. Seigneurs, avant,
 Partons de cy. Mouvez devant
 Entre vous troys.
 SAINT JEHAN
 865 Vostre conmant ferons, c'est drois.
 Dame des cieulx.
 GABRIEL
 Avant pardisons, c'est le mieux,
 Nostre rondel.
 MICHEL
 C'est mon, car il est bon et bel.
 870 Or sus, je vous en pri de cuer.
 RONDEL
 Tant a en en vous grace et douceur

Que nul ne fault a vostre aye,
 Precieuse vierge d'honneur.
 Mère au glorieux fruit de vie.

LE CHANOINE

Ha ! tresdoulce vierge Marie, 875

Com tu as bon droit se tu grouces

De ce qu'ay fait et te courroces!

Las ! de quelle heure fu je nez ?

Las ! je suis perduz et dampnez

Se je ne met en moy deffense. 880

Ha ! douce dame, quant je pense

A ta grant biauté non pareille,

Mon cuer du penser se merveille,

Car je voy trop sui variez

En moy quant me sui mariez. 885

Las ! de quelle heure ay je pris femme ?

Je voy que je pers corps et ame,

Et es mains de mes ennemis

Me suis mis, et par mes amis,

Se remède briefment n'y met. 890

218 c Mais, mère Dieu, je vous promet

Qu'ainsi je ne vous perdray mie,

Mais feray que serez m'amie,

Se je puis, ains demain ceste heure.

Cy ne feray plus de demeure, 895

Ains m'en revoys a l'assemblée.

Ma volentez a touz emblée

Par biau semblant faire sera,

Si que ja nulz ne le sara

Tant que d'eulx me seray emblez. 900

Se les cuers ont pour moy troublez,

Riens n'y aconté.

L'ONCLE

• Biaux niez, vous nous faites grant honte.

Dont venez vous toute ajournée ?
 905 Departie et desassemblée
 Est ja la gent de vostre feste.
 C'est a vous chose deshonneste,
 Quant ne les avez mercyé
 De l'onneur et regracié
 910 Qu'il vous ont fait.

LE CHANOINE

Je n'en puis mais, oncle, c'est fait,
 Et fust la contesse de Foiz.
 Pardonnez le moy ceste foiz,
 Oncle, pour Dieu.

L'ONCLE

915 Il nous fault savoir en quel lieu
 Est miex de jesir vostre assens,
 Ou chiez l'arcevesque de Sens,
 Puis que voz noces y sont faites,
 Ou en vostre ostel. Or m'en faites
 920 Responce brief.

LE CHANOINE

Biaux oncles, a qui qu'il soit grief,
 Je n'ay ne talent ne desir
 D'ailleurs qu'en ma maison gesir,
 N'en doubtez pas.

L'ONCLE

925 Or y alez isnel le pas,
 Et je par dela m'en yray
 Et amener vous y feray
 Vostre espousée.

218 d

LE CHANOINE

930 Il me plaist bien, oncle, et agrée
 Devant m'en voys.

LE PÈRE

Sire Aubert, je ne vy des moys
 Tel homme que vostre neveu.
 Ou peut il estre, n'en quel lieu,

Que cy ne vient ?

L'ONCLE

Je vieng de lui. Sire, il convient 935

Que nous li menons s'espousée,

Car c'est s'entente et sa pensée

D'ennuit gesir en sa maison.

Menons li sanz arrestoison;

Il en est heure.

940

LE PÈRE

Le veut il ? Alons sanz demeure :

Je le vueil bien.

L'ONCLE

Aussi fas je, sire, et si tien

Que c'est le miex.

LE PÈRE

Veczy vostre femme, biau fiex. 945

Or la prenez ; je la vous livre.

Quant est de moy je m'en delivre

Dès ore mais.

LA MÈRE

Dieu vous doint s'amour et sa paix

Et joie ensemble.

950

LE COUSIN

Dame, et vous, seigneurs, il me semble

Que nous en pouons bien aler

Et les laissier eulx deux parler

De leur secré.

LE PÈRE

Vous avez bien dit à mon gré. 955

Alons men ça, sanz plus debatre.

219 a

Je vueil que nous alons esbatre

En ma maison.

LA MÈRE

Je demourray cy, c'est raison.

Alez vous ent.

960

LE CHANOINE

De cy demourer n'ay talent.
 Certes avecques vous yray,
 Et tandis conme g'y seray
 Se couchera.

LA MÈRE

965 Il dit bien ; il ne la verra
 Mie couchier.

L'ONCLE

Alons men, sanz plus cy preschier .
 Je vous en proy.

LE PÈRE

970 Alons. Or ça, biau filz, je croy
 Qu'amissiez miex a demourer.
 Gardez vous de trop labourer :
 Ce sera sens.

LE COUSIN

Seigneurs, or oiez mon assenz :
 Je lo qu'en l'ostel en alons
 975 Ou noz noces faites avons,
 Et ne soions mie si nices
 Que ne visitons les offices
 Et la vaisselle aussi d'argent,
 Et mettons hors toute la gent;
 980 Et quant ainsi ouvré arons,
 Après esbatre aler pourrons
 Plus seurement.

L'ONCLE

C'est voir. Je lo bien vraiment
 Qu'il soit ainsi.

LE PÈRE

985 En nom de moy si fas j'aussi.
 Alons y ; n'y ait plus songié.
 Biaux filz, nous vous donnons congié
 D'aler couchier.

LE CHANOINE

219 b

Mais qu'il vous plaise, sire chier,
Sanz vous pas ne retourneray, 990
Mais la ou vous irez g'iray
Par compagnie.

LE COUSIN

A un mot, il ne nous plaist mie
Qu'avec nous doiez plus ore estre.
Pensez de vous au retour mettre : 995
Il en est temps.

LE CHANOINE

Puis que riens n'y vault mon contens,
A l'ostel m'en retourneray
Et a Dieu vous conmanderay.
Qu'est ce la? Diex y soit, ma dame! 1000
Dites, est couchée ma femme
A vostre vueil?

LA MÈRE

Oil, biau filz, sachez je vueil
Aussi prendre un po de repos.
Si ferez vous, se mon propos 1005
Croire voulez.

LE CHANOINE

J'ay le lit tout prest. Ça venez,
Dame, couchier.

LA MÈRE

Biau filz, sanz vous point empeschier,
Maishuy ceens ne demourray. 1010
Sachez qu'en mon hostel yray
Avec mes gens.

LE CHANOINE

Je n'ay qu'un de touz mes sergens,
Si me faut avec vous aler.
Or ne m'en faites plus parler, 1015
Par amour, dame.

LA MÈRE

Vous n'y venrez mie, par m'ame.
 Il me souffist bien se je l'ay.
 Thibaut, alons men sanz delay
 Appertement.

1020

L'ESCUIER

219 c

Dame, il me plaist. Alons briefment
 Ou vous voulez.

LE CHANOINE

Mère Dieu, que me secourez !
 En moy sens un trop dur assault.
 La char me bout, tressue et sault
 De ce que ja dedans ce lit
 N'a pris et eu son delit
 Et son vouloir de la pucelle
 Qui y gist, qui par est tant belle,
 Et me dit j'ay pensée lasse
 Quant entre mes bras ne l'embrasse,
 Et a moy par suis trop eschars,
 Et que s'on me deust en chars
 Ardoir ou noyer en viez puiz
 Puis qu'avoir ma volenté puiz,
 D'elle, tenir ne m'en deusse,
 Posé que de certain sceusse
 Que j'en deusse estre periz.
 Contre ce dit mes esperiz
 Que se je de ce ne me garde,
 Je ne donray l'eure de garde
 Que me verray si desceu
 Et me sera cy mescheu
 Que j'aray perdu, douce dame,
 Vostre amour et mon corps et m'ame.
 Nient moins la charoingne chestive
 Encontre l'esperit estrive
 Et art par desir et remue
 Pour la belle que la voy nue.

1025

1030

1035

1040

1045

Et pour ce dy qu'il avient peu 1050
 Qu'estoupes n'ardent près de feu :
 Estoupes est homs et feu femme ;
 Qui tost est espris de tel flame.
 Car de ce feu, bien m'en recors,
 Sens en partie espris mon corps. 1055
 Mais, vierge, pour la vostre amour,
 Cy ne feray plus de demour,
 Mais pour moy garder de bruir
 219 d Tout maintenant m'en vueil fuir
 Et laisser quanque j'ay ou monde, 1060
 Pour vous, mère Dieu pure et monde,
 Devotement de cuer servir
 Et la vostre amour desservir.
 Ceste lettre cy laisseray
 Qui dira qu'alez m'en seray 1065
 Estre hermite, et que l'en entende
 Que jamais jour on ne m'atende.
 Meubles et femme, je vous lais,
 Et mes amis touz, clers et lais,
 Conmand a Dieu et a sa garde. 1070

 Doulce mère Dieu, je regarde
 Quel chemin tenir je pourray.
 Ce bois la par my m'en yray.
 Il est hault, estrange et sauvage.
 E! Diex, vezcy un hermitage 1075
 Tout vuit. Je tieng nul n'y habite.
 Certes demourer conme hermite
 Y voulay, c'est m'entencion,
 Et ycy par devocion
 Mon temps user. 1080

LE PÉRE

Seigneurs, sanz plus ycy muser,

Alons veoir nostre espousé
Et sachons s'il a point rusé
Encor sa femme.

L'ONCLE

1085 Je le lo bien, sire, par m'ame.
Alons, se Dieu joie vous doint.
Nous y venrons trop bien a point,
Si com moy semble.

LE COUSIN

1090 C'est voir, et, par foy, s'il ne s'emble,
Nostre desjuner paiera,
Ou chausse ne soler n'ara
Huy a chaussier.

LA FILLE

1095 Mére Dieu, le jour voy haussier
Et seule sui sanz compagnie
Et ay esté toute nuitte. 220 a
Ou peut mon seigneur estre alé,
Quant ennuit a moy n'a parlé?
Je ne scé se vin desceu
L'a, par quoy ailleurs ait geu,
1100 Mais tout maintenant le s ray,
Car de ce lit me leveray
Pour le querir.

LA MÈRE

Belle fille, pour vous guerir
Yray je querre mire? Dites :
1105 Vostre mari sera il quites
De ses flamiches?

LA FILLE

De voz levains ne de voz miches
Ne scé que vous dites, ma dame,
Ne mon mari ne vy, par m'ame,
1110 Puis que couchay.

LA MÈRE

Ersoir, au partir, le laissay
Cy. Que dis tu ?

LE PÈRE

Avant ! est rompu le festu ?
Egar ! qu'est ce, dame espousée ?
Estes vous ja si tost levée ? 1115
Diex y ait part.

L'ONCLE

Encore a esté plus espart
Son mari, quant il est ja hors.
Ou est il alez, le bon corps ?
Savez vous, dame ? 1120

LA MÈRE

Elle ne scet, se dit par s'ame,
N'avecques lui ennuit ne jut.
Espoir que hier un pou trop but :
Si gist ailleurs.

LE COUSIN

Ce ne sont mie les meilleurs 1125
Nouvelles que puissions avoir.
Avant, avant ! il fault savoir
Ou il peut estre.

220 b

LA FILLE

A mon chevet ay ceste lettre
Trouvé. Gardez, oncle, que c'est. 1130
Ne m'y cognois fors tant qu'elle est
Nouvelle escripte.

L'ONCLE

C'est de sa main : mais que pourlite
L'aie, vous sarez sa divise.
Ceste lettre dit et divise, 1135
Ne vous merveilliez se j'en pleure,
Que mon nepveu yer, a celle heure
Que de nous il se destourna,
Pour dire ses heures tourna :

1140 En celle eglise ala tout droit,
 Et quant il fu en cel endroit
 Que nonne devoit conrencier,
 Le dire li convint laissier
 Pour sommeillier en la chappelle.
 1145 En dormant la vierge pucelle
 Vy tresnoblement atirée,
 Mais moult estoit vers lui yrée ;
 Si lui demanda qu'il pensoit
 Qui pour une autre la laissoit,
 1150 Et si lui sembloit qu'aussi belle
 Et aussi bonne fust com celle
 Dont il avoit faite s'espouse,
 Et qu'elle estoit ja si jalouse
 De lui qu'en paradis son lit
 1155 Lui avoit fait par grant delit,
 Qui lui sera du tout defait
 Et en enfer lui sera fait,
 S'il ne prent garde a sa besongne.
 Pour ce de nous, ce dit, s'eslongne,
 1160 Pour ce de nous s'en fuit et emble.
 A Dieu touz vous conmande ensemble,
 Et dit que tel chemin prenra
 Que cy jamais ne revenra,
 Mais en desert ou en boscage
 1165 Voulra servir en hermitage
 Dieu et sa mère.

220 c

LA FILLE

1170 Vezcy pour moy nouvelle amère.
 Lasse! chestive! j'esperoye
 Qu'honorée par lui seroie
 Plus que femme de ce pais.
 Voir, mes cuers est bien esbahis.
 Et puis qu'il a pris tele voie
 Que je pers ma première joye,
 Jamais autre mari n'aray,

XIX	UN CHANOINE QUI SE MARIA	179
	Mais pour s'amour nonne seray :	1175
	A Dieu le veu.	
	LA MÈRE	
	Ha! belle fille, de ce veu	
	Vous refrenez.	
	LE PÈRE	
	Taisiez, fille, et ma foy tenez	
	Que je vous donray tel mari,	1180
	N'aiez ja le cuer si marry,	
	Dont en puissance monterez,	
	Et dont bien venue serez	
	Par tout pour li.	
	LA FILLE	
	Sire, je promet a celui	1185
	Qui pour moy le grant venredi	
	En la croiz benoite pendi	
	Que de mari n'aray je point.	
	Nonne vueil estre, et en tel point	
	User ma vie.	1190
	LA MÈRE	
	Puis qu'elle en a si grant envie,	
	Je vous diray que nous ferons.	
	A l'abeesse parler yrons	
	De Poycy. Ce sont bonnes femmes.	
	La la faison l'une des dames :	1195
	Je n'y voy miex.	
	LE COUSIN	
	Vous dites moult bien, dame, et Diex	
	De ce moult bon gré vous sara,	
	Quant par vous telle fille ara	
220 d	A son servise.	1200
	LE PÈRE	
	Puis qu'a ce ta volenté prise	
	S'est, je n'y contrediray pas.	
	Sa, alons men ysnel le pas.	
	Je te promet ne fineray	

1205 Jusqu'a tant que je te verray
Nonne voilée.

L'ONCLE

Sire, s'il vous plaist et agréé,
Avec vous jusques la iray,
Et compagnie vous tenray,
1210 Moy et mes niez.

LE PÈRE

Puis qu'il vous plaist que me teigniez
Compagnie, vostre mercy.
Sa donc, touz cinq partons de cy
Sanz y plus estre.

LE CHANOINE

1215 Douce vierge, de qui volt naistre
Des vrais amans li tresparfaiz,
Dame, de ta grace refaiz
Ton sergent et le reconforte
Si qu'ouverte li soit la porte
1220 De ton saint estre.

NOSTRE DAME

Jehan, encores vous fault mettre,
Je ne vous vueil pas espargnier,
A voie pour moy compaignier
Avec ces anges.

SAINT JEHAN

1225 Dame, qui dessus les archanges
Et de touz sains estes royne,
Je feray de volenté fine
Vostre conmant.

NOSTRE DAME

Et vous, anges, suz, or avant :
1230 Encore aler vueil une foiz
A mon amy qui en ce bois

La me regrette.

221 a

GABRIEL

Vostre voulenté sera faite,
 Dame, et en alant chanterons.
 Michel amis, avant disons 1235
 Ce chant que n'a guères feistes.

RONDEL

Cuers humains, com plus te delites
 En la dame des cieulx amer,
 Plus fais euvres de grans merites.
 Cuers humains, com plus te delites 1240
 Et plus par grace en Dieu habites,
 Et plus as joye sanz amer,
 Cuers humains, com plus te delites
 En la dame des cieulx amer.

NOSTRE DAME

Mon chier amy, qui cy habites 1245
 En ce lieu divers et sauvage,
 Qui as laissié ton heritage
 Et tes nobles possessions,
 Ta femme et tes grans mansions
 Pour moy venir ycy servir, 1250
 Je le te voulray desservir
 Briefment, n'en doubtes.

LE CHANOINE

Ave, dame, qui dessus toutes
 Les vierges en paradis regnes :
 Quant si doucement cy m'aregnes, 1255
 Je te doy bien glorifier
 Et loer et manifïer
 De ta bonté.

NOSTRE DAME

Pour ce que ton corps as donté
 Par penance en cest hermitage, 1260
 Je te promet que l'eritage

- De paradis sanz fin aras
 Et ycy plus ne demourras.
 En un autre lieu t'enmenray,
 1265 Et souvent te visiteray
 Jusqu'en la fin de ton trespas.
 Anges, alez devant le pas,
 Et pardites a mon convoy
 Vostre rondel : amis, suis moy. 221 b
 1270 Or sus, chantez.
 MICHEL
 Chascuns en est entalentez,
 Vierge sanz per, s'est bien raisons.
 Avant, Gabriel : pardisons
 Devant la meilleur des elites.
 RONDEL
 1275 Et plus par grace en Dieu habites
 Et plus as joye sanz amer,
 Cuers humains, com plus te delites
 En la dame des cieulx amer.

Explicit un miracle de Nostre Dame qui s'aparut au chanoine en disant l'eure de nonne, et le reprist dont il avoit espousé femme par dessus ce que il lui avoit promis a la servir et amer tout le temps de sa vie, etc.

Serventois.

221 c J'AY maintes foiz au noble bien pensé
 Que Dieu, passant le pouoir de Nature,
 Fist aux humains quant sa divinité
 Descendre fist en corps de vierge pure :
 La s'esconsa la divine puissance,
 C'onques n'en ot Nature congnoissance;
 La du pur sanc de la vierge Marie
 Prist char humaine en substance de vie
 Et en nasqui vraiz homs virginalment.
 Tuit li creant ce point, je ne doubt mie,
 Sont soustenu en bon gouvernement. 11

Donc doit on bien de bonne volenté
 Servir la vierge et amer par droiture,
 Quant enfanter pot treble en unité
 Le createur dont elle est creature,
 Et le norrir conme mère en enfance,
 L'enfant a li faisant obeissance
 Conme vraiz filz a sa mère et amie ;
 La prist discipline sa seigneurie,
 Et la demonstra il visiblement
 Qu'essauciez est le cuer qui s'umilie
 Quant bonne amour par grace s'i assent. 22

Si c'om doit bien pour de bonne heure né
 Tenir le corps qui met toute sa cure
 En la vierge dame d'umilité,
 Car c'est celle que la sainte escripture
 Dit des humains estre vraie esperance,

Solaz, confort, joye, paiz, recouvrance,
 Conseil, refuge, advocate, partie,
 Suer, fille et mère au juge qui tout lie;
 Et qui bien sert ceste vierge humblement,
 La vierge l'aime et foy li certiffie
 33 Que li bienfaiz ne perist nulement.

Et quant tel bien sont en amour trouvé,
 C'est ce qui moult pecheour assure,
 Car la vierge prie l'humanité
 Qu'envers la deité paix li procure.
 Adonc la tendre humanité s'avance,
 Moustrant a Dieu la plaie de la lance
 Que sa char ot quant fu crucifie.
 La est tantost deitez convertie, 221 d
 La ne se fait pas prier longuement,
 Mais la par grace en pitié faite otrie
 44 L'amant mercy qui sa joie li rent.

Dame que j'aim, par vous sont recreé
 Et par le fruit de vostre porteur
 Cil qui dampné furent par fruit veé.
 Fruiz fu pour fruit, mors sure pour morsure,
 Pacience pour desobeissance,
 Fame pour fame, homs pour homs en balance;
 Vierge, aussi fu parmy vous convertie
 De vostre fil ceste euvre et acomplie,
 Tant en appert conme invisiblement,
 Com cil qui peut par divine maistrie
 55 A son plaisir ouvrir sensiblement.

Si vous suppli, dame, devotement
 Qu'avoir puissons sa sainte compagnie
 Touz et toutes au jour du jugement.

Amen.

Autre Serventois.

NOBLE chose est d'amour, car sa puissance
 Nous fu moustrée en debonnaireté
 Quant Dieu qui tout a en sa cognoissance
 Vint du divin et souverain secré
 Ou precieux et digne corps sacré
 De l'excellente humble vierge Marie,
 En qui il prist char et sanc, voiz et vie,
 Et devint homs cil qui tout voutl creer.
 La fu mortieux cil qui est sanz finer
 Pour conforter vray amant et amie. 10

222 a Ainsi Amours par soutive ordenance,
 Dieux, pére et filz, avec en unité
 Sains esperiz qui touz bons faiz avance,
 Ordonnérent d'egale voulenté
 Que sanz en riens amenrir deité
 Le filz de Dieu par la vierge prisie
 Frère seroit a humaine lignie
 Et doucement les verroit enformer
 De leur salut, et la voie moustrer
 D'amour, par quel vertu joie est norrie. 20

Car d'amour naist une douce atrempance
 Qui nous aprent a croire en verité
 Que l'umblie vierge en humaine semblance
 Gouverna cil dont tout est gouverné,
 Et il con fil garni d'umilité
 Li obei et porta seigneurie,
 Moustrant qu'estoit celui qui prophecie

Acompliroit pour le peuple sauver,
 Et pour touz diz en bien perseverer
 30 Fist a amour obeissance lie.

Ensement cil par vraie obeissance,
 Qui desiroit l'umaine sauveté,
 Vint faire en croiz d'umains la delivrance
 Et pour ç'offrir a mort s'humanité.
 La donna sanc et yaue a tel planté
 Que des humains fu la debte amortie.
 La fu la clef ouvrée et acomplie
 Dont la prison d'enfer vult defermer
 Et paradis ouvrir pour y mener
 40 Les vrais amans qu'Amours a en baillie

Dont vraiz amans doit avoir esperance,
 Se ce fait croit sanz y avoir doubté,
 Qu'en paradis ara sa demourance,
 Participant a la beneurté
 De l'umble vierge a qui Diex a donné
 Joie avec lui dont il la vivifie,
 Qui est sanz fin et touz jours monteplie,
 Laquelle veult a ses servans donner.
 S'en doit amans du tout Amour loer,
 50 Et dame en doit estre amée et servie. 222 b

Amons la vierge et servons sanz cesser,
 Car c'est celle qui nous peut empetrer
 Joie es sains cieulx sanz ce c'on l'escondie.

Deo gracias.

XX

.....

MIRACLE

DE

SAINT SEVESTRE

PERSONNAGES



SAINT SEVESTRE
LE PREMIER CLERC
LE SECOND CLERC
CONSTANTIN
PREMIER CHEVALIER
SECOND CHEVALIER
LE PREMIER CLERC TRACON
LE SECOND CLERC ZENOPHILE
L'ESQUIER COPIN
BOURGOT
LIEGART
GERTRUS
DIEU
SAINT PIERRE
GABRIEL
MICHEL
SAINT POL
LE MESSAGER CORNÉE
HELAINÉ
NOSTRE DAME
ABRAHAM
GODOLIAS
ANNE
DOECH

Cy commence un miracle de saint Sevestre et de l'empereur Constantin qu'il converti. 223 a

SAINT SEVESTRE

SEIGNEURS, en moy ay grant pitié
De ce qu'en telle ennemistié
Nous a l'empereur Constantin
Qu'il ne tent qu'a nous mettre a fin,
Pour tant que la foy catholique 5
Preschons, et c'est le bien publique,
Vous le savez.

LE PREMIER CLERC

Tressaint pére, voir dit avez.
C'est dommage, s'a Dieu pleust,
Qu'en Dieu ne croit, car s'il creust 10
Subhauciée fust sainte eglise,
Qui par lui destruite est et mise
Auques au nient.

LE SECOND CLERC

Les choses avenir convient
Ainsi conme elles doivent estre : 15
Quant il plaira au roy celestre,
Son cuer felon et perverti
Ara tost en bien converti,
Je n'en doubt point.

SAINT SEVESTRE

223 b C'est voirs; et Dieu grace lui doint 20

Qu'il le puit et croire et cognoistre
 Et la foy crestienne accroistre
 Et avoir en dileccion.
 Or ça, c'est mon entencion
 25 Que l'un de vous un sermon face
 Tout maintenant en ceste place
 Pour les cuers en bien esmouvoir.
 Car par sermon souvent avoir
 Sont maint cuer a bien atourné
 30 Et de bonnes meurs aourné
 Plus grandement.

LE PREMIER CLERC

Sire, je croy bien vraiment,
 Et je suis tout prest, s'il vous plaist,
 De le faire, et bien raison est
 35 Aussi, saint pére.

SAINT SEVESTRE

Je le vueil. Faites qu'il appére,
 Quant a preschier vous serez mis,
 Que vous soiez de Dieu amis
 Et de la foy.

PREMIER CLERC

40 Sire, volentiers; donnez moy
 Donques vostre beneïçon,
 Car sanz ce predicacion
 Ne doy pas faire.

SAINT SEVESTRE

45 Jhesu Crist, le roy debonnaire,
 Grace en Dieu tellement amaint
 Qu'a li se convertissent maint
 A sa foy. Va.

LE SERMON

Egredimini, filie Sion, etcetera. Et se fenist par *in secula seculorum.*

CONSTANTIN

Seigneurs, entendez ma raison :
 A vous deux conseillier me vueil
 Conme a mes amis. Trop me dueil, 50
 223 c Certes le celer n'en est preuz,
 De ce qu'ainsi me voy lepreuz
 Et que mon mal adès empire.
 Se savez en tout mon empire
 Homme qui se sache entremettre 55
 De conseil ne remède y mettre,
 Je vous pri que l'en le me mande,
 Et s'il veult avoir s'en demande,
 Car ja tant n'en demandera
 Conme encores plus en ara 60
 Se bien me fait.

PREMIER CHEVALIER

Sire, de faire un si grant fait
 Com divisez n'a pas puissance
 Homme dont j'aye congnoissance
 Se poise moy, par touz noz diex. 65
 Elas ! quant je regar voz yex,
 Voz mains, vostre corps, vostre vis,
 Qui tant estoit biaux a divis,
 Par lepre si defiguré
 En mon cuer n'a riens figuré 70
 Mais que tristesse.

SECOND CHEVALIER

Sire, forment au cuer me blesce
 Le mal que je vous voy avoir ;
 Si me semble que bon savoir
 Feroit des clers qui scévent lettre 75
 Se l'en y pourroit conseil mettre
 Ne garison.

CONSTANTIN

E ! seigneurs, sanz arrestison
 Vous pri donc que l'en envoit querre

80 Touz les bons clers qu'en ceste terre
 L'en y sara.
 LE PREMIER CHEVALIER
 Mon chier seigneur, fait vous sera,
 Car je mesmes pour vous yray :
 Au mains deux vous en amenray
 85 Que je sçay que l'en tient si fais
 Qu'il n'est nul clerc d'eulx plus parfaiz. 223 d
 Je les vois querre.
 SECOND CHEVALIER
 C'est bien dit. Ors alez bonne erre,
 Mon ami chier.

 PREMIER CHEVALIER
 90 Seigneurs, sanz vous granment preschier,
 Levez sus tost, n'y ait deffault :
 A l'empereur venir vous fault
 Avecques moy.

 LE PREMIER CLERC TRACON
 95 Sire, par les diex que je croy,
 Mon seigneur l'empereur de Romme
 Entre les autres est bien homme
 A qui sommes tenuz d'aler.
 Puis qu'il nous mande, a brief parler,
 Nous yrons, sire.

 SECOND CLERC ZENOPHILE
 100 Je ne say qu'il nous pense a dire,
 Mais volentiers l'orray parler.
 Or avant : pensons d'y aler
 Ysnellement.

 PREMIER CHEVALIER
 105 Maistre, sachez certainement
 Que la cause pour quoy vous mande
 Vous peut prouffit et honneur grande
 Porter; ne cuidiez le contraire.

Sa, venez vous devant lui traire :
Je seray pour vous deux messages.

Mon chier seigneur, vezcy les sages 110
Qu'avez mandé.

CONSTANTIN

Seigneurs, je vous ay demandé
Pour ce que vous me conseilliez :
Si vous pri que ne me failliez.
Je me voy si plain de pouacre, 115
N'a tel, je croy, de cy en Acre.
Ne fault pas que je le vous die :
Vous veez bien ma maladie.

224 a Regardez se par nesun tour
De santé puis avoir retour; 120
Car se me pouez ne savez
Garir, tenez que vous avez
Quanque j'ay en vostre bandon,
Et donrray a chascun tel don
Com voudra prendre. 125

PREMIER CLERC TRACON

Chier sire, onques ne poy apprendre
D'omme, tant fust bon medicin,
Ny en livre ebrieu ne latin
Ne trouvay herbe ne racine
Qui fust parfaite medicine 130
Pour tel mal estre garissable ;
C'est maladie non curable.
Ne doubtez qu'il ait homme ou monde
Qui tel mal garisse ne monde
Parfaitement. 135

SECOND CLERC ZENOPHILLE

Il dit voir, se n'est seulement
Par un moult merueilleux affaire.
Mais, sire, qui vous pourroit faire
Avoir biaucop d'enfans petiz

140 Et de leur sanc un baing faitiz
 Vous fust fait ou vous entrissiez
 Et vostre corps y lavissiez,
 Aussi chaut comme d'eulx venroit,
 Ce baing, sire, si vous vouldroit
 145 Sur toute rien.

SECOND CHEVALIER

Puis qu'il est seigneur terrien
 Et empereur de ce pais,
 Sire, ne soiez esbahis,
 Qu'assez vous en assambleray.
 150 Avant certes les embleray
 Aus méres, soit folie ou sens,
 Qu'ains demain n'en aie cinc cens
 En ma manaye.

ZENOPHILE

155 Se vous faites que je les aie,
 J'aray le cuer moult esmary
 Se je ne le vous rens gairy
 Dedans quart jour.

224 b

SECOND CHEVALIER

Je les vois querre sanz sejour.
 Sa, Copin, vien t'en avec moy.
 160 De trouver ent pas ne m'esmay
 Briefment assez.

L'ESCUIER

Sire, s'estre peut repassez
 Ainsi comme ce cleric propose,
 Certes ce sera noble chose
 165 Et grant et belle.

SECOND CHEVALIER

Enfant qui vive de mamelle
 N'espargneray qui ne s'en viengne
 Avec nous, comment qu'il aviengne,
 N'autre s'il n'a cinc ans passez,
 170 Afin qu'estre puist repassez
 Mon bon seigneur.

BOURGOT

Liegart, pieça n'o soyf greigneur
 Que j'ay ore. Par amour fine
 Te pry que me doingnes chopine,
 Et par ma foy je t'en donrray 175
 Du premier argent que j'aray
 Une autre aussi.

LIEGART

Bourgot, mouvoir n'ose de cy,
 Car mon filz dort, tu le voiz bien ;
 Mais s'aler lé veulz querre, tien, 180
 Vezcy l'argent.

BOURGOT

Se g'iray? oil, de cuer gent,
 Certes, m'amie.

GERTRUS

Gardes que ne la perdes mie
 Par deffaute d'aler la querre. 185
 Touz jours aras tu au vin guerre
 Tant con vivras?

224 c

SECOND CHEVALIER

Cest enfant de cy ne mouvras.
 Vaz la ou tu voudras aler.
 Il demourra a brief parler, 190
 A qui qu'il soit ou joye ou deulx ;
 Et si feront ces autres deux.
 Or m'en fault mains.

L'ESQUIER

Je met a eulx donques les mains,
 Sire, afin c'on ne les nous emble. 195
 Il est bon que les mette ensemble
 En lieu seur.

BOURGOT

Que ferez vous en mal eur?
 Emporterez vous mon enfant?

200 Nanil, non, je le vous deffant
Tant com puis, maistre.

SECOND CHEVALIER

Se je t'y voy plus la main mettre,
De ceste espée aras sanz doubtte
Par le corps. Ne fay pas l'estoute :
205 Tu ne le norriras plus, voir ;
Pour l'empereur le fault avoir.
Mett la, Copin.

LIEGART

Lasse! pour quoy, n'a quelle fin
Le dites vous?

SECOND CHEVALIER

210 Belle amie, occis seront touz,
Et de leur sanc ferons un baing
Ou l'empereur, soit perte ou gaing,
Sera baigniez, n'en doubttez mie :
Car par ce de sa maladie
215 Garir espére.

LIEGART

Ha! lasse! biau filz, se ton pére
Fust cy, il ne t'emportast mie :
Il y laissast avant la vie,
J'en suis certaine.

BOURGOT

220 Lasse! vezcy crueuse ataine!
Or voy je bien l'ay je perdu.
Se de dueil ay cuer esperdu
Qu'en puis je mais?

LIEGART

225 Certes ne les rarons jamais,
S'a l'empereur meismes n'alons
Et qu'a sa personne parlons
Conme dolentes.

BOURGOT

Par amour donc ne soions lentes

D'y aler. Ça, g'iray devant,
Se me voulez estre suivant 230
Et bon vous semble.

GERTRUS

Oil, certes, alons ensemble.
Devant lui grant dueil demenons
Et com tristes nous maintenons
En sa presence. 235

SECOND CHEVALIER

Mon chier seigneur, en audience
Vous dy j'ay d'enfans amassez
Tant qu'arez de leur sanc assez
A vous baignier.

PREMIER CLERC TRACON

Il n'est riens c'on doie espargnier 240
Pour lui faire santé avoir,
Ne vie d'omme ny avoir
N'autre riens née.

LIEGART

Lasse! com dure detinée
Ay par toy, Fortune sauvage! 245
Car en grant douleur et en rage
Me convient dès ores mais vivre,
Ne jamais n'en seray delivre,
Si com je cuit.

LIEGART

Onques mais douleur ne me cuit 250
Tant le cuer conme ceste fait.

225 a

Lasse! sanz riens avoir meffait,
Ma joie pers et mon solas.
Or n'est il femme a cuer tant las
Conme je l'ay. 255

L'EMPERÉRE

Dames, dites moy sanz delay.

Pour quoy estes en tel doleur.
 Chascune de vous a couleur
 De femme courcie et dolente.
 260 Dites moy, s'il vous atalente,
 Dont ce vous vient.

GERTRUS

Ha ! chier sire, s'il nous convient
 Dire vous voir de cest affaire,
 Sachiez nature nous fait faire
 265 Et amour le dueil que faisons,
 Et il y a bonnes raisons
 Qu'aus cuers aions douleurs amères.
 Nous sommes les dolentes méres
 Qui avons porté en noz flans
 270 Et norriz ces petiz enfans
 Que mettre voulez a martire.
 Sire, c'est ce qui nous martire
 Et nous tourmente ainsi pour voir.
 Si vous plaise de nous avoir
 275 Compassion pour la hautesce
 De vous et de vostre noblesce
 Qui tout surmonte.

L'EMPERÉRE

Bonne femme, cesce ton compte.
 Vous, seigneurs clers et chevaliers,
 280 Qui cy estes mes conseillers,
 Entendez ce que je vueil dire.
 La dignité de nostre empire
 De la fontaine de pitié
 Sourit et naist par grant amistié,
 285 Qui a ordené, c'est sanz faille,
 Que qui enfant tue en bataille
 Il doit estre decapité.
 Dont seroit ce grant cruauté
 Se ç'a noz enfans faisons
 290 Que faire a autres deffendons.

225 b

Que nous vault avoir surmonté
 Les barbarans se cruauté
 Nous vaint? certes petit, mais nient,
 Car avoir les vaincu si vient
 Des gens qui scévent fait de guerre, 295
 Mais des vices victoire acquerre
 Par vertu de bonnes meurs vient;
 Et en ceste bataille avient
 Qu'elle surmonte de vertu :
 S'i a victoire le vaincu ; 300
 Et nient moins il pert sa victoire
 Et est vaincu, c'est chose voire,
 Quant cruauté tant le surmonte
 Que d'avoir pitié ne fait compte.
 Si vous pry cy en amistié 305
 Que nous trestouz vainque pitié,
 Et s'elle nous vaint nous pourrons
 Bien dire que vainqueurs serons
 De touz ceulx qui mal nous voudront
 Et qui noz contraires seront ; 310
 Car qui serf a pitié se moustre
 N'est pas serf, non, mais il passe oultre,
 Car il est de bien enseigneur
 Et se preuve de touz segneur.
 Et pour tant vous fas ces recors 315
 Qu'a morir ainsi miex m'acors
 Et de ces ynocens la vie
 Sauver, par pitié qui m'envie,
 Que recouvrer vie cruelle
 Par la mort d'enfance si belle, 320
 Mesmes que par ainsi ouvrer
 N'est pas certain le recouvrer .
 Mais c'est certain, se je l'avoie
 Recouvrée ainsi, je seroie
 Cruel, ce qu'estre ne vueil pas, 325
 Ainçois conmans qu'ysnel le pas

LE PREMIER CHEVALIER

A vostre vouloir sommes prest,
 Mon chier seigneur, c'est de raison.
 Or ça, qu'a bonne garison
 225 d Vous vueillent noz dieux avoier
 Et celle santé envoier 360
 Que desirez.

L'EMPERÉRE

Amen. Bien sui; vous en irez
 Tenir a ces clers compagnie.
 Gardez qu'ilz ne s'en voient mie.
 Je scé qu'il sont de grant bien gent : 365
 Offrez leur et or et argent
 Ce qu'en voudront.

SECOND CHEVALIER

Voulentiers, sire, il en aront
 Assez, ne doubtez du mesprendre.
 Pensez de vostre repos prendre : 370
 Nous en alons.

PREMIER CHEVALIER

Seigneurs, devers vous revenons
 Pour estre de nous compaigniez.
 Gardez que ne nous espargniez
 De chose nulle qui vous faille. 375
 Conmandé le nous a sanz faille
 Mon seigneur, qui veult qu'honnorez
 Soiez et que vous demourez
 De son conseil.

SECOND CHEVALIER

Il dit voir. Or ça je conseil 380
 Qu'alons diner, se le greez,
 La derrières. Or me creez :
 Ce sera sens.

PREMIER CLERC TRACON

De moye part je m'y assens,

202

MIRACLE DE

XX

385

Quant vous plaist, sire.

SECOND CLERC ZENOPHILLE

Se conseil n'est a contredire
De nul preudomme. Alez devant,
Sire; nous serons vous suivant
Ou vous yrez.

LE CHEVALIER.

390

J'en vois. Or parra se direz
Mençonge ou voir.

226 a

DIEU

Je vueil qu'alez faire savoir,
Pierre, et tu, Pol, a l'empereur
Que pour ce qu'a eu horreur
395 Du sanc esandre aux innocens,
Qu'a li donner conseil m'assens
Comment il pourra tout sain estre.
Vous li direz qu'il mant Sevestre,
Et il tel baing li mousterra
400 Que si tost conme ens enterra
Gari sera, que que nulz die,
De touz poins de sa maladie;
Et quant cel biens li sera fais
Que pour ce deviengne si faiz
405 Que ses temples et ses ydoles
Trebuche et arde conme foles,
Et mes eglises restitue
Et de moy servir s'esvertue
Com vray crestien.

SAINT PIERRE

410

Sire Dieux, nous li dirons bien.
Pol, d'y venir vous avanciez;
Ange, et vous deux nous faciez
Compagnie pour nous esbatre.
En y alant chantons tous quatre

XX	SAINT SEVESTRE	203
	D'un mesmes point.	415
	GABRIEL	
	Pierre, je ne vous fauldray point.	
	Michiel, et vous?	
	MICHEL	
	Nanil, Gabriel, amis doulx.	
	Commencer vueil.	
	SAINT POL	
	Avec vous selon vostre escueil	420
	Le chant prendray.	
	MICHEL	
	De bien chanter ne me faindray	
	Tant conme la voiz me dure.	
	RONDEL	
226 b	Tant est douce nourreture	
	D'amer Dieu et son gré faire	425
	Qu'en ce ne peut nulz meffaire.	
	L'en en vault miex en nature,	
	En meurs, en sens, en affaire,	
	Tant est douce nourreture;	
	C'est vie a l'ame et pasture;	430
	C'est en quoy se doit parfaire	
	Et dire pour soy refaire :	
	Tant est douce nourreture	
	D'amer Dieu et son gré faire	
	Qu'en ce ne peut nulz meffaire.	4 5
	SAINT PIERRE	
	Constantin, bien te devroit plaire	
	Ce que te venons denoncier,	
	Et forment te doiz eslessier	
	De ce qu'orras en vision.	
	Pour ce que n'as l'effusion	
	Du sanc des ynocens souffert	440
	Et qu'a morir t'es miex offert	

Mesel pourry que ce qu'ilz fussent
 Occis ne que pour toy morussent,
 445 Jhesu Crist une bonté grande
 Te fait : c'est que par nous te mande
 Conseil comment tu gariras :
 Pape Sevestre manderas,
 Qu'as chacié en une montaigne,
 450 Si li requerras qu'il t'ensaingne
 Avoir de ton mal medicine,
 Et il une telle piscine
 Te mousterra, au Dieu congié,
 Que se trois foiz y es plungié
 455 Tu seras gariz nettement.
 De ce ne doubtes nullement,
 Je te dy voir.

SAINT POL

Voire, mais il te fait savoir
 Qu'il te requiert, quant tu verras
 460 Que de ton mal gari seras,
 Que tes ydoles et tes temples
 Destruises et de feu les emples, 226 c
 N'en telx choses plus ne te fies,
 Mais a Jhesu Crist rediffies
 465 Son eglise, et d'or en avant
 Deviengnes son loyal servant.
 Se savoir veulx de nous deux hommes
 Les nons et aussi qui nous sommes,
 J'ay a non Pol, et cestui Pierre,
 470 Qui est le fondement de pierre
 Sur quoy Jhesus crucifié
 A son eglise ediffié.
 C'est celui qui veult que le serves,
 Si qu'en guerredon tu desserves
 475 S'amour, sa grace et son bien fait.
 Seigneurs, nous avons ycy fait.
 Ralons nous ent chantant es cieulx

Avecques Dieu, c'est nostre miculx,
A mon avis.

GABRIEL

Alons sanz faire autre devis. 480
Reprendre vueil nostre rondel,
Car de chant est et bon et bel
Et il vous doit aussi plaire.

RONDEL

C'est vie a l'ame et pasture,
C'est en quoy se doit parfaire 485
Et dire pour soy refaire :
Tant est douce nourreture
D'amer Dieu et son gré faire
Qu'en ce ne peut nulz meffaire.

LE PREMIER CHEVALIER

Seigneurs, pensons de nous retraire 490
Devers mon seigneur, c'est raison,
Et il en est aussi saison,
Vous le savez.

SECOND CHEVALIER

Certes, sire, voir dit avez :
N'est pas bon de lui seul laissier ; 495
Pour le garder de courroucier
Alons men a li tout de fait,
Et sachons comment il le fait.

Quel chiére, sire ?

L'EMPERÉRE

226 d Seigneurs, je ne vous say que dire. 500
Il m'est si mal conme il peut estre.
Envoiez me querre Sevestre
Qui est le pape aux crestiens ;
Car deux des diex celestiens
Qui se font de son Crist amis 505

En avision m'ont promis
 Qu'il me fera par verité
 Un bain par quoy j'aray santé.
 Alez bonne erre.

PREMIER CHEVALIER

510 Sire, nous mesmes l'irons querre,
 Ja autres n'y envoierons,
 Et ycy le vous amenrons,
 Ja n'en doubtez.

SECOND CHEVALIER

515 C'est voirs, mais se vous me créés,
 Sanz noz espées pas n'yrons.
 Ne savons qui nous trouverons
 En nostre voie.

PREMIER CHEVALIER

Prenez la vostre ; j'ay la moye
 Que je vueil ceindre.

SECOND CHEVALIER

520 Alons men ; po avons que craindre
 En ce chemin.

SAINT SEVESTRE

Biau sire Diex, pére divin,
 Mon ame et mon corps je soubzmet
 En ta sainte garde et conmet.
 525 Seigneurs, a Dieu vous conmandez
 Et humblement li demandez
 Qu'il vueille avoir de vous mercy.
 Car certes je voy venir cy
 La gent l'empereur Constantin,
 530 Et croy c'est pour nous mettre a fin
 Par mort cruelle.

PREMIER CLERC

S'ainsi est que Diex nous appelle
 A aler a li par martire,

XX	SAINTE SEVESTRE	207
227 a	Loez en soit il, le doulx sire, Treshaultement.	535
	SECOND CLERC	
	Ce soit mon; prenons bonnement Ce qui nous vient.	
	LE PREMIER CHEVALIER	
	Sevestre, sire, il vous convient Venir a l'empereur bonne erre. Sachez il vous envoie querre A grant instance.	540
	SAINTE SEVESTRE	
	Si yray, seigneurs, sanz doubtance Moult volentiers.	
	PREMIER CLERC	
	Vous n'irez pas seul, mais vous tiers, Sire, car avec vous yrons Et par tout vous honorerons Com nostre maistre.	545
	SECOND CHEVALIER	
	Avançons nous, sire Sevestre, Je vous em pri par fine amour. Je say bien que vostre demour Si luy ennuie.	550
	SAINTE SEVESTRE	
	E! mon ami, Dieu nous conduie : De ce ne fault plus c'on m'enorte. Alez nous faire ouvrir la porte Sanz plus riens dire.	555
	SECOND CHEVALIER	
	Volentiers. Je vois devant, sire.	
	Mon chier seigneur, vezcy Sevestre. Pensez de vous en bon hait mettre Sans vous grever.	
	L'EMPERÉRE	
	En mon seant me vueil lever :	560

Je sens bien trop me suis tenuz
 Gisant. Bien soiez vous venuz,
 Amis Sevestre.

SAINT SILVESTRE

Sire, en vous vueille grace mettre
 565 Dieu qui tout peut.

227 b

L'EMPERÉRE

Mon ami, oir vous estuet
 Une vision qu'oy ennuit
 Veu, mais qu'il ne vous ennuit.
 Deux de voz diex sont venuz cy
 570 Devant moy, qui m'ont dit ainsi :
 Pour ce qu'ay plus eu envie
 Des ynocens sauver la vie
 Que de la santé de mon corps,
 Pour ce doulx et misericors
 575 Estoit si vers moy, ce me dirent,
 Ce Crist que Juifs morir firent
 Qu'il me mandoit par un doulx vueil
 De ma garison le conseil.
 Ce conseil est que vous mendasse
 580 Et par vostre gré me plungasse
 Trois foiz dedans une piscine
 Que moustrer me devez si digne
 Que si tost come g'i seray
 Plungié, du tout gary seray.
 585 Ainsi le m'ont il affermé
 Et si m'ont leurs deux noms nommé :
 L'un a nom Pol et l'autre Pierre.
 Ces deux diex de fust ne de pierre
 Ne sont, mais sont droitement hommes
 590 Aussi conme vous et moy sommes,
 A mon devis.

SAINT SILVESTRE

Sire, il vous est bien voir avis,
 Mais vous pouez bien dire miex

	Que de dire qu'ilz soient diex, Car ne sont pas dieux, mais apostre De nostre vray Dieu et du vostre. Car touz nous a faiz et fourmez Et les defourmez refourmez Par se benoite deité Qu'a jointe a nostre humanité, En laquelle il a mort souffert Et s'est a Dieu le pére offert Et soy donné en sacrifice, Afin qu'eussions Dieu propice : Ce fu quant il fu mis en crois, Emperière, et s'ainsi le crois Et qu'au tiers jour resuscita Et qu'après es sains cieulx monta Ou siet de son pére a la destre, Et aussi qu'il doit un jour estre Ou quel touz rescuçiterons En corps et en ame et serons Selon noz dessertes jugiez, Et par lui touz meffaiz vengiez Et les biens friz seront meri, Ce vous peut pour estre gari Valoir granment.	595
227 c	L'EMPERÉRE Je ne croy riens plus vraiment, Sire, et pour ç'a ma loy renonce Et vueil vivre, ce vous denonce, Com crestien.	600
	SAINT SEVESTRE Sire, Dieu vous parface en bien Et par amour a li vous joingne. Mais il faut donc que l'en vous dongne Crestienté.	605
	L'EMPERÉRE Sire, vous dites verité.	610
		615
		620
		625

Comment l'aray ?

SAINT SEVESTRE

Bien, sire. Je la vous donrray.

630 Avec moy jusques la venrés,
Sire : en ces fons cy enterrez ;
Mais avant despoillier vous fault.
C'est la piscine sanz deffault
Ou vostre santé devez prendre.
Entrez ens et pensez de tendre
635 Aus cieulx mains jointes et les yex,
Et priez humblement que Diex
Vous face grace.

L'EMPERÉRE

227 d

Entrer y vueil sanz plus d'espace
Et a genoulz ens me mettray,
640 Et la grace Dieu attendray
De bon vouloir.

SAINT SILVESTRE

Sire, pour gloire es cieulx avoir
Sanz fin, requerez vous baptesme
Et que vous oingne du saint cresme
645 Conme il convient ?

L'EMPERÉRE

Oil, sire, s'a gré vous vient.
Je n'atens el ne ne desir.
Faites tout a vostre plaisir
Hardiement.

SAINT SEVESTRE

550 Seigneurs, prions Dieu bonnement
Qu'aussi conme il gari a plain
De la lepre ou fleuve Jourdain
Naaman, prince de Surie,
Aussi de sa mezellerie
655 Vueille garir ce prince cy,
Et li ottroit par sa mercy

Tel vouloir que d'or en avant
 S'amour acquière en lui servant ;
 Et tele dominacion
 Sur toute estrange nascion 660
 Aussi lui vueille Dieu donner
 Qu'a voie les puist ramener
 De Dieu congnoistre.

LE SECOND CLERC

Amen, sire, et par lui accroistre
 Puist sainte eglise. 665

SAINT SEVESTRE

Ainsi soit il. Je vous baptise,
 Sire amperière Constantin,
 En la vertu qui est sanz fin
 De la benoite deité
 Qui contient a la verité 670

228 a Trois personnes, soiez en fis,
 Pére, sains esperiz et fils :
 C'est nostre foy.

L'EMPERIÈRE

Ha ! tresdoux Jhesus que je croy,
 Sire, mercié soiez tu 675

Qui me moustres ta grant vertu.
 Onques mais jour ne me fu miex
 Que de ce que te voy aux cieulx,
 Sire, qui roys es des royaulx,
 Sire, qui es amis loyaux. 680

Par toy le cuer tout me rehaite
 De la garison que m'as faite
 Du mal que long temps ay eu.
 Seigneurs, j'ay Jhesu Crist veu :
 Dites, et vous ? 685

SECOND CLERC

Nanil, sire, trop plus que nous
 Vous a chiers, et bien y appert
 Quant de lui veoir en appert

Vous a fait digne.

L'EMPERIÈRE

690 De sa main me fist ainsi signe,
Et tantost sanz faire demeure
Senti que me chey en l'eure
De dessus moy la pourreture,
Et m'a si nette creature

695 Fait com veez.

SAINTE SEVESTRE

Sire, aourer bien le devez
Et dire qu'autre Dieu nul est,
Quant si sain vous a et si net
Fait com vous estes.

L'EMPERÉRE

700 Certes pour s'amour loys honnestes
Et nouvelles establiray
Si tost qu'en mon palais seray
Et de cy hors.

SAINTE SEVESTRE

705 Seigneurs, or tost, vestez son corps 228 b
De ce vestement que tenez,
Et puis en son palais menez
De nous sera.

LE PREMIER CLERC

Sire, tantost fait vous sera.
Vestir, sire, vous fault ces draps.
710 Or avant : boutez cy le braz,
Et après si l'endoulserez,
Et puis de ces fons vous ystrez,
S'il vous agrée.

SECOND CLERC

715 Pour ce que c'est yaue sacrée,
Il appartient c'on le deporte
Huy d'aler, et que l'en l'emporte
En son manoir.

SAINT SEVESTRE

Je congnois que vous dites voir.
 Prenez le vous deux, mes amis,
 Et par vous soit hors de cy mis 720
 Et emportez.

LE PREMIER CLERC

Puis que de ce nous enortez,
 Sire, volentiers le ferons.
 Chier sires, nous vous porterons
 Touz deux ensemble. 725

L'EMPERÉRE

Ore, biaux seigneurs, il me semble
 Que Jhesu Crist sur moy a fait
 Au jour d'uy si tresnoble fait
 Que desservir ne le pourray.
 Toutes voies j'ordeneray 730
 Et ordene dès maintenant

C'om l'aoure d'or en avant
 Com vray Diex, c'est m'oppignion.
 Secondement, m'entencion
 Est que qui blasphéme dira 735
 De lui, du corps pugniz sera.

Après quiconque a crestien
 Fera autre chose que bien,
 28 c J'ordene qu'ainsi soit descript,
 Pour l'amour du doulx Jhesu Crist, 740
 Car aux biens de lui on s'aherde
 Et toute la moitié en perde.

Quartement, je vueil pour l'onneur
 De Jhesu Crist mon createur
 Qu'aussi que l'empereur romain 745
 Est sur touz roys chief souverain,
 Qu'aussi soit chief de touz eveques
 Celui voire et des arcevesques
 Qui de Romme evesque sera.

750 Quintement, quant il avenra
 Qu'aucun malfaitteur a garant,
 Pour quelque meffait apparant
 Qu'il ait fait, s'en fuit en l'eglise,
 Qu'il y soit sauf et ait franchise.
 755 Et après que nulz ne se fie
 Tant de soy qu'eglise ediffie
 En quelque ville que ce soit,
 Se licence avant n'en reçoit
 De son prelat. Et li septimes
 760 Est que j'ordene que les dymes
 Soient aux eglises données,
 De quoy elles seront doées
 A touz jours mais.

LE PREMIER CHEVALIER

765 Sire, je vueil des ores mais
 Ce Jhesu croire et aouer
 Et conme mon Dieu honnourer
 De mon pouoir.

SECOND CHEVALIER

770 Sy feray je voir, car j'espoir
 Que de tant plus grant gloire aray
 Com d'amer li me peneray
 Plus d'amour fine.

L'EMPERÉRE

775 Encores vueil j'ains que je fine,
 Seigneurs, a ma mére envoier,
 Pour son cuer en joie avoier,
 Lettres ou ara contenu
 Conment suis tout sain devenu
 Et suis crestien.

228 d

SAINT SEVESTRE

780 Mon chier seigneur, vous dites bien.
 Avant, les messages querez !
 Que plus tost savoir li ferez
 Et miex vaudra.

L'ESQUIER

Socier point ne s'en faudra :
 Je le vous vois faire venir.
 Cornée, sanz toy plus tenir
 Yci, vien t'en a mon seigneur. 785
 Il a de toy besoing greigneur
 Qu'il n'ot pieça.

LE MESSAGER

Et vez me cy tout prest. Or ça,
 Alons a li.

L'ESQUIER

Mon seigneur, je n'ay pas failli 790
 A trouver vostre messagier.
 Vez le cy tout prest et ligier,
 Ce dit, d'aler.

L'EMPERÉRE

Vien avant et m'entens parler.
 En Bethanie t'en iras 795
 A ma mère, et li bailleras
 Ces lettres cy de par moy, tien;
 Et li dy que suis crestien
 Hardiement : point ne li cèles,
 Et qu'elle me renvoit nouvelles 800
 De son estat.

LE MESSAGER

Sire, faire vois sanz debat
 Vostre plaisir.

L'EMPERÉRE

Or vas ; dy li que je desir
 Moult ton retour. 805

LE MESSAGER

229 a D'aler me vueil mettre en atour.
 Ne fineray tant qu'a lui soye.

Ma chiére dame, honneur et joye
 Vous otroit le dieu des Ebrieux.

810 Dame, vezcy que vostre fiex
 Vous envoie, et salut vous mande,
 Et a vous moult se reconmande.
 Veez que c'est.

HELAINÉ

815 Messenger, est il voir qu'il ait
 Guerpi du tout la loy paienne
 Et a pris la loy crestienne?
 Ne me mens goute.

LE MESSAGIER

820 Dame, il est verité, sanz doubte,
 N'autre Dieu maintenant a Romme,
 N'est serviz ny aourez d'omme
 Fors Jhesu Crist.

HELAINÉ

825 Ainsi le m'a il bien escript,
 Et qu'il est gariz de touz poins.
 Mais je te vueil dire deux poins
 Que de bouche tu li diras
 Si tost qu'a li venuz seras
 Premier que de sa garison
 J'ay grant joie, et c'est bien raison ;
 Et aussi m'a moult eslessié
 830 Qu'aux ydoles a renoncié ;
 Mais je le blasme durement
 De ce qu'aoure nullement
 Un homme que les Juifs firent,
 Pour la mauvaistié qu'en li virent,
 835 Crucifier et a mort mettre.
 Va t'en; quant a ore autre lettre
 N'aras de moy.

LE MESSAGER

840 Dame, bien le diray par foy :
 Ja n'en aray le bec emplus.
 A Dieu! cy ne demourray plus.
 Vers mon seigneur vueil retourner. 229 b

Sire, Dieu vous vueille aourner
 De grace et vous otroit s'amour.
 Le mains que je puis ay demour
 Fait en Judée. 845

L'EMPERÉRE

Bien puisses tu venir, Cornée.
 Quelles nouvelles?

LE MESSAGER

Mon chier seigneur, bonnes et belles.
 Ma dame est saine et en bon point,
 Mais elle escript ne vous a point, 850
 Ains m'a dit que die de bouche
 Que vostre garison li touche
 Grant leesce et grant joie au cuer
 Et de ce qu'avez jetté puer
 Et relenqui ydolatrie; 855

Mais moult est, se dit, esbahie
 De ce qu'un mort homme aourez
 Qui par Juifs deshonnorez
 Fu tant qu'en la croiz le pendirent,
 Et morir a honte le firent 860
 Nu et despris.

SAINT SEVESTRE

Se le mistère et le grant pris
 De celle mort entendisist,
 Certes telz moz pas ne disist,
 Sire; et pour ce bien le ferez, 865
 S'il vous plaist : vous li menderez
 Que les plus sages de la loy
 De Judée amaine avec soy,
 Et nous avecques vous serons;
 Et quand nous assemblez serons, 870
 Par deputoison mutuele
 De noz deux lois verrez 'laquele
 A foy plus vraie.

L'EMPERÉRE

875 Si bien dire ne le saroye,
 Saint pére; c'est sagement dit.
 Si le feray sanz contredit.
 Tu as tout ce bien entendu
 Que Sevestre m'a respondu.
 880 A ma mère t'en vas arriére
 Et lui dy en telle manière,
 Com tu os qu'il m'a devisé.
 Or vas com sage et advisé,
 Et si t'avance.

229 c

LE MESSAGIER

885 Voulentiers, sire, sanz doubtance.
 J'en vois sanz plus faire sejour :
 Ne fineray ne nuit ne jour
 Tant qu'a li viengne.

SAINT SEVESTRE

890 Sire, droiz est qu'il me souviengne
 De ce faire a quoy suis tenuz.
 Depuis que suis ycy venuz,
 Je n'ay peu mes heures dire.
 Aler m'en vueil acquitter, sire,
 En ce moustier.

L'EMPERIÉRE

895 Bien me plaist, pére et ami chier.
 Ou nom de Dieu or y alez,
 Et quant avez dit revenez
 Ycy a moy.

SAINT SEVESTRE

Si ferons nous, sire, par foy.
 Seigneurs, alons.

SECOND CLERC

900 Nous vous suivrons, sire, aux talons.
 Alez devant.

SAINT SEVESTRE

Ho ! cy ne venez en avant.
 Devant cel autel a genouz
 M'en vois mettre et prier pour vous
 Et pour moy la mère de grace 905
 Qu'amis de son chier filz nous face.
 Dame, qui es de grace plaine,
 Dame, après Dieu la souveraine
 229 d En gloire et en beneurté,
 Dame en qui la divinité 910
 D'humanité se revesti,
 Quant a estre fil s'assenti
 De vous qui sa fille estiés,
 Dame, plaise vous que mettiez
 Dedans mon cuer telle science 915
 Et en ma voiz telle loquence
 Que s'aucuns vient pour contredire
 Que Jhesus vostre filz, mon sire,
 Ne soit et vraiz Diex et vraiz homs,
 Que moustrer par vives raisons 920
 Lui puisse si que mère fus
 D'omme et Dieu que conme confus
 N'y puist ne sache debat mettre,
 Tant soit grant clerc ne sage maistre;
 Et pour ce que ma prière oies, 925
 Dame, et que de ce me pourvoies,
 De cy endroit ne partiray
 Tant que du tout pardit aray
 Vostre sautier.

DIEU

Humblement et de cuer entier, 930
 Mère, devant vostre ymage estre
 En oroisons voy la Sevestre
 Ou requiert de cuer et de bouche
 Chose qui a mon honneur touche.

935 Si vous vueil a li envoier,
 Et par ces anges convoier
 Vous feray, et si li direz
 Si tost que devant li venrez
 Que pour sa grant devocion
 940 Il ara son entencion.
 Sus, seigneurs, convoiez ma mère,
 Et chantez a voiz haulte et clére
 Lui convoiant.

GABRIEL

945 Nous le ferons de cuer joyant,
 Vraiz Dieux : c'est droiz.

MICHEL

230 a

Prenons ensemble d'une voiz,
 Gabriel, je vous em pri,
 Et si disons sanz detri
 Ce rondel a chére lie.

RONDEL

950 Glorieuse vierge Marie,
 Amour vous fist de Dieu mère estre,
 Amour aux humains vous marie,
 Glorieuse vierge Marie,
 Amour vous fait par seigneurie
 955 Regner en la gloire celestre;
 Glorieuse vierge Marie,
 Amour vous fist de Dieu mère estre.

NOSTRE DAME

Sevestre, ne t'esmaies mie.
 Mon filz Jhesus savoir te fait
 960 Que briefment te convient de fait
 Pour la foy que tiens deputer
 Contre ces juifs sanz doubter
 Qui sages sont parfaictement;
 Mais ne t'esbahis nullement,
 965 Car l'esperit de sapience

Aras en toy et de science,
 Dont par la divine vertu
 Touz seront maté et vaincu
 Li juifs qui a toy venront
 Et redargué se rendront
 A l'argument. 970

SAINT SEVESTRE

Vierge ou toute gloire resplent,
 Dame, royne precieuse,
 Sur toutes femes vertueuse,
 De tant qu'ay vostre voiz oy, 975
 Je vous rens loenge et mercy,
 Ma chiére dame.

NOSTRE DAME

230 b Ce saint homme de corps et d'ame
 Laissons cy; je l'ai conforté
 De la divine majesté, 980
 Qui de mon filz et de mon père
 Descent. Dedans sa gloire clére
 Nous en ralons.

GABRIEL

Michiel, no rondel pardisons
 A l'en raler. 985

MICHIEL

A ce me vueil bien accorder
 A ceste fie.

RONDEL

Amours vous fait par seigneurie
 Regner en la gloire celestre;
 Glorieuse vierge Marie, 990
 Amour vous fist de Dieu mère estre

LE MESSAGIER

J'ay tant a destre et a senestre
 Couru en tenant mon alaine

Que je voy la royne Helaine.
 995 Ma dame, Dieu vous doit honnour.
 Le franc empereur, mon seignour,
 Si vous mande qu'a li venez
 Et qu'avecques vous amenez
 De voz grans clers sages Juifs,
 1000 Des plus lettrés et miex eslis,
 Dame, que vous pourrez trouver
 Et il leur fera approuver
 Que la loy ou il est creans
 Est vraie, et que li tout poissans
 1005 Jhesus revint de mort a vie.
 A Romme est preste la clergie
 De ce prouver.

HELAINÉ

Po pourront vers mes clers durer.
 Abrahan et Godolias,
 1010 Anne, Doeck, n'arrestons pas ;
 Alons men tost.

ABRAHAM

Il y ara maint divers mot
 Retourné à la question.
 Je tien et croy que par raison
 1015 Nous leur mousterrons clérement 230 c
 Qu'il sont abusé laidement
 Par ce Jhesu.

GODOLIAS

Il s'en trouveront deceu.
 Souldre ne saront ne respondre,
 1020 Que leur loy ne facions confondre,
 Mais que veritez soit oye :
 Car de Moyse et de Helie
 Sommes fondé.

ANNE

Godolias, en verité.
 1025 Noz anciannes escriptures

Leur approuveront leurs lourdures
Hastivement.

DOECH

Il y fault bien avisement,
Car crestien ne sont pas fol.
Il ont de Jehan et de Pol 1030
Escripture et Apocalipse,
Si qu'il fault bien que de malice
Soions garni.

SAINT SEVESTRE

A la vierge dont Dieu nasqui
Et a son benoit createur 1035
Nous rens : ralons a l'empereur
Que je voy la.

L'EMPERÉRE

Ça, saint pére, seés vous la.
Je suppose qu'assez briefment
Venra cy ma mère et sa gent 1040
Qui seront garni d'arguer,
Si qu'avis de redarguer
Fault, pére chiers.

SAINT SEVESTRE

Dieu, en qui est mes desiriers,
Par sa grace nous aidera, 1045
Si lui plaist, si que po durra
Leur ygnorance.

PREMIER CLERC

230 d C'est c'en quoy j'ay mis ma fiance,
Car sanz sa grace debonnaire
Ne pouons ne dire ne faire 1050
Point de bonne euvre.

SECOND CLERC

Vous savez puis que la bouche euvre
Pour parole de Dieu tenir,

1055 Que la grace du saint espir
En li parole.

LE MESSAGIER

Vezcy Romme, a po de parole
Dame, vezla l'empereur ;
Delez lui ou palais maieur
Est son conseil.

L'EMPERIÈRE

1060 Venir voy la royne a l'ueil ;
Alons contre lui : c'est ma mère.

De Jhesu que tieng a vray père,
Dame, soiez la bien venue.
Sachez que de ceste advenue
1065 Suis forment liez.

HELAINÉ

Biau filz, bonne aventure aiez.
Moult suis lie de vo santé ;
Et s'ay courroz d'autre costé
De ce que pris vous avez loy
1070 Par laquelle vous tenez foy
D'un home mort.

L'EMPERÉRE

Ma dame, le droit et le tort
Vous en feray briefment oir.
Seigneurs, voulez vous establir
1075 Deux juges, s'il sont deux paiens ?
Juifs ne sont ne chrestiens :
Si orront chascune partie ;
Puis sera la chose partie
Par eulx, et en rendront sentence.
1080 Assez ont clergie et science,
Et si ne leur est rien touchable ;
Dont la cause est bien raisonnable
Qu'ilz soient juge.

ABRAHAM

Je vueil bien que chascun en juge
Sur le procès. 1085

GODOLIAS

Par eulz en soit jugement faiz,
Je le vueil bien.

ANNE

Puis qu'il ne sont pas chrestien,
Riens ne nous touche.

DOECH

Bien vueil qu'il soit dit de leur bouche, 1090
Quant les paroles arguées
Seront et d'eulx considerées :
Je m'y accorde.

L'EMPERÉRE

Tracon, seez cy sanz discorde,
Et vous, Zenophile, lez lui. 1095
S'entendez ce qui sera huy
De ces sages cy deputé,
Car par vous yert déterminé
Ly jugemens.

TRACON

Selom ce que m'ont donné sens 1100
Li dieu en qui je suis creans
Y seray de cuer entendans
Moult volentiers.

ZENOPHILLE

Aussi nous en est il mestiers,
Tracon ; car juges qui n'entent 1105
Ce qu'on dit loyal jugement
Il ne peut rendre.

ABRAHAM

Or ça : vous nous faites entendre,
Vous, chrestiens, qu'ilz sont trois dieux,
Pére, sains esperiz et fiex. 1110
C'est une chose magnifeste

- A vous, mais a nous est moleste.
 Entendez : Diex li gloriex
 Ne dist il pas : Je sui seulz Diex ?
 1115 Il ne dist pas : Nous sommes troy. 231 b
 Et si dites en vostre loy
 Que Diex est cil qui ot nom Crist,
 Pour ce que des miracles fist ;
 Mais en nostre loy sont assez
 1120 Qui ont peu, li faiz est prouvez,
 Faire miracles clérement ;
 Mais toutes voies hardement
 N'orent pas d'eulx appeller Dieu,
 Si qu'a croire estes trop hastieu :
 1125 C'est grant enfance.
 SAINT SEVESTRE
 Abraham, nous avons creance
 En aourer, bien vueil c'on l'oye,
 Un seul Dieu, non si seul que joye
 Ne prengne en filiacion.
 1130 Par vos livres m'entencion
 Vous mousterray, qu'en deité
 A de personnes trinité ;
 Et ce fu du prophète dit :
Ipse me invocavit
 1135 *Pater meus, et cetera,*
 C'est a dire qu'il l'appella
 Pére, et ce pére dit : J'ay fil.
 Ainsi le prophète subtil
 Le dit : ne le poez nier.
 1140 Entendez ce point si lier :
Filius meus es tu, ego hodie genui te.
 Or venons a avoir preuvé
 Le pouoir du saint esperit.
 La parole qui de lui yst,
 1145 C'est la vertu qui est es deux
 Et fait une unité en eulx

Et s'a non de tierce personne
 En tant que sa substance sonne;
 Que dit le prophète dessus ?
E spiritu oris ejus, 1150
Omnis virtus eorum.

Après en vos livres trovon :

231 c *Faciamus hominem ad ymaginem et similitudinem
 nostram,*

C'est a dire en la concordance :
 Faisons homme a nostre semblance; 1155

Et puis qu'il dit nostre, en maieur,
 C'est a dire qu'il sont plusieurs
 En personne, et en deité
 Un Dieu pour un homme fourmé.

Exemple, seigneurs, entendez : 1160

Ces trois ploiz que cy regardez
 Ilz sont trois, ce n'est mie gas,
 Et toutes voies n'est q'un draps;
 Ainsi est il trois et trois un,
 En une puissance commun. 1165

Après vueil estre descenduz
 Ou vous dites que pas creuz
 Ne doit estre par nul affaire
 Qu'il soit Diex pour miracles faire,
 Et qu'autres ont miracles fait. 1170

Il est excellent de son fait,
 Car com diz, conme vertueux
 A confondu les orgueilleux,
 S'appert Dathan et Dabiron
 En bible ylleuc et environ, 1175

Car par leur orgueil terre ouvri
 Dessoubz eulz qui les sangloti :
 Ce fu bien a veoir merveilles.
 Et ces miracles non pareilles
 Furent et sont, car nulle peine 1180
 N'en vint sur lui, c'est foy certaine.

Or y pensez.

TRACON

Biaux doulx seigneurs, ors escoutez.
 Nous veons assez bien vostre estre.
 1185 Pour voir vous disons que Silvestre
 A droit pour lui en cestui cas.
 Ne savons qui ses advocas
 A esté, mais en sa parole
 Creons, que par vertu parole :
 1190 Dites pour quoy.

ZENOPHILE

Selon ce que j'entens et voy, 231 d
 Silvestres a bien declairé
 La treble eternelle unité,
 Et les trois personnes moult bien
 1195 Separé, ou li chrestien
 Croient, et après vous disons :
 Se ne fust Diex nous ne pouons
 Veoir qui peust de son fait.
 Avoir tant de miracles fait
 1200 Dont a ce point cessez a tant
 Et d'un autre dites avant
 S'il vous est bel.

GODOLIAS

En vostre testament nouvel,
 Crestien, avez confessé
 1205 Vostre Crist de femme estre né,
 Tempté, lié et despoillié,
 Baillé et puis crucifié,
 De fiel et d'aizil abruvé,
 Pour mort ou sepulcre bouté.
 1210 C'est faux a croire et impossible
 Qu'en Dieu fussent cil fait possible :
 C'est evident.

SAINT SILVESTRE

Hé! par vos livres proprement

- Vous soldray, de ce ne doubt mie. 1215
 Premier le prophète Ysaye
 Dit de Crist la nativité
 Par une telle auctorité:
Ecce virgo concipiet et pariet filium.
 Après de sa temptacion, 1220
 Zacarie dist et moustra
 Qui Crist le grant prestre avisa :
*Vidi Jhesum stantem sacerdotem magnum coram angelo
 et Sathan stabat a dextris ejus.*
 Cette auctorité jette jus
 Ce que vous yci debatez 1225
 Et de ce point vous rent matez.
 Après veult David tesmoingnier
 232 a Le baillier et le despoillier
 Et aussi son abruvement.
 Du bailler dit premièrement : 1230
*Qui edebat panes meos magnificavit super me supplan-
 tationem, etc.*
 Du despoullier après moustra :
Diviserunt sibi vestimenta mea.
 De l'abruver dist il moult bel :
Dederunt in escam meam fel.
 Après en Esdras vous avez 1235
 Comment lié fu ; entendez :
*Vincistis meum sicut patrem qui liberavit vos de terra
 Egipti, clamantes ante tribunal judicis humiliastis
 me, suspendentes in ligno tradidistis me.*
 En Jeremie après moustré
 Vous est comment il fu couchiez
 Ou sepulcre mortiffiez, 1240
 Disant, de ce bien recors sui :
In sepultura ejus vivificent mortui.
 En voz livres tout ce trouver
 Pouez et le plus approuver
 Par le sautier. 1245

GODOLIAS

C'est voirs; prest sui de tesmoingnier
 Qu'ilz dient ces moz pour autrui,
 Et Silvestre moustre de lui
 Qu'il les dient pour son Dieu Crist.
 1250 Mais ce point cy pas ne souffist,
 Au mains a moy.

SAINT SILVESTRE

Ceste deffense bien t'otroy,
 Mais que tu m'aies un moustré
 Autre que Crist de vierge né,
 1255 Et aussi qui ait fiel beu,
 Crucifié, ne mort jeu,
 Ne puis pris resurreccion
 Et qui a son ascencion
 Soit monté vraiment es cieulx : 232 b
 1260 S'autres a tout ce fait que cieulx
 Jhesu Crist ou je sui creant,
 Je vueil bien estre recreant.
 Mais s'autrui ne m'y scez trouver,
 Pour vaincu te puis approuver
 1265 En touz ces poins.

L'EMPERÉRE

Je vueil cy respondre, il est poins.
 Maistre, s'autrui ne me nommez
 Qui ait fait les faiz proposez
 Que cy endroit avez oy,
 1270 Maté par sentence vous dy
 Selon les drois.

ANNE

Godolias se taist tout cois.
 Silvestres, et je te demande
 Voians touz cy une demande :
 1275 Quant Crist que loé tant avez,
 Si com vous dites, fu saint nez
 Et purement sainttifiez,

Pour quoy fu il donc baptiziez,
 Quant de santtificacion
 N'avoit a faire par raison 1280
 Ne de baptesme?

SAINT SEVESTRE

Maistre, entendez : de ce mon esme
 Vous diray, car trestout aussi
 Que circoncision failli 1285
 A Crist quant il fu circoncis,
 Au propos, quant de lui fu pris
 Li sains baptesme vraiment,
 De nostre santtifiement
 Fu commencement la endroit ;
 Quant a lui besoing n'en avoit, 1290
 C'est li certains.

ANNE

232 c Gentilz emperéres haultains,
 Cilz Silvestres est moult entiers
 En sa loy, mais moult volentiers
 Orroye qu'il exposast cy 1295
 Pour quoy Crist de vierge nasqui :
 Que fu ç'a faire ?

SAINT SEVESTRE

Tantost t'en mousterray l'affaire.
 La terre dont Adan fu faiz
 Fu vierge. Or entens bien ces fais. 1300
 Humain sanc n'avoit point beu
 Ne maleiçon receu
 Ne pour mort d'omme corrompue
 N'estoit, car de lui receue 1305
 N'avoit d'omme esté sepulture
 Ne de serpent esté peuture.
 Or fu cel Adan du serpent
 Vaincu ; pour ce secondement
 Fu un second Adam formez,
 Vierge, par lequel fu matez 1310

Li maus serpens qui le tempta ;
 Car aussi conme Adan mata
 En paradis le fruit mengant,
 De Crist fu matez en vivant

1315 Li maus serpens.

L'EMPERÉRE

Je croy pour certain et si pens
 Qu'Anne ne se vouldist pas taire,
 S'il seust riens dire au contraire
 De ces raisons.

TRACON

1320 Et pour ce maté li disons.
 Un autre die.

DOECH

Il m'est avis que trop varie
 Voç entendemens. Vous savez
 Diex est touz parfaiz appelez
 1325 Ny onques n'y ot que parfaire.
 Pour quoy donc ne par quel affaire
 Seroit il nez en Jhesu Crist ?
 Après on a de droit escript
 C'on ne doit pas pére appeller
 1330 S'il n'a filz, et tu veulz porter
 Qu'il fu pére premièrement
 Devant le Crist advenement :
 C'est grant merveille.

232 d

SAINT SEVESTRE

Voire a toy, car trop se merveille
 1335 Mes cuers de toy, c'est chose clére.
 Ça : li filz engendré du pére
 Fu, et est devant le temps faiz,
 Pour ce que de lui fust fait faiz
 Qui onques mais n'avoit esté,
 1340 Et qu'homme aussi fust reformé,
 Par pechié deffait et peri.
 Par parole eust ce fait cy

Fait s'il vouldist, mais nel pouoit
 Rachater s'il ne devenoit
 Homs mortelx, et en verité 1345
 Convenable en sa deité
 N'estoit mie de souffrir mort ;
 Et pour ce par divin accort
 Fu le fil pour nous a mort mis ;
 Et s'avoit esté filz touzdis 1350
 Avec le pére.

DOECH

Silvestre, or fais qu'il nous appére
 Pour quoy ton Crist apparanment
 Souffri qu'il fust si laidement
 Pris, liez, moqués et flaellez, 1355
 Cloez, coronnez, abruvez :
 Que fut ç'a dire ?

SAINT SEVESTRE

Toy le diray sanz contredire :
 Il ot fain pour nous saouler,
 Et s'ot soit pour nous abuvrer 1360
 De sainte pardurable vié.
 Après fu du serpent d'envie
 Témpté ; scez tu pour quel raison ?
 Pour encontre temptacion
 233 a Nous aidier en avoir victoire ; 1365
 Puis fu tenuz, c'est chose voire,
 Pour ce que nous fussions delivre
 Des Sathans, ce truis en mon livre.
 Après il vould estre moquiez :
 Pour quoy ? pour nous, bien le sachiez, 1370
 Garder des ennemis moquans.
 Puis fu liez pour ses servans
 Deslier de maleïçon,
 Puis pour nostre confusion
 Couvrir vould estre despoulliez. 1375
 Après d'espines fu ses chiez

Coronnez pour a ses amis
 Donner les fleurs de paradis.
 Après il fu ou fust penduz
 1380 Pour condempner et mettre jus
 La convoitise ou fut cueillie ;
 Puis pour lui faire villenie
 De fiel et d'esil abuvré,
 Afin que nous fussions mené
 1385 Boire aux glorieuses fontaines
 Qui sont de miel et de lait plaines,
 C'est assavoir gloire parfaite.
 Puis prist mort sa char vierge et nette
 Pour nous rendre vie eternelle ;
 1390 Puis fu celle char maternelle
 Ou sepulcre : la vout gesir
 Pour les sepulcres beneir
 Des sains, puis vout es cieulx monter
 Pour nous paradis defermer ;
 1395 Et siet a la destre du pére
 Pour exsaussier, c'est chose clére,
 Les prières des vraiz creans
 En lui ; trop vous tien recreans
 Se n'y creez.

L'EMPERÉRE

1400 Biaux seigneurs, bien oy avez
 De Silvestre l'entencion.
 Parlé a d'inspiracion
 Vraie et divine.

HELAINÉ

1405 Bien sçay que pas ne l'adevine,
 Ains li vient du divin secret,
 Dont cuer ay eu po discret,
 Quant en Crist n'ay pieça creu.
 Or n'en soions plus recreu :
 Creons y touz ; quant est de my,
 1410 Silvestre, mon treschier ami,

233 b

Pour Dieu baptesme me donnez.
A vostre foy.

TRACON

Aussi ne vueil plus nostre loy
Tenir. Je renonce a Mahon, 1415
Et baptesme ou nom de Jhesum
Vous redemande.

ZENOPHILLE

Solut a chascune demande
Si bien que mes cuers pervertiz
S'est a la loy Crist convertiz, 1420
Si qu'avoir saint baptesme pri,
Car je sens tout mon cuer ravy
En Dieu le vray.

ABRAHAM

Jamais autre loy ne tenray
Que celle qu'avez soustenu, 1425
Car en tout l'avez si solu
Qu'a moy pert vraie.

GODOLIAS

Je ne donne un bouton de haye
De quanque avons faiz d'argumens;
Car solu les a si par sens 1430
Qu'en Crist vueil croire.

ANNE

Aussi fas je, c'est chose voire,
Car trop attendu nous avons,
Quant tenu n'avons ne tenons
Leur foy certaine. 1435

DOECH

233 c

O nom la poissance haultaine
Requerons touz baptesme avoir,
Tendans a fin que recevoir
Nous vueille Diex au trespasser,
Et qu'il nous vueille habandonner 1440
Sa gloire clere.

SAINT SILVESTRE

Loenge en rens a Dieu le père
Et a la vierge bonnement
De ce saint convertissement.

1445 Or ça, au baptesme en alons,
Et touz en alant chanterons.
Seigneurs, aidiez moy ; or avant:
Aussi conme je vois devant
Commencier vueil ; suivez mon ton :

1450 *Ave regina celorum.*

Explicit

Serventoys couronné.

DE grant eur vint li voloir plaisans
 D'amours, d'amant et de dame sanz per,
 Quant Dieu, qui est amours pour touz amans,
 En dame vout amant son fil fourmer
 Virginalment et si secretement
 Que nulz fors li ne pot savoir comment,
 Tant fu celle euvre a congnoistre obscurcie ;
 Lors de ce fait fu nature esbahie,
 Lors fu de nient en vierge humain corps pris,
 Et lors fu dame en grace resjoie
 Pour resjoir amies et amis. 11

J'en lo Amours dont li pouoirs est grans,
 Qui Dieu son filz amant fist encharner
 Divinement es tresprecieux flans
 De la tresvierge et dame sanz amer,
 Dont la se fist humblement, purement,
 233 d Tresglorieux et noble aliement
 De Dieu a homme en substance de vie,
 Laquelle amant soubzmist par courtoisie
 A mort pour mors amortir ; en croiz mis
 Fu, et tout pour raviver sa lignie
 Au gré d'Amours en qui j'ay mon cuer mis. 22

Et pour ce sui en mon cuer desirans
 De li servir et la vierge loer
 Qui sanz grief fu l'umain salut portans
 Au vouloir Dieu qui la vout preparer
 Et consacrer, dont je tien fermement
 Que dame soit de l'umain sauvement,

Que dame soit ains que née saintie,
 Que dame soit a Dieu mère et amie,
 Que dame soit ou touz biens sont compris,
 Et dame aussi dont foy nous certiffie
 33 Qu'en dame amer gist honneur et proufiz.

Car en dame a tant de biens habondans
 Qu'a touz bons est joye d'onneur porter
 A ceste dame en qui sont florissans,
 Car Dieu la vout sur toutes honorer
 Et conme mère eslever haultement
 La ou elle est tresglorieusement
 D'anges et sains honorée et servie,
 Sanz fin assise a la destre partie
 Dieu qui pére est, filz et sains esperiz,
 Trois noms regnans en telle seigneurie
 44 Que c'est un sens et un voloir unis.

Dame gentiex, gracieuse et sachans,
 Cors precieux, trosne de foy nommer
 Vous puis et vray secours des esperans,
 Vierge royal, vierge c'on doit amer,
 Vierge devant, vierge en l'enfantement
 Et vierge après, vierge sanz finement,
 Vierge par qui promesse et prophecie,
 Los, gloire, honneur et paix fu acomplie ;
 Après Dieu, dame estes de paradis
 Et de toute grace si raemplie
 55 Que je vous vueil croire et amer touzdis.

L'ENVOY

Prince d'amours, noble fu la maistrie 234 a
 Quant sanz charnel meffait fist son cher filz,
 Amant parfait, homme en dame infinie
 Dont amans sont par grace resjois.

Serventoys estrivé.

D'UN vray amant et d'une vraie amie
 Nous vient nos biens, no joie et noz proufiz,
 Dont li amie est la vierge Marie
 Et li amans est Dieu de paradis,
 Qui s'alia a ceste amie fine
 Qui faite estoit pure, sainte et divine,
 S'avoit en li sens, honneur et biauté,
 Grace, douceur, eur, humilité
 Et de touz biens si parfaite habondance
 Qu'en li se mist pour sa grande bonté
 Amours qui donne a touz amans plaisance. 11

Vezi le bien, l'onneur, la courtoisie,
 Qui vient d'amour : c'est li sains esperiz,
 Li divins feus, dont l'or qui reflambie
 Fu par ce feu d'humanité vestiz ;
 Car tout ainsi que l'argent c'on affine
 Seroit sur l'or qui vient de noble mine,
 Fu par ce feu couvers d'humanité
 Li ors que je compare a deité,
 Si qu'on vît puis Dieu et homme en semblance,
 Sains esperiz, un filz en unité,
 Touz d'un vouloir et d'une obeissance. 22

Ainsi Amours qui les amoureux lie,
 Li doulx metaulx humains a l'or unis,
 Nasqui des flans de la vierge saintie,
 Vray Diex, vrayz fiex, vrayz homs et vrayz amis,
 Qui nous moustra noble et puissant doctrine,
 Qui nous donna son sanc et sa char digne,
 Qui nous rendi par mort vie et santé,

Qui puis manda a s'amie en secré :
 Amie, amans vous mande aiez creance 234 b
 Que lassus a vostre lieu ordené
 33 Pour joie avoir et vivre en souffisance.

Et par ce point doit dame estre servie
 Quant Dieu, qui est vray roy suppellatis,
 Ne volt souffrir que la char fust pourrie
 Ou il avoit esté neuf mois touz vis.
 Car comment que sa char fust femenine
 Si la fist Dieu si pure et si viergine
 Que bien devoit après mort d'obscurté
 Avoir es cieulx vie et auttorité,
 Et on en vit mainte signiffiance,
 Et s'en ont tant li appostre affermé
 44 Qu'amans y doit avoir vraye fiance.

Dame gentilz et de biauté garnie,
 Judith plaisans, Hester en juste advis,
 Rebecce en seûs, sage en advocatie,
 Dont vous portez coronne de hault pris
 Au destre Dieu, noble et puissans royne,
 S'est eureux, vierge, qu'a vous s'encline
 Quant vous pouez veoir en majesté
 Un vray amant, un Dieu en unité,
 Ou vous avez si jolie aliance
 Que voz servans en sont reconforté
 55 Par bonne amour qui leur donne alejance.

L'ENVOY

Prince, qui bien de degré en degré
 Aroit d'amie et d'amant bien amé
 Le santement, il aroit cognoissance
 Que puis qu'il sont ensemble enamouré
 C'on n'en pourroit faire la dessevrance.

. XXI



MIRACLE

DE

BARLAAM ET JOSAPHAT

PERSONNAGES



LE ROY AVENNIR
LE PREMIER ASTROLOGIEN
LE DEUXIESME ASTROLOGIEN
LE PREMIER CHEVALIER
L'ESCUIER
LE PRESCEUR
BARLAAM
LE MESSAGIER
DEUXIESME CHEVALIER
JOSAPHAT FIL DU ROY
LE MESEL
UN VIEL HOMME
DIEU
GABRIEL
ARACHIS
NACHOR
THEODAS
LA FILLE DU ROY ORFELINE
LA DAMOISELLE
NOSTRE DAME
MICHIEL

*Cy commence un miracle de Nostre Dame de Bar-
laam, maistre d'ostel du roy Avenir, qui converti
Josaphat, le fil du roy, et depuis converti Josa-
vhat son père le roy et touz ses gens. 235 a*

LE ROY AVENNIR

SEIGNEURS, je vous pri et requier,
Dites me voir de ce que quier.
Vous estes astrologiens,
Les plus haulx de sens et d'engiens
Tenuz de toute ceste terre. 5
Or entendez que vueil enquerre :
Vezci mon filz orphelinet
De mère, car trespasée est.
Dites moy, sera il ja grant?
De savoir ay le cuer engrant 10
Quelx il sera.

LE PREMIER ASTROLOGIEN

Sire, pour certain il fera
De soy un puissant et riche homme
Et tel que de ci jusqu'a Rome
N'ara pareil. 15

LE DEUXIESME ASTROLOGIEN

235 b
Roys, or entens que dire vueil.
Cest enfant ici que tu as
Sera grant homme, mais non pas
En ce pais dont es seigneur,
Mais en un autre trop meilleur 20
Et trop plus noble, ja n'en doubttes.

Plus je dy qu'il tenra, escoutes,
 La loy et foy des chrestiens
 Que maintenant sur toutes riens
 25 Hez et parfuis.

LE ROY

Je l'en garderay, se je puis.
 Seigneurs, savez que vous ferez?
 En ce manoir la le menrez,
 Et gardez bien que point n'en isse,
 30 Et si ne soiez pas si nice
 Que de nesune enfermeté
 Li parlez ne de povreté,
 De mort aussi ne de viellesce
 Ne de chose qui a tristescce
 35 Lui puist la pensée esmouvoir,
 Ne que par nul il puist avoir
 De Crist aucune mencion,
 Afin que son entencion
 De riens n'y mette.

LE PREMIER CHEVALIER

Vostre voulenté sera faite
 40 Si bien, sire, par touz noz diex
 Qu'il ne verra qu'esbaz et jeux
 Et leescce, pour le tenir
 De penser au temps a venir,
 45 A brief parler.

LE ROY

C'est bien dit; pensez d'en aler,
 Et tenez bien tout clos sur vous,
 Et soiez songneux et jalous
 De li garder.

L'ESCUIER

A ce sarons bien regarder.
 50 Mon seigneur, s'il vous plaist, g'yray
 Devant vous et le porteray
 Entre mes braz.

LE PREMIER CHEVALIER

Tu diz bien ; prens l'ysnel le pas
Et va devant.

55

235 c

LE PRESCHÉUR

Doulx Diex, ce m'est le cuer grevant
Que les gens de ce pais voy
Vivre ydolatres sanz ta foy
Tenir ne croire en toy, doulx Diex ;
Ce me fait si mal que j'ains miex 60
Morir, sire, entre eulx pour t'amour
Que ne leur monstre sanz demour
Comment es cielx pére as sanz mére,
Et mére en terre euz sanz pére,
Et comment tu t'abandonnas 65
A morir pour nous et donnas.
Yci a de gent moult grant masse :
Conmencier vueil sanz plus d'espasse
Un sermon que je leur feray.
Se Dieu plaist aucun en trairay 70
A loer Dieu et son doulx nom.

Penitenciam agite, appropinquabit enim regnum celorum, Mathei III^o. Ces paroles sont escriptes en l'évangile saint Mahieu et veulent ainsi dire en françois : Faites penitence et le royaume des cieulx vous approuchera, c'est a dire, vous approucherez de Dieu. L'apostre saint Pol dit : Vous demandez et riens ne prenez ; pour quoy ? pour ce que a droit pas ne demandez. Et saint Jaque dit : Mes chiers amis, chascun jour demandons le royaume des cieulx, disans : *Adveniat regnum tuum*, mais pour ce mie ne l'avons que indeuement le demandons. Car l'empeschement de nos pechiez, dont point ne nous amendons, est la cause pour quoy a nostre demande faillons. Et pour ce le sauveur du monde, qui nous bailla et aprist la fourme de requerre et de-

mander en l'orison de la sainte patenostre, il meisme es paroles dessus dictes nous enseigne comment nous pouons empetrer, se par penitence nous voulons l'ostacle de nostre demande oster, quant il dit : *Penitenciam, etc.*, faites penitence et le royaume des cielx vous approuchera. Ostez de vous pechié et tantost ce que vous requerez vous avez. Es quelles paroles le sauveur du monde fait deux choses : premièrement il nous esmeut a ce que de faire penitence ne doyons recroire, quant il dit : *Penitenciam agite*. Secondement il nous promet du royaume des cieulx la gloire : *Appropinquabit, etc*. Douce gent, combien que le doulx Jhesus des obprobres que nous li faisons nous peust et puist reprendre et blamer, par justes menaces espouenter et par paines et fliaux chastier, toutes voies encore ama il miex par sa benigne misericorde au commencement de sa predicacion et encores aime le pecheur par promesses rappeler, quant il dit : *Penitenciam agite*, faites penitence. Et par foy a penitence faire nous devroient noz propres maux poindre et exciter. Pour quoy? car se le pecheur se veult recorder de la gloire que pour ses pechiez il a perdu, de la misère qu'il a encoru, de la sentence divine qu'il atent et de la peine qu'il a acquis et du tourment, il est trop folz s'il ne s'en deult et est plus dur que pierre s'il ne les plaint et s'en repent. Car se il regarde derrière lui, il y voit et treuve pour beneurté perdue pleur; s'il regarde environ lui, pour misère encorue il y voit douleur; s'il regardé dessous lui, il y voit du feu d'enfer l'erreur. Qui donques entre toutes telz choses se peut tenir de lamenter et soy pleindre qui derrère li a damage, devant li tourment, environ soy confusion, dessous li jugement? Et pour ce entre vous, pecheurs, faites donques penitence. Mais s'il est pecheurs qui doie faire penitence, je dy entre vous, gens qui aourez les ydoles, la devriés faire, car je vueil dire que c'est un des grans et enormes pechiez qui soit que

235 d

236 a

le pechié d'ydolatrie, que vous osez a Dieu l'onneur que vous li devez et aorez faulx ymages, de quoy dit David le prophète que se sont ymages qui ont bouche et ne parlent point, qui ont oreilles et goute n'oient, qui ont yex et point ne voient, qui leurs piez ne peuent remuer, ne de leurs mains riens manier. Et pour ce, mes amis, entendez, et a prendre le salut de voz ames ne tardez, les sacremens de la doctrine medicinalle recevez, et charité, vous qui estes hommes, par raison dicernez. Quoy! qu'a la supersticion de voz ydolez renoncez et au vray Dieu qui vous a créé vous convertissez, a l'amère passion qu'amours li a fait pour vous souffrir pensez, le sacrement de baptesme recevez, et a li seul voz cuers par charité donnez. Repentez vous donques, vous qui par ydolatrie pechié avez, et celi qui est vray Dieu qui a tout fait et fourmé reconnoissez et a li seul aourez et servez, la beneurté qu'avez perdue et le grant dommage qu'avez encoru recouvrez, et plourez sanz vous desesperer et a la repentance de la benoite Magdalaine vous confourmez, a penitence faire vous mettez, et celi qui est vray Dieu qui tout a fait et fourmé com debonnaire reconnoissiez et humblement merci li requerez et a li servir devotement vous donnez, par quoy au royaume des

236 b cieulx parvenir puissiez, lequel royaume nous otroit
ille qui est benedictus Deus in secula seculorum. Amen.

BARLAAM

Las! onques mais n'oy sermon
 Faire, s'ay je en mains lieux esté
 Qui parlast de si grant bonté
 Ne de si haulte amour de fait 75
 Com Crist a tout le monde a fait
 A ce que ce seigneur ci dit;
 Et je le croy sanz contredit.
 Si me vueil a l'aouer mettre
 Et de touz biens mondains desmettre 80
 Pour gangnier des cieulx l'eritage

Rendre me vois en hermitage
 Et mon corps en paine asservir
 Pour l'amour ce Dieu desservir
 85 Et me faire crestienner :
 A li me vueil du tout donner,
 C'est mon propos.

LE ROY

Je suis esbahiz que je n'oz
 Nulles nouvelles de mon filz,
 90 Ne puis c'on l'en mena ne fis.
 Il m'en fault nouvelles avoir.
 Musehault, vaz moy tost savoir
 A ceulx qui de mon filz sont gardes
 Comment il le fait, et si gardes
 95 Que leur maintien et leur atour
 Me saches dire a ton retour
 Sanz mentir goute.

LE MESSAGIER

Mon chier seigneur, n'en aiez doute,
 Je vous promet quant revenray
 100 A dire tresbien vous saray
 De vostre filz et de ses gens
 Tout le maintien, car diligens
 Seray du veoir et d'enquerre.
 Puis qu'il vous plaist, g'i vois bonne erre.

105 Mes seigneurs, noz dieu Apolo,
 Tervagant, Mahon et Juno
 Vous vueillent en bien maintenir
 Et touz jours en joie tenir 236 c
 Et en leesce.

PREMIER CHEVALIER

110 Musehault, bien veignes tu ! Qu'est ce ?
 Dont viens ainsi ?

LE MESSAGIER

De mon seigneur le roy qui ci
 M'a envoié, soiez en fis,
 Savoir comment le fait son filz
 Ci entre vous. 115

PREMIER CHEVALIER

Nous le faisons si bien que nous
 Ne pensons qu'a nous solacier,
 Vivre en joie, chanter, dancier :
 Je te di voir. 120

LE MESSAGIER

De son fil, s'il vous plaist, veoir
 Moult liez seroie.

PREMIER CHEVALIER

C'est de li veoir tresgrant joie,
 Tant a doulx et plaisant visage, 125
 Tant est humain, courtois et sage,
 Et tu le verras sanz targier.
 Voiz le la. De li, messagier,
 Dy que te semble.

LE MESSAGIER

A mon seigneur le roy ressamble 130
 Miex c'on ne le pourroit pourtraire.
 Pour ce devers la court retraire
 Me vueil sanz plus faire debat :
 De ceens voi assez l'estat,
 Qu'est noble et grant. 135

L'ESQUIER

Selon que le cuer as engrant
 De faire fais.

LE MESSAGIER

A Mahon vous conmant huy mais.
 Sachiez d'errer ne fineray
 Jusqu'a tant qu'au roy reseray, 140
 Et ce sera a terme court.

Mon seigneur, je vien de la court
Vostre enfant chier.

236 d

LE ROY

Et qu'as tu trouvé, messagier ?
145 Ne me mens mie.

LE MESSAGIER

Que j'ay trouvé? toute gaudie,
Touz solaz, touz esbatemens,
Tout glay, certes pas ne vous mens ;
Et ce qui le miex m'a pleu,
150 C'est que j'ay vostre filz veu
En tresbon point.

DEUXIESME CHEVALIER

De maistre d'ostel n'avez point,
Sire : un novviau vous en fault faire
Barlaam vous ne vostre affaire
155 Petit mais prise.

LE ROY

Ceste nouvelle ou l'as tu prise?
Me veulz tu faire courroucier
Au plus sage et; vray conseillicier
Qu'entour moy aie ?

DEUXIESME CHEVALIER

160 Non, sire, mais c'est chose vraie
Qu'il s'en est alé es desers,
Conme hermite povre convers,
Servir des chrestiens le dieu.
Mais ne sçay pas le propre lieu
165 Ou est alé.

LE ROY

Or pais, ne m'en soit plus parlé.
J'en sui courrouciez vraiment.
Si en feray tant que briément
Revenra ou mal li venra.
170 Musehault, aler te fault,
Amis, dès maintenant bonne erre

- Par les desers d'Inde la terre :
 N'y laisse hermite nul que puisses
 Ou ne vois, tant que tu truisses
 Barlaam, et quant tu l'aras 175
 Trouvé, de par moy li diras
 Qu'il ne mette pas en delay
 237 a Que ci ne viengne, et que je l'ay
 En grant desir.
- LE MESSAGIER
- Mon chier seigneur, vostre plaisir 180
 Feray bonnement, c'est raison.
 Je m'en vois sanz arrestoison.
 A Mahom, sire, vous conmant.
- Ce chemin tenray ci devant;
 D'errer me convient bien pener 185
 Et penser comment assener
 Je pourray miex a mon chemin.
 En ma bouteille a de bon vin
 Et j'ay grant soif; si en buray
 Ici un trait, puis m'en iray 190
 Sanz faire assiete ne mengier.
 Or suis je aise, frès et ligier
 Con se venuz fusse en un char.
 En la terre sui de Sennar
 Ou l'en me dit que d'ermitages 195
 A plus qu'ailleurs sur les boucages
 Et sur le grant chemin comun.
 J'en voy la, ce m'est avis, un.
 Je vois savoir qui y habite.
- Mahon vous gart, biau pére hermite : 200
 Adressiez moy.
- BARLAAM
- Quelle est l'adresce, amis? De quoy
 Avez mestier?

LE MESSAGIER

205 Sire, un hermitte serche et quier
 Qui Barlaam se fait nommer.
 Avez vous point oy parler
 Ou il repaire?

BARLAAM

Et qu'avez vous a li a faire,
 Mon ami chier?

LE MESSAGIER

210 Vezci, sanz longuement preschier,
 Sire, qui me fait ci venir.
 Le roy, mon seigneur, Avenir
 Vous mande (bien vous recognois :

215 Barlaam estes, a la vois) *237 b*
 Que sanz delay vous atournez
 A ce qu'a sa court retournez,
 Car fain a de parler a vous,
 Si que, s'il vous plaist, mettons nous,
 Sire, au retour.

BARLAAM

220 Ou nom de Dieu, mon creatour,
 Puis qu'il me mande a li iray.
 Alons, plus n'y sejourneray :
 Devant alez.

LE MESSAGIER

Je vois, puis que vous le voulez.

225 Une chose vous demandasse
 Voulentiers, se faire l'osasse,
 Sire Barlaam : c'est pour quoy
 Avez relenquy nostre loy
 Et touz noz diex.

BARLAAM

230 Amis, je l'ay fait pour le miex.
 Tiens, de touz voz diex ce n'est riens :
 Il n'est foy que des crestiens;

Et ce clérement te prouvasse
 Se nous eussions bien espasse.
 Mais je ne le te puis moustrer, 235
 Car nous sommes près pour entrer
 Devant le roy.

LE MESSAGIER

C'est voir. Or vous en cessez coy.

Mon seigneur, vezci Barlaam
 Pour qui trouver peine et ahan 240
 Ay moult eu.

LE ROY

Barlaam, di : qui t'a meü
 Que de toute honneur desnüé
 T'es pour estre en vilté müé?
 Folz, bien as perdu ton avis : 245

Povre es de corps, meigre de vis,
 Vestu d'ort et vil garnement,
 Qui soloies si richement
 Vivre et vestir si nobles draps.
 237 c De toy feront enfans leurs gas 250
 Conme d'un sot.

BARLAAM

Roys, je te respons a ce mot :
 Se veulz savoir raison pour quoy,
 Tes ennemis hors d'entour toy
 Chace et deboute. 255

LE ROY

Qui sont il? et se d'eulx as doubte,
 Vueilles le dire.

BARLAAM

Sire, c'est convoitise et yre :
 Ces deux l'omme pas ne despeschent,
 Mais si le troublent et empeschent 260
 Que veoir ne peut verité.
 Pour ce vous requier qu'equité

Viengne en place, sire, et prudence,
 Puis qu'ay de parler audience
 265 Par vostre ottroy.

LE ROY

Soit fait con tu dis, je l'ottroy.
 Dy sanz respit.

BARLAAM

Sire, les folz ont en despit
 Les choses qui sont, pour un point,
 270 Qu'il cuident qu'il ne soient point,
 Et s'efforcent moult d'avoir celles
 Qui ne sont pas, ainsi com s'elles
 Fussent choses vraies appertes,
 Ce que ne sont pas. Adecertes,
 275 Qui la douceur ne congnoistra
 Des choses qui sont ne pourra
 La verité de ceulx apprendre
 Qui ne sont pas choses n'entendre,
 C'est tout certain.

LE ROY

280 Des choses qui sont plus a plain
 Me di, Barlaam, qui sont elles,
 Et aussi te demant de celles
 Qui pas ne sont.

BARLAAM

Sire roys, or m'entendez dont. 237 d
 285 Tant com chascuns est en ce monde,
 Il s'efforce a ce qu'il habonde
 A avoir des biens temporex,
 Des honneurs et deliz charnex
 Qui ne sont pas biens proprement,
 290 Car il faillent comunement,
 Et ce peut on assez savoir ;
 Car quant miex les cuide homme avoir,
 Lors li vient aucune aventure,
 Perte d'amis ou la mort sure

	Qui de ses biens le met tout hors :	295
	Si tost com l'ame a hors du corps,	
	Ainsi les y fault touz laisser,	
	Et nientmoins pour les amasser	
	Par aventure s'est dampnez.	
	Dont ne les doit nulz homs senez	300
	Pour choses qui soient tenir,	
	Puis qu'au besoing n'en peut joir.	
	Mais les choses, sire, qui sont,	
	Qui touz jours l'ome vivre font	
	Et maintenir de bien en miex,	305
	Si sont croire qu'il est un Diex	
	Regnant tout seul en deité,	
	Qui par s'infinie bonté	
	Ordonna que son fil venroit	
	En terre et qu'il nous sauveroit	310
	Et il si fist, car char humaine	
	Prist en vierge de grace plaine.	
	Se vous me demandez comment,	
	Je vous respon que simplement	
	Fu fait par le saint esperit,	315
	Qui de Dieu nostre frère fist,	
	Et pour ce que si grant estoit	
	Le pechié qu'Adan fait avoit,	
	Nostre pére, quant mort la pomme,	
	Que digne n'estoit point pur homme	320
	De satisfaire a Dieu le pére.	
	Pour ce nasqui de vierge mère	
	Dieu le filz, qui tant nous ama	
	Que l'amende pour nous paia	
238 a	Quant en croiz souffri la mort sure	325
	Par amour qui fu sanz mesure;	
	C'est la foy que crestien tiennent,	
	C'est la voie par quoy il viennent	
	A cognoistre et amer les choses	
	Ou toutes douceurs sont enclosez.	330

C'est a penser, se dit l'escript,
 Aux graces que fait Jhesu Crist
 Et a fait a l'umain lignage
 Et a desirer l'eritage

335 De paradis.

LE ROY

Seuffre toy, seuffre de telz diz,
 Ou tu me verras courroucier :
 Car se promis au conmencier
 Ne t'eusse que j'osteroie
 340 Yre de moy, je te feroie
 Ardoir en un feu maintenant.
 Me vas tu ici sermonnant
 De truffes? fui de ci; va t'en.
 Que Mahon te mette en mal an!
 345 Se jamais te voi de mes yex,
 Morir te feray, par noz diex,
 A grief martire.

LE DEUXIESME CHEVALIER

Tost li avez abatu, sire,
 Sa jangle. Il s'en va tout honteux,
 350 Et s'a esté de mort douteux
 Forment aussi.

BARLAAM

E! Diex, pour quoy n'est il ainsi
 Qu'il ne m'a fait morir pour toy?
 Bien feusse eureux s'en ta foy
 355 Morusse ainsi.

JOSAPHAT, FIL DU ROY

Sire, je sui en grant soussi
 De savoir la raison pour quoy
 Me fait ci mon seigneur le roy
 Con se fusse reclus tenir,
 360 Qu'aler ne puis hors ne venir,

- N'onques en ma vie ne fis.
 J'en sui forment, soiez en fis,
 Triste de cuer, n'est pas merveille.
 Si vous pri, sire, c'on le veille
 238 b A mon seigneur faire savoir 365
 Et qu'ay perdu, si ay je voir,
 Le goust de boire et de mengier ;
 Et ce me peut moult dommager
 S'il n'y pourvoit.
 PREMIER CHEVALIER
 Et qui voulez vous qui y voit 370
 Pour li nuncier ?
 JOSAPHAT
 Envoiez y vostre escuier :
 Il souffira.
 PREMIER CHEVALIER
 Sire, tout maintenant ira.
 Escuier, entens ça a moy. 375
 Va t'en a mon seigneur le roy
 Et li dy que son filz hors mettre
 Fault de ci, ou il ne peut estre
 Guères en vie.
 L'ESCUIER
 Sire, de faire ay grant envie 380
 Vostre plaisir. G'i vois en l'eure
 Et si n'y feray pas demeure.
- Mon seigneur, Mahon vous doint joie.
 Vostre filz, sire, a vous m'envoie :
 Il chiet d'anuy en tel dangier 385
 Qu'il pert le boire et le mangier :
 Ou partir du chastel li fault
 Et cueillir air, ou sanz deffault
 Ne vivra pas.
 LE ROY
 Alez le querre isnel le pas. 390

Ses gens et li tout m'amenez
 Et compagnie li tenez,
 Je vous en pri.

DEUXIESME CHEVALIER

305 Sire, volentiers sanz detri.
 Escuier, alons men, alons.

Chier sire, querre vous venons.
 Partez de ci et voz gens touz.
 Mon seigneur le roy veült que vous
 Parmy sa terre chevauchiez
 400 Et esbatez et solaciez :

Venez vous ent.

238 c

PREMIER CHEVALIER

Il a droit, que trop longuement
 A ci esté.

JOSAPHAT

405 Certes, vous dites verité;
 A mon corps en est pis d'assez
 Or avant, devant moy passez :
 Je vous suivray.

L'ESCUIER

Tout devant le premier iray,
 C'est de raison.

LE MESEL

410 Je voy venir de gent foison :
 Mes cliquettes me fault hochier.
 Vostre aumosne, mon seigneur chier,
 A ce malade.

JOSAPHAT

415 Tant est, seigneurs, laide et mausade
 Celle chose que je la voy
 Qu'esbahiz en suis touz par foy.
 Quelle chose est ce?

DEUXIESME CHEVALIER

C'est un homme que moult apresse,
Sire, mal de mesellerie,
Qui sur toutes est maladie 420
Moult reprouvée.

JOSAPHAT

Puis qu'elle est en homme trouvée,
L'a donc chascun ?

PREMIER CHEVALIER

Nanil, sire, pas de cent un.
S'en chascun tel mal se feroit 425
Ou autre damage, seroit
Trop malement.

JOSAPHAT

Donc congnoist on ceulx plainement
Qui tel mal ont a soustenir,
Ou viennent il sanz diffinir ? 430
Dites me voir.

DEUXIESME CHEVALIER

238 d Sire, il n'est homme qui savoir
Puist les choses qui sont a estre,
Ne lay ne cleric, tant soit grant maistre
• Ne bien lettré. 435

UN VIEL HOMME

E ! Mahom, je croy je n'istré
Jamais nul jour de ceste paine.
Viellece a feiblece me maine;
Ne puis mais aler sanz baston.
Sire, donnez m'un petit don, 440
Maille ou denier.

JOSAPHAT

Seigneurs, cest homme merveillier
Me fait plus que l'autre devant.
A paine peut aler avant.
Biau preudon, dire me vueillez 445
A droit : qu'est ce que babillez ?

Point ne l'entens.

UN VIEL HOMME

Mon doulx seigneur, la main vous tens.
 Donnez m'aucune chose, sire.
 450 Autrement ne le vous puis dire,
 Que trop sui viex.

JOSAPHAT

Je ne sçay qu'il dit, par noz diex.
 Laissons, alons men sanz detri,
 Et si me dites, doulx ami,
 455 Pour quoy tielx est.

LE PREMIER CHEVALIER

Ce qui en cest estat le met,
 C'est qu'il a moult d'ans qu'il fu nez,
 Car a tel estat destinez
 Sont vieilles gens.

JOSAPHAT

460 Et quelle est la fin? Diligens
 Sui du savoir.

LE PREMIER CHEVALIER

La fin, sire, c'est la mort, voir,
 A quoy on vient.

JOSAPHAT

Or demande je s'il convient
 465 Les uns morir, les autres non.
 Respondez m'a ceste raison
 Ce qu'en savez.

239 a

DEUXIESME CHEVALIER

Sire, ce point savoir devez :
 Touz fault morir.

JOSAPHAT

470 Et dedans quans ans peut venir
 La mort a homme?

DEUXIESME CHEVALIER

Certes quant homme vit la somme
 De quatre vins ans, dire l'ose,

Ou de cent au plus, c'est grant chose.
Lors de viellesce est ou conduit, 475
De la quelle la mort s'ensuit
Tantost après.

PREMIER CHEVALIER

Du roy mon seigneur sommes près.
Je le voy la. A li alons
Touz ensemble, et le saluons 480
Con devons faire.

JOSAPHAT

En ce ne pouons nous meffaire;
Saluer le vueil le premier.

Mahon, mon pére et seigneur chier,
Soit de vous garde. 485

LE ROY

Filz, bien vegniez. Quant vous regarde,
Je suis touz liez, car il m'est vis
A la couleur de vostre vis
Qu'estes tout sain.

JOSAPHAT

Mon seigneur, sachiez de certain 490
Qu'en moy point de filz n'eussiez
Briément se vous me feissiez
La tenir encore un petit.
J'ay perdu tout mon appetit :
Puis deux mois, c'est merveille grande,
N'ay trouvé saveur en viande 495
Qu'aie mengié.

LE ROY

239 b Biau sire, et je vous doin congié
D'aler esbatre ou vous voulez.
Cel hostel la pour vous prenez, 500
Car je le vueil.

JOSAPHAT

Sire, je feray vostre vueil.

Tout maintenant donques iray,
 Puis qu'il vous plaist, et y feray
 505 Mon tinel estre.

PREMIER CHEVALIER

Sire, ne vous pouez miex mettre :
 Je scé bien de pieça l'ostel.
 Regardez ; vezci un lieu bel
 Ou riens ne fault.

JOSAPHAT

510 Voir est : ici seoir me fault ;
 Et si vueil que vous deux issiez
 De ci et que vous m'i laissiez
 Seul une piéce.

L'ESCUIER

A chose nulle qui vous siesce,
 515 Sire, ne contredirons pas.
 Alons nous ent isnel le pas
 De ci endroit.

PREMIER CHEVALIER

Alons, tu diz bien et as droit ;
 Je le t'acors.

JOSAPHAT

520 En moy ay touz jours se remors
 Que vivre ne puis sans viellesce,
 Dont je suis moult esbahiz qu'est ce
 De vie d'omme : c'est un nient,
 Car com plus vit plus viex devient,
 525 Plus vit et plus pert senz et force
 Et plus la mort sur lui s'efforce.
 Après la mort que devient il ?
 Je ne sçay. Hé ! s'aucun subtil
 Peusse trouver ne savoir
 530 Qui m'en sceust dire le voir,
 Moult me feust bel.

DIEU

239 c

Entens ça a moy, Gabriel,
 A Barlaam de ci t'en vas
 Et li diz qu'il ne laisse pas
 Qu'au fil d'Avenir roy ne viengne 535
 Et qu'il li monstre et li enseigne
 Comment aux biens celestiens
 Maine la foy des chrestiens
 Et quelle elle est. Or vas bonne erre.
 Es desers de Sennar la terre 540
 Demeure et est.

GABRIEL

D'obeir a vous sui tout prest,
 Pére des cieulx, c'est bien raison.
 Pour c'y vois sanz arrestoison.

Amis Barlaam, entens moy. 545
 A Josaphat le filz du roy
 T'en vas. Dieu veult que li denonces
 La foy crestienne et prononces
 Comment de la vierge nasqui
 Homme qui est Diex, voire, et qui 550
 Toute chose forma de nient
 Sanz lequel croire nul ne vient
 Aux grans joies de paradis.
 Or vas et si li monstre et dis :
 Dieu le te mande. 555

BARLAAM

Loée en soit sa bonté grande!
 Puis qu'il li plaist en l'eure iray,
 Mais cest habit ci changeray
 Et prendray de marchant l'abit.
 C'est fait. Vraiz Diex, a mon labit 560
 Et a ma paine regardez
 Con vostre, sire, et me gardez
 De mal dire et de mal penser.

Amis, vueillez moy assenser
 565 De ce que je vous vueil enquerre.
 Marchant sui, qui ay une pierre
 A vendre precieuse et fine,
 Qui les avugles enlumine,
 Qui fait oir les non oyans
 570 Et fait parler les non parlans,
 Et qui aux folz donne sagesce.
 Conment peusse avoir adresce
 A ce qu'au filz du roy parlasse
 Et que ma pierre li moutrasse?
 575 Dites le moy.

239 d

L'ESCUIER

Un sage homme sembles par foy,
 Amis, qui te voit ou visage;
 Mais tu es folz en ton langage :
 Onques pierre n'ot tel puissance.
 580 J'ay bien en pierres congnoissance :
 Or la me moustres, je t'en pri,
 Et s'elle est telle, sanz detri
 Je feray qu'a li parleras
 Et qu'a grant honneur en venras :
 585 De ce ne doubtte.

BARLAAM

Ma pierre est, amis, or escoute,
 Telle, se saches de certain,
 Que personne qui n'a l'ueil sain
 Et entière chaasté ne garde,
 590 S'il vient a ce qu'il la regarde,
 Sa veue pert ysnel le pas.
 Et je voy que sains yex n'as pas :
 Pour ce la te vueil escondire.
 Mais j'ay bien pour voir oy dire
 595 Que tresbiaux yex, sains et nez, porte
 Le filz du roy, et n'est pas morte
 En li chasté.

L'ESCUIER

Puis qu'elle est telle en verité,
 Je ne quier point c'on la me moustre,
 Car ma chasteé est passée oultre 600
 Et si n'ay mie bien sains yex.
 Mais or entens ci pour ton miex.
 Devant mon seigneur te menray
 Maintenant, et si li diray
 Ton fait. 605

Mon chier seigneur, vezci

240 a

Un marchant qui, seue mercy,
 Vous apporte une telle pierre
 Que je cuide qu'en nulle terre,
 A ce qu'il dit, n'ait la pareille.
 C'est noble chose et grant merveille 610
 De ses vertuz.

JOSAPHAT

Amis, bien soiez vous venuz.
 De vostre venue ay grant joie.
 Pourroit il estre que je voie
 Celle pierre que vous avez? 615
 Je vueil qu'enprès moy vous seez :
 Venez avant.

BARLAAM

Chier sire, honneur me faites grant,
 Que n'avez pas ma petitesse
 Regardé, mais a la largesse 620
 De vostre grant beninité,
 Et c'est bien fait en verité.
 Se de ma pierre demandez,
 Vezci que j'en dy : entendez.
 Il est voir q'un Dieu fist ce monde 625
 Et toute riens qui y habonde
 Et l'omme fist a sa samblance,
 Auquel segnourie et poissance

Il donna sur toute autre chose,
 630 Et sanz ce que je riens vous glose
 Mais que die selon la lettre,
 Le mist en paradis terrestre.
 La li furent habandonné
 Touz les fruiz, et congié donné
 635 De mengier en, fors d'un : hélas !
 Ce conmant trespassa li las,
 Qu'il crut au conseil de sa femme,
 Dont il chey en tel diffame
 Que se gousté n'en eust point,
 640 De mort n'eust esté ja point,
 Mais pour ytant qu'il en gousta,
 Dieu de ce lieu hors le bouta :
 Un temps pot puis vivre et durer,
 Mais mort li convint endurer,
 645 Et par lui nous y fault touz courre :
 N'est nul, non, qui s'en puist rescourre.
 Mais Diex qui en sa deité
 A de personnes trinité 240 b
 Voiant comment en son servage
 650 Sathan tenoit humain lignage
 Et qu'en enfer touz descendoient
 A la value qu'il mouroient,
 Son fil en terre nous tramist,
 Qui en une vierge se mist
 655 Et la prist nostre humanité,
 Et de la tresgrant charité
 Qu'il ot a nous si s'enyvra
 Que d'enfer il nous delivra
 Et fist nostre redempcion ;
 660 Par la benoite passion
 Que Juifs li firent souffrir,
 A quoy de gré se vout offrir,
 Com vrais homs qu'il fu et vraiz Diex,
 Et afin que l'entendez miex

Pur homme ne pouoit de fait 665
 Amender a Dieu le meffait
 Qu'avoit fait l'omme premerain,
 Car tuit tenoient du levain
 Du pechié de leur premier pére
 Et ici vueil qu'il vous appére 670
 Qu'ange n'y estoit point tenuz,
 Car homme n'estoit pas venuz
 D'ange, ne n'avoit sa nature,
 Dont selon raison et droiture
 Homme avoit de deux mors la somme 675
 Jusqu'a tant que Diex devint homme,
 Qui de tout ce l'omme acquitta
 En quoy par delit s'endebta
 Quant mort la pomme.

JOSAPHAT

Un point vous demant ci, preudomme : 680
 Puis qu'il estoit vray Diex, conment
 Senti il peine ne tourment
 Ne souffry mort?

BARLAAM

J'ay dit devant en mon recort
 Qu'en ly deux natures avoit, 685
 De quoy l'une divine estoit :
 Ceste ne senti point de peine,
 Mais seulement nature humaine
 La mort endura et senti,
 Qui la mort a mort abati. 690
 Et combien qu'en li habita
 La mort, il se resuscita
 Par la vertu de sa nature
 Divine, qui dura et dure
 Sanz fin et sanz commencement; 695
 Et si tenez certainement
 Qu'en la fin un tel jour sera
 Que conme homme et Dieu il venra

Les bons et les mauvais jugier,
 700 Les maux fera sanz fin vengier,
 Et aux bons donrra sanz fin gloire.
 A ce devroient penser voire
 Les folz qui aux ydoles servent,
 Qui rien fors enfer ne desservent.
 705 Folz sont il voir et plain de rage,
 Qui aourent leur propre ouvrage
 Et ce que de leurs mains ont fait,
 Et puis les appellent de fait
 Leurs dieux, qui les sauve et les garde,
 710 Et eulx mesmes sont des diex garde ;
 C'est bien fantosme et desverie.
 Sire, aussi ne me taiz je mie
 De ceulx qui tant aiment ce monde,
 En qui toute malice habonde.
 715 Il ressemblent, ce m'est avis,
 Un homme qui ot trois amis.
 Le premier ama plus que soy ;
 Au second avoit telle foy
 Qu'autant con soy meisme l'amoit ;
 720 Le tiers le moins amé clamoit.
 Or avint que devant le roy
 Fu semons pour aucun desroy :
 A son grant ami fuit bonne erre
 Pour aide et conseil requerre
 725 En li monstrant conment touz jours
 L'ot amé. Cil a briez moz cours
 Li dit : Je ne te cognois point ;
 Mais puis que tu es en tel point, 240 d
 Se mestier est, de moy aras
 730 Deux linsieux dont te couvreras.
 Quant l'ot, de li, mat et confus,
 Se part, s'est au second venuz
 Et le pria con le premier.
 L'autre dist : Merler ne m'en quier,

Mais tant feray je bien pour toy : 735
 Jusqu'a l'uis du palais le roy
 Voulientiers te convoieray
 Et puis tantost m'en revenray.
 Quant ces moz li a oi dire,
 De li se part a cuer plain d'ire, 740
 Et aussi qu'en desesperance
 D'aler au tiers ami s'avance.
 Quant devant li vint, si baissa
 La chiére et cheoir se laissa,
 Et li dist : A toy parler n'ose, 745
 Car ne t'ay pas, c'est vraie chose,
 Amé con deusse avoir fait ;
 Toutes voies je sui de fait
 Maintenant en grant triboul mis,
 Et si ay a touz mes amis 750
 Failli : pour Dieu, ne me faux pas.
 Cil li respont isnel le pas :
 Voir, treschier ami te repute ;
 Or ne doubte nul qui t'empute,
 Car devant le roy m'en iray 755
 Pour toy et te delivreray.
 Ce premier ami, sire, qu'est ce ?
 C'est possession de richesce
 Que li mondain a grant labour
 Assemblent de nuit et de jour, 760
 Et a tant de periz s'esperdent ;
 Et quant de ce siecle departent,
 Ne sont leurs corps las ne leurs piaux
 Couvers fors des plus viez drapiaux :
 Si a povre tresor, emy ! 765
 Et après le second amy
 Femme et enfans et parens sont
 Qui jusques a la fosse vont
 Ou le mort enterrent et bournent
 Et puis arrière s'en retournent. 770

Mais le tiers est pour verité
 Foy, esperance et charité,
 Aumosne qui les pechiez cuevre
 Et estaint, et toute bonne euvre
 775 Que nous pouons ci aval faire,
 Par quoy nous pouons a Dieu plaire,
 Qui gracieux a Dieu nous livrent
 Et des ennemis nous delivrent
 Que nous avons.

JOSAPHAT

780 Mon chier ami, par voz raisons
 Congnois du monde le deffaut
 Et voy que touz morir nous fault
 Et ne savons quant ne comment;
 Après je voy tout clérement,
 785 Combien que ne soie pas viex,
 Que ce n'est rien que de noz diex.
 Dès ci les reni pour venir
 A la foy que vous voy tenir.
 Sachiez qu'avec vous m'en iray :
 790 Pére et honneurs, tout laisseray
 Pour Dieu servir.

BARLAAM

S'ainsi vous voulez asservir
 A Dieu, vous ressemblerez, sire,
 Un jovencel dont vous vueil dire,
 795 A qui on vult femme espouser,
 Et celui pour la refuser
 S'en fouy : cure n'en avoit ;
 Et tant ala qu'en un lieu voit
 La fille d'un povre homme orant,
 800 Et en Dieu loant labourant;
 Si li dist : Que faites vous, dame ?
 Je vous voy une povre femme
 Et Dieu loez aussi de fait
 Con se riche vous eust fait.

	Celle respont, qui fu benigne :	805
	Si com petite medicine	
241 b	Souvent de grant douleur delivre,	
	Aussi di je tout a delivre	
	Graces des petiz dons c'on rent	
	Causent fait et vouloir souvent	810
	De grans dons faire, sire ; et oultre	
	Grans choses de Dieu, ce vous moustre,	
	Ay pris et receu de fait	
	Conment a s'ymage m'a fait,	
	Et entendement et memoire	815
	M'a donné, voire, et a sa gloire	
	M'a appelé, et ouvert l'uis	
	De son paradis, ou je puis	
	Entrer, se n'est pour mon deffaut.	
	Donques bien loer le me fault	820
	Pour tiex biens ; raison y ay belle.	
	Cil qui vit sage la pucelle	
	La demanda par mariage.	
	Son pére li dit, qui fu sage :	
	Ne la peuz avoir, biaux amis ;	825
	En trop bas lieu veux estre mis ;	
	Tu es de nobles gens estraiz,	
	Et je suis en povreté traiz.	
	Le jovencel dist : Ne m'en chaille ;	
	S'il vous plaist, ma femme ert sanz faille. 830	
	Le povre homme dist : Amis, taiz te.	
	Je n'en ay plus : que m'en desmette	
	Et qu'entre tes mains l'en enmaines ?	
	Nanil, se sont paroles vaines.	
	Le jovencel dist : Se je l'ay,	835
	Sire, avecques vous demourray,	
	Et menray la vie et l'estat	
	De vous, sanz faire nul debat.	
	Le preudomme a ce s'assenti ;	
	Et cil tantost se desveti	840

De ses garnemens precieux :
 Jus les jetta, s'en print uns vieux,
 La fille espousa, ce me semble.
 Ainsi demourèrent ensemble
 845 Eulz trois une pièce de temps
 En paiz, sanz noise et sanz contens.
 Quant son gendre ot bien esprouvé
 Le preudomme, et il ot trouvé
 Qu'il li fu loyal et certain,
 850 Qu'avint il? Un jour par la main *241 c*
 Le prist, en sa chambre le maine
 Qui ne fu mie trop vilaine.
 La li moustra de l'avoir tant
 Qu'onques veu n'en ot autant.
 855 Et quant ot veu tout a tour,
 Ains que de la feist retour,
 Le preudomme par bonne entente
 Tout li donne et tout li presente
 Beninement.

JOSAPHAT

860 Père, je congnois clérement
 Que ceci avez dit pour moy.
 Mais dites moy par vostre foy,
 Quans ans pensez vous bien avoir
 Et ou demourez? Du savoir
 865 Ay grant desir.

BARLAAM

Sire, quant vous vient a plaisir,
 J'ay d'aage quarante cinc ans
 Et suis es desers habitans
 De la terre de Sannar ditte :
 870 La demeure je et habitte
 En hermitage.

JOSAPHAT

Père, il semble a vostre visage
 Que soixante dix ans passez

Avez d'aage et plus assez,
En verité. 875

BARLAAM

Se vous de ma nativité
Voulez touz les ans compter, sire,
Vous pourrez bien verité dire;
Mais de compter n'ay pas envie
En la mesure de ma vie 880
Les ans qu'au monde ay despendu
Et en vanitez expandu,
Car mors estoie en l'ame lors,
Et on ne doit pas les ans mors
Dire ans de vie. 885

JOSAPHAT

241 d Je n'ay de riens si grant envie,
Pére, ce vous di en appert,
Conme d'avec vous en desert
Aler manoir.

BARLAAM

Sire, je vous fas assavoir, 890
Se si chaudement y venez,
La compagnie, ce tenez,
De nous deux ne durera point;
Et avec ce vous di ce point :
Cause seray et mocion 895
De faire persecucion
A mes frères, si ques, pour Dieu,
Demourez, sire, en vostre lieu
Jusques a tant que vous verrez
Temps que miex venir y pourrez. 900
Je vous ay monstré nostre foy.
Or la gardez et baisez moy,
Si m'en iray.

JOSAPHAT

Sire, volentiers le feray,
Bien la m'avez sceu preschier. 905

Dieu le vous rende, pére chier.
 Certes volentiers m'en alasse
 Avec vous, se je ne doubtasse
 Ce qu'avez dit.

BARLAAM

910 Chier sire, du saint esperit,
 De Dieu le pére et Dieu le filz
 Soiez seigniez et beneiz.
 A Dieu! pour le miex vous ay dit.
 Attendez encore un petit :
 915 Si vauldra miex.

PREMIER CHEVALIER

Sire, noble estes et gentiex :
 Quant ferez aux diex sacrefice?
 Ne devez pas conme homme nice
 Vivre sanz foy.

JOSAPHAT

920 Non fas je voir : amis, tais toy.
 De tes diex ne me parles plus.
 Ou filz de la vierge, Jhesus,
 Croy fermement.

242 a

LE PREMIER CHEVALIER

925 Sire, si creez folement ;
 Quant vostre pére le sara,
 Bien scé qu'il s'en courroucera.
 Ceste creance delaissez
 Et a nostre loy vous plaisez,
 Qu'il ne vous hache.

JOSAPHAT

930 Certes, je vueil bien qu'il le sache.
 Mais a la court vas, je t'en pri,
 Et li denonces sanz detri
 Hardiement.

LE PREMIER CHEVALIER

Puis qu'il vous plaist, hardiement,

Sire, maintenant li vois dire. 935
 Nous sommes honniz, treschier sire :
 Vostre filz s'est mis a la foy
 Des crestiens, et nostre loy
 Laisse et despise.

LE ROY

Haro ! comment ? dy m'en la guise. 940
 Qui m'a ce fait ?

PREMIER CHEVALIER

Sire, a li est venuz de fait
 Un hermite nommé Barlaam,
 Que Mahon mette huy en mal an,
 Qui tellement l'a atourné 945
 Qu'a la loy du tout l'a tourné
 Des crestiens.

LE ROY

Se je le tien en mes liens,
 Par Mahom, chier li venderay.
 Las ! je ne say que je feray, 950
 Tant ay courrouz.

ARACHIS

Sire, sire, confortez vous :
 Je vous diray m'entencion.
 Je scé de nostre nascion
 Un hermite qui, ce me semble, 955
 En touz cas Barlaam ressemble.
 Se vous voulez, querre l'iray
 Et com prisonnier l'amenray,
 Et il Barlaam se nommera,
 Et après un jour pris sera 960
 De faire a li deutoison
 Des deux loys, et il par raison
 La foy crestienne au premier
 Soustendra, et au derrenier
 Se laira vaincre en rappelant 965
 Tout ce qu'il avoit par avant
 Enseigné. Ainsi vostre filz

Revenra a vous, j'en sui fis,
Voire a merci.

LE ROY

970 Par Mahon, c'est bien dit qu'ainsi,
Arachis, avancez ceste euvre
Par quoy mon filz briément recuevre
Qui perduz est.

ARACHIS

975 Sire, a vostre vouloir sui prest.
Je le vois querre.

LE ROY

Certes, le cuer de dueil me serre
Quant mon filz m'a en tel despit
Qu'il laisse ma loy. Sanz respit
Vois a li parler.

Biau filz, qu'est ce ?

980 Pour quoy m'as mis en tel tristesse
Que ma viellesce deshonneures,
Que noz diex laisses et aeures
Un dieu estrange?

JOSAPHAT

985 Pére, j'ay fait un noble change :
J'ay fui tenébres, c'est voir,
Pour la vraie lumière avoir,
Et l'erreur par quoy j'ay mespris
Ay laissié, s'ay verité pris.
990 Ne vous traveilliez pas en vain,
Car nient plus que de vostre main
Ne pouez le ciel atouchier
Ne la mer aussi asseichier,
Ne me pourrez vous rappeler
De Crist servir, a brief parler,
995 Com crestien.

242 c

LE ROY

E! las chetiz, or voy je bien
Que pour les biens que je t'ay fait

Je sui cause de ce meffait;
 Car je t'ay plus fait, j'en sui fiz,
 C'onques père ne fist a filz : 1000
 Et pour ce conme hors du sens,
 Plain d'orgueil, a faire t'assens
 De ma voulenté le contraire.
 Ce point me sceurent bien retraire
 Les astrologiens senez. 1005
 Qui me dirent quant tu fuz nez
 Que plain seroies d'arrogance
 Et aussi d'inobedience.
 Je treuve bien qu'il dirent voir.
 Mais certes je te fas savoir 1010
 Qu'a honte de moy partiras
 Ou tu ma voulenté feras;
 Et se ton ennemi me fais,
 De peine te donray tel fais
 Qu'onques tel n'ot homme par mi, 1015
 Tant ait esté mon ennemi
 Et mal vueillant.

JOSAPHAT

Pére, trop me vois merveillant
 Que de mon bien vous adolez.
 Je tien que pére est afolez 1020
 Qui du bien son fil se courrouce.
 Se vostre cuer de mon bien grouce
 Ne que vous me faciez contraire,
 En sus de vous me verrez traire
 Et conme un serpent vous fuiray, 1025
 Ne pére ne vous nommeray.
 Certes jamais.

LE ROY

Ore souffrir me fault hui mais.
 Je m'en vois; tu t'aviseras,
 Et je croy que grant sen feras 1030
 D'obeir moy.

ARACHIS

Bien vous debatez, sire roy,
 Sanz raison : l'enfant est novice ;
 S'il a mespris par aucun vice,
 1035 Il s'en gardera conme sage.
 Nouvelles : Barlaam est en cage.
 Tant l'ay quis que je l'ay trouvé.
 Il m'a assez peine donné,
 Je vous promet.

LE ROY

1040 Alons men; puis qu'en prison est,
 Je li feray honte et annuy
 Ains qu'il soit mais tel jour conme huy,
 Par ces deux yex.

JOSAPHAT

1045 Ha ! doulx Jhesus, sire, vray Diex,
 Bien m'est sourse douleur amére,
 Quant prison est Barlaam mon père,
 Mon père voire vraiment
 Quant est de m'ame au sauvement.
 Or n'ay je plus d'amis au monde,
 1050 Si est bien droiz que mon cuer fonde
 En pleurs, en soupirs et en plains.
 Ha ! Barlaam, pour vous sui plains
 De dueil'et d'ire.

DIEU

Gabriel, a Josaphat dire
 1055 Vas qu'il laisse son dueil ester
 Et que Barlaam sanz doubter
 N'est emprisonnez ne pris, non,
 Mais c'est un qui Nachor a nom,
 Qui li ressemble.

GABRIEL

1060 Vray Dieu, sire, et vray homme ensemble,
 Dire li vois ysnel le pas.

Amis, ne te courrouce pas
 Pour Barlaam, car anuncier
 Te vien qu'il n'est pas prisonnier
 Ne tenuz de ton pére encor, 1065
 Ains est un qui a nom Nachor.

243 a

Fay bonne chiére.

JOSAPHAT

Ha ! Dieu, la vostre merci chiére
 Quant n'est pas pris !

LE ROY

Arachis, j'ay le cuer espris 1070
 De dueil pour mon filz : n'est merveille,
 Car il dit que vueille ou ne veille
 Crestien sera.

ARACHIS

Ce qui plus, sire, le fera
 Faire vo vouloir plainement, 1075
 C'est : parlez a li doucement ;
 Car lait parler chace et retrait
 L'enfant, mais doulx parler l'attrait
 S'autrement ne se veult donter,
 Prenez un jour de desputer 1080
 De nostre loy encontre celle
 Qu'il tient pour meilleur et plus belle,
 Et si li dites qu'il ara
 Barlaam que tenez, qui sera
 De sa partie. 1085

LE ROY

Arachis, j'ay grant aatie
 D'ouvrer selon vostre conseil.
 Pour ce devers li raler vueil.

Biau filz, acole moy et baise,
 Oncques sanz toy je ne fu aise, 1090
 Grant joie pren en ta jonesce :

Portes honneur a ma viellesce,
 Car touz jours seult honneur venir
 A l'enfant qui se veult tenir
 1095 Obediant et doubtant pére,
 Et qui ne l'est si le compére,
 Car mal en vient.

JOSAPHAT

Pére, il est un temps qu'il convient
 Amer, en autre fault hair,
 1100 Temps de paiz et temps d'envair,
 C'est a dire temps de bataille,
 Si que je ne doy point, sanz faille,
 Tant estre a vous obeissant
 Que pour vous soie Dieu laissant
 1105 Par qui sui nez.

243 b

LE ROY

Puis que tu es si obstinez
 Que desobeissant te voy,
 Soions d'acort et moy et toy
 1110 De faire une deutoison
 De noz loys : ce n'est que raison.
 Ton maistre Barlaam tien pris,
 Qui t'a ceste creance apris :
 Devers toy et pour toy l'aras,
 Et des autres qui que voulras ;
 1115 Et je pour nostre loy deffendre
 Volray de noz clers aussi prendre.
 S'a Barlaam en vient le miex,
 Je lairay pour ta loy noz diex ;
 Et s'il est vincu tu larras
 1120 Ta creance et si revenras
 A nostre loy.

JOSAPHAT

Certes, pére, je m'y ottroy,
 Mais que Barlaam me bailliez.
 De l'oir faire sui touz liez :

Avant ! soit faite. 1125

LE ROY

Si sera elle et tost parfaite,
Car j'ay ausi, si com je pense,
Les clers touz prez a ma despense
Pour desputer.

JOSAPHAT

Alons men donc sanz rioter, 1130
Je vous en pri.

LE ROY

Alons. Arachis, sanz detri,
Alez tost et si m'amenez
Barlaam qu'en prison tenez,
Il a ja je ne scé combien, 1135
Et si faites vous savez bien
Que je vueil dire.

ARACHIS

243 c Vous dites voir : se fas mon, sire.
G'y vois.

Nachor, biau doulx amis,
Querre vous vien pour estre mis 1140
En grant honneur se vous voulez.
Devant le roy vous en venez
Et dites que Barlaam estes
L'ermitte; ileucques fort vous faites
Conme crestien de tenir 1145
Leur foy et de la soustenir;
Et un po en desputerez,
Mais assez tost vous vous lairez
Vaincre des gens de nostre loy :
Par ce raron le filz du roy, 1150
Qu'est crestien.

NACHOR

Certes je le vous feray bien,
Arachis : a po de langage,

Je scé de leur loy tout l'usage.

1155 Alons bonne erre.

ARACHIS

Vezi Barlaam que vien de querre,
Mon seigneur chier.

LE ROY

Biau filz, pour tantost despeschier,
Vezi Barlaam que vous livre.
1160 Or die et deffende a delivre
La loy d'entre vous crestiens :
Ja ne li mefferay en riens,
Soit en seur.

JOSAPHAT

Sire, ce soit en bon eur.
1165 Baarlaam, or entens a moy.
Tu scés comment je suis par toy
En la foy de Crist introduit.
Je ne scé qu'a faire on t'a duit,
Mais se la soustiens et deffens,
1170 Je te dy que c'est mes assens
De finer crestien ma vie,
Qui qu'en ait engaigne n'envie ;
Se tu te laisses surmonter,
Je te promet a brief compter
1175 La vilenie que j'aray 243 d
En l'eure sur toy vengeray,
Car la langue te trairay hors
De la gueule et le cuer du corps,
Et aux chiens mengier les donray :
1180 Ainsi aux autres mousterray
Conment se devront entremettre
De fil de roy en erreur mettre
Ne decevoir.

NACHOR

Sire, j'en feray mon devoir ;
1185 Ne vous esmouvez point en ire.

Sire roys, que voulez vous dire
Contre crestiens?

LE ROY

Avant, seigneurs, avant; je tiens
Que cesser li ferez sa jangle.
Mettez le me tost math en l'angle; 1190
Parlez a li.

LE PREMIER ASTROLOGIEN

Barlaam, tu es seul celui
Qui as trahi le filz du roy,
Et d'erreur l'as mis en arroy. 1195
Pour quoy l'as fait?

NACHOR

Barlaam sui je, qui de fait
Ay le filz du roy hors osté
D'erreur et non mie bouté
En erreur, non.

PREMIER ASTROLOGIEN

Respons moy a ceste raison. 1200
Puis que les roys et les grans hommes
Et les sages plus que ne sommes
Noz diex croient et les honneurent
Et conme vrays diex les aeurent,
Comment es tu si hors du sens 1205
Que tu oses ne te consens
A faire encontre?

NACHOR

Or entendez ci. Je vous monstre
Que Griex et les Caldeiens
244 a Et aussi les Egipciens 1210
Par erreur et contre droiture
Ont fait leurs dieux de creature.
Li Caldeien le premier
Tiennent et croient, sire chier,
Des elemens que ce sont dieux 1215
Pour ytant qu'ilz voient as yeux

Qu'au prouffit des hommes sont fait,
Et toute voie de leur fait
Vient souvent a corrupcion
1220 Homme et a mainte passion.
Après je vous monstre des Grioux
Que de faulx hommes ont fait diex,
Con fu Saturne qui menga
Ses enfans et si se trencha
1225 Les genitailles et en mer
Les jetta ; ce fu fait amer.
Puis ont voulu en escript mettre
Jupiter le roy des diex estre,
Et toutes voies dient il
1230 Que souvent par son art subtil
Se transfourma en une beste
Pour pechié faire deshonneste,
Que nous appellons advoultire.
Des Egipciens vous vueil dire
1235 Qu'il ont les bestes adouré
Conme leurs dieux et honnoré.
Les uns aouré ont pourciaux,
Les uns viaux, les autres aigniaux
Si que je di touz ceulx ci sont
1240 En erreur et contre Dieu font,
Contre raison et droit escript.
Mais li crestien dit de Crist,
Qui le fil du treshault aeurent,
En erreur mie ne labeurent,
1245 Car il aurent le vray Dieu
Qui par puissance est en tout lieu,
Qui de la destre Dieu le père
Descendi en la vierge mère
Ou fist merveille, ce me semble,
1250 Car Dieu et limon joint ensemble
Et la divine majesté
Conjoint a nostre enfermeté,

Et li qui estoit infiniz
 Qui par pechié nous vit finiz
 Se vout tant par amour aherdre 1255
 A nous que, sanz ce qu'estoit perdre,
 Vout estre homme que n'estoit mie,
 Et a nous mors redonna vie
 Sa dine mort.

DEUXIESME ASTROLOGIEN

Tu argues malement fort. 1260
 Or me di ce que vueil enquerre :
 Se cestui filz qui vint en terre
 Fust vraiz Diex, com tu fais acroyre,
 Avecques Dieu son pére en gloire,
 Di moy comment morir peust ; 1265
 Ou si fu vrais homs qui eust
 Souffert mort, com je t'oy compter,
 Comment pot il mort surmonter ?
 Car homs mortel resusciter
 Ne peut, ne Diex mort endurer, 1270
 Ne Diex et homme, se me semble,
 Ne pot il oncques estre ensemble :
 Je ne scé comment dire l'oses,
 Car ce sont deux contraires choses,
 Chascun le voit. 1275

NACHOR

De truffes parlés qui vous oit,
 Car je vous ay par ma doctrine
 Monstré qu'a nature divine
 Fu nature humaine adjoustée
 Sanz estre point en char muée 1280
 Ne la char en divinité,
 Et parmi celle humanité
 Que Dieu, qui estoit invisibles,
 Prist se fist il a nous visibles,
 Et par sa mort nature humaine 1285
 Sauva, et peine osta par paine.

Et combien qu'a la mort s'offri,
 La deité rien ne souffri,
 Nanil, mais elle mist a mort
 1290 Mort quant il surreci de mort
 En corps humain. 244 c

LE ROY

Ho! je deffens jusqu'a demain,
 Seigneurs, ceste deputoison.
 Il est d'aler diner saison :
 1295 Laissez ce plait.

JOSAPHAT

Pére, puis qu'estre ainsi vous plait,
 Je vous requier donques que j'aie
 Mon maistre hui mais en ma mennaie
 Pour avoir avec li conseil,
 1300 Et vous voz maistres, bien le veil;
 Ou se mon maistre retenez
 Que voz clercs huy mais me donnez.
 A l'un faire serez d'accort
 De ces deux, ou vous avez tort,
 1305 Se m'est avis.

LE ROY

J'ouvrray selon ton devis ;
 Barlaam aras avec toy
 Et j'aray mes clers avec moy.
 Tien, maine l'en.

ARACHIS

1310 C'est le miex qu'il ait Barlaam,
 Car j'esper quant il parlera
 Ja a li qu'il le tournera
 A nostre loy.

LE ROY

Aussi l'espere je, par foy.
 1315 Pour ce l'ay fait.

JOSAPHAT

De joie m'avez huy refait,

Amis, par voz parlers honnestes.
 Ne doubtez : bien scé qui vous estes.
 Certes Barlaam n'estes mie,
 Mais Nachor, qui d'astrologie 1320
 Estes dit maistre.

NACHOR

Haro ! sire, comment peut c'estre
 Que le savez ?

244 d

JOSAPHAT

A demander pas ne l'avez,
 Nachor, mais ce vous ai j'a dire; 1325
 Savoir le m'a fait celui sire
 Qui le monde de nient crea,
 Puis par sa mort le recrea,
 Si conme hui l'avez dit, amis.
 Certes s'en vous ne se fust mis, 1330
 N'eussiez ja sens ne puissance
 D'avoir parlé de sa naisçance
 Ne de s'amére passion
 Ne de sa resurreccion
 Si haultement con fait avez; 1335
 Mais il veult que soiez lavez
 Par baptesme, et que le servez
 Si que sa grace desservez
 Et que puissiez avoir sa gloire;
 Et se bien avez en memoire 1340
 Comment jugier il nous venra
 Et comment rendre nous fault
 Raison et de faiz et de diz,
 Et qu'est enfer et paradiz,
 Ce monde petit priserez; 1345
 Et se le faites vous ferez
 Certes que sage.

NACHOR

Je vous di bien j'ay en courage,
 Sire, jamais ne fineray

1350 Jusqu'a tant que baptesme aray ;
 Et je sçay bien ou le doy prendre
 Et sachiez qu'après m'iray rendre
 En un hermitage et bouter
 Pour moy hors du monde jeter
 1355 Et pour li servir jour et nuit.
 A Dieu, sire ! ne vous ennuit :
 Certes g'y vois.

THEODAS

Seigneurs, je ne fui puis deux moys
 Autant com je sui esbahiz.
 360 Sire, Nachor s'est tout hors mis
 De nostre loy par le langage
 De vostre hoir, et en hermitage 245 a
 Va demourer con crestien.
 Mais se voulez, je vous di bien,
 1365 Je feray tant que vostre filz
 Retournera, soiez en fiz,
 A nostre loy.

LE ROY

Se tu le fais, en nom de moy,
 D'or feray faire ton ymage
 1370 Et li feray autel hommage
 Et autel sacrefice ou miex
 Conme je fas aux autres diex,
 Je te promett.

THEODAS

Rois, donc hors d'entour ton filz mett
 1375 Touz ses servans ; a ce ne failles,
 Et pour li servir ne li bailles
 Mais que femmes bien acesmées
 Et pucelles gentes parées
 Qui soient avec li touz jours
 1380 Et touz temps de nuiz et de jours .

Car c'est la chose, a dire voir,
Qui plus joune homme decevoir
Peut et attraire.

LE ROY

Alez me querre sanz retraire
La fille du roy, Sanceline, 1385
Qui de nouvel est orfeline.
Je la vueil avecques li mettre.
Se femme le peut a point mettre
El le mettra.

DEUXIESME CHEVALIER

Sire, en l'eure fait vous sera. 1390
Je meismes la vous vois querre.

Dame, entendez que vueil requerre :
Pour mon seigneur le roy vous pri
Que veigniez a li sanz detri
Parler un poi. 1395

LA FILLE DU ROY

Sire, volentiers faire doy
Bien tant pour li, g'y suy tenue.
245 b Avecques moy sanz attendue
Venez, Lorine.

LA DAMOISELLE

Vostre vouloir de cuer benigne 1400
Fera, ma dame.

LA FILLE DU ROY

Sire roy, Mahon vous gart l'ame !
A vostre mant vien, c'est raison.
Dites moy pour quelle achoison
Vous me mandez. 1405

LE ROY

Belle, sagement demandez.
Mon filz, se sachiez, crestien
Est de fait, voire, mau gré mien,

Et je l'en vueil, se puis, retraire.
 1410 Et a la loy que tien ratraire
 Si vueil que le gouvernement
 Aiez de li tout plainement.
 Se vous le pouez attourner
 A ce qu'il vueille retourner
 1415 A nostre loy par quelque voye,
 Ne doubtiez que ne vous pourvoie
 Si bien qu'a mari vous l'arez
 Et royne après moy serez
 De ce pais.

LA FILLE DU ROY

1420 Sire, ne soiez esbahiz
 S'il est crestien orendroit
 Car je vous dy, soit tort soit droit,
 Je l'en retrairay, nul n'en doute,
 Mais que parler sanz plus m'escoute
 1425 Une seule heure.

LE ROY

C'est bien. Or alons sanz demeure,
 Et je le vous mettray en main.

Biau filz, vezci que je t'amain.
 Je ne vueil plus qu'homme te garde :
 1430 Ceste dame t'ara en garde,
 Qui belle est et qui a corps gent,
 Et s'est née de noble gent.
 Dame, avecques li demourrez ;
 Biaux seigneurs, et vous en venrez
 1435 Avecques moy.

245 c

L'ESCUIER

A vostre gré faire m'ottroy,
 Sire, c'est droiz.

PREMIER CHEVALIER

Si sommes noz en touz endroiz,
 C'est de raison.

JOSAPHAT

M'amie, j'ay bien achoison, 1440
 Puis qu'avecques moy vous tenez,
 De vous dire que bien devez
 Loer par euvres et par fait
 Dieu qui si belle vous a fait
 De corps, mais c'est a vous diffame 1445
 Quant tele n'estes devers l'ame;
 Car s'elle fust belle et honneste,
 Ce fust et bonne chose et nette
 Que de vous, dame.

LA FILLE DU ROY ORFELINE

Comment savez vous que mon ame 1450
 Est orde, sire?

JOSAPHAT

Puis qu'en Jhesu Crist nostre sire,
 Qui de la destre Dieu le pére
 Descendi en la vierge mére,
 Qui est vraiz Diex, n'avez creance, 1455
 Ne que pris n'avez renaissance
 Par baptesme, c'est vraie chose,
 Qu'elle est orde, bien dire l'ose :
 Orde, car s'ainsi trespassez,
 Touz ses bons jours ara passez 1460
 Et es tourmens d'enfer sera
 Mise tant com Diex durera ;
 Et en ces griefs tourmens iront
 Ceulx qui par foy creu n'aront
 Que Crist est Diex. 1465

LA FILLE

Se tu desires pour le miex
 Qu'aux ydoles ne serve point,
 Ottroies moy donques ce point
 Que prendre me vueilles a femme.
 245 d Fille de roy sui, noble dame. 1470
 Li crestien n'ont pas horreur

De mariage, ains a honneur
 Le tiennent et a chose honneste,
 Dont maint patriarche et prophète
 1475 Et Pierre, des appostres l'un,
 Furent, si con dient aucun,
 Mariez. Dont sanz toy meffaire
 De moy peuz bien ta femme faire,
 Ta loy gardée.

JOSAPHAT

1480 Femme, c'est parole gastée :
 Car ja soit ce que crestien
 Puist femme avoir, je te dy bien,
 Ceulx en sont hors pour verité
 Qui de garder virginité
 1485 Ont fait les veuz.

LA FILLE

Or soit, amis, si com tu veulz ;
 Mais se mon ame veulz sauver,
 Un petit don te vueil rouver :
 S'il te plaist, tu le me feras ;
 1490 C'est qu'avec moy maizhui gerras,
 Et je te promet de ma main
 Crestienne seray demain.
 Se d'un grant pecheur tu me diz
 Que les anges de paradis
 1495 Font joie quant il se repent,
 A celui qui son temps despent
 Pour li en bien faire avoier
 N'est mie deu grant loyer ?
 Si est, voir ; dont, se tu as sens,
 1500 A ce que je requier t'assens,
 Et ainsi tu me sauveras,
 En quoy grant merite acquerras
 Et preu a t'ame.

JOSAPHAT

Ha ! mére Dieu, tresdoulce dame,

Envoyez moy vostre confort. 1505
 Assailliz sui malement fort
 Et temptez si diversement
 Ne scé que faire nullement,
 246 a Dame, se par toy n'ay seccurs.
 A toy m'en vueil fouir le cours, 1510
 A toy vien, royne des cieulx :
 Regarde moy de tes doulx yeulx,
 Ou je sui pris et mal bailliz.
 De toutes pars sui assailliz.
 Ceste femme si me propose 1515
 Qu'a gesir avec li m'expose
 Et crestienne devenra :
 Par ce son ame sauvera,
 Se dit, mais n'en scé pas le voir ;
 Après ma char fait esmouvoir 1520
 Sathan par sa suggestion
 Au fait de fornicacion,
 Auquel ne me vueil assentir.
 Si vueilles, dame, consentir
 Que mon ame ne maine a perte 1525
 Ceste temptacion desperte ;
 Et je de ci ne partiray,
 Dame, tant que tout dit aray
 Vostre psaultier.

DIEU

Mére, alez ent en ce moustier 1530
 A Josaphat qui vous deprie :
 Si devotement mercy crie
 Que je vueil qu'il soit secoruz.
 De temptacion est feruz
 Trop malement. 1535

NOSTRE DAME

Filz, obeir vueil bonnement
 A ce que vous plaist conmander.

Anges, sanz le vous demander,
 Venez ent faire compagnie,
 1540 Et en alant ne laissez mie
 Que ne chantez.

GABRIEL

Doulce dame, voz voulez
 Ferons du tout.

MICHIEL

Il ne nous doit point estre a coust :
 1545 Gabriel, disons sanz demour.

RONDEL

246 b

Fleurs des fleurs, par laquelle odour
 Ame de pechié est sauvée
 Et a l'amour Dieu ramenée,
 Digne estes sur toutes d'onnour,
 1550 Benoitte avant que fussiez née,
 Fleurs des fleurs, par laquelle odour
 Ame de pechié est sauvée.

NOSTRE DAME

Amis, pour ce que ta pensée
 As mis et ta devocion
 1555 En moy, par grant dileccion
 Te vien veoir et conforter
 Et de par mon filz enorter,
 Qui est le roy de paradis,
 Que ne croies de rien aus dis
 1560 Sanceline, n'a ses paroles :
 Elles sont et faulces et foles ;
 Mais de bien faire te souviengne,
 Si qu'en la fin t'ame parviengne
 Au royaume qui est sanz fin.
 1565 S'amé as mon filz de cuer fin
 Et moy, aimes nous miex touz jours,
 Et dedans un petit de jours
 De ce siecle trespaseras
 Et sanz fin avec nous seras.

Ralons nous en a Dieu, amis : 1570
Faites qu'a fin soit ce chant mis
A mon raler.

MICHIEL

Gabriel, sanz en plus parler,
Disons joyans et sanz errour.

RONDEL

Fleur qui sur touz biens a valour, 1575
Sanz vous n'est point grace donnée :
Pour c'estes es cieulx couronnée,
Fleur des fleurs par laquelle oudour
Ame de pechié est sauvée
Et en l'amour Dieu ramenée. 1580

JOSAPHAT

246 c Ha ! vierge, com beneurée
Recreacion ay eu
De ce que ci vous ay veu !
Fi, fi, fi de biauté humaine
Et fi de la joie mondaine ! 1585
Certes jamais ne fineray
Tant que hors jetté m'en seray,
Car il m'annuye.

LE ROY

Je doubt que mon filz ne s'en fuie.
Teodas, devers li alons, 1590
Et a li encores parlons
De son affaire.

THEODAS

Sire, ce sera bon a faire,
Et si sarons se Sanceline
L'a point attrait a son convine 1595
N'a sa cordelle.

LE ROY

C'est bien dit. Et qu'est ce la, belle ?

Comment vous va ?

LA FILLE

Vostre filz un cuer de pierre a.
 1600 Il n'est nul qui le puist flechir
 Ne muer. Vez le ça venir.
 Il vient d'orer.

LE ROY

Filz, venez vous de labourer
 Ou de quel lieu ?

JOSAPHAT

1605 Je vien d'aouer le vray Dieu,
 Qui nous a faiz et deffera
 Touz et toutes quant li plaira :
 A li en est.

LE ROY

Touz jours es par ton parler prest,
 1610 Quant moy et toy sommes ensemble,
 De moy courroucier, ce me semble.
 Laisse moy de ton Dieu ester,
 Et me croy : je cuit sanz doubter
 Que miex feras.

JOSAPHAT

1615 Pére, un jour venra que seras
 Trait devant li, vueilles ou non,
 Et si li renderas raison
 Et compte de toute ta vie.
 La se vengera de l'envie
 1620 Et de l'ennuy et des debaz
 Qu'a crestiens pour li fait as,
 Se ne t'avises.

246 d

THEODAS

Josaphat, merveilles devises.
 Comment ! nous veulz tu faire entendre
 1625 Q'un jour venra qu'il faudra rendre
 Raison de quanque on ara fait ?
 Quant seroit ce jugement fait

Ny a fin mis?

JOSAPHAT

Quant, Theodas, biaux doulx amis?
 Aussi tost comme oeil euvre et clot, 1630
 Car il n'est rien a Dieu repost :
 Toutes choses voit clérement
 Et scet dès le commencement.
 Autrement Diex ne seroit pas :
 Muser ne fault point sur ce pas. 1635
 Et si sachiez bien sanz doubtaunce
 Ceulx qui sont hors de sa creance
 Et qui n'ont saint baptesme pris
 Sanz fin seront de feu espris.

Je te dy voir. 1640

THEODAS

Je t'ay cuidé prendre et avoir,
 Josaphat, mais tant m'as appris
 Qu'a ton Dieu croire me rens pris;
 Car je cognoys en verité 1645
 Qu'il convient de neccessité
 Qu'un Dieu soit qui touz biens merisse
 Et qui les maux aussi punisse,
 Et nul n'en est a dire a droit
 Fors cil dont parles orendroit,
 Et pour ç'a li servir m'ottroy : 1650
 Si fera mon seigneur le roy,
 S'il me veult croire.

LE ROY

Theodas, est ce chose voire
 Que le crerez?

THEODAS

Sire, oil, et vous si ferez, 1655
 Pour estre de toulz maulx delivres;
 Car je voy par mesmes noz livres
 Qu'ainsi est com vostre filz dit :
 Si le creez sanz contredit,

1660

Je le conseil.

LE ROY

Puis que le me loez, je vueil,
 Biau filz, crestien devenir,
 Ne jamais je ne vueil tenir
 Ce royaume, mais le vous quitte
 1665 Et si m'en iray estre hermitte
 Pour pardon avoir des meffaiz
 Que j'ay ça en arriére faiz.
 Diex, ce dittes en voz recors,
 Est tant doulx et misericors
 1670 Qu'il n'est tant mauvaise personne
 A qui ses pechiez ne pardonne
 Se de cuer li crie mercy,
 Et je le pense a faire ainsy
 Certainement.

JOSAPHAT

1675

Pére, ne doubtez nullement
 Quant baptesme receverez
 De touz pechiez lavez serez.
 Si vous diray que nous ferons :
 Touz ensemble nous en irons
 1680 A Barlaam le saint preudomme
 Qui nous devisera en somme
 Ce que pour nostre sauveté
 Nous convient de neccessité
 Faire; alons y.

THEODAS

1685

Alons, car le conseil de ly
 En ce cas nous peut moult valoir,
 Et je tien que de grant vouloir
 Nous aidera.

LE ROY

1690

Je croy que voirement fera :
 Or y alons.

247 b

DEUXIESME CHEVALIER

Mon seigneur, avec vous volons
 Touz estre aussi crestiennez.
 Puis qu'a ce vous estez donnez,
 Si faisons nous.

JOSAPHAT

E ! seigneurs, benoiz soiez vous ! 1695
 Grant grace au jour d'ui Dieu vous fait.
 Avant : alons men touz de fait
 A Barlaam par ce boucage.
 Je scé moult bien son hermitage.
 Vez le la ; je le voiz huchier. 1700

Barlaam, pére et ami chier,
 Parlez a moy.

BARLAAM

Je voiz la. Qui est ce que j'oy ?
 Ha ! filz, Dieu vous ait en sa garde !
 De vous me donnasse envis garde : 1705
 Comment vous va ?

JOSAPHAT

Bien, biau pére. Diex fait nous a
 Grace apperte et miracle gent.
 Mon seigneur mon pére et sa gent
 Ay avec moy ci amenez, 1710
 Pour estre touz crestiennez ;
 Mais moult y ay eu a faire.
 Pour Dieu, biau pére, en cest affaire
 Soiez songneux.

BARLAAM

Ha ! tresdoux Dieu, roy glorieux, 1715
 Conme on doit bien glorifier
 Ton saint nom et magnifier !
 Certes, chascun y est tenuz.
 Seigneurs, bien soiez vous venuz !
 Assez brief vous baptiseray ; 1720

Vous venrez ou je vous menray ;
 La trouverons les fons touz prestz.
 G'iray devant et vous après,
 Pour ce que ne savez le lieu ; 247 c
 1725 Et en alant, en loant Dieu
 Et la vierge qui le porta,
 Ceste antaine ou biau deport a
 Chanterons ensemble a hault ton :
Ave, regina celorum.
Explicit.

Serventois.

J'AY maintes foiz au noble bien pensé
 Que Dieu donna a l'umble vierge pure
 Quant il la fist vaissel de trinité,
 Lequel on peut comparer par figure
 A une nef preste en toute ordenance.
 Cors ot de paiz, cordail de concordance,
 Tref de force, chastel de seigneurie,
 Mast de droiture, ancre de sainte vie,
 Gouvernail de divin entendement.
 Tuit cil de qui sa grace est ensuie
 11 Sont soustenuz en bon gouvernement.

Dont doit on bien de bonne volenté
 Suir la nef de si noble voiture
 Que de touz biens y a telle planté

Qu'il n'y a chief, fin, nombre ne mesure.
 Ceste nef tient infinie abondance :
 Touz biens y sont puisiez sanz descroissance ;
 Ceste nef est nommée et baptisie
 Nef de grace pour humaine lignie,
 Conme vaissel qui touz les biens comprennent
 Dont le windas humains a Dieu ralie
 Quant bonne amour par grace s'i assent. 22

Si qu'on doit bien pour de bonne eure né
 Tenir le corps qui met toute sa cure
 A passer par la nef de netteté
 Soubz l'umbre du noble mast de droiture
 Par my la haulte mer d'oultreuidance
 Tenant le gouvernail de souffisance,
 Siglant contre les vens d'orgueil, d'envie,
 D'avarice, d'ire et de glotonie ;
 247d Car quant nef voit la vierge en tel tourment,
 Tantost fait qu'elle est au port adrescie
 Car li bien fait ne perist nullement. 33

Et quant tel bien en amour sont trouvé
 Qu'en nef faite de l'umaine faiture
 Vint l'admiral de vraie deité
 Pour sauver toute humaine creature,
 En ceste nef doit on avoir fiance
 Et la amer et croire sanz doubtance
 Que c'est l'excellente vierge Marie,
 Mére d'amours et d'amans vraie amie,
 Celle par qui grace aux humains descent,
 Et celle qui tost fait que Diex ottrie
 L'amant merci, qui sa joie li rent. 44

Dame que j'aim, par vous sont recreé
 Li descreé par la male morsure
 Que fist Adam ou mortel fruit veé

Et par mi ce que vostre porteur
 Mort en souffri : g'y ay ferme creance,
 Et scé que vous regnez ou la puissance,
 La sapience et bonté infinie
 De trinité et essance a unie,
 Après Dieu souveraine eternelment.
 Et la peut vos frans cuer, vierge prisie,
 55 A son plaisir ouvrer sensiblement

ENVOY

Si vous pri, vierge nef, devotement
 Que par vous soit ma nef si convoie
 Qu'arriver puist a port de sauvement.

Autre Serventois.

NOBLE chose est, au voir considerer,
 De ce que Diex ains le commencement
 Du siècle vult en pensée ordener
 Un saint vaissel, precieux, noble et gent,
 Ouquel il mist par divine maistrie
 Grace a donner sanz ce c'on l'escondie
 A homme humain qui repentant seroit :
 Ce saint vaissel est, a parler a droit
 Et approuvé par certaine figure,
 Le digne corps de l'umble vierge pure
 11 Qui proprement neccessaires estoit. 248 a

Certes, c'est voir, ligier est a prouver ;
 Car figuré est ou viel testament

La ou Dieu vult a Moise donner
 La manne dont il prist norrissement,
 De laquelle posa une partie
 En un vaissel, lequel nous signifie
 De la vierge le saint corps benoist;
 Et la manne est, que le peuple attendoit,
 Grace que Dieu mist en lui sanz mesure
 Pour le salut d'umaine creature.
 Ses noms loez et graciez en soit! 22

On l'en doit bien et priser et loer
 Et saint vaissel appeller vraiment,
 Qu'en li comprist sanz en riens separer
 Dieu père, fil et avec ensement
 Saint esperit qui des humains est vie.
 La devint char la parole anuncie,
 La fu li sains des sains qui tout portoit,
 La fu portez cil qui grace apportoit,
 La fu adjoint a humaine nature
 Cil qui donnoit angelique pasture,
 Qui son vivant son service feroit. 33

Et par ce point croit mon cuer sanz errer
 Qu'en ce nous fist Dieu grace purement
 En tant qu'il volt de noyent nous creer,
 Qu'a nous ami se fist fraternelment
 Pour acomplir la sainte prophecie
 Et approuver qu'estoit le vray messie
 Qui les creans en li sauver venoit,
 Et en preschant comment les siens vouloit
 Desocuper de la prison obscure,
 Moustrant qu'avoit l'umain fait pris en cure
 Quant ensement ses amis confortoit. 44

Dame gentilz, ou il n'a qu'amender,
 Triclin vaissel ouquel habondamment

Li pecheour peuent grace trouver,
Qui eschiver veulent leur dampnement,
Pour c'estes vous royne intronisie,
En l'eglise triumphant seigneurie,
En hault chancel assise de vo droit :
La paradis estre paré devoit 248 b
De vo saint corps, si com dit l'escripture ;
La estes vous servie sanz murmure
55 Au gré d'Amour : dame, mes cuers le croit.

ENVOY

Et quant Dieu n'a de nous par pechié cure,
Si faites vous qu'a grant envoiseure
Par vostre grace a merci nous reçoit.

Explicit.

XXII



MIRACLE

DE

SAINT PANTHALEON

PERSONNAGES

LE PÈRE PANTHALEON, EUSTORE

PANTHALEON

MAISTRE MORIN

LE VOISIN

HERMOLAUS, PRESTRE

HERIPPÉ

YPOCRAS

L'ENFANT

LE COUSIN, GOMAS

L'AVUGLE

LE CONTRAIT, MONDOT

L'EMPEREUR

FAGOT, PREMIER SERGENT

DEUXIESME SERGENT

PREMIER PRESTRE

DEUXIESME PRESTRE

LE COURBE HOMME, SADOH

DIEU

GABRIEL

MICHIEL

NOSTRE DAME



GO *quasi vitis fructificavi suavitatem odoris, etc.,*
Ecclesiastici xxiiii^o. Ces paroles proposées en
 latin veulent ainsi dire en françois : J'ay comme
 la vigne fruttifié soueveté d'odeur. Entre Sapience qui est
 le filz de Dieu et Marie, la vierge benoite, a une tres-
 grant affinité, car Sapience est creeresse de Marie comme
 père et Marie est de Sapience vraie mère, si comme elle
 mesmes le tesmoingne *Ecclesiastici* xxiiii^o : *Qui creavit*
me requievit in tabernaculo meo : Celui qui m'a créé a
 reposé en mon tabernacle, c'est a dire a pris en moy char
 humaine; et pour ce et non mie sanz cause sont appro-
 priées les paroles de Sapience a Marie, laquelle regardant
 en ce monde nous envaist, par le procès de l'espitre de
 laquelle j'ay pris les paroles proposées au commencement,
 et nous attrait a elle considerer en trois manières. Pre-
 mièrement pour raison de sa conmendacion en ce qu'elle
 dit : *Ego quasi vitis; ego mater pulcre dileccionis, etc.*
in me gracia omnis vite, etc. : Je sui comme la vigne; je
 sui mère de bele amour; en moy est grace de toute vie et
 verité. Secondement pour raison de son invitacion, car
 elle dit : *Transite ad me* : Venez a moy vous qui me
 convoitez. Tiercement pour raison de sa remuneracion :
Qui edit me, etc.; qui audit me, etc. : Ceulz qui me
 menguent et boivent aront encore soif et faïn. Yci dit
 elle mains et fait plus, et veés le procès que fait la vierge
 benoite en ceste espitre : premièrement elle est soy con-
 mandant; secondement nous semonnant et envaissant;
 tiercement les consentans a son imitation remunerant.

Et toutes ces choses attraient et aleichent. Et premièrement sa commendacion qui est trible, selon trois clauses, esquelles trois choses sont signifiées selon l'ordenance de la lèttre, c'est assavoir, quelle chose est de elle : *Ego quasi vitis* ; après quelle chose est elle : *Ego mater, etc.* ; et après quelle chose est en elle : *In me gracia omnis vite, etc.* Or veons premièrement quelle chose est elle. Elle dit qu'elle est mère de belle amour. Ici met quatre vertuz ordenans quatre de ses affections, c'est assavoir joie, esperance, douleur et pæur. Car elle n'ot joie mais que par charité ou de charité ; pour ce s'appelle elle mère de belle amour : *Mater pulcre dilectionis*. Ne elle n'ot esperance mais que en sainteté ; pour ce dit elle : *Sancte spei*. Ne elle n'ot paour mais que avec reverence : *et timoris*. Ne elle n'ot douleur mais que avec congnoissance : *et agnitionis*. Et est telle la diferance de ces quatre que joie est de present, esperance du futur, douleur du mal present et pæur du mal a venir. Ainsi donques doivent ordener les bonnes personnes leurs affections que charité engendre en eulz joie, reverence, pæur et douleur, soit acompaigniée de prudence et saintée d'esperance. Oultre par ces quatre pren quatre vertuz que Marie ot contre quatre vices. Elle s'appelle mère de belle amour contre le vice de delit de charnalité, mère de paour contre tout orgueil et vanité, mère de grandeur ou de force contre pusilanimité et mère de sainte esperance contre avarice et cupidité. Beneurée est bien la personne en la congregacion qui en ces quatre choses ensuit Marie. Ainsi appert quelle chose est elle ; c'est qu'elle est mère de belle amour. Or veons après quelz chose est en elle, car miex vault ce qui dedans est repost et mucié. Il s'ensuit : *In me gracia omnis vite et veritatis*. L'espitre dit qu'en li est grace de toute voie de verité. Et ici met aussi quatre choses, car elle dit qu'elle est adresce et voie aux meserrans, verité aux ignorans, vie aux morans, vertu aux deffailans. Mais note bien ce

qu'elle dit qu'en li est grace de toute vie, qui est treble, car il est une vie qui est de mariage, l'autre de continence et de veuvage, et la tierce est de virginité en l'estage. Donques Marie est vie en exemple des mariez, des continens et des vierges, et de ces trois est il dit *Ecclésiastici* xxiiii^o. *In Jacob inhabita* : Marie, habite en Jacob, c'est quant aux mariez; *et in Israel hereditare* : et prend ton heritage en Israel, quant aux continens; *et in electis meis mitte radices* : et met et envoie tes racines en mes esleuz, quant aux vierges. Ou autrement est elle en grace de toute voie, c'est assavoir des commençans, des profitans et des parfaiz. Aussi di je qu'en li est grace de toute verité, qui est treble, car en elle est verité de vie, de doctrine et de justice. Beneuré est bien donques le lieu ou regne ceste treble verité, c'est assavoir verité de vie en conversacion, verité de doctrine en predicacion et verité de justice en correccion. Aussi est en elle toute esperance de vie. Car c'est l'esperance aux pecheurs, aux repentans et aux justes. Par elle est donné pardon aux pecheurs, grace aux repentans et gloire aux justes, et ainsi nous appert sa commendacion selon trois similitudes qu'elle met; premièrement par similitude de vigne : *Ego quasi vitis*; secondement par similitude de mère : *Ego mater, etc.*; et tiercement par similitude de fontaine : *In me gracia omnis vite, etc.* Se tu considères la vigne tu y treuves merveilleuse delectableté tant en l'odeur, tant en la fleur conme ou fruit : l'odeur a soueveté, la fleur agreableté et le fruit douceur : et tout ce trouveras tu en Marie; mais je me passe de l'exposer pour briété. Après se tu considères Marie conme mère, tu la trouveras de merveilleuse fecondité pour quatre condicions d'affection amoureuse qu'elle met, dont la première est biauté; pour ce dit elle : *Ego mater pulcre dileccionis* : je suis mère de belle amour; secondement, qu'elle est de songneuse et tendrière amour; pour ce dit elle : *et timoris*; tiercement qu'elle est de discrète et certaine amour; pour ce

dit : *agnicionis*; et quartement qu'elle est de forte et ferme amour; pour ce dit elle : *et sancte spei*. Pour quoy dit un devot clerc : Marie, Benoitte es tu qui sur les thrones, Les pucelies et les mathrones Tiens privilège d'excellence; Tu es rousée, vaine de miel, Puiz de douceur, en qui de fiel ne d'amer n'ot onques semence. Ça jus pecheurs te magniffient, Lassus en toy se glorifient Ceulx qui ont gloire souveraine; Ton enfantement a l'onneur Fu des femmes et pour l'amour Aussi de creature humaine. Si li prions que par sa douce misericorde elle nous doint grace de faire chose en ce siècle par quoy nous puissions venir a la beneurté pardurable avec le père et le filz et le saint esperit, qui est *unus Deus benedictus in secula seculorum. Amen.*

Cy commence un miracle de saint Panthaleon que un empereur fist decoler avec Hermolaus et ses deux compaignons qui l'avoient baptizé. 250 a

LE PÈRE PANTHALEON

Entens a moy, Panthaleon.

Biau filz, avis m'est qu'il est bon

Que tu saches aucun mestier,

Par quoy, se tu en as mestier,

5 Ton estat par honneur maintiengnes

Sanz ce qu'en dangier d'autrui viengnes;

Et toy qu'en dis?

PANTHALEON

Père, je sui cil qui touz dis

A vo vouloir faire m'assens.
 Vous savez, je n'ay pas tant sens 10
 N'engin si vray ne si entier
 Que je sache qui m'a mestier
 Si bien con vous.

LE PÉRE

Tu as dit voir, mon enfant douls.
 Pour ce le te diz j', or entens : 15
 Tu as assez aage et temps
 D'apprendre, et si as bon engin.
 Si j'en parle a maistre Morin,
 Vourras tu bien avec lui estre ?
 C'est des mires le meilleur maistre 20
 Que l'en sache en tout ce pais.
 Estre ne dois pas esbahis
 250 b De m'en respondre.

PANTHALEON

Oil voir; alez l'en semondre,
 S'il vous plaist, et si l'en touchiez. 25
 S'il me veult avoir, si sachiez
 Toute s'entente.

LE PÉRE

Tu dis bien, g'i vois sanz attente
 Et si n'y sejourneray point :
 Je le voy, c'est trop bien a point. 30

Plaise vous, sanz plus oultre aler,
 Maistre Morin, a moi parler,
 Je vous en pri.

MAISTRE MORIN

Voulientiers. Or ça, sanz detri,
 Que voulez dire? 35

LE PÉRE

Je vous demant, dites moi, sire,
 Se vous vouldriés a apprentiz

Prendre Panthaleon mon filz :
Dites oil.

MAISTRE MORIN

40 Vostre filz? et quel aage a il?
Dites le moy.

LE PÉRE

Maistre Morin, foy que vous doy,
Il a plus de quinze ans passez.
Il est biau valeton assez
45 Et bien appert.

MAISTRE MORIN

Se tel cen vous dites m'appert,
Sire, volentiers le prendray.
Mais s'il vous plaist, je le verray
Tout avant euvre.

LE PÉRE

50 La veue le voir en descuevre,
Et vous ne dites que raison.
Venez ent jusques en maison :
Vous le verrez.

MAISTRE MORIN

Alons, ja desdit n'en serez
55 De ma partie.

250 c

LE PÉRE

Panthaleon, chiére espartie,
Biau filz, faites ce seigneur cy,
Quant li plaist estre venuz cy
Pour vous veoir.

PANTHALEON

60 D'onneur vous veuillent pourveoir
Noz diex, chier maistre.

MAISTRE MORIN

Ore, biau filz, voulez vous estre
Volentiers mire?

PANTHALEON

Ce qui plaira mon père, sire ;
A li en est. 65

MAISTRE MORIN

Pour ce que le voi gent et net,
Sire, volentiers le prendray
Et le mestier li apprendray
Parfaitement, s'en li ne tient.
Mais je vous di bien qu'i convient 70
Qu'il me serve set ans entiers,
Et dix livres de voz deniers
Avoir avec.

LE PÈRE

Je vous paieray d'argent sec
Volentiers. Or l'en amenez 75
Et vous pri que li apprenez
Le fait de degré en degré
Si que je vous en sache gré.
Mais je vouray, ne vous ennuit,
Qu'avecques moy chascune nuit 80
Viengne jesir.

MAISTRE MORIN

Soit, puis que vous vient a plaisir,
De ce ne vueil plus barguignier.
Or ça, biau filz, alons gaignier.

Yci endroit en ceste place 85
Nous fault du jour estre une espace
Savoir s'aucune ame y venra
Qui affaire de moy ara
Par quelque voie.

250 d

PANTHALEON

Maistre, j'ay de faire grant joye 90
Vostre vouloir.

MAISTRE MORIN

Or ne met pas en nonchaloir,

Quant tu besoingnier me verras,
 De regarder con tu feras
 95 Soit d'une plaie descouvrir,
 Soit de la laver et ouvrir,
 Soit de mettre y emplastre ou tente
 Et de la lier : la t'entente
 Aies et l'ueil.

PANTHALEON

100 Maistre, de ce point ne me dueil
 Que vous me dites.

LE VOISIN

Maistre Morin, pour estre quittes
 De ce que je vous ay promis
 Vous viens je querre, chiers amis.
 105 Ne vous voi ci que besongnier :
 Alons men sanz plus eslongnier,
 Par fine amour.

MAISTRE MORIN

Panthaleon, sanz plus demour
 Faire, va t'en jusqu'a demain.
 110 Mais reviens icy assez main,
 Car j'y seray.

PANTHALEON

Vostre conmandement feray,
 Maistre, c'est droiz.

HERMOLAUS, PRESTRE

Or regardez en touz endroiz
 115 Un enfant bien moriginé.
 A Dieu puist il estre donné!
 Herippé, et vous, Ypocras,
 Regardez le venir le pas :
 Qui est il ore ?

YPOCRATES

120 Pére, il est filz a Eustore
 Le senateur.

HERIPPÉ

251 a Pleust a Dieu le createur
 Qu'il eust telle congnoissance
 Qu'il eust guerpi mescreance
 Pour nostre loy. 125

HERMOLAUS

Ha ! doulx Jhesu, souverain roy,
 Noblement l'ariez embelli.
 Je vueil un po parler a li.
 Biau filz, ça venez un petit :
 J'ay de parler grant appetit 130
 A vous sanz doute.

PANTHALEON

Sire, volentiers gens escoute
 Anciens parler conme vous.
 Que me direz vous, sire doulx,
 Que j'aye a gré ? 135

HERMOLAUS

Filz, je vous demande en secré
 Le vostre nom.

PANTHALEON

L'en m'appelle Panthaleon,
 Filz Eustore.

HERMOLAUS

Biau filz, je vous demans encore 140
 Sanz plus quel Dieu vous aourez,
 Et pour quel bien vous labourez
 En li servir.

PANTHALEON

Sire, les biens que desservir
 Poons de servir a noz diex 145
 Sont moult grans, ce dit on, mais quiex ?
 Je n'en sui pas ore recors.
 Mais plusieurs diex, ce vous recors,
 Conme ceulx par qui sommes né,
 Par qui le monde est gouverné 150

Et par qui les choses ont fin,
Ceulx croy j'et aour de cuer fin
A mon pouoir.

HERMOLAUS

Es tu de nul mestier? Le voir
155 Me vueilles dire.

PANTHALEON

Oil : apprentiz sui a mire, 251 b
N'a pas granment.

HERMOLAUS

Biau filz, je te dy vraiment,
160 Toy et touz ceulx qui en telx diex
Croient, soient jounes ou viex,
Et qui ont jusques ci creu
Sont si malement deceu
Qu'i se dampnent et corps et ames,
Soient hommes ou soient fames.
165 Car tu doiz tenir et savoir
Qu'il n'est qu'un Dieu, saches de voir,
Qui nous a faiz et deffera
Et après nous refformera
Noz propres corps

PANTHALEON

170 Et conment nous sera il lors?
Biau sire, dites.

HERMOLAUS

Es cieulx conme sains esperites
Aront les bons leur mansion;
Les mauvais a dampnacion
175 Pardurable en enfer pour lors
Seront en ames et en cors.
Croy, biau filz, que pas ne te mens
La soufferront divers tourmens
Dont nul ne peut dire la somme,
180 Et a bon droit, car Diex a homme
Tant amé, la seue mercy,

Que des cieulx en ce monde cy
 Vint prendre en vierge char humaine,
 Et pour oster homme de paine
 Souffri en croiz péine mortel : 185
 Si li devons bien faire autel
 Se nous voulons sa gloire avoir.
 Mais tant te fas je bien savoir
 Qu'a celle gloire nul ne vient
 Se ceste creance ne tient 190
 Qu'après sa mort monta es cieulx,
 Vrais Diex, vraiz homs, et homs vrais Diex
 Est regnans en gloire celestre ;
 251 c Mais aussi te vueil je promettre
 Que se tu as en lui creance 195
 Il te donrra telle puissance
 Que de trestoutes maladies
 Gueriras, mais que dessus dies :
 « Ou nom Jhesu », faisant ce signe
 De croiz, sanz autre medicine 200
 Ny herbe mettre.

PANTHALEON

Vous serez mon pére et mon maistre
 Dès ore mais, et vous croiray,
 Et ceste creance tenray.
 Certes volentiers vous escoute, 205
 Mais aler m'en fault, car je doubte
 Trop demourer.

HERMOLAUS

Biau filz, Dieu vous vueille honorer.
 Alez a Dieu.

L'ENFANT

Haro ! ou iray n'en quel lieu ? 210
 Ce serpent grant a desmesure
 Semble qu'il mette peine et cure
 A moy prendre, et qu'ailleurs ne bée.

Las ! vez le cy gueule baée
 215 Ou me suit pour moy transgloutir.
 Mahon, veuillez me garantir
 De mort villaine !

PANTHALEON

Ce mau serpent forment se paine
 De cel enfant la devourer,
 220 Dont le fait de paour plourer
 Et le met forment en esmay.
 Je croy que je vueil faire essay
 S'en pourroit estre despeschié
 Par le Dieu dont m'a tant preschié
 225 Ce bon prestre Hermolaus.
 Prier le vueil. Trespoulx Jhesus,
 Qui souffris mortel passion
 Pour l'umaine redempcion,
 Si conme Hermolaus le dit,
 230 Sire, je te pri sanz respit,
 Se tu puez, ceste beste livre
 A mort et l'enfant faiz delivre
 Qui de paour a grant effrois,
 Par la puissance de ta crois
 235 Que faire vueil sur ceste beste,
 Qui est hideuse et deshonneste.
 Ou nom de Jhesu, beste fiére,
 Requier que mort en toy se fiére
 Qui te cravante.

251 d

L'ENFANT

240 N'ai mestier que plus me demente,
 Mais que com joieux me deporte.
 Car je voi que la beste est morte,
 Qui si me suivoit pour mengier.
 Or sui je hors de son dangier :
 245 Joyant m'en vois.

PANTHALEON

Ha ! trespoulx Jhesus, s'a ma vois

Et au signe que j'ay si fait
 De ta crois as donné de fait
 Vertu de ceste beste occire,
 Que puis je de ton pouoir dire? 250
 Sire, loez soit ton saint nom!
 Certes il n'est Diex se toy non.
 Touz autres diex pour toy reny
 Et de mon cuer hors les bany.
 Baptizier me vois faire errant. 255

Pére, je vien a vous courant.
 Baptisez moy, ce vous requier,
 Pour mon sauvement que je quier
 Et que vueil faire.

HERMOLAUS

Biau filz, en ce ne peuz meffaire, 260
 Et j'en ay grant joie pour voir.
 Mais qui te muet? di m'en le voir,
 Se Dieu t'aïst.

PANTHALEON

Ne m'avez vous promis et dit
 Que s'estre vueil crestienné 265
 Mire devenray si sené
 Qu'il ne sera mal quel qu'il soit,
 Se de ma main cure reçoit,
 Que je ne garisse et affine
 Sanz mettre quelque medicine, 270
 Mais qu' « ou nom Jhesu » seulement?
 Vous le m'avez dit vraiment :

252 a

Dont n'avez mie?

HERMOLAUS

Oil, par la vierge Marie,
 Et je croy tu le prouveras, 275
 Après que crestien seras;
 N'en doubtez point.

PANTHALEON

Je l'ay ja prouvé par un point
 Que je vous vueil cy diviser :
 28c Ne scé con m'en poy adviser.
 Ainsi conme orains m'en aloie,
 Je trouvay la en celle voie
 Un hideux serpent qui suivoit
 Un enfant qu'estrangler vouloit;
 285 Et me fu advis qu'il le tint ;
 S'en oy pitié. Lors me souvint
 De ce que m'aviez enseignié,
 Si que le serpent j'ay seigné
 En priant Jhesu qu'il morust,
 290 Par quoy a l'enfant secourust ;
 Et le serpent isnel le pas
 Morut ilec, n'en doubtiez pas,
 Et l'enfant tout sain s'en ala,
 Si que quant j'ay veu cela,
 295 Je di : Jhesu Crist c'est celi
 Qui est vrais Diex, et pour c'en li
 Creans vueil estre.

YFOCRATES

Pére, loons le roy celestre,
 Quant, pour attraire a sa creance
 300 Cest enfant ci, a sa puissance
 Ainsi moustrée.

HERIPPÉ

A ce que miex la chose oultrée
 Soit, pére, faites nous savoir
 Comment il puist baptesme avoir :
 305 C'est de raison.

HERMOLAUS

252 b

Comment? sanz point d'arrestoison
 Au moustier saint Pol le menrons
 Et la baptesme li donrrons.
 Ça, alons ment.

LE PÈRE

Je suis esbahiz malement 310
 En quel lieu mon filz tant se tient
 Que vers moy ne va ne ne vient,
 Ne ne fist puis que je le mis
 Apprentiz. Par chiez ses amis
 S'il y seroit point vois savoir. 315
 Bien mal me fait, a dire voir,
 Quant si longuement l'ay perdu :
 Le cuer me fait tout esperdu.
 Gomas, bon jour vous doint Mahom.
 Ne savez de Panthaleon 320
 Dire nouvelle?

GOMAS LE COUSIN

Nanil, par Dyanne la belle
 Que nous aourons conme deesse.
 Pour quoy le dites, cousin? Qu'est ce?
 A il que bien? 325

LE PÈRE

Par Mahom, cousin, n'en scé rien :
 Ne le vi, il a set jours hui,
 Dont j'ay au cuer dueil et annuy,
 Ne je ne scé ou je le quiére.
 Je m'en revoys par cy derrière 330
 Chiez son maistre Morin le mire,
 Pour savoir s'il m'en sara dire
 Nouvelle aucune.

GOMAS

Non ferez, car il est pour une
 Cure faire alé jusqu'au Pas, 335
 Si que, cousin, n'y alez pas :
 Vous museriez.

LE PÈRE

Haa! par ce point vous me feriez

340 Estre hors de doubte. cousin,
Car je pense qu'en ce chemin
L'ait mené; pour ç'attenderay
Son retour et si m'en yray,
Tarde que tarde.

252 c

GOMAS

345 Chier cousin, alez a la garde
De touz noz dieux.

HERMOLAUS

Ore, Panthaleon biau fiex,
Puis que vous baptesme avez pris
Et que la foy vous ay appris
Qui appartient a crestien,
350 Dès ores mais gardez la bien
Et quanque pourrez l'essaussiez,
Ne pour chose ne la laissiez
C'on vous tourmente.

PANTHALEON

Sire, ce n'est mie m'entente,
355 S'il plaist a Dieu.

HERMOLAUS

Or en ralez en vostre lieu :
Fait avez ci assez demour.
Diex vous doint sa grace et s'amour :
Priez pour moy.

PANTHALEON

360 Voulentiers, et vous, ce vous proy,
Pour moy aussi.

YPOCRATES

Dieu le face par sa merci
De gloire digne.

HERIPPÉ

365 Celle qui est des cieulx royne
Li vueille estre dame et amie.

Si ne faudra a grace mie
Amour de Dieu.

LE PÈRE

Filz, dont viens tu, ne de quel lieu?
Elas! tu m'as bien empeschié
De dueil, si as fait grant pechié. 370
J'ay ci musé pour toy touz jours.
Au mains me dy ou ces huit jours
Demouré as.

PANTHALEON

252 d Père, ne vous courrouciez pas.
Mon maistre un homme pris avoit 375
En cure, lequel il devoit
Garir dedans dix jours ou mains.
Si y a si bien mis les mains
Qu'il l'a tout gari et curé.
Pour ç'avons nous tant demouré, 380
Car de sa maison ne partismes
Jusqu'a tant que nous en venismes
Hier puis dynée.

LE PÈRE

Mal fu sa personne onques née.
Onques mais que je sache n'oy 385
Tant de courrouz ne tant d'annoy
Jour de ma vie.

PANTHALEON

Père, si a esté folie.
Or laissons ester ce parler.
A mon maistre m'en vueil raler 390
Sanz plus attendre.

LE PÈRE

T'en vas tu? or pense d'apprendre
Bien ton mestier.

PANTHALEON

Si feray j', il m'en est mestier.

395 Maistre, je vous salu, c'est drois,
Com cil qui sui en touz endroiz
Vostre sujet.

MAISTRE MORIN

Panthaleon, moult bien vous siet
A saluer, par Mahonmet,
400 Et a parler, dont moult bel m'est.
Ne vous vi mais il a huit jours.
Ou avez puis esté touzjours
A verité?

PANTHALEON

Sire, mon pére a acheté
405 Hors de la ville un heritage
Ou il appartient grant gaingnage,
Et pour ycellui pourveoir
L'avons ensemble esté veoir.

Or le savez.

MAISTRE MORIN

253 a

410 S'a Mahon plaist, bien fait avez.
Ore pour ta science accroistre,
Il te fault les herbes congnoistre
De quoy tes oingnemens feras
Quant tu de moy parti seras.

415 Biau filz, c'est une.

PANTHALEON

Maistre, j'en congnois bien aucune :
Je congnois ortie et sarfueil,
Persil, macidoine et milfueil ;
Et si congnois moult bien cresson
420 Olenois, voire, et seneçon,
Tenasie, coq, lis et mente,
Moron, plantin et une gente
Fueille qui est nommée doque.
Ne cuidez pas que je vous moque :
425 Toutes ceus cy congnoys je bien,
Et avec ce langue de chien

Quant je la voy.

MAISTRE MORIN

Panthaleon, biau filz, avoy !
 S'a point les savoies bien mettre
 Dygne seroies d'estre maistre. 43
 Or te diray que tu feras :
 D'aucunes cueillir m'en yras,
 Et je te mousterray conment
 Tu en feras bon oingnement
 Au retourner. 435

PANTHALEON

Maistre, g'i vois sanz sejourner :
 Si tost conme diné aray,
 Assez vous en apporteray.
 E! doulx Jhesu Crist, roy celestre,
 Sire, plaise toy qu'il puist estre 440
 Que mon père soit a ta loy
 Converti aussi conme moy !
 Pour son sauvement le desir.
 Sire, ce soit ton saint plaisir,
 Si com c'est le mien, tu le scez. 445

Je viens, père. Est diner passez ?
 Vieng je trop tart ?

253 b

LE PÈRE

Nanil, filz, se Mahon me gart :
 Assez estes venuz a point.
 Ceens ne dinerons nous point. 450
 Nous yrons diner chiez le page,
 Qui le nous fera a l'usage
 De son pais.

PANTHALEON

J'ay long temps esté esbahiz,
 Et suis encore, sachiez, sire, 455
 D'une chose que vous vueil dire,
 Pour quoy est ce qu'adès seant

Voy l'un des dieux et l'autre estant,
 Ne le seant estant n'est point,
 460 Ne l'estant ne siet? de ce point
 Ay admiracion trop grande
 Que ne siet cilz, ce vous demande,
 Et cilz ne liève.

LE PÈRE

Ta question est fort et griève :
 465 Par mon salut, je ne cuît mie
 Qu'en ceste ville ait homme en vie
 Qui ce point te sceust espondre.
 De ma part ne t'en scé respondre,
 Car en ce ne me congnois goute ;
 470 Mais tu m'as mis en telle doubtte
 Que jamais pour ceste raison
 N'iert que je n'aye soupeçon
 Qu'i ne soient mie vrait diex,
 Car ilz sont, ce voi j'a mes iex,
 475 Telx com tu dis.

L'AVUGLE

Elas ! conme est povre et mendis
 Et desconfortez qui ne voit !
 Il n'a bien ne joie ou qu'il voit
 Et si chiet en grant desconfort.
 480 Ha ! Mahon, qui saroit com fort
 Il m'ennuie, il s'esbahiroit
 Et de moy grant pitié aroit.
 Quant me recors et me remembre
 Que je ne souloie avoir membre
 485 Qui ne fust sain conme une pomme,
 Et je sui ore si povre homme 253 c
 Que je ne me voy ou conduire,
 Est il rien qui tant me peust nuire ?
 Nanil, sanz doubtte.

PANTHALEON

490 Biaux amis, un petit m'escoute.

Tu te complains et te lamentes
 Et trop malement te dementes
 Pour ta veue, ne m'en merveil.
 Se croire vouloies conseil,
 Encor la pourras tu ravoïr 495
 Et aussi clérement veoir
 Conme onques fis.
 L'AVUGLE
 Sire, soiez certains et fis
 Qu'il n'est riens que je ne feïsse
 Pour recouvrer le benefice 500
 De ma veue.
 PANTHALEON
 En l'heure te sera rendue,
 Se laisser veulz la loy paienne
 Et prendre la foy chrestienne :
 Bien dire l'ose. 505
 L'AVUGLE
 Ne me fault il faire autre chose
 Pour la ravoïr?
 PANTHALEON
 Saches, biau frère, nanil voir.
 Dès si tost com tu aras dit
 De cuer : Je croy en Jhesu Crist, 510
 Bien te sera.
 L'AVUGLE
 Dès maintenant dont ce sera.
 Doulx Jhesu Crist, et près et loing,
 A vous croire et servir me doing
 Conme vray Dieu, filz Dieu le père : 515
 Sire, par ceste foy m'appére
 Qu'estes vraiz Diex.
 PANTHALEON
 Sueffre : je vueil touchier tes yex.
 Sire, a qui le costé fendi
 Longis l'avugle un venredi, 520

Dont il yssi et yaue et sanc 253 d
 Qui coula de vostre saint flanc,
 Sur ses mains, et si bel ouvra
 Que sa veue recouvra,
 525 Pour quoy il vous cria merci,
 Sire, aussi a cest homme ci
 Rendez la veue en ceste voie,
 Par quoy chascun congnoisse et voie
 Que sur touz estes seul vraiz Diex.
 530 Frère, euvre ou nom Jhesu tes yex
 Et cler en voies.

L'AVUGLE

Touz mes pleurs sont muez en joies,
 Car je voy tresparfaitement,
 Dont Jhesu mercy haultement ;
 535 Car puis qu'il m'a fait ceste grace,
 Sire, je vueil sanz plus d'espace
 Baptesme avoir.

LE PÈRE

Or puis je clérement savoir
 Que noz diez n'ont nulle maistrie,
 540 Mais que c'est fole ydolatrie
 Que de les com diex honnourer.
 Jhesu seul doit on aourer.
 Panthaleon, or voi je bien,
 Filz, que vous estes crestien.
 545 Si feray je, ce vous denonce.
 A la loy paienne renonce
 Dès cy endroit.

PANTHALEON

Certes, pére, vous avez droit,
 A brief parler.

L'AVUGLE

550 Sire, pour Dieu, pensons d'aler
 La ou baptesme recevray,
 Car ne mengeray ne buvray

Paien jamais.

LE PÈRE

Aussi ne feray je moy, mais
 Que celui trouver puisse a point 555
 Qui les gens baptise et enoint
 De l'huile sainte.

254 a

PANTHALEON

Je vous menray a tel qui mainte
 Foiz celle sainte office a fait,
 Qui est catholique parfait. 560
 Suivez moy.

Hermolaus père,
 Qu'en vous la Dieu grace s'appère.
 Parlez a nous.

HERMOLAUS

Panthaleon, que voulez vous,
 Mon enfant chier? 565

PANTHALEON

Père, sanz vous longues preschier
 De cest homme, sachez sans doubté,
 Que maintenant ne veoit goute,
 Dont malement se dolosoit,
 Quant je li dis que s'il vouloit 570
 Croire en Jhesu Crist, voire, et prendre

Crestienté, que sanz attendre
 Aussi cler verroit qu'il fist onques,
 Et il s'i assenti; adonques
 En seignant li touchay les yex, 575
 Dont il voit aussi bien ou miex
 Conme il fist onques, Dieu merci.

Mon père, qui a ce fait ci
 Veu, s'en est si merveilliez
 Qu'il est, sire, touz conseilliez
 Qu'il se veult de la loy demettre 580
 Sarrazine et crestien estre;

Pour ce vient ci.

HERMOLAUS

Doulx Jhesu Crist, je vous graci,
 585 Quant ainsi vous plaist a ouvrer.
 Or ça, seigneurs, pour recouvrer
 Grace qui voz pechiez destruisse
 Et qui droit a Dieu vous conduise,
 Puis que c'est vostre voulenté,
 590 Venez prendre crestienté
 Ou vous menray.

L'AVUGLE

Sire, volentiers le feray
 De moye part.

LE PÈRE

595 Sy feray je, car il m'est tart
 Que l'aie eu.

254 b

UN HOMME CONTRAIT

Las! se le cuer ay esmeu
 A dueil faire j'ay bien raison,
 Quant ne scé de quelle achoison
 Ceste maladie me viengne,
 600 Que je n'ay pié qui me soustiengne,
 Ains me fault tenir deux eschaces
 Et mon corps trainer par les flaches
 Se je vueil nulle part aler.
 Helas! on ne soloit parler
 605 De bel homme se de moy non.
 Or ay du tout perdu ce nom,
 Car contrait sui et mehaingniez,
 Ha! maistre Morin, bien veigniez:
 Chiez vous m'en aloie tout droit.
 610 Pourroit il estre en nul endroit
 C'on peust garison avoir
 De tel mal com j'ay, pour avoir,
 Et estre sain?

MAISTRE MORIN

Une demande fais en vain :
 Je ne scé ; mais que souffrir puisses 615
 Que tes jambes taste et tes cuisses,
 Je t'en diray tantost le voir
 Se jamais garison avoir
 Pourras ou non.

LE CONTRAIT

Maistre, or y gardez : que Mahon 620
 Vous doint's'amour.

MAISTRE MORIN

Je lé te feray sanz demour
 Presentement.

LE CONTRAIT

Vous me blechiez trop malement
 Luec endroit, maistre. 625

MAISTRE MORIN

254 c La main n'i puis plus souef mettre,
 Je ne scé de quoy tu te plains ;
 Mais c'est le mal dont tu es plains
 Qui les nerfs t'a retrait sanz doubte.
 Je te di tu as une goutte 630
 Que nous appellons palasine,
 Contre laquelle medicine
 Nulle ne vault.

LE CONTRAIT

Elas ! ainsi donques me fault
 Mes jours finer? 635

MAISTRE MORIN

C'est voirs, et nient moins se finer
 Pouoies d'un cuer de fenis,
 Ton mal seroit du tout fenis
 Ligiérement.

LE CONTRAIT

Et n'est il riens qui autrement 640
 Me puist valoir?

MAISTRE MORIN

Nanil voir, car en nonchaloir
Tu l'as trop mis.

LE CONTRAIT

645 Las! or voy je que mes amis
Ay touz perduz en verité,
Puis que j'ay perdu ma santé:
N'est nulle doubtte.

MAISTRE MORIN

Garde bien qu'en toy ne se boute
Dueil quel qu'il soit.

LE CONTRAIT

650 Sire, de vous pren congié. Voit
Si com pourra !

MAISTRE MORIN

Espier vueil ou il yra :
Courrouciez est.

HERMOLAUS

655 Ore, biaux seigneurs, avis m'est
Que moult grant joie avoir devez
Du baptesme que vous avez,
Et que chascun est bien tenuz
D'amer Dieu. Or gardez que nulz
660 De ceste foy ne vous retraie
Pour biau parler qu'il vous retraie,
Ne pour menace.

L'AVUGLE

254 d

Pour chose c'on me die ou face,
Certes jamais n'aoureray
Aus ydoles, ne ne croiray.
665 Biau pére, a Dieu!

LE PÉRE

Pére, mais que viengne en mon lieu,
Je vous promet je destruiray

Quaque en maison en trouveray,
Soiez en fis.

L'AVUGLE

Sire, de vous et vostre filz 670
Pren congié. A Dieu vous conmans.
Es prières me reconmans
D'entre vous deux.

PANTHALEON

A Dieu ! amis, soiez bien preuz 675
A Dieu amer.

LE PÈRE

Mahom, Mahom, qui que blasmer
M'en doie, plus ne demourrez
Ceens; de la trebucherez.
Passez jus par male aventure :
Folz est qui en vous met sa cure. 680
Filz, fas je bien? Le chief li froisse,
Afin c'on ne le reconnoisse
Jamais nul jour.

PANTHALEON

Père, ne doit que deshonnour
Avoir tel dieu. 685

LE PÈRE

Biau filz, qui que le prengne a jeu,
Après le vueil porter noier,
Et d'ilec me vueil avoier
D'aler droit en Jherusalem
Ou le vray Dieu a grant ahan 690
Pour nous moru.

PANTHALEON

Père, vous a bien tant feru
S'amour au cuer?

LE PÈRE

Je ne cuide ja a nul fuer

695 L'eure veoir, a brief parler, 255 a
 Que meuz soie a y aler.
 Filz, mes biens et mon hostel garde,
 Car le mouvoir forment me tarde :
 A Dieu te di.

PANTHALEON

700 Pére, mie ne vous desdi,
 Mais au mains vous convoieray
 Ou avecques vous m'en iray,
 S'il vous agréé.

LE PÉRE

705 Pour ce que soit chose secrée,
 Filz, non ferez.

LE CONTRAIT

710 Elas! bien sui deshonnorez.
 Mon mal de jour en jour empire,
 Et si ne puis nulle part mire
 Trouver qui m'en sache guerir.
 Certes je vouldroie mourir
 Tout maintenant.

L'AVUGLE

715 Amis, c'est grant desavenant
 De la mort ainsi desirer :
 Ne savez vous considerer
 Autre confort?

LE CONTRAIT

Nanil, j'ay angoisse trop fort
 Et qui jamais ne prenra fin,
 Se me dient li medecin.
 Laissez m'en pais.

L'AVUGLE

720 Aussi ne cuiday je jamais
 Veoir, amis, n'a pas granment,
 Car les yex estains longuement

Avoie euz, point n'en veioie,
 Quant me trouva en plaine voie
 Un jonne home qui m'aproucha, 725
 Qui si tost qu'i les me toucha
 Il me gari tout nettement,
 Sanz emplatre ny oingnement
 Mettre y n'ointure.

255 b

LE CONTRAIT

Tant vous fist il plus belle cure. 730
 Helas! mon ami, qui est il?
 Ne scé s'il seroit si subtil
 Que de mon mal me garisist.
 Je feisse quanqu'il vouldist
 Certainement. 735

L'AVUGLE

Et je tieng et croy fermement
 Que de ce mal te garira
 Se tu fais ce qu'il te dira.
 Or t'en advise.

LE CONTRAIT

Quelque chose qu'il me divise, 740
 Je la feray.

L'AVUGLE

Donques je le t'enseigneray.
 Voiz tu la ce jonne homme estant?
 C'est celi, n'en soiez doubtant,
 Qui m'a gueri. 745

LE CONTRAIT

Aler m'en vueil donques a li
 Ysnel le pas.

MAISTRE MORIN

Mon ami, ne me mentez pas.
 Vous avez dit que la veue,
 Que vous aviez du tout perdue, 750
 Par cel homme avez recovré.

Comment a il sur vous ouvré ?
Dites le moy.

L'AVUGLE

Sire, volentiers, par ma foy :
755 Il me dist, se creire vouloie,
En Jhesu Crist, que je verroie ;
Et je du cuer m'y assenti
Et tantost sur mes yex senti
Son doit, dont croiz dessus me fist.
760 Onques autre chose n'y mist,
Si vi en l'eure.

MAISTRE MORIN

Il tient donques et si honneure
Crestienté ?

255 c

L'AVUGLE

C'est voirs, si fas j'en verité.
765 Dès si tost que poy regarder,
Baptiser me fis sans tarder
Et sui crestien.

MAISTRE MORIN

Va t'en : qu'il ne t'en soit doubt bien
Encor de pis.

LE CONTRAIT

770 Ha! sire, je qui sui despis
De touz pour ce que sui contrait
Et que li nerf me sont retrait,
Dont je palis souvent et taing,
Vueillez regarder mon meshaing
775 Et prendre en cure.

PANTHALEON

Se je te garis et te cure,
Laisseras tu la loy paienne
Pour tenir la foy crestienne
De cuer loyal ?

LE CONTRAIT

Certes oil, franc cuer royal,
Tresvoulentiers. 780

PANTHALEON

Or te deslie : endementiers
M'avisera.

LE CONTRAIT

Sire, voulentiers le feray.
Deslié sui. 785

PANTHALEON

Or entens : ou nom de celui
Qui est appellé Jhesu Crist,
Qui des propheties l'escript
Tout acomplit et affina,
Quant en la croiz pour nous fina, 790
Soies tu beneiz et seigniez
Et de tes membres meshaingniez
Gariz a plain.

LE CONTRAIT

Or ne me dueil je mais ne plain
255 d Ne de mal ne sui agrevez. 795
Vez me ci sur mes piez levez.
Sire, se je vous lo j'ay droit,
Quant sur moy avez cy endroit
Fait si biau fait.

PANTHALEON

Mon ami, ce n'ay je pas fait : 800
Ç'a fait Jhesu, le roy de gloire,
Que tu doiz aouer et croire :
Promis li as.

LE CONTRAIT

Sire, ne li mentiray pas.
Je m'en vois faire baptiser 805
Pour ma conscience appaiser.
A Dieu, chier sire!

PANTHALEON

A Dieu, amis, qui te gart d'ire !

Prie pour moy.

LE CONTRAIT

810 Sire, volentiers : je le doy
Certes bien faire.

MAISTRE MORIN

Ma science ne mon affaire
Ne vault mais rien en ce pais,
Dont je sui forment esbahiz.
815 Lonc temps a que je ne fis cure;
N'est nulz qui ait mais de moy cure.
Chascun a Panthaleon cuert,
Et chascun garist et secuert.
J'en ay grant dueil et grant envie.
820 Ma chevance pers et ma vie,
Mais la seue li feray perdre,
S'a point puis l'empereur aherdre.
Je m'en vueil a sa court aler
Savoir s'a li pourray parler :
825 Je le voy la, c'est bien a point.

Mon chier seigneur, Mahon vous doint
Honneur sanz fin.

L'EMPEREUR

Bien veigniez vous, maistre Morin.
Quel vent vous boute ?

MAISTRE MORIN

256 a

830 Mon seigneur, vous l'orrez sans doubte.
Sachez qu'il a en ceste ville
Un jonne homme qui par sa guille
Fait aux gens despiter noz diex,
Et pour ce qu'il les puisse miex
835 Attraire a la loy de Jhesum
Qui fu pendu conme larron,
Les avugles fait veoir cler

Et les contraiz fait droit aler,
 Aux mehaigniez leurs maux tarist
 Si qu'il semble qu'il les garist. 840

Au mains congnois je bien l'avugle
 Qui ne veoit rien plus qu'un bugle,
 Qui voit bien con vous maintenant.
 Sire, je vous le di pour tant
 Que s'ainsi le laissez durer, 845
 Je doubt qu'en la fin endurer
 N'en faille ennuy.

L'EMPEREUR

J'en venray a chief au jour d'uy.
 Alez vous deux avecques li,
 Et tu leur monstreras celi 850
 Qui a esté enluminez,
 Et tantost si le m'amenez
 Ci en present.

MAISTRE MORIN

Sire, de cuer tout me present
 A vostre vueil. 855

FAGOT PREMIER SERGENT

Alez devant, je le conseil ;
 Nous vous suivrons.

DEUXIESME SERGENT

Il dit bien; voirement ferons.
 C'est le meilleur.

MAISTRE MORIN

E gardez : vez le la, seigneur. 860
 Alez le prendre.

PREMIER SERGENT

Ça, maistre, il vous fault sanz attendre
 Venir a l'empereur bonne erre,
 256 b Qui par nous vous envoie querre;
 C'est sanz mentir. 865

L'AVUGLE

Alons, seigneurs, sanz alentir.
Je suis tout prest.

DEUXIESME SERGENT

Sire, vezci qui venuz est
A vostre mant.

L'EMPEREUR

870 Bien est. Amis, je te demant,
Es tu cil qui granment esté
As sans veoir? Di verité
Hardiement.

L'AVUGLE

875 Oil, mon seigneur, vraiment,
Je sui celi.

L'EMPEREUR

Or me respons : qui t'a gari
Si que tu vois?

L'AVUGLE

880 Jhesu Crist, vray Diex et vray roys,
Qui de nient a fait tout le monde,
Celui qui justiffie et monde
Les pecheurs, cil que toute gent
Doivent croire, par son sergent
Qui nommez est Panthaleon,
885 M'a gari. Si est bien raison
Que ceste bonté recongoisse
Et que sa loenge j'acroisse
A mon pouoir.

L'EMPEREUR

Donques a ce que puis veoir
Tu es crestien?

L'AVUGLE

890 C'est voirs; autrement comme un chien,
Sire, vivroie.

L'EMPEREUR

Garde que ci plus ne le voie.
 Je te conmant si con m'as chier
 Que le chief li voises tranchier
 Aus champs la hors.

895

256 c

PREMIER SERGENT

Sire, volentiers, et dès lors
 Que j'aray fait ci revenray.

Sa, maistre, assez tost vous feray
 Taire tout coy.

L'AVUGLE

Amis, puis que je scé pour quoy
 Tu me maines pour mettre a fin,
 J'en loe Dieu et de cuer fin
 Le te pardoing.

900

PREMIER SERGENT

De tel pardon n'ay pas besoing.
 Avant : a genoulz vous mettez.
 Morir vous fault ci, n'en doubtez ;
 Ce vous promet.

905

PANTHALEON

Ce crestien qu'a mort on met
 Me fait pitié, n'est pas merveille,
 Et ce tirant s'i appareille
 De grant manière.

910

PREMIER SERGENT

Estens le col, baisse la chiére :
 Tien, vas, maishui n'en aras mains.
 Jamais ne de piez ne de mains
 Ne s'aidera.

915

PANTHALEON

Amis, dites : qui vous donrra
 Vostre vin, souffrerez vous bien
 C'on emporte ce crestien
 Pour mettre en terre

PREMIER SERGENT

920 De ce que me venez requerre
 Convenroit qu'il fust fait secré ;
 Mais qu'aray je s'a vostre gré
 Vous lais ce corps ?

PANTHALEON

Je vous donray, ce vous accors,
 925 Quatre florins.

PREMIER SERGENT

Mais qu'ilz soient d'or, bons et fins.
 A quant paier ?

PANTHALEON

En l'eure, pour vous appaier :
 Tendez la main.

256 d

PREMIER SERGENT

930 Or le prenez hui ou demain,
 Quant vous plaira.

PANTHALEON

Je vois querre qui m'aidera
 A l'emporter.

PREMIER SERGENT

Et je compagnie porter
 935 Vois l'emperére.

PANTHALEON

Amis, se m'amour avez chiére,
 Je vous pri, aidiez m'un tantet
 A mettre en sauf ce corps qui est
 Pour la foy Jhesu Crist martir.
 940 Ennuit le pense ensevelir
 Et mettre en terre.

LE CONTRAIT

Voulientiers, sire, alons bonne erre :
 Que vous soiez le bien venuz !
 A vous plus qu'a nul sui tenuz,
 945 Bien m'en souvient.

PANTHALEON

Or ça : porter le nous convient
En cel anglet.

LE CONTRAIT

Sus de la, sus. Sire, il y est ;
Voulez plus rien ?

PANTHALEON

Nanil, amis, il est moult bien. 950
A Dieu alez !

MAISTRE MORIN

Sire, se vous ne conmandez
Prendre Panthaleon de fait,
De vostre emprise n'avez fait
Chose qui vaille. 955

L'EMPEREUR

Entre vous deux, comment qu'il aille.
Alez et si le m'amenez,
257 a Et gardez que ne revenez
Sanz li vers moy.

DEUXIESME SERGENT

Sire, a voz grez faire m'ottroy. 960

Alons, compains, nous deux ensemble :
Penses tu point ou il te semble
Que le truissons ?

PREMIER SERGENT

Je cuit se nous en alissons
La ou gist le crestien mort, 965
Nous le trouverions : c'est mon sort.
Or y alons.

DEUXIESME SERGENT

Soit. Ho ! de li plus ne parlons :
Je le voi venir ça avant.
Contre li m'en vois au devant. 970

Panthaleon, ne scé plus dire,
Venir vous fault sanz contredire
A l'empereur.

PANTHALEON

975 En bonne heure soit ce, seigneur;
Si y alons.

DEUXIESME SERGENT

Mon seigneur, nous vous amenons
Panthaleon.

L'EMPEREUR

980 Es tu ce qui mire es si bon
Que les avugles renlumines
Sanz mettre y nulles medicines,
Et les contraiz aussi redresses,
Et toutes maladies cesses
Par paroles tant seulement?
Dy me voir, se Mahon t'ament,
985 Quelles sont elles?

PANTHALEON

990 Sire, elles sont plaisans et belles,
Car elles sont du doulz Jhesu,
Homme et Dieu, qui de l'ort palu
D'enfer par sa mort nous retrait,
Afin qu'en gloire feussions trait
Avec son pére.

L'EMPEREUR

257 b

Il convient qu'autrement m'appére
Ce que tu dis; point ne l'entens.
Di moy a quelle fin tu tens
Plus en appert.

995

PANTHALEON

Je di que tout homme se pert
Et se met a dampnacion
Qui a foy ny entencion

A autre dieu qu'a Jhesu Crist,
 Car il est de lui seul escript, 1000
 Puis qu'a ce dire sui meuz :
Videte quod ego solus
Et non sit deus preter me :
 Entre vous, de qui diffamé
 Sui par ignorance de foy, 1005
 Veez qu'autre dieu n'est que moy.
 Pour quoy? car il est dit après
 En ce lieu mesmes par exprès :
 J'occiray et vivre feray,
 Je naverray et gariray, 1010
 Et si n'est nul, au paraler,
 Qui de ma main puist eschaper.
 Et pour ce vous debvriez soubzmettre
 A lui, sire, et crestien estre
 Pour vous sauver. 1015
 L'EMPEREUR
 Il te faudroit bien miex prouver
 Qu'il soit vraiz diex.
 PANTHALEON
 Or le faisons, s'il vous plaist, miex :
 Faites venir ci en present
 Quelque malade ou mort present 1020
 Et soit tenu sanz detrier
 Pour dieu celui qui par prier
 Ou le malade garira
 Ou le mort resuscitera,
 Soit le dieu ou plus vous fiez 1025
 Ou Jhesus le crucifiez
 Lequel j'aour.
 L'EMPEREUR
 257 c Vas me querre, vas sanz demour
 Les prestres a noz dieux servans.
 Qu'a moy viegnent tost, ce leur mans 1030
 Et les em pri.

DEUXIESME SERGENT

Mon seigneur, je vois sanz detri.

Seigneurs, je vous truis bien a point,
Venez vous ent sanz tarder point

1035 A l'emperière.

PREMIER PRESTRE

Yci ne fault mie prière,
Mais qu'il conmande.

DEUXIESME PRESTRE

Grant joie ay de ce qu'il nous mande.
Alons pour faire son vouloir :

1040 Nous n'en pouons que miex valoir.
Avant, passez.

PREMIER PRESTRE

Mon seigneur, ne scé que pensez,
Qui si en haste nous mandez :
Vez nous ci, sire; or conmandez
1045 Vostre plaisir.

L'EMPEREUR

C'est mon vouloir et mon desir
Que cel homme que voy la courbe
Facies ci avec vous en tourbe
Venir bonne erre.

PREMIER SERGENT

1050 Mon chier seigneur, je le vois querre.
Bon homme, sanz vous ci tenir
Il vous fault jusques ça venir.
Or faites brief.

LE COURBE HOMME

1055 Amis, le haster m'est moult grief.
Alez devant, je vous suivray
Tout le plus tost que je pourray
Voire a mon aise.

L'EMPEREUR

Seigneurs, je vous pri qu'il vous plaise
 De cuer aux ydoles prier
 Que cel homme sanz detrier 1060
 257 d Vueillent garir, a celle fin
 Que Mahom, voire, et Apolin
 Et noz autres diex aourés
 Soient de ceulz et honnourés
 Qui les vitupérent et blasment 1065
 Com dyables et les diffament
 Cy devant moy.

PREMIER PRESTRE

Sire, nous en ferons nous doy
 Maintenant quanque en pourrons faire
 Conme ordenez a tel affaire. 1070
 Berith, mon dieu, de ta puissance,
 Sire, nous faiz cy demonstrance :
 Par ta bonté, par ta largesce,
 Cest homme garis et redresce
 Si que ce peuple ait achoison 1075
 Et nouvelle cause et raison
 De toy loer et aourer,
 De toy servir et honnourer
 Conme vray dieu.

DEUXIESME PRESTRE

Mon dieu Astaroth, de cuer pieu 1080
 Soiez a ma priére enclin,
 Et vous, Mahom, et Apolin,
 Devotement vous pri mercy :
 Monstrez vostre puissance cy
 Et garissez la maladie 1085
 De cest homme, afin que l'en die
 Et croye l'en par verité
 Qu'en vous a vraie deité
 Sanz fin regnable

L'EMPEREUR

1090 Vostre prière est po valable,
Seigneurs, a ce que je voy ci.
Panthaleon, or prie aussi
Ton Dieu, si verrons qu'il fera,
Se ce contrait cy garira
1095 Ou non par toy.

PANTHALEON

Doulx Jhesu Crist, si com je croy
Que pour ce que tu te livras
A mort, d'enfer nous delivras 258 a
Et pour c'en ce monde venis
1100 Et, toy Dieu, homme devenis
Et preis humaine nature,
Ceste contrainte creature
Pour ta sainte foy essaucier
Vueilles garir et redrecier
1105 En present, que ces gens le voient,
Par quoy conme vray Dieu te croient
Et reconnoissent.

LE COURBE HOMME

Les os m'estendent et me croissent :
Je croy que je me vueil drescier.
1110 Seigneurs, bien me doy esleescier :
Gari me sens par tout le corps.
Certes au Dieu croire m'accors,
Panthaleon, que vous creez,
Et si dy que par lui creez
1115 Fu tout le monde.

PREMIER PRESTRE

Tais toy. Que Mahon te confonde !
Saches se l'emperiére estoie
En tel lieu mettre te feroie
Que ne verroies piez ne mains
1120 De cest an, soies en certains,
Tant as tu dit.

DEUXIESME PRESTRE

Mais celui doit estre maudit
 Qui les hommes ainsi bestourne
 Qu'a croire en un Dieu les atourne,
 Qui tant par ce monde courut 1125
 Qu'avecques deux larrons morut.
 A cestui doit on courir seure
 Qui noz diez het et deshonneure,
 Et l'a mort mettre.

MAISTRE MORIN

Par Mahom, vous dites voir, maistre, 1130
 Et se le fait m'appartenoit
 Sanz mort de ci ne partiroit :
 Car par sa science nouvelle
 Pourra faire la gent rebelle
 258 b Contre vous, sire. 1135

L'EMPEREUR

Panthaleon, bien oy dire
 As du viel Antime comment
 Il a souffert paine et tourment
 Pour ce Jhesu qu'il tant prisoit
 Et pour noz diex qu'il desprisoit, 1140
 Et si n'a gaires ?

PANTHALEON

Je scé bien que par moult de paires
 De tourmens, sire, il a passé,
 Mais ne l'avez pas tant lassé
 Que l'aiez peu vaincre, non ; 1145
 Et se tel viellart pour le non
 Dieu a voulu tant soustenir,
 Je qui sui jeune et a venir
 Encore doy je miex souffrir
 Et moy a plus grant peine offrir 1150
 Pour avoir plus noble victoire
 Et pour couronné avoir de gloire
 Avec Antime.

L'EMPEREUR

Par le Dieu que j'aour hautime,
 1155 C'est Baal, n'en aras ja mains.
 Avant : mettez a li les mains.
 Se de moy servir estes liez,
 Yci tout nu le despoulliez
 Et le liez a celle estache
 1160 De cordes aussi c'une vache,
 Et a brandons de feu ardans
 Li ardez et costez et flans
 Jusqu'a l'entraille.

SECOND SERGENT

Si ferons nous, sire, sanz faille.
 1165 Compains, puis qu'a ce faire vient,
 Avant : despoullier le convient
 Premièrement.

PREMIER SERGENT

Or nous en delivrons briément.
 Sa, ce chaperon sanz riote.
 1170 Or avant : et surcot et cote
 Fault despoullier.

258 c

DEUXIESME SERGENT

C'est fait; ja en ferons moullier
 De vin noz pances.

PREMIER SERGENT

J'ay bien pensé ce que tu penses :
 1175 Ce ferons mon certainement.
 Or nous fault aviser comment
 Le lierons.

DEUXIESME SERGENT

Fagot, bien nous en chevrons.
 D'une corde par la poitrine
 1180 Et d'une autre par my l'eschine
 Sera lié a ceste estache,
 Et afin qu'il ne se destache
 Lui lierons les mains en croiz

Par derrière, se tu m'en croiz,
Et les piez a l'estache aussi. 1185
Tien, boute ceste corde cy
Dessous s'essaille.

PREMIER SERGENT

Je vois bien, il l'ara tost belle.
Tu veulz que je les noe ensemble :
Sont il bien noez? que t'en semble? 1190
Regardes cy.

DEUXIESME SERGENT

Si est cestui, ce croy j', aussi,
Car les reins comprennent et les mains.
Or ne fault fors, mais c'est du mains,
Lier dessous. 1195

PREMIER SERGENT

Tu as dit voir, mon ami doulx.
Tantdis conme g'iray au feu,
Delivres t'en; fays y un neu
De celle corde.

DEUXIESME SERGENT

Il me plaist. Va, je le t'acorde : 1200
Or t'en avance.

DIEU

Mére, j'ay d'aler desirance
A Panthaleon mon ami
Que je voy la lié par my
258 d Le corps, pour grief tourment porter. 1205
Avec moy, pour li deporter,
Venez, et vous, anges, aussi.
Or sus, descendez jus de cy
Ysnellement.

PREMIER ANGE

Vray Dieu, vostre conmandement 1210
Acomplirons.

DEUXIESME ANGE

Voire, et en alant chanterons
De cuer joieux.

PREMIER ANGE

Prenons ensemble entre nous deux :

1215 En ce ne pouons meffaire.

RONDEL

Dieu poissans, roy debonnaire,
Eureuse est la personne
Qu'a mort pour vous s'abandonne;
S'on li fait peine en corps traire
1220 Et nient moins s'amour vous donne,
Dieu poissant, roy debonnaire,
Eureuse est la personne;
Car il en a pour salaire
De beneurté couronne
1225 Ou gloire sanz fin foisonne.
Dieu poissant, roy debonnaire
Eureuse est la personne
Qu'a mort pour vous s'abandonne.

PREMIER SERGENT

1230 Sa, je reviens. Ains qu'il soit nonne,
Maistre, vous ferons escumer.
Ces brandons nous fault alumer
Sanz plus attendre.

DEUXIESME SERGENT

Tu dis voir, et aus costez tendre
De ce chetif.

PANTHALEON

1235 Jhesu, Jhesu, filz Dieu le vif,
Pour toy sui mis en sacrefice.
Or m'otroies le benefice
Du don de force.

PREMIER SERGENT

Compains, qu'est ce cy? plus m'efforce
 A mon brandon cler faire ardoir 1240
 Et plus destaint. A dire voir,
 259 a Trop m'en merveil.

DEUXIESME SERGENT

Autel dire du mien te vueil :
 Vez la, ne le puis plus tenir.
 Ma main sens morte devenir : 1245
 Perdue l'ay.

PREMIER SERGENT

Après toy n'ay pas long delay.
 Les moies deus sens si mal estre
 Qu'i me semble que goute flestre
 Les me menjusse. 1250

L'EMPEREUR

Comment ! seigneurs, se je loing fusse,
 Vous le laissiez tost en pais!
 Ferez vous autre chose huy mais
 De voz brandons?

DEUXIESME SERGENT

Sire, les mains perdu avons : 1255
 Enchanté sommes.

L'EMPEREUR

Conseilliez moy entre vous hommes
 Que je feray.

LE PREMIER PRESTRE

Sire, bien vous conseilleray :
 Il ne fault mie qu'i recuevre ; 1260
 Nous trois metterons mains en euvre :
 Vezla une grande chaudière :
 Nous l'asserrons en tel manière
 Qu'il ara bon feu tout entour ;
 La ferons mourir sanz retour 1265
 Panthaleon a grief tourment
 Par boullir dedans longuement,

Se vous voulez.

L'EMPEREUR

1270 Il me plaist, seigneurs. Or alez,
Delivrez vous.

DEUXIESME PRESTRE

Mon chier seigneur, chascun de nous
Est prest de faire vostre vueil.
Certes embesongnier m'y vueil
Tresvoulentiers.

MAISTRE MORIN

1275 Alons, et je feray le tiers
De cuer aussi.

259 b

PREMIER PRESTRE

1280 Or ça : ceste chaudière ci
Fault asseoir en ceste place.
Ho! bien est : ne fault fors c'on face
Que ce maleureux soit dedans,
Envers, en seant ou adans,
N'en chaut lequel.

DEUXIESME PRESTRE

1285 Aler deslier de ce pel
Le convient et amener ci.
G'i vois; or y venez aussi,
Maistre Morin.

MAISTRE MORIN

1290 Voulentiers, ami, de cuer fin.
Desliez le hault et je bas.
Panthaleon, mal te meslas
D'ame garir.

DEUXIESME PRESTRE

Voire, quant le convient morir
A telle paine.

MAISTRE MORIN

1295 Avant ce que l'en plus te paine,
Laisse les cures, c'est ton miex,
Et sacrefies a noz diex,

Si feras sens.

PANTHALEON

Par foy, ce n'est pas mes assens
Que pour nul ci n'en autre lieu
Je croie ni aoure dieu
Que Jhesu Crist.

1300

DEUXIESME SERGENT

Alons men : il est tout escript
Que devons faire.

PREMIER PRESTRE

Seigneurs, abreignons nostre affaire :
Puis qu'il a noz diex en despit,
Faisons le mourir. Sanz respit
Soit icy mis.

1305

259 c

PANTHALEON

Jhesu, vray dieux et vrais amis,
Ton confort m'envoie et t'aide
De ce tourment, car j'ay grant hide
Selon ma sensualité
Et la povre fragilité
De ma charongne.

1310

DIEU

Ne doubttes, non, que je t'eslongne,
Panthaleon; près sui de toy.
Aies bonne fiance en moy.
Entres en la chaudière a plain
Et je te tenray par la main,
Et verras que pour toy feray
Et combien ami te seray.

1315

Va com hardis.

1320

PANTHALEON

Ha! doulx Jhesus, s'acouardiz
Ay esté, pardonnez le moy.
Seigneurs, trop esbahiz vous voy
Quant ne m'osez la paine offrir
Que pour mon Dieu vueil bien souffrir

1325

Et endurer

L'EMPEREUR

Seigneurs, trop le laissez durer :
N'est pas bien fait.

MAISTRE MORIN

1330 Avant : touz ensemble de fait
Cy dedans tantost le jettons.
Il y est : au feu nous mettons
Bon faire et grant.

DEUXIESME PRESTRE

Sachiez j'en ay le cuer engrant,
Par Mahonmet.

DIEU

1335 Gabriel, vas : je te conmet
A ce feu destaindre qu'il font.
Je vueil contre ce qu'il meffont
Un po monstre de ma puissance
1340 Pour croistre amour et esperance
En mes amis.

GABRIEL

259 d

Sire, a nient sera tost mis,
Quant le voulez.

PREMIER PRESTRE

Egar ! le feu s'en est volez
Soudainement ; n'en y a goute.
1345 Il a joué, seigneurs, sanz doubte
D'enchantement.

MAISTRE MORIN

Je me muir, seigneurs, vraiment :
Le cuer me fault.

DEUXIESME PRESTRE

1350 Bonnes gens, venez a l'assault.
Le dieu Panthaleon ou chief
M'a feru, dont j'ay tel meschief
Que je me muir.

PREMIER PRESTRE

Haro ! l'en m'esrache le cuir
 Par tout le corps. Las ! que feray ?
 Yci d'angoisse enrageray. 1355
 C'est fait, c'est fait.

DIEU

Panthaleon, pour toy de fait
 Ay voulu ces gens mettre a fin.
 Se tu m'as amé de cuer fin,
 Encore m'aimes. 1360

NOSTRE DAME

Amis, qui mon filz ton dieu clames,
 Saches com tu plus l'amerass
 Et com plus pour lui soufferrass,
 Tant serass plus beneurez
 Et des anges plus honnorez 1365
 Lassus en gloire.

DIEU

Elle te dit parole voire.
 Ici te lais, es cieulx m'en vois.
 Alez devant a haulte vois
 Vous deux chantant. 1370

MICHIEL

Gabriel, disons or avant
 Au miex que le sarons faire.

260 a

RONDEL

Car il en a pour salaire
 De beneurté couronne
 Ou gloire sanz fin foisonne. 1375

L'EMPEREUR

Ha ! mauvaise et fausse personne,
 Is, hors, is de celle chaudière.
 Qui te meut en telle manière
 Que tu as ci ocis ces gens
 Et les autres faiz negligens 1380
 De servir aux diex et separez,

Et de ne scé quel Dieu te pares

Et fais monneste ?

PANTHALEON

Je te dy bien dit le prophéte,
 1385 Qui dit des mauvais qu'a ce chéent
 Que leurs maux sur leurs chiés leur chéent,
 Et il dit voir.

L'EMPERÉRE

Puis qu'ainsi est, fay me savoir
 Qui t'a si bien endottriné,
 1390 Je t'en pri, et si obstiné
 En ta science.

PANTHALEON

Un saint homme de conscience
 Qui nommez est Hermolaus.
 Il est tel que je croy n'est nulz
 1395 Meilleur de lui.

L'EMPEREUR

S'il peut estre que parle a lui,
 Je te pri fais tant que ci viengne,
 Et que m'endottrine et enseigne
 Com toy a fait.

PANTHALEON

Venir le vous feray de fait
 Et bien brief, sire.

PREMIER SERGENT

Mon seigneur, nous vous venons dire
 Que noz mains nous sont revenues
 Que nous jugions avoir perdues
 1405 Oultrément.

DEUXIESME SERGENT

260 b

Il dit voir, sire, vraiment.
 Noz diex en soient aourez,
 Par qui en sommes restorez,
 C'est sanz doubance.

L'EMPEREUR

Seigneurs, tost verrez bonne enfance : 1410
 Panthaleon m'est alé querre
 Celui par qui ainsi meserre.
 Il cuide que croire le doie,
 Mais il n'en est pas a deux doie.
 Laissez venir. 1415

PREMIER SERGENT

S'en mes mains peut jamais venir,
 Certes je li venderay chier
 Ce que les mains m'a fait sechier
 Et amortir.

DIEU

Mére, de ci nous fault partir. 1420
 Aler vueil a Hermolaus.
 Vous venrez avecques moy sus,
 Car il me plaist.

NOSTRE DAME

Mon Dieu, chier filz, voire sanz plaît.
 Entre vous, anges, descendez 1425
 Et a bien chanter entendez
 Nous convoiant.

GABRIEL

Nous le ferons de cuer joiant,
 Dame de gloire.

MICHIEL

Gabriel, c'est bien chose voire. 1430
 Sus : disons a chant hautain.

RONDEL

Esjois toy, cuer humain,
 A qui Dieu sa mère amaine :
 Par amour t'ont pris en main.
 Esjois toy, cuer humain, 1435
 En eulz loent soir et main

Non pas de loenge humaine :
 Esjois toy, cuer humain,
 A qui Diex sa mère amaine. 260 c

DIEU

1440 Hermolaus, tien de certain
 Pour ce qu'amé m'as de cuer fin,
 Le temps approuche de ta fin.
 Ce te fas je savoir. Mais quoy ?
 Soies perseverans en foy
 1445 Et si grant merite acquerras
 Qu'en gloire couronne en aras
 De vray martir.

HERMOLAUS

Ha ! sire Diex, a mon partir
 Ton saint et bon ange m'envoie,
 1450 Qui me conduie et mette en voie
 De vray repos.

NOSTRE DAME

Persevère en ton bon propos,
 Et tu a ce ne fauldras pas,
 Chier filz. Ralons nous ent le pas,
 1455 Anges, or tost : alez devant
 Et chantez d'accort. Or avant,
 Sanz plus cy estre.

GABRIEL

Dame de la gloire celestre,
 Nous ferons vostre voulenté.
 1460 Michiel, de nous deux parchanté
 Soit nostre rondel a plain.

RONDEL

En eulz louent soir et main
 Non pas de loenge humaine.
 Esjois toy, cuer humain
 1465 A qui Diex sa mère amaine.

PANTHALEON

Père, c'est bien chose certaine,
L'emperière par moy vous mande,
Car il a voulenté trop grande
De veoir vous.

HERMOLAUS

Panthaleon, biau filz doulx, 1470
Si yray sanz contredit.
C'est voir ce que hui m'a dit
Jhesu Crist que mon temps vient.

260 d

Puis qu'aler m'y esconvient,
Alons bon pas. 1475

PANTHALEON

Sire, vezci, n'en doubtez pas,
Le bon preudomme.

L'EMPERÉRE

Dy, demeures tu seul, bon homme?
Ne me mens mie.

HERMOLAUS

Sire, nanil, j'ay compaignie 1480
De deux frères, je vous dy bien,
Preudommes qui sont crestien,
Dont l'un Ypocrates a nom,
L'autre Herippé, et ont renom
De grant bonté. 1485

L'EMPERÉRE

De les veoir ay voulenté.
Alez les querre.

PREMIER SERGENT

Sire, pour vostre grace aquerre
Je les vous vois faire venir.

Seigneurs, sanz vous plus ci tenir, 1490
Venez vous ent a l'empereur.
Ne vous en pouez a honneur
Mie excuser.

HERIPPÉ

1495 Non ferons nous. Sanz ci muser,
Frère, alons ment.

YPOCRATES

Alons : si doubt je vraiment
Que jamais ci ne retournons.
Je lo qu'un po ci sejourbons
Pour Dieu prier.

HERIPPÉ

1500 Aussi fas j'. Amis, detrier
Nous souffrez un petit icy,
Mon frère et moy et vous aussi,
Par fine amour.

PREMIER SERGENT

1505 Mais que ne faciez long demour,
Bien m'i consens.

YPOCRATES

Nanil, ce ne seroit pas sens.
Doulx Jhesu Crist, se pour ta foy
Nous convient souffrir, je te proy
Qu'en t'amour nous tiengnes si fors,
1510 Quelques paines qu'aient les corps,
Que pour paine ne pour martire
C'on nous face, ne perdons, sire,
Ta vision.

261 a

HERIPPÉ

1515 Sire, qui par provision
D'infinie amour et bonté
As volu prendre humanité
Et toi Dieu et homme moustrer
Et mort as mort par mort oultrer,
Sire, plaise toy quant venrons
1520 Devant l'emperere et serons
Mis a raison que par toy voient
Tel signe avenir qu'il te croient
Seul vray Dieu estre.

PREMIER SERGENT

Seigneurs, vous pouez bien trop mettre
 A faire voz affliccions, 1525
 Et si ne sont qu'inlusions :
 Vous moquez vous ?

YPOCRATES

Ha ! chier sire, pardonnez nous
 S'un petit demouré avons.
 Sus, biau frère, si en alons : 1530
 Yl en est temps.

HERIPPÉ

Biau frère, alons, bien vous entens,
 Ou nom de Dieu.

L'EMPEREUR

Regardez, si tost com ce lieu
 Ces anchanteurs approuchié ont, 1535
 Les diex tant courrouciez s'en sont
 Que la terre ay senti trembler
 Et feu par l'air ont fait voler.
 (Icy trebucheront les ydoles.)
 Ç'avez veu ?

PANTHALEON

Emperière, trop deceu 1540
 Vous voy se voz dieux ont ce fait
 Que vous dites : pour quoy de fait
 261 b Se sont il si vilment laissié
 Trebuchier que tout sont froissié ?
 Vous les veés. 1545

L'EMPEREUR

Tu es uns ennemis desvez ;
 Et sachez je ne mengeray
 Tant que de toy vengié seray.
 Ou tu noz diex aoureras
 Ou tu vilainement mourras : 1550
 Pren l'un des deux.

PANTHALEON

Par foy, ce seroit mal et deulz
 Que j'aoure telz diex ne croye
 Qui ne sont que fust ou que croye
 1555 Et que mon bon Dieu deguerpisse.
 Je n'ay mie le cuer si nice
 Que je le face.

L'EMPEREUR

Avant, seigneurs; en celle place
 Les menez ensemble touz quatre
 1560 Liez, qu'il ne puissent combatre
 Ne vous en riens point occuper.
 De ces trois les testes coper
 Premièrement ainsi le vueil,
 Si que cestui le voie a l'ueil;
 1565 Et si ne se veult convertir,
 Si soit ainsi conme eulz martir :
 C'est ma sentence.

DEUXIESME SERGENT

Mon seigneur, ja n'ara en ce
 Deffault que dites.

PREMIER SERGENT

1570 Tu diz voir, nous en morrons quittes
 Assez briément.

DEUXIESME SERGENT

Les mains yci premièrement,
 Fagot compains, leur lierons,
 Et puis si les en enmenrons
 1575 Touz mettre a mort.

PREMIER SERGENT

Tu diz bien, et je m'y accort.
 Or les lie, et tandis g'iray
 Crier c'on viengne sanz delay
 Veoir la justice d'eulx quatre.
 1580 Or escoutez sanz plus debate :
 De par mon seigneur l'emperiére,

Vous conmans en ceste manière :
 Ne laissez pour un ne pour el
 Que pour chascun homme un ostel
 Ne viegne tost a la justice : 1585
 Qui n'y venra fera que nice,
 Soit en certains.

DEUXIESME SERGENT

Regarde. Ont il lié les mains
 Estroittement ?

PREMIER SERGENT

Oil voir. Avant, alons ment : 1590
 Passez, merdaille.

LE CONTRAIT

Il m'ennuie qu'il fault que j'aille
 A la justice maintenant,
 Et s'avoie ailleurs convenant
 Ou je faudray. 1595

SADOTH LE COURBE

Cy endroit plus ne me tendray,
 Je m'en vois veoir la justice,
 Que ne soie tenu pour nyce
 Et negligent.

DEUXIESME SERGENT

Or ça, maleureuse gent, 1600
 Qui tant en Jhesu vous fiez,
 S'a noz diex ne sacrefiez,
 Les testes vous copperay cy.
 Ja n'en avez autre mercy,
 Par ceste teste. 1605

HERMOLAUS

Biaus amis, de ce dire tais te,
 Car tu gastes quanque tu diz.
 Ne perderons pas paradiz
 Pour tes falourdes.

DEUXIESME SERGENT

1610 Puis que vous les tenez a bourdes,
 Pensez de vous agenoiller;
 Vous avez cela le premier.
 Et toy, sacrefieras tu
 A noz diex, ou que feras tu?
 1615 Respons me brief.

261 d

YPOCRATES

J'ay plus chier a avoir le chief
 Yci coupé en ceste place
 Qu'envers Jhesus tant me mefface
 Que le renie.

DEUXIESME SERGENT

1620 Puis qu'estre veulz de sa mesnie,
 Besse toy; tien, pren ce lopin.
 Et toy, veulz tu a Apolin
 Sacrifier?

HERIPPÉ

1625 Ce n'est pas chose en quoy fier
 On se doie, amis, nullement,
 Mais Jhesu Crist tant seulement
 Doit on com Dieu magnifier
 Et a li seul sacrifier.
 A lui seul, a lui sacriffi,
 1630 De touz voz autres diex di fi :
 Ce n'est que songe.

DEUXIESME SERGENT

Chier comparras ceste mençonge.
 L'as tu dit? agenoille toy.
 Tien, or demeure la tout coy;
 1635 Pren celle prune.

PREMIER SERGENT

Panthaleon, il n'y a qu'une.
 Vous veez la fin de ces corps :
 Autel avez, ce vous recors,
 Ou vous aourerez noz diex.

Ne scé se vous amerez miex
Morir que vivre. 1640

PANTHALEON

Amis, par ceste mort delivre
Seray de la mort pardurable;
Pour ce l'ay je bien agreable,
Et bien me plaist. 1645

PREMIER SERGENT

Je ne vous en tenray plus plait.
Baissiez vous et tendez le col.
262 a Qu'est ce cy? Ay je espée a fol?
Estre souloit la miex tranchant
Qui fust de cy jusqu'a Larchant, 1650
Et au ferir s'est si pliée
Com se fust de cire gommée,
Ne plus ne mains.

DEUXIESME SERGENT

Ha! sire doulx, a jointes mains
Vous requier, ce don nous donnez 1655
Que vostre mort nous pardonnez,
Car je congnois bien par ce signe
Que vous estes un homme digne
Et plain de bien.

PANTHALEON

Biaux seigneurs, je vous di combien 1660
Que vous me vueillez a mort mettre,
S'a mon Dieu ne plaist et mon maistre,
De riens ne me pouez grever ;
Mais pour voz cuers plus eslever
A lui amer et li congnoistre 1665
Et voz entendemens accroistre
Vous a il fait ce signe ci.
Sire, par la vostre mercy,
Secourez m'ame a ce besoing.
Biaux seigneurs, ma mort vous pardoing 1670
Puis que me requerez pardon :

Faites de moy tout a bandon
Vostre plaisir.

PREMIER SERGENT

1675 Puis qu'avez la mort en desir
Et que vous la nous pardonnez,
Faire nous fault que vous finez
Yci de fait.

DEUXIESME SERGENT

1680 Alons men, puis que tu as fait.
Sire, ces gens sont decolez.
Dites nous des corps que voulez
Que l'en en face.

L'EMPEREUR

1685 Laissez les la en celle place
Aus bestes et aus chiens rungier.
Sans plus ci estre alons mengier,
Passez devant. 262 b

PREMIER SERGENT

Faites voie ci. Or avant
Ligiérement.

DIEU

1690 Anges, alez ysnellement
La jus et faites un recort
D'un rondel chanter par accort
Tandis que les gens entremettre
Verrez des corps en sauf lieu mettre
De ces quatre la mes amis,
Qui pour mon nom sont a mort mis;
1695 Et le chantez si doucement
Que ces gens esjoissement
Y prengnent et miex congnoissance
D'avoir a moi ferme creance.
Or tost, alez.

ANGES

Si ferons nous quant le voulez : 1700
C'est bien raison.

LE CONTRAIT

Sadoth, vezci sanz mesprison
Gens mis a fin.

SADOTH

Vous dites voir, Mondot voisin.
Il me font au cuer grant pitié, 1705
Au moins cestuy pour l'amistié
Et la grace qu'en moy hier mist,
Car courbe estoie et il me fist
Ainsi droit estre.

LE CONTRAIT

Faisons le bien Alons les mettre
Et mucier ci en cest destour; 1710
Et quant ja failli sera jour
Ou que soit les enterrerons,
Et je cuide que nous ferons
Nostre deu.

SADOTH

Le volez vous? ja recreu 1715
Ne m'en verrez : sus, sanz mot dire.
Or allez devant, allez, sire :
Delivrez vous.

262 c

MICHIEL

Gabriel, disons, ami dous,
Ce rondel, bel est d'acors. 1720

RONDEL

Diex puissans misericors
Par vostre misericorde
Amours les pecheurs racorde
A vous, si a dous accors,
Diex puissans misericors; 1725
Et avec ce le recors
De voz graces c'on recorde

370

MIRACLE DE SAINT PANTHALEON

XXII

Plusieurs a bien faire encorde.
Dieux puissans misericors,
1730 Par vostre misericorde
Amour les pecheurs recorde.
Explicit.

T A B L E

	Pages.
XVII. — Miracle de un paroissian esconmenié.....	1
XVIII. — Miracle de Theodore.....	67
<i>Serventois</i>	129
<i>Autre serventois</i>	131
XIX. — Miracle de un chanoine qui se maria..	135
<i>Serventois</i>	183
<i>Autre serventois</i> ..	185
XX. — Miracle de saint Sevestre..	187
<i>Serventoys couronné</i>	237
<i>Serventoys estrivé</i>	239
XXI. — Miracle de Barlaam et Josaphat.....	241
<i>Serventois</i>	300
<i>Autre serventois</i>	302
XXII. — Miracle de saint Panthaleon.....	305



